

A romantic scene featuring a couple in silhouette. A man in a suit is holding a large, textured red heart on a stick. The background is a soft, warm glow, possibly from a sunset or city lights. The overall mood is intimate and affectionate.

أنا أنت

أنا أنت
أنا أنت
أنا أنت
أنا أنت

أنا أنتِ

ل

سلمي طارق

جميع الحقوق محفوظة © عصير الكتب للنشر الإلكتروني

<http://book-juice.com>

أنا أنتِ

المؤلفة : سلمى طارق

نشر في : نوفمبر 2015

تنسيق داخلي : عصير الكتب للنشر الإلكتروني



الكلمة الوحيدة اللى أقدر أقولها عن الرواية " عندما يكون للحب معناً
آخرأ "

رحلة ممتعة بين صفحات الرواية ~

أنا إنتِ

ظلت تبحث بعينها عنه وسط الحاضرين ، لا تعلم لمَ لم يظهر إلى الآن؟ .. ظلت تراقب مدخل القاعة بانتظار ظهوره .. وبينما هي تحديق بالمدخل إذا بيده تحيطها من خلفها ممسكةً بيدها .. فالتفت بفرع ولكن سرعان ما ابتسمت وسبقته عيناها وفاضت بما يحمله قلبها من مشاعر قبل أن ينطق لسانها ، فنظر لها بابتسامة حانية أرضت مشاعرها وقال بعد أن إنحنى على ركبته وسط نظرات كل من بالقاعة : بحبك يامنار

ابتسمت عيناها قبل شفيتها ونظرت للأرض بخجل فأخرج علبه من جيبه وفتحها كأبطال السينما وألبسها الخاتم المتألي مع الأضواء وقال بصوت حنون : تتجوزيني ؟

تهتدت بسعادة ممزوجة بخجل وسط نظرات الجميع منتظرين الرد القاطع منها ، قالت بخجل : بحبك يا مجنون

نهض من إنحنائه وسط تصفيق الحضور حتى العروسين وضمها إلى صدره ورفعها وأخذ يدور بها وسط أنغام الأغنية التي تعشقها والتي أعدها خصيصاً لها بالاتفاق مع منسق الأغاني بالقاعة

ظل يدور بها وهي لا تصدق ما يحدث معها ، وفجأة فتحت عيناها على صوت والدتها المدوى الذي يصيح من خارج غرفتها : إصحى بقى يامنار ، كل يوم هتنامى لحد العصر ولا إيه؟!!

زفرت بملل وقالت لنفسها بضيق : يوووه بقى كل يوم نفس الموال ، الله يحرق الدروس اللي بتصحينا بدرى فى رمضان دى

نهضت من الفراش بتكاسل وأخذت تتمايل بسعادة بعد أن تذكرت حلم الأمس والتي كانت فيه بين يدي حبيبها .. مدت يدها تحت الوسادة وأخرجت هاتفها وخلال أقل من دقيقة كانت تراجع آخر محادثة دارت بينهم ، وأخذت تتأمل كلماته التي لا تخبرها أبداً بحقيقة مشاعره .. هل يحبها كما تحبه أم لا ؟

إهتز هاتفها معلنا وصول رسالة منه

-صباح الفل يا جميل

ردت بسعادة : صباح النور يا عمر عامل إيه ؟

كتب : صايم وإننى ؟

ردت بسعادة : صايمة برضه

كتب بسرعة : أنا لازم أقفل معلش .. إعملى حسابك بقى إننا هنفطر معاكوا إنهاردة معرفش عمتو قالتلك ولا إيه ؟
كتبت وهى تكاد تطير من الفرحة : تنوروا يا عمر .. أنا عندي درس هيخلص قبل المغرب ، هقلبه وأجليكم
علطووووول

-ماشي ياسطى نتقابل على خير.. خلى بالك من نفسك..سلام

"بحبها يارامى وبحلم بيها ومش عارف أعمل إيه ؟!"

قالها حازم ذلك الشاب طويل القامة خمري البشرة أسود الشعر لصديقه رامى وهما بانتظار قدوم المدرس ليعطيها
الدرس ب"السنتر" .. ارتفع صوت رامى وهو يضحك بشدة وقال بسخرية : والله صعبت عليا يلا يا حازم وشكلى
هعيط

قال حازم بضيق : الحق عليا أصلا إني بحكى لجزمة زيك !! ..

رد رامى وهو لا يزال يضحك : أهو الجزمة دا مظبط ومسيطر مش زيك ! .. آخرك تروح تقولها إشرحيلى المعادلة
دى ، أنهى عبارته وأخذ يضحك بشدة .. فقال حازم بحزن : طب أعمل إيه يعنى ؟ .. فيدنى ياخيرة !

رد رامى بغرور : لأ يا عم دا سر المهنة ! .. بس اللي أقدر أقولهولك إنك تروح تكلمها .. وأدى دقنى إن عبرت
أهلك

ثم عاد يضحك ولكن حازم لم يبالي له لأن نظره وقع على منار التى دلفت للتو لداخل "السنتر" .. اقترب منها
وقال ببسمة هادئة : إزيك يا منار ؟ إيه أخبار المذاكرة ؟

ردت بهدوء : تمام يا حازم الحمد لله .. وإنت إيه أخبار الكيمياء معاك ؟

-أهى ماشية .. بس كنت عايزك تفهمينى معادلة لو مش هتقل عليكى يعنى

ردت بابتسامتها الهادئة : مش هتقل عليا ولا حاجه يا حازم .. دا إحنا صحاب وإخوات من زمان فمفيش بينا الكلام

دا

ثم بدأت تشرح له المعادلة التى يفهمها بالفعل ولكنه يتحجج بها كى يحدثها ..وعندما أنهتها شكرها وتركها عائداً
لرامى بخيبة أمل لأنه لم يظفر منها سوى بتلك البسمة الهادئة التى لا تكن أى مشاعر خلفها .. وشرح لمعادلة
كيميا أخرى !

رن هاتفها بعد ترك حازم لها بلحظات فأجابت وقالت بعد السلام بشوق : وحشتينى أووى يا هدير .. ليه سبتينى
لوحدى!

ردت هدير وقد تحركت الدموع بعينها : معلىش يامنار أعمل إيه ؟ .. بابا كان مصمم إننا ننقل بعد ما ماما ماتت

-الله يرحمها .. المهم إيه أخبار الثانوية العامة ؟ .. بيقولوا بتمطر فى أدبى

ضحكت هدير وقالت : الجو حار معدل صيفاً .. عبيط أهبل شتاءً .. وإيه أخبار علمى ؟

-بيسلم عليكى .. المهم بقى أنا لازم أقفل عشان عندى درس

ردت ببسمة : موشي .. نبقى نتكلم بليل وتحكيلى نفذتى اللى اتقنا عليه ولا لأ ؟ (قالتها بشئ من التواعد المتصنع)

ابتلعت ريقها بصعوبة وقالت بتوتر : طبعاً يابنتى حاضر إن شاء الله يلا سلام بقى ..

-لا إله إلا الله

-محمد رسول الله

قال بابتسامة : إن شاء الله مش هتعتل ولا حاجه

-إنت طالع جدع يانور زى بابا الله يرحمه

تنهد وقال : الله يرحمه ..

عادت منار بلفهة إلى منزلهم ولكنها لم تجد خالها وعمر .. فسألت والدتها بتعجب : هو مش خالوا كان جاى
إنهارة؟!

ردت الأم بحزن : عمر ياعيني وقع جامد فى الشارع ومقدرووش يجوا !

جلست منار تفطر مع والديها ولما أنهت الفطور .. دلفت الى غرفتها وفتحت حسابها على هاتفها وأرسلت لعمر :
سلامتك ألف سلامة يا عمر .. أنا زعلت جدا والله .. وخذ بالك من نفسك بعد كدا !!

بعد أن فطر حازم مع والدته وأخته دخل غرفته وأغلق على نفسه وارتمى على الفراش وأخذ يحدق بالسقف وعقله
يفكر بها .. لا يعلم ماذا عليه أن يفعل لتجبه كما يحبها ؟ .. لا يعلم كيف حتى يخبرها بحبه ؟! ..

تنهد بضيق وأغمض عينيه بحزن وأخذ يتذكر تلك الكلمات القاسية التي أسمعته رامى إياها فى عودتهم من الدرس ..
أخذ يفكر كيف هو بالفعل " قفل " .. "ومش مسيطر وحنين بالعبيط " كما نعتته رامى .. ولذا لن تنظر منار أبداً له !!
.. إنه يحبها ذلك الحب البرئ الطفولى الذى لازم قلبه منذ الابتدائية ولم يفارقه إلى الآن !

غرق حازم فى أحزانه حتى غلبه النعاس .. واستيقظ فى الحادية عشر مساءً ارتدى ملابسه وغادر ليلحق بأصحابه فى الساحة حيث يلعبون حتى بلوغ الفجر ثم يعود كل منهم إلى بيته ينام حتى اليوم التالى ..

حين رآه رامى إبتسم وإقترب منه وقال بحزن : أنا آسف يا حازم على الكلام اللى قولتهولك واحنا مروحين من الدرس ! .. بس والله أنا نفسي تبطل تحب منار دى لأن عمرك ماhtوصل لقلبها أبداً !

قال حازم بضيق : خلاص يارامى مش لازم تسمعنى نفس الكلمتين بتوع الصبح !!

قال رامى بجدية : والله مقصدش أضايقك يا حازم .. بس بجد مش عايزاك تتعلق على الفاضى !

قال حازم بنفاد صبر : خلاص انا بقي يارامى !!!! خلصنا !! ولو أنا صعبان عليك أوى كدا فميصعبش عليك غالى !!

قال رامى بجدية : حازم! .. منار بتحب ابن خالها ! ..

ارتبك حازم وقال كأنما يود ألا يصدقه : وإنت إيش عرفك ؟

-سمية البت بتاعتى .. صاحبة منار الروح بالروح وإنت عارف كدا ، أنا جرجرتها فى الكلام وهى زى الهيلة فتنت على صحبتها

زفر حازم بضيق وقال وهو يشتعل : خلاص قفل السيرة الزفت دى بقى !! .. مش عايز أسمع تانى !! .. وخلينا نلعب أحسن

جلست منار تفكر بعمر .. لم لم يرد إلى الآن ؟! .. هل رأى الرسالة أم لا ؟..هل رآها ولم يبالي بأن يرد ! .. لم يعاملها هكذا ؟! .. ألا يبادلها نفس الشعور ؟! .. أم أنها مجرد تسلية مجانية جاءت تحت قدماه ! .. هل يراها كما ترى هى باقى الفتيات التى لاتحترمنهن لأنهن على علاقة هاتفية بأولاد ! .. هل هى مثلهن فى نظره ؟! ... بالطبع لا

! .. هي تحادثه بحدود ولا يتعدى كلامهما "الفيس بوك" .. وحين تقابله تشعر بالخجل فلا يتحدثان إلا قليلاً !
.. بالطبع هي ليست رخيصة كباقي الفتيات على الأقل هي لم تصرح له بحبها إلى الآن رغم أنها تحبه منذ قديم
الزمان .. تحبه ذلك الحب البرئ الذي منذ نعومة الأظفار .. الحب الذي فُطر عليه كل إنسان .. ولا يشوب هذا
الحب أى معكر .. سوى أنها لا تعرفه شعوره نحوها !!

وهكذا أقنعت منار نفسها بأنها ليست مخطئة أو على الأقل أرضت نفسها إرضاء مؤقت .. كما تفعل كل ليلة لكي
تستطيع أن تنام وضميرها قد أُوهم بأنه "مرتاح"

ظلت تنظر لها تنفها كل حين وحين حتى اهتز أخيراً .. معلناً وصول رسالة منه

-الله يسلمك .. إيه رأيك هقع مخصوص كل يوم عشان أخضك عليا

كادت تقفز من مكانها حين قرأتها و كتبت بسعادة : ومين قالك انى اتخضيت اصلا !! .. دا انا اترعبت !

كتب وهو يبتسم : ليه ؟

كتبت بعدم فهم : هو إيه اللي ليه ؟

-إتخضيتي ليه يعنى ؟

رفعت حاجبها وقالت فى نفسها .. "ماشي ياسى عمر والله لأزاولك"

وكتبت : مانت عارف ياعمر ويتستهيل !

كتب ببسمة : عارف ! .. عارف إيه ؟

- إنت عارف انا اتخضيت ليه

كتب ببسمة : ليه بقى ياترى ؟

-معرفش ياخويا إنت أدرى

رد : هى بقت كدا يامنار؟؟

كتبت بابتسامة : آه بقت كدا ياسطى

ابتسم وقرر أن يخرج منتصراً من المحادثة وكتب : ماشي براحتك .. كنت عايز أقولك على حاجة محيراني ومش عارف أعمل إيه !؟

كتبت بقلق : خير ؟

-هو خير إن شاء الله بس إوعدينى أنه هيبقى سر .. وعد ؟

كتبت وقلبها يخفق بشدة : وعد .. بس خير قلقلتنى !!؟

أخذ نفساً عميقاً وكتب:أنا بحب واحدة جارتنا من زمان ومش عارف أقولها !!

إتسعت عينها وفى لحظة أدمعت وتخبطت مشاعرها حتى كاد يُعشي عليها !! .. تأخرت قليلاً فى الرد وحاولت أن تُظهر ثبات إنفعالى غير موجود من الأساس وكتبت : ألف مبروك .. ربنا يتمم بخير

-مبرووك مين !!!!! بقولك مش عارف أقولها

تنهدت وقررت أن تضحى من أجل من تحب .. فسعادة المرء فى سعادة من يحب وإن كانت تلك السعادة سُبنى على الفراق بينهم .. كذلك سمعت ورأت فى الكثير من الأفلام ولكنها لم تكن تعلم أن الأمر قاسى لتلك الدرجة .. إنها تشعر بخنجر مسموم يخترق جسدها ويمزقها أشلاء !

كتبت : قوول لطنط .. أو لخالو

-قولت لماما وقالتهلى روح قولها !

-هو إنت بتحبها فعلاً ولا ناوى تتسلى بيها ؟

-بحبها .. بحبها .. والله العظيم بحبها .. وحتجوزها أول ما هخلص الكلية

-خلاص قولها ! .. وربنا يتمم بخير

كتب بسرعة : يعنى إنتى موافقة ؟

كنت وقد بدأت تفهم شيئاً فشيئاً

-موافقة على إيه ؟ .. إنك تقولها ؟ .. آه ياعم موافقه

-منا خلاص قولتلها .. أصل أنا بكلمها دلوقتى

كنت وهى تبسم لا إرادياً : هو إنت لحتت؟! .. عموماً مبروك ياسيدى ووصل سلامى ليها

-على فكرة أنا بكلمها هى بس دلوقتى .. هى بس !

كنت وهى تبسم بانتصار : لأ بتكلم إثنين ! .. أنا وهى

-لأ هى واحدة بس

-لأ اتنين .. أنا + هى = 2 .. عدت من الثانوية إزاي نفسى أعرف؟؟

-آه صح .. اتنين ايوا بكلم 2

كنت بسرعة " يعنى طلعتنا إثنين فى الآخر أهو !!

-أعمل إيه ما البعيدة مبتفهمش

- بتحب واحدة مبتفهمش !! .. طووويب .. عموماً سلملى عليها

-منار بتسلم عليكى يامنار

قالت بدهشة مصطنعة "إيه دا؟! .. هو إنت بتكلم جد!؟

-أيوا جد ! ..والله بحبك يامنار

-طيب !

-إيه اللي طيب .. مش هتقوليلي إنتي بتحبيني ولا إيه ؟

أخذت تفكر قليلاً ثم كتبت " طب وآخرة الحب دا إيه ؟

-جواز طبعاً ! ؟

-معلش يا عمر .. مقدرش أقولك حاجة زى كدا !

-ليه ؟

- عشان بابا بيتق فيا وأنا لازم أبقى قد الثقة دي

-مانا بحبك عشان إنتي محترمة

- موشي .. بس ينفع بقى تبطل تقولي بحبك دي ؟

-ليه ؟!

-عشان ميبقاش حرام

يابنتي أصلاً الحب مش حرام ! .. بس عشان احنا فى مجتمع متخلف بيقولوا إنه حرام !! .. صدقيني !

-طيب ماشي

-أنا لازم اقفل بقى دلوقتي .. نتكلم بكرة بقى إن شاء الله

-خلى بالك من نفسك ..سلام

أغلقت منار هاتفها بعد أن أغلق عمر واحتضنته بشدة وهي تنهد بسعادة .. أخذت تتراقص وتتمايل من السعادة
وركضت نحو الحمام وتوضأت وصلت العشاء التي كادت أن تضيعها وسجدت شكراً لله الذى رزقها حب عمر
وبعد أن أنهت صلاتها رن هاتفها معلنا اتصال هدير.. ردت وقد تلاشت ابتسامتها بعض الشيء : إزيك ياهدير ؟

-أنا كويسه .. هو دا اللي هنتكلم بليل؟؟

-معلش والله نسيت .. متزعليش

-أنا مبزعلش منك يا عبيطه اصلا .. المهم بقى عشان الرصيد .. اخبار اللي اتفقنا عليه إيه ؟

-كويس الحمد لله ..

-يعنى بطلتوا كلام؟؟

-بقينا بنتكلم خفيف يعنى .. بصراحه لأ ! .. لسه بنتكلم عادى بس فى حدود بينا ياهدير متخافيش أنا عارفه الصح
من الغلط !

-بس كلامكم دا غلط ! .. حتى لو بتقولى كلام عادى ! .. إنتى بتحببيه يعنى ممكن فى أى لحظة تضعفى وتقولى
الكلام الغلط!

-معرفش بقى ياهدير متعقديهاش .. دا أنا بتعب لما بنتكلم فى اليوم مرتين بس ، عايزانى إزاي مكلمووش خالص !!

-طب مش هقولك عشانى ولا عشانك .. عشان ربنا ؟ ..

-يووووه بقى ! .. معرفش بقى ياهدير وبعدين قولتلك مبنقولش كلام يغضب ربنا حتى هو قالى إنه بيحبنى وأنا
مقتلوش عشان ربنا !

-إيه!!! .. هو قالك إنه بيحبك ؟

-أيوا ! وهنتجوز إن شاء الله وهبقى أعزمك على الفرح

-يا منار "ما عند الله لا ينال إلا بطاعته " .. يعنى قلب عمر دا فى ايد ربنا ! ..

ردت بملل : منا عارفه .. عشان كدا أنا هظبط الصلاة وهقرب من ربنا .. عايزة حاجه تانى ؟

-لأ .. عايزاكى بس بخير .. مع السلامة !

-سلام!

أغلقت منار هاتفها وألقتها الى جوارها وزفرت بضيق وقالت لنفسها " مينفعش فرحة تكمل على بعضها أبداً!!..لازم حد ينكد عليا!! أووووف بقى "

وفى صباح اليوم التالى

“إزيك يا حازم ؟ ”

رد حازم بوجه خالى من المشاعر : عادى يانور !كلو محصل بعضه !

قال نور ببسمة : ليه بس يا حازم ؟ .. إضحك خلى الدنيا تنور

-أهو اللي جانبنا ورا كلامك دا .. بتقعد تنشره على الفيس وتقوله وكأنك مش عايش معانا فى الدنيا أصلاً!!

نظر له نور بتعجب وقال : ليه بتقول كدا ؟

-عشان أنا بصراحة زهقت ! .. زهقت من الكلام اللي بتقعد تقوله ومحدش بينفذه حتى إنت نفسك ! .. وزهقت

من نفسي ومن حياتى ومن رامى ومنك إنت شخصيا !! (قالها حازم ثم زفر بسخط)

إبتسم نور إبتسامة لم يتوقعها حازم وقال : لو مش عجبك طلقنى

صاح حازم : يخربيتك فصلتني !

قال نور وهو يضحك : بوظلتك الأداء صح .. تعالى نعيد تانى

-لأ خلاص إنت خرجتني من المود

قال نور مبتسماً : يعنى فرفشت خلاص ؟

-ربما

وكزه نور فى ذراعه وقال : أيوا بقى هو دا حازم اللي أنا أعرفه

ابتسم حازم وقال : ماشي ياسيدى .. أخبار المذاكرة إيه معاك من غير دروس ؟

-الحمد لله تمام

قال بتعجب : إنت ماشي إزاي من غير دروس كدا ؟

-ماشي ببركة ربنا ووالله مش بتريق .. فعلا بسمي ربنا وأعمل اللي عليا وأسيب الباقي عليه

-ربنا يكون فى عونك بصراحه.. بتشتغل وبتذاكر فى ثانويه عامه لوحك وبتاخذ بالك من مامتك وأختك .. بصراحه

أنا بحسدك عشان كل الناس بتحبك وأنا أولهم وعشان بحسك مبسووط علطول (قالها بجديه)

ابتسم نور وقال بحماس : طيب ياعم إحسد براحتك معنديش مشاكل .. بس قولى كدا .. إيه رأيك تبقى مبسووط

زبي كدا علطوول ؟

قال حازم بملل : عارف هتقولى إيه "قرب من ربنا -عامل الناس كويس - سامح .. والكلام اللي أنا حافظه دا

قال نور ببسمة : لا ياعم مش هقولك كدا .. ع العموم مش هقدر اقف معاك أكثر من كدا عشان رايح الجامع وبعد

الظهر عندى محاضرة .. ماتيجى معايا ؟

قال حازم باستهزاء : محاضرة إيه ؟.. هو انت دخلت الكلية من ورايا ؟

-ايه يا حازم السكر دا ؟ .. لا ياعم دى محاضره اسمها فهمت الدنيا شاب اسمه "أحمد يوسف " اللى هيقدّمها ..
لو فاضي تعالى معايا

-قشطة .. بدل ما أقعد مع النكد هاجى معاك .. بس لو طلعت وحشة هنفخك

-متقلقش دى هتتعجبك أوى إن شاء الله

فتحت منار عينيها مع صوت آذان الظهر وتوضأت وصلت الصبح والظهر سوياً وفتحت حسابها على هاتفها وكتبت
لعمر :أخبارك إيه انهاردة ؟

-أنا حلو عشان سألتى عليا .. وانتى ؟

-يعنى .. الحمد لله على كل شئ

-مالك ؟!

كتبت بضيق : مخنوقة شوية عشان إتخانقت مع أعز صحابى وكلمتها بأسلوب وحش ! ومن موضوع كمان !

-ايه كمان ؟!

-مضايقه من كلامنا بصراحه بتاع انبارح أوى ! .. وهو بصراحة مينفعش !

فكر عمر قليلاً ثم كتب : أنا آسف عشان قوتلك حاجه زى كدا وبصراحة إنتى معاكى حق ! واعتبرينى مقولتتش
حاجه وأنا مش هكلمك فى الموضوع دا تانى أبداً غير لما آجى وأتقدملك رسمي .. تمام كدا ولا فى حاجه تانى
خنقاكى ؟

إرتاحت بشدة لكلماته وكتبت بأريحية : شكراً يا عمر

-العفو على إيه ..المهم إنك تبقي مبسوطه

-أنا ببقى مبسوطه طول مانا بكلمك

أرسلتها منار ثم إنتبهت لما أرسلت ! .. وقالت لنفسها " إيه الغباء دا ! انا كنت لسه بقولوا إيه وبعتلوا إيه !! ..
اظاهر ان هدير كانت صح لما قالتلى إنى ممكن أضعف وأقول الكلام الغلط .. يارب متزعلش منى وتبعد عنى عمر

وبعد صلاة الظهر حضر حازم مع نور تلك المحاضرة بعنوان "فهمت الدنيا " وكانت من شاب يدعى أحمد أخذ
يحدثهم فى المسجد عن حياته السابقة وكيف أخطأ كثيراً وفعل كل ما يبغي ولكنه لم يسعد إلا حين عاش لهدف
وهو الله .. ظل حازم يستمع لكلماته والملل يكاد يقتله ! .. فهو سمع هذا الكلام مراراً وتكراراً ولكنه لم يشعر يوماً
بصدقه !!

عندما إنتهت تلك المحاضرة خرج نور وحازم من المسجد فقال حازم لنور بضيق : عجبتك يا نور ؟

قال بسعادة : جدا جدا جدا ..أنا بجد بحب أحمد دا جدا ودى رابع مرة أحضرله نفس المحاضرة وهحضرها
خامس وعاشر ومليون ان شاء الله .. كل مرة بيزرع جوايا طاقة إيجابية ويدبنى أمل إنى مهما بقيت وحش ممكن
أرجع ربنا وممكن أعيشها بانبساط وسعادة وانشكاح

اتسعت عينا حازم وقال بغير تصديق : إيه دا !!؟ .. أمال أنا ليه محستش بكل دا ! .. أنا حسيت إنه بيشتغلنا ياعم
!! .. مفيش حد بيتغير **180** درجة كدا بين يوم وليلة !! .. لأ وايه كان هيعدى على واحدة ولما قالتله اتقى ربنا
اتصلح واتغير وبقي فل يا فل ولأ وايه نفس ذات الوحدة دى رضيت تتجوزوا !! .. إيه البكش دا !!!

“عندك حق ! “

إلتفت حازم لمصدر الصوت بفرع فإذا به " أحمد " الذى كان يهزأ به منذ ثوانٍ .. ارتبك حازم ولم يجد مايقوله
ولكن أحمد وفر عليه عناء البحث عن كلمات وقال بابتسامة منحت حازم بعض الهدوء : عندك حق .. أنا لو حد

حكاى حكاىة زى دى عمرى ماكنت هصدقها .. بس معنديش حاجة أثبتلك بيها إنها حكاىة حقيقة .. كل اللى أقدر أقولهلوك إنك مش هتصدقنى غير لما تحس إحساسى

قال حازم باهتمام : وإنت حاسس بإيه ؟

ابتسم أحمد ثم قال : مرتاح

قال نور بسعادة : يارب أنا كمان أبقى مرتاح زيك ياأحمد

-يارب يانور

سأل حازم باهتمام : طب أنا أبقى مرتاح إزاي ؟ .. أنا مخنوق خنقة فظيعة !! وعمرى ما حسيت براحة !!

-دور على ربنا يا حازم وإنت ترتاح .. دور عليه فى كل حاجه بتعملها .. أنا عارف إنك سمعت كتير وكل الناس بتقولك قرب من ربنا بس أنا بقولك بجد دور عليه .. وعلى اللى يرضيه .. أصل هى دنيا واحدة بس وكلنا هنموت .. يانموت على طريق الله .. يانموت على أى طريق تانى .. وأى طريق تانى مش هيفيدنا !

-يعنى إنت عايزنى أحبس نفسى فى صومعة وأقعد أعبد ليل ونهار ! .. ولا اتعلم ولا اشتغل ولا اعيش !!!

رد أحمد بثقة : لأ طبعا ! .. مين قالك كذا ! .. المشكلة إننا مترسخ عندنا صورة إن اللى بيحب ربنا دا لازم بيبقى معقد ويحرم كل حاجه ويبقى قفل وحد خنيق كذا ! .. والمشكلة الأكبر إننا فصلنا العبادة عن الحياة فاما انى أعيش حياتى بطول والعرض بعيد عن ربنا .. واما اقلل عليا الصومعه واعبد ويس وفى الحاليتين من هترتاح !

تنهد أحمد وأردف : الحياة أجمل بكثير من اللى احنا شايفنه .. احنا شايفين الخناقات والزحمة والغل والكره ومش شايفين ربنا فى كل دا ..

صمت حازم قليلاً يفكر بكلمات أحمد ثم قال ببسمة : إنت غريب جدا! .. وعايز تعيش فى يوتوبيا (المدينة الفاضلة) بتاعت أفلاطون ! .. اللى زيك ميقدرش يعيش مع الناس !

فتح حاسبه وكتب " الصلاة " .. وضغط زر البحث .. ظهر له عدة شيوخ ممن لا يحب مظهرهم فأضاف " الصلاة مصطفى حسنى " .. ظهر له حلقات أحبك ربى عن الصلاة وغيرها .. بدأ يحملها على هاتفه بحماس شديد وبدأ يحمل حلقات أخرى لنفس البرنامج عن مواضيع مختلفة وهو يشعر بحماسة وسعادة لم يشعر بهما من قبل .. ظل هكذا الى أن سمع صوت اذان العصر أغلق حاسبه وتوضأ وفرش المصلاة على الأرض ورفع يديه ولكنه لم يكبر .. انحنى ورفع المصلاه عن الأرض وارتدى حذائه ونزل ليؤدى العصر بالمسجد كبداية جديدة ل " صلح مع الله "

وعندما دخل المسجد اتسعت عيناه لم يجد سوى رجلين فقط مع الامام ! .. هذا حال المسجد برمضان فما حاله فى باقى السنه !! .. دخل المسجد وصلوا سوياً وبعد أن أنهوا الصلاة عاد لمنزله وهو يشعر بسعادة ونصر وتردد فى أذنه " طوبى للغرباء .. طوبى للغرباء .. الذين يصلحون إذا فسد الناس .. يارب أكون غريب .. يارب أنا عايز أكون مختلف ! .. لأ يارب .. أنا بعونك هبقى مختلف "

دخل حازم شقته وكأنه يدخلها لأول مرة .. كان يشعر باحساس غريب جدا .. يشعر بأنه سيكون سعيداً للأبد .. ومجرد التفكير فى السعادة يمنحك السعادة .. إتجه للمطبخ حيث والدته تعد الفطور .. إقترب منها وقبل يدها لأول مرة وقال ببسمة : إيه أخبارك ياسحورة ؟

ضحكت الأم وقالت بسعادة : تمام يا حازم .. ربنا يابنى يخليك رايق وبتبوس إيدي علطوول كدا

-يارب ياماما .. عايزة منى أى حاجه أساعدك فيها ؟

قالت بحنان : عايزاك تذاكر وتنجح وتبقى دكتور قد الدنيا

قال بمرح : ياااااه دكتور مرة واحدة .. طلباتك كترت أوى! .. طب قولى ألحق علوم ولا حاجه ؟.. الطمع وحش

ردت ببسمة : والطموح حلو .. وأنا أملى فى ربنا كبير إنى هيخلى ولادى أحلى عيال فى الدنيا

-يسمع من بؤك ربنا .. المهم بقى استغلينى وأنا أتقد حماسة وقوليلى أساعدك فى إيه ؟

ضحكت وقالت : ماشي ياعم المتقد .. ينفع تنزل تجبلى حاجات من السوبر ماركت بدل ما أنزل بعد الفطار ؟ ..

لو مش قادر عشان الصيام مش مشكله يا حبيبي هبقى أنزل أنا بعد الفطار

فكر حازم لعدة ثوانى وأحس بكسل يساوره من الداخل ولكنه لم يترك الفرصة لنفسه كى تفسد عليه حماسته فنطق بسرعة : هاتى ورقة الطلبات وأنا أروح أجيبهم من عند نور

-ماشي .. ثوانى

أخذ الورقة ونزل بحماس الى السوبر ماركت الذى يعمل به نور وحين رآه قال متبسماً : إزيك يانور ؟

-تمام يا حازم .. وإنت ؟

-تمام ع الاخر .. أنا جاى أنفعكوا أهوو وإبقى إفتكر الجمال دى

ضحك نور وظهر رجل كبير السن حسن المظهر ذو لحية خفيفة من خلف حازم وجذبه من أذنه بنخفة وقال : وأنا مستنيك إنت يلا عشان تنفعا ؟

ضحك حازم وقال : احنا آسفين يا صالاح ححك علينا يا حاج محمود ! .. أنا هروح أشترى من براا

ضحك وتركه قائلاً : إبقى أعملها كدا

ثم التفت لنور وقال : أنا هروح بقى يانور .. وإنت إبقى اقفل قبل المغرب بنص ساعة وروح .. يلا السلام عليكم يا شباب

ردا سويا : وعليكم السلام ..

ثم بدأ نور يجمع لحازم طلباته وحازم يراقبه بابتسامة .. التفت نور لحازم وقال مبتسماً : ينفع تبطل تراقبنى ؟

-لأ ! .. أصلى عايز أقلدك فلازم أراقبك

-طيب ..

ثم عاد يجمع الطلبات مجددا الى أن فرغ منهم وناولهم لحازم وحاسبه ثم قال ببسمة : إيه رأيك فى أحمد يوسف ؟

-بصراحة .. شاب جميل

-عقبالنا يارب

-يارب .. أنا هخلع بقى عشان .. سلام ياباشا

-سلام

عاد حازم لمنزله وهو سعيد للغاية وأعطى لوالدته الطلبات ثم إتجه لغرفة أخته الوحيدة "هدى" وطرق بابها ودلف مبتسما ويده خلف ظهره .. ابتسمت حين رأته وبدأت تتحدث بلجلجة كعادتها : إيزيك ك يا حازمم ؟

قال مبتسماً : حلو وزى الفل عشان انتى بخير

ابتسمت وقالت : ح حبيبي .. يارب ب تبق قى طيب ك كدا علطوو لل

-يارب ياهدى .. كنت جايبلك حاجه كدا ..

إتسعت ابتسامتها وسألته بلفهة وبلا لجلجة : إيه ؟

-هتدينى كام ؟

-ولا مليون م

-اذا كان كدا ماشى .. اتفضلي ..

ثم أخرج شكولاته من خلف ظهره .. قفزت هدى من مكانها وخطفتها من يده وصاحت بسعادة : الله ! بابلى

-بعد الفطار بقى إبقى كليها

إنفجرت ضاحكة حتى سقطت على الفراش من شدة الضحك وقالت : كويس إنك فكرتني ! .. كنت هنسي وأفتحها

قال بمرح : لا دا استهبال بقى حضرتك

أخذا يضحكان واحتضنته وقد أدمعت عينها من شدة الضحك وقالت : إنت إنهاردة شبه بابا الله يرحمه أووى يا حازم .. خليك طيب كدا علطول

ابتسم بحنان وقد لاحظ اختفاء التعثر فى نطقها وقال بسعادة : ان شاء الله يهدى

مر إسوعين و منار تحدث عمر وتحاول وضع تلك الحدود الوهمية بينهما .. وكل يوم يزداد تعلقها به عن اليوم السابق .. نعم كانت تحبه ولكن منذ أن علمت أنه يحبها .. مرضت به ! .. فصارت لاتنام الا حين تحادثه حتى بعد الفجر .. وتظل بانظاره ساعات تاركةً حياتها ودراستها .. كل يومها عبارة عن محادثتها إياه .. وحين يغلق تغرق بين خيالات جميلة لن تتحقق وهى تعلم ذلك ! .. فتغرق فى دموعها حتى يغلبها النوم .. فتنام لتستيقظ فى اليوم التالى .. لتحدثه وحسب !! ثم تغرق فى دموعها .. أين تلك الرومانسية التى تشاهدها دوما بالافلام ؟ .. لم لم يحدث يوما أن تنام سعيدة بعد محادثته ؟ .. لم تبكي بشكل يومي .. مر الاسبوعين وقد بدأت منار تفهم أن الرومانسية لاتكمن فى كلمات الحب وحسب وإنما هناك شئ آخر ! .. لا تعلمه ولا تعلم حتى كيف تصل له ! .. كل ما تعرفه هى أنها تعيسة جداً .. وأنها لن تبتعد أبداً عن عمر .. وان كان هذا على حساب سعادتها !! .. فعمر شاب جيد جدا وبكلية الطب وابن خالها ويصلي بانتظام وأحياناً بالمسجد ولا يرافق الفتيات .. وصاحب خلق ومعروف بذلك بين ذويه .. ولن تجد مثله أبداً ولو ظلت تبحث طوال حياتها ..

عاد نور الى منزله قبل المغرب بقليل كعادته وقابلته حبيبة أخته بابتسامة وقالت : تعالى يانور عمالك مفاجأة

-خير اللهم إجعله خير

-لأ خير إن شاء الله .. تعالى معايا أوضتى بس

ثم جذبته من ذراعه وهرولت نحو غرفتها وقالت ببسمة : غمض عينك !

وضع يديه على عينيه وقال بمرح : لما نشوف فى الآخر هتطلع مفاجأة فعلا ولا بكش !

-تراااا .. فتح عينك

أزال يده واتسعت عيناه للحظة ثم ابتسم وقال ببلاهة : إيه دا ؟

قالت بفرحة : دا كوتشي .. فاكرك الخمسين جنيه اللي أنا قلبتها منك ؟ .. أهو أنا بقى كملت عليها من تحويشة

العمر وجبتلك الكوتشي دا .. دا ماركة على فكرة وأصلى

مط شفتيه وقال : ليه بس كلفتى نفسك يعنى شيفانى حافى ! .. كنتى جيتى الشنطة اللي نفسك فيها ؟

-ماهوو .. أصلها من قريب مكنتش حلوة قوى .. وبعدين يعنى الكوتشي أفيد ولا الشنطة ؟ .. الكوتشي طبعاً ! ..

وانت بتاعك قدم وأنا عرفاك مش هتنزل تجيب واحد جديد عشان لو أنا أو ماما عوزنا حاجه يبقى معاك فلوس ! ..

صح ؟

قال بحزن : لأ طبعاً مش صح ! .. متعمليش كدا تانى يا حبيبة عشان مزعلش منك ؟!

قالت بغير فهم : وأنا كنت عملت إيه بس !! .. متبقاش أوفر يانور !!

-بصي يا حبيبة إنتى لسه صغيرة ! .. يعنى مسئولة منى .. يعنى اللى تعوزيه أجهولك مش العكس ! .. وإنتى عارفه إن مفيش حاجة بتضايقنى فى الدنيا غير موضوع الفلوس دا ! .. فىا ستى أنا متشكر جداً جداً وهدية جميلة ومقبولة وماركة وكل حاجه .. بس لو سمحتى إذا تكرمتى متككريهاش تانى .. اتقفنا؟؟

تنهدت وقالت باستسلام : طيب ! .. روح قيسه بقى عشان أشوف المقاس ؟ ..

-ماشي

ظلت منار تتجول فى شقتها بتوتر .. فاليوم ستزورها هدير صديقتها العزيزة ولأول مرة منذ أن إنتقلت إلى محافظة أخرى .. وقد كانت إعتذرت لها عن الأسلوب الذى حدثتها به .. ظلت منار على أعصابها حتى سمعت جرس الباب هرولت نحوه وهى مبتسمة وقلقة بنفس الوقت وحين فتحته صاحت بفرحة : هديـــــر ..

وارتمت بين ذراعيها وأخذت تقبلها بشدة وهى تقفز من السعادة .. لقد اختفى كل شعور بالتوتر أو الضيق .. تركتها ثم صاحت : ايه النيولوك الجامد دا !!

ابتسمت هدير وقالت وهى تغمز لها : احنا جامدين أووى

أمسكت منار بها وأخذت تديرها يمناً ويسرى وقالت : إيه الفستان التحفة دا .. والطرحه كمان .. شكلك حلووو
أووى أووووى أووووى .. أنا هاخذهم مليش دعوة

قالت هدير بمرح : هتقليبنى من ع الباب كدا .. طب استنى لما أدخل طيب عشان أتقلب بضمير

ضحكت منار وقالت : أحيه! .. أنا نسيت أدخلك .. إتفضلي إتفضلي ..

دخلت هدير وجلست مع منار بغرفتها وكان بيدها حقيبته صغيرة .. دخلت منار ويدها عصير بارد قدمته لها .. شربته هدير وقالت لمنار ببسمة : غمضى عينك بقى يابطه

أغمضت عيناها بفرحة فأخرجت هدير من حقيبتها فستان وناولته إياها ،صاحت منار من شدة الفرح واحتضنتها
وقالت : الله ..حلو أووى

-إلبسيه بقى وانا هغمض عيني

ضربتها على كتفها بخفة وقالت : هروح ألبسه وأجيلك .. ثوانى ..

إرتدته وهرولت إليها وقالت بيسمه : إيه رأيك ؟ ..

-زى القمر .. بس بدمتك مش أحلى من البنطلون ؟

نظرت منار لنفسها فى المرآه وقالت باحراج : يعنى آه .. حلو .. بس البنطلون برضه مريح فى الحركة والمواصلات
والدروس وكده

-بس الفستان واسع وحلو ويعجب ربنا .. صح ؟

قالت منار بضيق : بس أنا مش ملتزمة أصلا عشان ألبس واسع .. ولو لبست واسع هبقى منافقة !!

قالت هدير بعدم فهم : يعنى إيه ملتزمة ؟! .. مفيش حاجة اسمها ملتزمة أصلا !..فى حاجة اسمها أنا بحب ربنا
وهعمل اللى يحبه .. سيبك من الجو بتاع ملتزمة ومش ملتزمة .. مبيأكلش عيش يا أختى والله

ضحكت منار من أسلوبها وقالت : يعنى ممكن ألبسه مع لبسي العادى ..

-ماشى .. المهم تلبسيه .. وجيالك رواية حلوة أووى أووى

قالت منار بابتسامة واسعة وقد نست همومها قليلاً : رومانسي بقى وحركات ولا إيه ؟

-“فى الحلال ” .. رقيه طه .. روايه ملهاش حل ..اول ماقربتها قولت دى بتاعتك عشان انتى بتحبنى الروايات
الشبابى دى وكدا

وفى اليوم التالى .. استيقظ حازم فى التاسعة صباحاً وابتسم لأنه تذكر أنه صلى الفجر .. نهض من على فراشه بحماس وفى أقل من دقيقة كان قد رتبه .. غسل وجهه وجلس قليلا مع أمه وأخته ثم عاد لغرفته وأغلق على نفسه وجلس على مكتبه وأخرج كشكوله وكتب فى صفحة جديدة .. “ يوم جديد .. ياترى هضيعه ولا هتسفاد منه ويقربنى شبر من ربنا .. بسم الله توكلت عليك ومش هتواكل .. أنا عايز أعمل حاجات كتيره انهاردة جديدة .. وأولها إني هضحى ! .. وأقول لماما تسلم إيدك وأبوسها بعد الأكل والثواب عند ربنا بقى دا بر الوالدين طلع ثوابه كبير أووى وكمان هي بتتعب معانا بصراحة .. وأنا لسه سامع مصطفى حسنى عن بر الوالدين قبل ما أنام ومأثر فيا جدا ولازم أستغل الحماس دا .. تانى حاجه هعملها هروح دروسي وآجى أذاكر وأخلص اللي عليا أول بأول عشان أرضى ربنا وأمى وأعمل حاجه ليا .. تالت حاجه بقى وأنا بفكر فيها من اسبوع بصراحه وهي هبدأ أحفظ جزء عم .. سورة كل اسبوع أحسن منا مبيح كدا ! .. وهسمع تفسيرات الشعرواى اللي نزلتها وهخلى نور يعلمنى التجويد أو هروح أحضر معاه بس خايف أضيع وقت وأنا فى سنة مهمة زى دى .. ربنا يستر .. أنا مش عارف هو أنا كدا اتجننت عشان بكلم نفسي ولا لسه قدامى شويه ؟ .. بس معرفش ليه مرتاح وانا بكتب فى الكشكول جنانى دا ! .. حلو زى ما أحمد قال .. الاختلاف دا احساس مختلف عمرى ماجربته قبل كدا .. ولسه هختلف أكثر وأكثر .. اصبر بس عليا يا حازم .. المهم بقى آخر حاجه عايز أسجلها إني هروح أغير مجموعته الكيميا .. على عيني والله يامنار بس أنا عيطت إنبارح خلاص وأنا بكلمه ! .. شكلى هيبقى وحش قدام ربنا لما أقوله خلاص يارب وأرجع فى كلامى ! .. هيزعل منى .. ومش عشان هو غفور رحيم هتكل على كدا ! .. المهم أنا بحبك وعشان كدا مش هبص عليكى ! .. وهدعى تكونى مراتى حتى لو بتحبى قريبك دا مليش دعوة !!! .. ربنا قادر يقربنا من بعض !!!! .. لو الكشكول دا اتمسك هروح ورا الشمس .. ربنا يستر .. اشوفك بليل يا حازم وانت اقرب من ربنا.. اه نسيت اكتب .. همشي مبتسم .. وهرمى السلام على كل حد اقابله .. دول حسنات كتير يعنى مش حاجه بسيطه.. وهأكل قطه وانا جعان .. الحمد لله .. وانا ماشي هسمع حلقة الصيام.. لعل وعسى أحس بطعمه ان شاء الرحمن .. حلوة الرحمن دى هكتبها علطووول “

اتصلت منار بهدير وهى تجهش بالبكاء وحين ردت صاحت وهى تبكى وترتجف : محمد ماااااا !! ماااااا يا هدير وملحش يتغير !! .. هدير أنا حاسة إنى هموت زى محمد !! .. هدير أنا بغضب ربنا وبكلم عمر كلام ميصحش إلحقينى !! “

اتسعت عينا هدير لم تجده ما تقوله لها .. لم تكن تعلم أنها ستتهار الى ذلك الحد !! .. استجمعت هدير قواها وقالت بصوت هادئ : ينفع تهدي عشان نعرف نتكلم بس ! .. دى روايه مش حقيق..

قاطعتها وهى تصيح : لأ مش رواية !! .. دى حقيقة .. أنا هموت وهو غضبان عليا !! .. هموت وأنا بعصيه !! .. أنا مبصليش وبكلم ولد ويلبس وحش !! .. وديما بفهم نفسي إنى أحسن منهم !! .. وأقول أنا ليسي طويل بيغطى ! .. إلحقينى !!!!!!! .. أنا هموت!!!!!!

-إهدى بالله عليكى يامنار وأنا هجيلك .. أنا لسه فى اسكندرية وهجيلك دلوقتى .. سلام

بدلت هدير ثيابها وإتجهت نحو منزل منار وقابلت والدتها بابتسامه تخفى توترها ودخلت غرفة منار التى كانت غارفة فى دموعها .. وبمجرد دخولها قالت منار وهى تبكى : أنا مش هكلم عمر دا تانى أبداً ! ..

إبتسمت هدير واقتربت من صديقتها وضممتها بحنان .. فأردفت منار : بس مش قادرة ! .. حاسة إنى هضعف

قالت هدير بابتسامه : إحنا أقويا برنا .. وانتى هتقدرى تبعدى عنه .. بس قررى ! .. وخدى الخطوة ! .. الخطوة هى القرار الفعلى ..

-أنا مش هقدر مكلموش ! .. انا متعلقة بيه قوى ! .. وانتى مش هتبقى جنبى عشان بعيدة !

-هتقدرى بعون الله .. عون ربنا القادر على كل حاجة .. افتحى بلوتوثك ياحلوة وأنا هبعثلك شوية أسباب هتاخذى بيها عشان تبعدى عنه تماما إن شاء الرحمن

استجابت منار لهدير التى أرسلت حلقات خدعوك فقالو لمصطفى حسنى عن الصداقة بين الاولاد والفتيات .. وسحر الدنيا " المصاحبة " .. ومواضيع أخرى مختلفة لعدة دعاة وشيوخ آخرين .. استقبلتهم منار ونظرت لها بياس وقالت : تفتكرى هقدر ؟

-ميقولش الكلمة دى غير حد ضعيف أو يائس .. واحنا أقويا برينا ومتفائلين بالخير زى ما رسولنا الكريم علمنا صدقيني انهارده أحلى من انبارح

-هدير! .. انتى ازاي بقيتى كدا؟! .. ازاي لسه قادرة توفى بعد موت والدتك وجواز بياكى ! .. ازاي قادرة تضحكى وتساعديني وانتى فى الظروف دى ! .. ومرات باباكي بتعاملك وحش أوى ! .. ازاي عايشه ببسمة وأمل إن انهارده أحلى ومفيش اصلا فى حياتك اى دليل على كدا ! .. انتى مصدقة اللى بتقوليه دا ولا بتكررى الكلام اللى كلو بيقولوا !

ردت هدير وابتسامتها لم تتغير : كل الحكاية إنى حبيت ربنا .. شوفى إنتى بتقولى انك بتحبى عمر ومش هتقدرى تبعدى عنه .. شوفى بقى حب عمر دا يجي إيه جنب حب ربنا .. والله المثل الأعلى .. أنا راضية بكل اللى هيجبهولى لأنه عالم بيا ويحالى ويعمل ديما اللى أصلحلى .. كل اللى بيعمله خير ليا .. لما ماما -الله يرحمها - ماتت نقلنا .. لما نقلنا استغدت انى بدأت أقرب منه .. بدأت أحبه لأنى كنت بيعط ليل نهار ومكنش ليا غيره أشتكيله .. ولما بابا اتجوز وزوجته بقت تعاملنى وحش اتعلمت أصبر وأقابل السيئة بالحسنة واتعلمت أحب كل الناس حتى اللى تصرفاتهم ساعات بتضايقنى ودلوقتى بحاول أتعلم إنى متضايقش أبداً أبدا

صمتت منار قليلا ثم قالت : يعنى ربنا ممكن يكون له حكمة فى انى أغلط وأكلم عمر ؟

-لأ .. هو أكيد ليه حكمة مش ممكن .. وليه حكمة انى أجيلك وأجبلك فى الحلال وانى أجيلك والفستان يعجبك .. وانى اجبلك واحد .. كل حاجه ربنا له حكمة فيها .. مش هنعرف حكمته فى كل حاجه دا احنا يدوب هنعرف جزء منها .. كلو خير

تحمست منار بعض الشيء وقالت : طب لو هبعد عنه فعلا .. هتساعديني ؟

ردت بحماس : أيوا هساعدك وهقف جنبك لحد ما تغلبى شيطانك

قالت منار بحيرة : طب أنا المفروض أعمل إيه فى الأول كدا ؟

-إعمليله بلوك

صاحت منار بفزع : نعم !! .. إزاي يعنى ؟! .. إنتى بتهزرى ؟!

-لأ مبهرش ! .. لازم تبدأى بداية قوية عشان متضعفیش !

-لأ طبعا ! .. أنا لو بدأت باندفاع هرجع باندفاع !! .. لازم آخذ السلم خطوة خطوة !

صمتت هدير قليلا ثم قالت : يعنى انتى عايزة تكلميه أقل من الاول .. بس هتفضلي تكلميه ! .. يعنى الذنب

الشغال ! .. يعنى زعل ربنا شغال ! .. ولا إيه رأيك ؟

-بس أنا ديما أعرف إن اللى بيندفع بسرعة ويتغير بسرعه بيرجع بسرعه !

قالت هدير : الكلام دا مثلا مثلا فى حالة إن واحدة عايزة تتغير فتقوم جاية جدول صعب زى اللى بيوزعوها علينا

دلوقتي فى رمضان تمشي عليه .. وتمشي عليه من غير حب للعبادة .. فالطبعي هتزهق وترجع فعلا زى مابتقولى !

.. بس انتى هتبعدى عن ذنب حاجز بينك وبين ربنا .. يعنى لما هتسيبه هيتشال حجاب بينك وبين ربنا فعمرك ما

هترجعى ولا هتزهقى لأنك هتحسى براحة بعد ماتبعدي وتسيبه أصلاً

صمتت منار قليلاً ثم قالت بحزن : طب ليه ربنا مش عايزنا نحب ؟ ..

قالت هدير بسرعة : مين اللى قال كدا ؟! .. الحب حلال وعمره ماكان حرام ! .. بس تصرفاتنا بقى هى اللى اما

حلال او حرام !

-يعنى انا ممكن مكلمش عمر وافضل احبه ؟!

-طبعا يامنار .. بس لازم تعمليله بلوك .. عشان متكلموش وعشان متدخليش تنفرجى على بروفيله فتحنى .. وادعى ربنا يرزقك عمر فى الحلال

-بس أنا لو عملته بلوك هيفتكر انى محبوبوش ! .. أو انى زعلانه او بحب غيره ولما هيشوفنى هيسألنى ليه عملته بلوك؟! ..

-أصلا أصلا خالك بيجلكم كل قد إيه وقد إيه؟؟ .. وكمان ياستى ابعدى عن اى قعدة فيها عمر .. وهو مش هيعرف يسألك .. وبعدين هو اكيد مش هيسألك .. عشان شكله وكرامته يعنى فده فمصلحتنا ..
-وافرضى افتكر انى محبوبوش؟

-وايه المشكله؟ .. خليه يفتكر كدا .. ولو كان يببحك فعلا هيتقدملك .. ولما تقبلى هتشتيليه قد إيه انتى بتحببيه بس عشان بتحبى ربنا و محترمة قررتى تحافظى عليه.. ها اتقفنا؟

أغمضت منار عينيها للحظة وتخيلت نفسها حين تتخلص من وجع الضمير وحين لا تترك لعمر فرصة ليظن أنها "رخيصه" .. وأحست أنه سيتمسك بها أكثر فأكثر لأنها محترمة وسيأتى لخطبتها حين تصير بالكلية فابتسمت وفتحت عيناها وقالت بسعادة : اتقفنا وجدا كمان

-معلش بقى بس أنا لازم أمشي عشان قولت لبابا انى هاجى عندك شوية وأحصله عند عمو محمود .. فلازم امشي عشان ميحصلش مشاكل وهنفضل على اتصال علطول

ارتفع صوت ضحكاتها وقالت بخفة : والله إنت غسل يانور وحازم بقى غسل لما بقى يمشي معاك

ابتسم نور وقال بشئ من الخجل من اطرائها : والله أخوكى حازم مفيش زيه فى الدنيا ياهدى فإسمعى كلامه بقى وهو عمره ما هيزعل منك ..

-ماشي ..

-ثوانى وهكون محضرك اللى إنتى عاوزاه

ثم بدأ يتجول فى المحل وهو يجمع لها طلباته ودخل الحاج محمود (صاحب المحل) وألقى السلام ودخل الحمام ليتوضأ ليصلي الظهر الذى لم يصله بالمسجد .. وفجأة سمع صوتها وهى تضحك مجدداً .. شعر بالضيق من طريقة مزاح نور معها ولكنه لم يشأ أن يعاتبه في وجودها .. سمعه وهو يقول " لأ خليها عليا دى حاجة بسيطة ياستى هدية النجاح "

استشاط الحاج محمود غضباً وخرج بسرعة وهو يدب الأرض ورأى مشهداً اتسعت له عيناها .. رأى نور وكأنه يدس شيئاً فى جيبه بسرعة وقوة والخزنة مفتوحة أمامه .. ظل يحدق به والشرر يتطاير من عينيه .. لاحظ نور نظراته الحانقة ولا حظ أنه خرج بسرعة دون أن ينزل أكمامه أو يحتوى يجفف قطرات الماء التى تتساقط من ذراعيه .. ارتبك وقد وصله ما يشعر به الحاج محمود الذى قال له بضيق : مين اللى كانت هنا دى ؟

رد بتوتر : دى أخت حازم و ..

قاطعها بضيق : خلاص مش عايز أعرف ! ..

حاول نور الابتسام وقال : حضرتك كنت عايز منى حاجة ؟

رد بوجه خالى من المشاعر : آه .. إبقى تعالى بعد التراويح عشان هتودي شويه صناديق للبيت عندى ! .. والواد يوسف صغير ومش هيقدر يشيلهم ! وابقى سيبهم ع الباب لو محدش فتحلك !

تعجب نور لأن هذه أول مرة يطلب منه الحاج محمود أن يعمل بعد مدة عمله الرئيسية ولكنه لايمانع فى مساعدة من يحتاج ! .. فقال مبتسماً : مينفعش بعد المغرب علطول .. عشان بعد التراويح هروح مع حبيبة عند الدكتور عشان تعبانة ومينفعش تروح لوحدها !

أشفق عليه وقال وقد غلب حبه لنور على ضيقه : سلامتها .. بس هتقدر تيجي بعد الفطار علطول كدا ؟ ..

-أيوا يا حج مفيش مشاكل

-تمام ! ..

سمعا صوت اذان العصر فتوضأ نور وقال : بعد إذتك هروح أصلي في المسجد ؟

هو يعلم أنه لا يعترض ولن يعترض ولكنه يفعل ذلك دوماً .. تفاجئ نور برد بارد لا يحمل أى مشاعر : لأ ! .. إفرض حد جيه وأنا هنا لوحدى وحب يجيب حاجة من فوق ! .. أقوله إستنى أصل البيه بيصلى فى الجامع !

نزلت كلماته كالصواعق على نور و قال بدهشة : بس أنا بروح كل يوم و ..

قاطع بضحك : بيبقى فى حد معايا يقدر يطلع ع السلم العالى !

أخذ نور نفساً عميقاً وحاول ألا ينفعل نهائياً وقال : طب حضرتك ينفع تسمعى .. العشر دقائق اللي هصلي فيهم فى المسجد هما نفسهم اللي هصلي فيهم هنا .. فمش فارقة .. كدا كدا هسيب حضرتك نفس العشر دقائق

انفعل الشيخ الكبير وصاح بضحك : إنت هتقف تتجادل معايا ! .. الكلام اللي أقوله هو اللي يمشي وبس !

طأطأ نور رأسه وقال بحزن : حاضر !

ثم دخل الى المخزن وفرش المصلية وشرع يصلي وحين لامست جبهته الأرض انفجر باكياً وأخذ يردد وهو يبكي " اللهم أعزنى ولا تذلى لغيرك ! .. يارب سامحنى يارب ! .. مقدرتش أقوله لأ وهو راجل كبير وفى مقام أبويا ! .. يارب سامحنى أنا عارف إنى غلطان يارب متزعلش منى يارب ومتدلىش لغيرك .. يارب إنت الذل فى حضرتك عزة .. يارب إهدينا جميعاً وشيل من قلبه أى شك من ناحيتى .. أنا مش مستحمل بصاته اللي كلها شك ! .. يارب إهدينا جميعاً "

أنهى نور صلاة العصر وغسل وجهه من دموعه وخرج بابتسامة هادئة للحاج محمود الذى يحبه كوالده وسيبذله مافى وسعه ليستعيد ثقته وحبه ..

ثم هم بتركه لكنه منعه وقال مماًزحاً : إيه يابنى دماغك زبالة أوى كدا ليه ! .. أقصد أمسك إيدها الثانية يعنى !
..وياسيدى لو عايزنى أخليها تأخرلك منار شوية هخليها تعمل كدا وتختلى بيها إنت كمان وتقولها إنك بتحبها !

قال حازم باعتراض شديد : لأ ياعم شكراً ! .. خلينالك قلة الادب والهيافة ! .. الله يهديك !

ضحك وقال بمكر : قلة أدب مين ياعم .. مش هما موافقين ؟ .. يبقى خلاص هما اللي وحشين مش احنا !

قال حازم بانفعال : ومين قالك بقى إن منار ترضى تقف وقفة زى دى أصلاً!!

قال بثقة : ياعم هتوافق وترضى وهتبقى زى الفل كمان .. مش صاحبة سمية ؟ .. يبقى خلاص .. الحكاية دى
هتبقى عندها عادى .. هى عندها استعداد بس مش لاقية اللي يوجهها !

-إنت زبالة !

قال بمكر : وهى أزيل ! .. بتقعد تتدلع عليك وتعملها نفسها بتتكسف .. وبتقعد تكلم ابن خالها دا طول الليل !!
.. معلقة اتنين فى وقت واحد .. بنت الجامدة !

لم يطق حازم كلماته عن فلكمه لكمة قوية فى وجهه وصاح به : آخر مرة أشوفك يا حيوان ! .. لو شوفتك هوبت
ناحيتها هقتلك !!

إلتفت كل من بالسنتر لهما ولكن حازم لم يهتم وخرج وهو يدب الأرض وكاد أن يصطدم بفتاة على الباب .. اعتذر
دون أن ينظر لها وأكمل طريقه تاركاً السنتر عائداً لمنزله وهو يكاد يشتعل غضباً

نظرت منار له وهو يدب الأرض فى غضب وتساءلت لم هو غاضب لذلك الحد ؟ .. لم لم يلقى عليها السلام حتى
!؟ .. هل لم يعرفها بسبب ذلك الفستان الفضفاض الذى أحضرته لها هدير ؟! .. اتسعت ابتسامتها .. ودلفت من

الباب السنتر وهى تبتسم فى ثقة من مظهرها أنه الى حد كبير .. يرضي الله

عاد نور إلى منزله وعلى وجهه إمارات الحزن ..وعندما رأته حبيبة اقتربت منه وقالت : مالك يا نور ؟

حاول الابتسام وقال : ماليش ..أنا بخير الحمد لله

سندت بكوعها على كتفه وقالت بخفة : على عمو يا عمو ؟

حاول أن يكون مرحاً وقال : إيه !؟ .. أختي مخبر ؟

قالت بغرور مصطنع : أيوا طبعا طبعا .. إيه الموضوع فى الموضوع بقى ؟

دخل الى غرفته وجلس على طرف فراشه وقال بحزن : مضايق شوية يا حبيبة !

قالت بتعجب : نوررر ومضايق !؟!! .. الاتنين .. شكلك بتشتغلنى يااض

ابتسم وقال بحزن : يااض ! .. طيب ياستى متشكرين

اقتربت منه ومسحت على رأسه بحنان : مالك بقى بجد يا نور ؟

تنهد باستسلام وقال : هدى أخت حازم جت السوبر ماركت وأنا كنت بهزر معاها عادى يعنى .. ومن ساعتها وأنا

حاسس إن الحاج محمود اتضايق !

قالت بعتاب : طب بتهزر معاها ليه ؟ .. هى مش دى بنت برضه ومينفعش و..

قاطعها : فى إيه يا حبيبة !؟ .. هو أنا يعنى البنات خلصوا وهروح أعاكس أخت صاحبي ! .. وبعدين دى لسه داخله

أولى إعدادى يعنى عيلة صغيرة ! .. وأنا بحب أهزر معاها عشان موضوع النطق اللي عندها دا فبحس إنى عايز أهزر

معاها وأحسسها إن معندهاش أى مشكلة !!

-أنا مقولتش إنك بتعاكسها بس يعنى هى بنت صغيرة وممكن تفهم هزارك دا غلط .. وبعدين إنت مش أكبر منها

بكتير ! .. دا هما خمس او ست سنين ! ..

-بقولك طالعه من سته ابتدائى ! يعنى عيله صغيرة !! فهمانى ؟

ردت ببسمة : حاضر .. ولو حضرتك عايزة تمشي من دلوقتي وأنا أكمل شغل المطبخ فمفيش مشاكل .. عشان تلحقى تيجي بسرعة يعني

قالت وكأنها كانت تنتظر عرضها : ماشي يا هدير على راحتك يا حبيتي .. يلا يا أم يوسف نروح نجهز

وبعد أقل من نصف ساعة خرجت المرأتان وكذلك والد هدير (أشرف) وأخيه الحاج محمود الى محله .. تاركين يوسف ذو الـ 12 عاما برفقة هدير وقد إتفقت معهم أن تلحق بهم بعد صلاة العشاء كي تصليه حاضرا فى المنزل ولا تؤخره ..

ومع صوت الاذان خرج يوسف ليلعب مع أصدقائه وبقيت هدير وحدها .. صلت العشاء وبدلت ملابسها وخرجت من الباب وأغلقتة وجاءت تنزل من على السلم ولكنها تفاجأت بالذى يعترض طريقها ويقول : أنا طول عمرى ساكن هنا وأول مرة أعرف إن القمر ساكن تحتى ! .. زفرت بضيق وحاولت أن تنزل ولكنه سد الطريق بيديه فتراجعت للخلف وقالت بغضب : ينفع تعدينى ؟

قال بمكر : وأنا قولتلك متعديش ؟

مد يده ليمسك يدها ولكنها تراجعت للخلف عدة خطوات حتى وصلت لبابا شقة عمها التى لا تملك مفتاحها .. جاء يقترب منها ولكن صوتاً قادماً من أسفل السلم أوقفه " تعالى يارامى ساعدنى الله يكرمك أنا بغرق "

نظر رامى بضيق للذى أفسد عليه متعته وقال بضيق : إمشي يانور مش ناقصك دلوقتي !

قال نور بمرح وكان لا يرى هدير ولا يعلم بأن رامى يضايقها لأنه بقف فى أسفل السلم : طبعاً مش ناقصنى ! .. مانت واقف فى الترواة فوق وساينى هنا أتفخ ! يابن المحظوظة يافوزى زمانك هايص ! .. تعالى ساعدني يابني بقولك بغرق وعايز أجري ألحق العشا

نظر رامى لهدير التى تراقب المشهد بتوتر وعض على شفثيه وهو يتفرسها بعينه وقال بخبث وصوت لم يسمعه نور : كان زمانى هايص على الآخر لولا وجودك يابن البايخة !

—بتقول حاجة يلا !

اندفعت هدير بسرعة ودفعت يد رامى التى تسد الطريق وهرولت حتى وصلت للبوابة وخرجت تهرول الى محل عمها
وكانت الدموع قد انسابت من عينيها !

نظر رامى لنور وصاح : دا وقتك برضه !!!

نظر له نور بغير فهم وقال : يابنى تعالى إسند معايا الصناديق دى نطلعها مرة واحدة بدل ما أفضل طالع نازل !
-أوووف .. حاضررر !

وصلت هدير لمحل عمها وهى تبكى ولم تجد والدها فدخلت الى المخرن وغلست وجهها بسرعة قبل أن يأتى
ويراها .. فدخل عمها الحاج محمود خلفها ومسح دموعها وقال بحنان : بتعيطي ليه يا حبيبة عمو ؟
-مفيش ياعمو !

قال بحزن مصطنع : كدا تخبى على عمك حبيبك ؟

تنهدت باستسلام وقالت وقد بدأت تبكى مجدداً : اول ماخرجت من شقة حضرتك فى ولد عاكسنى وكان هيمسك
إيدي بالعافيه ومرضيش يعدينى .. وبعدين دخل صحبه من البوابة وكمل عليا وقعد يقوله يابن المحظوظة و زمانك
هايص .. وأنا جريت أصلا عشان كنت مرعوبه منهم

تفاجئ الحاج محمود بم يسمع وقال بدهشة : ويوسف كان فين !؟

-نزل يلعب مع صحابه قبل ما أنزل بشوية !

ظهر على وجهه علامات الضيق وقال بغضب : متعرفيش أساميهم أو شكلهم الحيوانات دول !!

-خلاص ياعمو ملهاش لازمة .. ربنا يهديهم !

قال بغضب : اساميهم إيه ولا شكلهم إيه ؟

-معرفش أشكالهم بس واحد فيهم كان اسمه نور ! .. اللى هو قعد يلطف من عند البوابة دا !! .. والتانى معرفش
اسمه!!

قال الرجل بذهول : نور !! .. ، جز على أسنانه بغضب وقال : شكله كان إيه ؟

-قولت لحضرتك معرفش أشكالهم

-طب كان شايل صناديق كتيره كدا ؟

قالت بدهشة : أيوا صح ! .. وحضرتك عرفت إزاي ؟

-مش مهم تعرفي ! .. أنا هعرف شغلي معاه وهجبلك حقك ! .. وإنتي يلا امسحي دموعك ومنتحكيش حاجه

لابوكي لما يجي عشان هو حمقى وممكن يتخانق .. وروحي بلدكم يابنتي وانا هتصرف معاه وهعرفه ان الله حق !

-بلاش ياعمو ! .. الله يسامحه بقى .. وبعدين مش دا اللي كان بيعاكسني من الاول اصلا ! و ..

-خلاص ياهدير ! .. انا قولت كلمة ومش هتنهيا ! .. هتصرف معاه يعنى هتصرف معاه !

فتحت منار حاسبها لأول مرة بعد حديثها مع هدير ودخلت على صفحة عمر وجاءت تضغط على زر " حظر " ولكنها ترددت وفكرت لوهلة .. وتراجعت عن القرار فجأة وقالت لنفسها " أنا هعمله أوف لايين وخلاص .. كدا كدا مش هنتكلم بس هبقى اطمئن عليه من بعيد لبعيد وخلاص " .. وبينما هي بصفحة وقبل أن تغلق الدردشة بينهما .. ظهرت بجانب اسمه تلك النقطة الخضراء التي تزيل كل الحواجز بينهما .. ابتسمت بتلقائية ثم طرأت على رأسها في فكرة .. أغلقت الدردشة بينهما ثم بدأت تضغط أعجبنى على الجميع منشوراته كانت تقول لله بصمت " أنا هنا !! " ..

لا تعلم أين ذهبت وعودها لهدير وأين ذهب تأنيب ضميرها؟! .. في لحظة تخدير وقتية .. حين تزول .. يعود الألم

من جديد .. وبعد عدة ثواني وصلتها رسالة جريئة " مستخبية مني ليه ؟ "

ردت بدون بتفكير " هستخبي منك ليه ياعمر ولا ازاي حتى ؟ "

قال فى نفسه " أنا فاهم الحركات دى يا منار متشتغلينش بقي " .. وكتب لها : معرفش اسألى نفسك !

كتبت بحزن وقد بدأ يزول مفعول المخدر ويعود الألم : طيب

-ايه أخبارك ؟

أعاد لها الأمل من جديد وكتبت بحماس : كويسه الحمد لله .. أخذت شوية قرارات كدا وعازية أقولك عليها

كتب بشئ من السعادة لأنهما عادا يتحدثان : قوليلي بس قوليلي الاول ليه عامله أوف لاين ؟!

-هقولك دا من ضمن القرارات .. ماشي ؟

-ماشي .. ابدأى !

تنهدت بسعادة وكتبت : قررت كدا أغير من نفسي .. يعنى هظبط الصلاة ومفيش حاجة اسمها صلاتين مع بعض

ولا أنام وأنا سايبه صلاة .. وهقعد قدامك وقدام أى غريب بطرحة .. وهوسع لبسي شوية وأطول الطرحة شوية ..

ومش هسلم على رجالة تانى .. وهغير طريقة حياتى كلها وهعيش عشان ربنا ويس .. إيه رأيك ؟

وبعد أن أرسلتها تنهدت بحزن وقالت فى نفسها : بس مقدرتش أنفذ وعدى مع ربنا ومكلمكش !!

ظل عمر يقرأ مراراً وتكراراً وهو لا يصدق ما يقرؤه ! .. ظل عدة ثوانى يحرق بالكلام ثم كتب : ربنا يقدرك .. بس

الحياة صعبة أوى !

قالت بعدم فهم : يعنى إيه صعبه أوى ؟!

-مفيش !

-لأ بجد يعنى إيه!!!!

تنهد وكتب : يعنى الدنيا صعبة أوى إنك تستمرى فى اللي إنتى عاوزاه !

اتسعت عيناها حين قرأت رسالته وصاح صوت بداخلها " هو ذا اللى ربنا قدرك عليه !! .. " .. شعرت بغضب شديد
يمزق أوصالها حاولت أن تبقى هادئة وكتبت : أنا بقى هقدر !! ..

قال غير واثقاً فيما تقول : هنشوف !

اشتعلت غضب وكتبت وهى تكاد تحطم لوحة المفاتيح من الغضب : أيوا هنشوف !! .. سلام !!

ولأول مرة تغلق هى معه وليس العكس .. كانت دائماً تحدثه حتى يغلق هو ولكن اليوم والنار بداخلها تشتعل لا
تُسأل عم تفعل !

دخل نور السوبر ماركت بابتسامته المعتادة بعد التراويح ليخبر الحاج محمود أنه قد أوصل الصناديق كما طلب منه
.. حين رآه تغير لونه ورمقه بظرات نارية اقشعر لها بدن نور .. قال الحاج محمود بضيق : إنت جيت !

ابتلع ريقه بصعوبة وقال بتوتر من لهجته : أيوا حضرتك كنت عايزنى فى حاجه تانى ؟

قال بمكر : أيوا .. ودى الصناديق دى لبيت الدكتور معتر ..

تنحج نور فى حرج وقال : أنا آسف والله بس بيت الدكتور معتر بعيد وأنا كنت هودى حبيبة للدكتور عشان تعبانه
جدا !

زفر بضيق وقال : يعنى أنا مثلاً هروح أوديهم ! ..

-حضرتك أنا ممكن أوديهم بكرا إن شاء الله !

قال وكأنه يستفز نور كى ينفعل : لأ لازم يروحوا إنهاردة !! خلى أختك لبكرة !

اعتذر نور بأدب وهو لا يصدق ما يسمع من شيخه الكبير حنون القلب : أنا آسف بس مش هقدر والله هي تعبانة أوى و ..

قاطعه بغضب : وأنا مالي أنا تعبانة ولا زفت ؟! .. أنا ليا إن شغلي يخلص !! .. أنا بقبضك عشان تخلص الشغل مش تكية هي !!

جز نور على أسنانه لأن كرامته تُهان للمرة الثانية بنفس اليوم ولكنه كان متمسكاً بعمله ولا يريد أن يخسره كما أنه متمسكاً باحترامه للشيخ إلى أبعد حد ! .. أخذ يستغفر الله بداخله ويدعوه أن يمر الموقف على خير ..

نظر له الحاج محمود ووجد عيناه تستعطفانه أن يسمح له بالذهاب مع أخته فقال له وهو لا يزال يشتعل غضباً مما قصته له هدير : هو في حاجة حصلت عند بيتي لما روحت ؟

تعجب نور من السؤال لكنه هز رأسه نافياً وقال : مفيش حاجة حصلت .. يدوب روحت ولما محدش فتح سبتهم على الباب وجيت زى ما حضرتك قولتلى ..

-طيب يعني مشوفتش حد ؟

-لأ ! .. آه صحيح افتكرت شوفت رامى ع السلم وأنا طلع وهزرت معاه بكلمتين وخليته يجي يساعدنى ونطلع الصناديق قصاد بعض بدل ما أفضل طالع نازل وعشان كمان ألحق العشا ! ..

زفر الحاج محمود بضيق لأنه علم أن رامى هو من بدأ بمضايقة هدير وهو يعلم أخلاقته وتصرفاته وشكوى بنات المنطقة من تصرفاته وأخذ يتخيل شكل رامى وهو يحاول أن يمسك بهدير ونور يسخر ويلق بسخافة فهب وأمسك بعنق نور وصاح به : قسماً بالله يانور لو شوفت وشك هنا تانى لأكون قتلك بايدي !! .. مش كل البنات زبالة يا استاذ وينفع يتلعب ويتهزر معاهم !! .. إطلع بررا وحاسبك هيوصل لخالك ! .. برا !!

خلصه من يديه بعض الرجال الذين تجمعوا حوله ونور لم يفكر حتى أن يدفعه عنه .. لقد اتسعت عيناه فى دهشة مما سمع فهو لا يفهم أى مما يُقال له أو حتى عم يتحدث ! .. اخرجوه الناس من المحل وهم يقلبون كفاً على كف مما سمعوه عن نور .. كيف يمكن لذلك الشاب ذو الصبغة الدينية والوجه الباسم والذى لا يفوت صلاة بالمسجد

والذى يتمنون أن يتخذوه أبنائهم قدوة لهم أن يكون "بتاع بنات " كما فهموا من حديث الحاج محمود الذى طردته
توا من العمل !!

تحرك نور باتجاه منزله وتحسس وجهه ومسح تلك الدمعة التى خرجت دون أن يأذن لها .. وحاول أن يتسمم كى لا
تشك أخته وولדתه ويسألانه عم دار بينه وبين الحاج محمود .. وكان طوال الطريق لا يستمع الا لصوت شئ واحد فى
رأسه .. " ما ريك بظلام للعيد " .. " ما ريك بظلام للعيد " .. " ما ريك بظلام للعيد "

“عمو ! .. أنا مكنتش عايزة تقطع عيشه ..”

رد بضيق : أنا مقطعش عيش حد ! .. هو اللى قل أدبه فى الأول ! “

ردت هدير وهى حزينة : بس أنا سمعته وهو يقولك إن أخته تعبانة أوى وأكيد هيبقى محتاج فلوس عشان تتعالج
وحضرتك طردته ! .. يارتنى ماكنت اشكتيلك ياعمو !

ربت على كتفها وقال بحنان : متزعليش ياهدير .. الطيبة الزائدة اللى عندك دى هتوديكي فى داهية ! .. اللى بيغلط
لازم يتعاقب عشان يبقى عبرة وميغلطش تانى ! .. وبعدين أنا شاكك فيه من الصبح من قبل حكايتك أصلا ! .. يعنى
مطردتوش من مرة واحدة !

-بس كدا حضرتك ضريت دا وفضحته فى الشارع ومحدث هيرضي يشغله عنده .. وفى نفس الوقت اللى كان
قليل الادب من الاول متضررش !!

زفر بضيق وقال : أنا مليش سلطة ع رامى الزفت دا ! .. ومقدرش أكلمه لحسن أبوه راجل إستغفر الله العظيم ..
مدلعه دلح مرئ كدا ! .. أبوكى جيه أهوو .. فرفشي كدا بقى عشان سفركم يبقى سهل إن شاء الله

جلست منار على فراشها ضامة قدميها الى صدرها وتحيطهما بذراعيها .. كانت غارقة في التفكير .. لم تكن تتوقع تلك الاجابه الصماء من عمر ! .. كانت مشتتة الذهن لاتعلم أيهما صواب .. هل الحياة صعبة حقا كما قال عمر ولن تستطيع أن تستمر ؟ .. أم أنه يقول هذا فحسب لأنه لا يريد أن يحاول حتى أن يتغير ! .. ظلت واجمة تفكر .. هل ستتغير أم ستبقى كما هي ؟! .. وإذا تغيرت وبقي عمر كما هو ! .. هل سيقبل بها بالفستان والحجاب الطويل الذى قررت أن تبدأ التدرج فيه مع أول أيام العيد ! .. ياالله ! .. لاتدرى ماذا تفعل !!

وبعد عدة أيام .. “ يعنى إيه طردك ؟! ”

رد نور بحزن : طردنى يعنى طردنى يا حازم ! ..

صاح بفرع : طب ليه ؟!

-معرفش والله .. الحمد لله على كل شئ ..

-لا حول ولا قوة الا بالله ! .. طب تحب أنا أروحله وأكلمه ؟

-لا يا حازم شكراً .. أنا هدور على شغلانة تانيه وخلاص ورينا يستر وألاقى بقى

حاول حازم أن يبتسم كى يمنحه بعض الامل وقال : ان شاء الله تلاقى يا نور .. المهم ركز دلوقتى فى مذاكرتك وبقى ننزل ندور بعد الفطار سوا

-أنا هروح بقى يا حازم ونبقى نتقابل تانى فى صلاة العصر بقى

-ان شاء الله .. سلام

خرج حازم ونور من المسجد .. واتجه حازم الى السوبر ماركت دون أن يخبر نور بذهابه .. وحين رآه الحاج محمود ابتسم وقال : ازيك يا حازم ؟

-تمام الحمد لله .. وانت عامل إيه يا حج ؟

تنهد وقال : كويس يا بنى ! .. أخبار أختك إيه ؟

تعجب أنه يسأله عن هدى وقال ببسمة : كويسه الحمد لله كبرت وبقت فى اعدادى خلاص

نظر له الحاج محمود بغير فهم وقال : اعدادى ازاي ؟ .. مش هي فى تانيه ثانوى ؟

رد حازم بابتسامة : لأ يا حج دى لسه فى اولى اعدادى السنادى .. دى اخت نور اللي فى تانيه ثانوى !

-لا حول ولا قوة الا بالله أنا إزاي مخدتش بالى !

نظر له بغير فهم وقال : مخدش بالك من إيه ؟

-هاه ؟ .. لا ابدا ولا حاجه يا حازم .. متعرفش أخت نور أخبارها إيه ؟ .. كانت تعبانة وعائز أطمئن عليها ؟

قال حازم بحزن : ادعيلها يا حج .. هي تعبانة جدا ونور مش راضي يقول لحد من خيلانه او عمامه عشان رافض أن

حد يساعده .. دا أنا عرفت منه بالعافيه أصلا ! ..

قال بحزن : طب هو لقي شغل ولا لسه ؟

-لا والله لسه يا حج !

تردد قليلا ثم قال : طب كنت عايز أسألك فى حاجتين .. رامى صاحبك ب ..

قاطع حازم بصرامة : كان صاحبي .. بس من ساعة ما سمعت الحديث بتاع " المرء على دين خليله فلينظر أحدكم من يخالل " .. وأنا أعدت نظر فى كل صحابى وأولهم رامى الله يهديه ! .. كنت بتسأل عنه فى إيه ؟

-لا ولا حاجة ! .. أصلا كان قصدي أسألك على نور بس اتلغبطت .. هو زعلان ؟

-لأ الحمد لله .. بحسه ديما مبسوط ومرتاح رغم كل اللي هو فيه !

قال الحاج محمود بتعجب : إيه اللي هو فيه ؟ .. كل دا عشان مشيته من عندى !؟

-والله أبداً يا حج هو أصلا مش بيحب سيرة حضرتك غير بكل خير وحتى مرضيش يقولى ليه مشيته ! .. أنا بس بقول إنه يتيم وبيصرف على أمه وأخته وفى ثانوية عامة ومبياخدش دروس ! .. يعنى بزعل كل ما أشوف حالى وحاله .. بحس إنى مدلع جامد وعندي نعم وميزات كتيرة اووى ربنا حرم منها ناس تانيه واللى بيحرقنى بجد .. إن الناس التانية بتبقى راضيه وأنا مش بقى راضي عن حالى أبداً وديما حاسس إنى مظلوم !

تنهد الحاج محمود وقد شعر بالشفقة لحال نور وفكر أنه قد يكون تسرع ولكن سرعان ماتذكر دموع هدير فتأكد أنه قد فعل الصواب .. فنظر لحازم فى ضيق وقد تبدلت ملامحه وقال : صاحبك اللي بتدافع عنه دا وصعبان عليك أوى دا .. بعته البيت يوديلي حاجات راح معاكس بنت أخويا هو والزفت اللي اسمه رامى والبت جت منهارة ! .. أنا مرضتش أكلمه ولا أعلمه حاجه يدووب مشيته من عندى !

اتسعت عينا حازم وصاح بدهشة : اززززاي !! .. دا نور دا أدب وأخلاق ومبيصش على بنات أصلا ! إزاي هيعاكسها يعنى ! .. ومع مين ؟ .. رامى ؟ .. رامى ونور مش بيمشوا مع بعض اصلا ورامى بيقول على نور معقد أصلا فازااااى؟! .. أكيد انت فاهم غلط !؟

قال بضيق : يعنى هي هتتبلى عليه ليه !؟ .. وبعدين بنت أخويا مش كذابه !!

-أنا مقولتش كدا والله يا حج بس نور دا هو اللي علمنى أصلى فى المسجد وعلمنى أغض بصري وأنا مكنتش متخيل إنى ممكن أتغير كدا وفى فترة قصيرة أوى كمان ! .. استحالة يعمل حاجة زى كدا ! .. اكيد الحكاية فيها حاجة غلط ! .. وهنعرف الغلط دا لما نسأل نور !

-أنا مش عايز أشوفه أصلا !! ولا أكلمه !! .. ولو سمحت بقى يا حازم شوف انت جاي تاخذ إيه وبطل كلام عنه لحسن مش طابق سيرته !

وبعد العصر .. "مااااااا !"

"انتى جيتى يامنار ؟ .. أنا هنا فى المطبخ "

دلفت منار الطبخ بسعادة وكانت ترتدى جيبه لأول مرة وقالت بسعادة : إيه رأيك فى الجيبه دى ياماما ؟

قالت الام ببسمه : جميلة يا حبيبتي .. يااااه أخيرا لبستيها !

-ومش هقلعها تانى

نظرت الام بدهشة فأردفت منار : ماما أنا مش هلبس بناطيل تانى أبدا

صاحت الام فى ذهوول : نعم ! .. دا من إيه دا ان شاء الله ؟

-يعنى ياماما عادى .. البناتيل ضيقه اووى بصراحه

-من امته وانتى بتقولى ضيقه وواسعه ؟ .. ما طول عمرك مش بتلبسي البنطلون الضيق أووى دا .. وتلبسي الجينز

الكويس وفوقها حاجات طويله

-طويلة مين ياماما ؟ .. دى قصيرة أووى .. وأنا مخدتش بالى غير لما بقيت أنزل بالفستان بتاع هدير والجيبه ..
مكنتش فاكرة إن مناظرنا بتبقى بشعة للدرجة دى

-بشعة إيه ؟ .. يابت إنتى سفروته !! .. امال التخان يقولوا إيه ؟ .. وبعدين ياختى الحمقة الدينية دى مجتث ليه
قبل ما أجبلك طقمين العيد اللي هيترموا لو لبستى جيبات !

-مش هيترموا ولا حاجه .. هلبس البناطيل فى البيت او لما اتجوز .. والبلوزات هلبسها على جيبات .. هى كدا
كدا قصيرة وتمشي على الجيبه

ثم أخذت تلح على والدتها : وافقى ياماما .. والنبي والنبي والنبي والنبي

صاحت امها : خلاااااص اتنبلى اعملى اللي انتى عاوزاه .. قولى لابوكى بس الاول !

هرولت نحو غرفة والدها وقالت بدلع: بابا .. حجوج .. عشقى الذى لاينتهى .. أبتاه يا أبتاه ! .

ضحك بشدة وقال : عايزة إيه يابت أنا عارف الدخلة دى ؟

إستجمعت قواها وقالت : بابا أنا مش هلبس بناطيل تانى وهلبس جيبات بس

نظر لها بتعجب فأخذت تردد فى الحاح : والنبي والنبي والنبي يابابا

اعتدل فى جلسه وقال : أولا بلاش تقولى والنبي عشان حرام نحلف بغير الله .. ماشي ؟

-ماشى

-ثانيا بالنسبة لموضوع الجيبات دا اممممم .. هو انا موافق بس خايف لترجعى فى كلامك ؟

-لأ متخافش بنتك راجل

ضحك وقال : طيب يابنى أنا موافق .. بس لو رجعتى ف كلامك ورجعتى للبناطيل فمفيش لبس جديد لحد السنة
الجاية وعليكى خير بقى .. اتفقنا ؟

-اتفقنا

دلفت والدتها وصاحت : إنت وافقت يا على !!؟

-وموافقش ليه ؟ .. استنى اما أغيظك شوية .. ناولينى المحفظة يامنار ..

ناولته اياها وهى تبتسم بشدة فأخرج منها 200 جنيه ناولها لمنار وقال : اشترى طقم جديد عشان العيد يامنار بدل البناطيل اللى مش هتتلبس

قبلته بشدة وهرولت الى غرفتها بسعادة فقالت والدتها : طب وافقتها فى الجنان وقولنا ماشي .. انما تديها فلوس تجيب حاجه تانيه ليه ؟

-كل سنة وانتي طيبة يا ام منار بقى ..وبعدين انا مش عايزها تلبس فى العيد حاجة قديمة فيلعب الشيطان فى دماغها ويرجعها للبناطيل .. أنا عايزها متحسش فى يوم انى وقفت فى طريقها .. دى هى الحيلة واللى هتدخلني الجنه لو ربيتها كويس

-بس يعنى عمرك ماقولتها حاجه على لبسها ! ..

قال ببسمة : أنا عارف أنا برى بنتى ازاى .. روحى بقى كملى الفطار ومتخافيش يا ام منار

خرجت وأغمض عينيه وقال لنفسه : ربنا يبعدك عن عمر كمان يامنار .. ومتزعليش منى لما تعرفى انى بعرف اخبارك من هدير وان انا اللى خليتها تجبلك الفستان وهى جاية وحاسبتها عليه لما جتلك .. ربنا يابنتى يخليكوا لبعض وتبعدى عن كل اللى يغضبه

دخلت منار غرفتها وفتحت حاسبها ووجدت رسالة من عمر " ازيك يامنار .. عامله إيه ؟ .. بقالنا كام متكلمناش .. أنا عارف انك بتفتحي بس اوف لاين .. وعرفت من البوستات اللي بتنشرها .. أنا عايز أعرف هو أنا ضايقتك فى حاجة ؟ .. أنا بحبك بس مش حاسس إنك بتحبنى !! .. ردى عليا لو سمحتى "

تنهدت بعمق وجاءت ترد ولكنها تذكرت أنها وعدت الله ألا ترد عليه مجددا .. قالت لها نفسها أن ترد عليه تلك المرة وستكون الاخيرة .. بدأت تكتب الرد وفجأة أحست أنها خائنة لوالدها الحنون والاعظم أنها خائنة لله ولوعدها له .. ووجدت نفسها تكتب وهى تبكى " لن أخون الله فيك " .. " لو سمحت يا عمر متكلمنيش تانى خالص ولو أنا كلمتك متردش عليا !! .. أنا عايزة أقرب من ربنا وهتحدى الدنيا الصعبة أو اللي إنت شايفها صعبة .. أنا أكبر ذنبه حاسه انى بعمله هو كلامى معاك !! .. كلامنا كله حرام كله غلط !! .. انا تعبانة أووى من الموضوع دا ومش قادرة أعيش وأنا بخون ثقة والدى فىا .. وياريت تحترم رغبتى فى دا .. ولو إنت بتحترمنى إمسح الرسايل اللي كانت بينى وبينك فى الأيام اللي فاتت !! .. وسيبنى أنغير ومتقفش فى طريقى .. ومهما حصل متكلمنيش على الفيس عشان مضعفش وأرد عليك !! .. مش مستتية منك رد ولو وصلنى رد مش هرد ! .. "

قرأها عمر مراراً وتكراراً غير مصدقاً لما فيها قال فى نفسه : هى فعلا هتتغير بجد ؟ .. ولا هى مش بتحبنى وعايزة تخلع بطريقه كويسه ؟ .. طب لو هى مش بتحبنى كانت بتكلمنى ليه كثير اووى كدا ؟ .. أنا مش فاهم هى إيه اللي حصل معاها ماكنا لسه بنتكلم من كام يوم وكانت عادية وكويسه ! .. إيه اللي هيغيرها كدا ! .. هو فى حد بيتغير كدا بسرعة ومن غير مقدمات ؟ ! .. أنا مش فاهم حاجه خالص !! "

فزع حازم من نومه وجلس على طرف الفراش وأخذ يستغفر كثيراً .. " استغفر الله العظيم .. والله يارب أنا مش عارف أنا ليه بحلم بيها كدا ! .. أنا عمري ماكان فىا حاجة وحشة من ناحيتها !! .. ليه ديما بحلم انى بعاكسها او بحاول أأذيها !! يارب أنا غيرت كل المجموعات اللي بشوفها فيها ومعنتش بفتكرها الا وادعيك انها تبقى حلالى

وبس وانك تهديها وتهديني ! .. انا مش عارف ليه بحلم كدا ! .. يارب نورني لو بعمل غلط تانى عشان ابعده عنه
وابطل أغضبك فيها .. ثم قام وتوضأ وصلى ركعتين فى جوف الليل وبكى بشدة وهو يدعيه أن يبعده عنه كل حرام ..
وأخذ يدعوه أن يرزق نور فرحة لا يحزن بعدها أبداً ! .. فرغ من الصلاة ثم اتصل بنور بلا تفكير.. وتفاجئ أنه
مستيقظ فقال معتذرا: أنا آسف والله انى بكلمك متأخر كدا بس كنت بصلي ولقيتني فجأة بكلمك كدا لوحدي
والله

ابتسم نور وقال : طب ودعيتلى ؟

-أيوا .. كنت عايزة أسألك هو ينفع أصلى ديما بليل كدا ؟

-أيوا طبعا .. دا اسمه قيام ليل .. وقيام الليل هو شرف المؤمن لأنه مش فرض إنما إنت بتقيم الليل ولو بركعتين
عشان تكلم ربنا وتشكيله وتدعيه وتشكره

-ماشي يانور متشكر أووى

-على إيه ؟! .. المفروض تشكر ربنا ان ادانا الفرصه اننا نكلمه ونحكيه ونطلب منه كل اللي احنا عاوزينه

-طيب .. اقل ومنتقابل بكرة

-ماشي يا حازم .. بس انا عايز اقابلك انهاردة !

نظر حازم للساعه وقال : الساعه 2 يانور !!

-خلاص نتقابل كمان ساعتين فى الفجر

-ماشي ربنا يقدرنى وأعرف آجى

-نتقابل على خير ان شاء الله وابقى ادعى لحبيبة يا حازم الحرارة مبتنزلش بس الحمد لله فى السراء والضراء

فتحت منار عيناها وكانت الساعة تقارب الثالثه .. قامت بتكاسل وشريت وعادت للفراش ولكنها قامت وجلست على طرف الفراش ورفعت يدها للسماء وأخذت تدعو الله أن يعينها على ما ستفعله .. ثم تدهرت في سريرها لتنام ولكنها قامت مجدداً وتوضأت وصلت ركعتين لأول مرة في جوف الليل .. ودعت الله أن يصلح عمر ويصلحها ويرزقها اياه في الحلال الذى لن تقبل بغيره بديلاً !

وفى اليوم التالى

“ إحنا مش محتاجين حاجة والحمد لله ! .. أنا هدور على شغلانة تانيه .. متشكرين يا خالو ! “

قال الرجل بعصية : وإنت فكرك إنك هتعمر فى شغلانة تانيه ! .. مش كفاية جبتهك شغلانة عند الحاج محمود بطلوع الروح اصلا ! .. وتيجي فى الاخر قله الادب تاخذ حقها معاك وتروح تعاكس بنت أخوه !

صاح نور بذهول : نعم !! .. أنا والله معرفش حاجه عن الموضوع دا !! .. بنت أخوه مين !!

-البت اللى عاكسها انت والزفت رامى ع السلم ! .. ولا صحيح انت هتفتكر ازاي؟! .. هتفتكر مين ولا مين اصلا !!؟

-حرام عليك تقول عليا كدا !! .. أنا معرفش حاجه والله !! .. ولا عملت حاجة !!

-يووووه بقى متقرفنيش !! .. أهو عملت اللى عملته بقى وخلاص واهو الراجل طردك من عنده !! .. ومش هيتعامل معايا تانى !! .. دى آخرتى انى مشيت ورا عيل صغير !!

تدخلت والدة نور وقالت وهى تبكي : لا يا منصور متقولش على نور كدا ! .. دا راجل من صلب راجل وعمره ما عمل حاجة وحشة لحد ! .. أكيد الحاج محمود دا فاهم غلط !!

صال نور بتعجب : فاهم غلط إيه؟! .. أنا معرفش أى حاجه من اللى بتحكوا فيها ولا اعرف بنت أخووه ولا غيرها !! .. وعمري ما عملت حاجه لبنت مهما كانت عشان عندي أخت وهيتدلها !!

تأفف منصور بضيق وقال : ادوشنا بقى بكلامك دا !.. قصر الكلام عشان مش فاضي .. إنت هتترزع فى البيت تذاكر عشان تفلح وتدخل كلية عدلة وأنا هصرف عليك لحد ماتدخل الجامعه إكراماً لأختي بس مش أكثر !! .. بس لما تدخل الجامعه ملكش حاجة عندي .. فاهم?!!

صاحت حبيبة بتعجب : هو إنت هتصرف علينا من فلوسك؟! .. دى فلوس أبونا الله يرحمه !

رمقها خالها بنظرة نارية واقترب منها نور وقال وهو يجز على أسنانه من شدة الغضب : إمشي يا حبيبة روحى أوضتك !

-لأ مش رايحه أوضتى يانور ماهو لازم يعرف إن كنا ساكتين فدا من احترامنا إنه خالنا مش أكثر !!

أمسك ذراعها بقوة حتى كاد يعتصره بين أصابعه وقال بغضب : قولتلك إمشي !

خافت حبيبة من نظرات أخيها الغاضب وأدمعت عيناها ورأى فيهما ذلك الرعب الكامن والذى لم يراه أبداً فى عينيها فترك ذراعها وكأن وعيه قد عاد له وهرولت إلى غرفتها وهى تبكى !!

نظر له لخاله وقال : إعمل اللى حضرتك شايفه صح ! .. بعد إذنكم !

ثم خرج مندفعاً لغرفته وأغلق الباب وارتمى على فراشه ودفن وجهه بالوسادة وأخذ يبكى بمرارة !

التفت والدته الى أخيها : حرام عليك يامنصور ! .. إنت قاسي عليه قووى ! .. نور غلبان والله وميستحقش كل دا !

-بلا غلبان بلا بتاع بقى ! .. انا عايزه يقعد يذاكر ! .. يعنى عايز مصلحته !! وتقوليلي قاسي !! .. قال قاسي قال !

أغلقت حبيبة بابها وأخذت تبكى بحرقة على فراشها ! .. وبعد مايقارب الساعة سمعت طرقاً خفيفاً على بابها ..
دفنت رأسها بالوسادة ولم تجب .. زاد الطرق على الباب ودلف منه نور عندما لم تجب .. اقترب منها ووضع يدها
كنفها وقال بحنان : ينفع تنامي وإننى زعلانة منى والعيد بعد يومين ؟

اعتدلت وجلست على طرف الفراش وقالت ودموعها تنهمر : وإننى ينفع تزعقلنى وتمسك ايدى كدا ؟

قال محاولاً اضعاء المرح : خلاص ياستى بدل ما مسكت ايدك يبقى لازم نكتب الكتاب .. مينفعش اسيبك
ممسوكة كدا !

جاءت تبتسم ولكنها أشاحت وجهها كى لايرى بسمتها فأردف : ماتحاوليش شوفتها خلاص

نظرت له وقالت : خلاص يانور مش زعلانة !

أحاطت كنفها بذراعيه وقال : بصي يا حبيبة .. عارف إننى غلطت وغلطت جدا كمان ! .. وربنا لوحده يعلم بالنار
اللى كانت جويا .. ولما رديتى على خالو زعلتيني منك فالنار طلعت عليكى إنتى ! ..

-أنا مش متعودة عليك عصبى ! .. ولا عمرك بتغضب ولا تزعقلنى !!

-حقك عليا يا حبيبة .. أنا غلطانلك .. بس مينفعش تتكلمى مع خالو كدا ! .. مهما كان دا خالنا برضه

-وفلوسنا اللى عنده ؟

-دى حاجة فى علم الغيب .. الله أعلم هترجع ولا لأ .. مش دى المشكلة أصلاً .. المشكلة إنك ترفعى صوتك
عليه وتردى عليه ! .. مينفعش ! .. ولا أنا اللى هعلمك الحرام والحلال يا حبيبة ؟

أطرقت بحزن وقالت : والله مكنش قصدى .. أنا آسفة يانور

رفع وجهها بكفه وقال : أنا مش عايزك تعتذرى خالص يا حبيبة

نظرت له بغير فهم فأردف : عايزك متغلطيش عشان متعتذرىش .. بس مش معنى كدا انى هضربك بالنار لما تغلطى
هبقى أحدفك من البلكونة بس

ضحكت حبيبة فضمها اليه وقال : مش عايز أشوف دموعك تانى يا غالية .. وبعدين عندك حرارة يبقى لازم
تستريحى مش تعيطي

وفى أول أيام العيد

منار بفرحة " إيه رأيك بقى ياسمية ؟ "

صاحت سمية بفرح : إيه البتاع دا !! فين الطقم اللي جايبينه سوا !!؟

ردت ببسمة طفولية : ركنته وجبت الفستان دا

صاحت : فستان مين دا عباية ! .. دى معجزاكي أووى

ردت ببسمة : عجبانى ياستى عباية .. فستان .. أهو عاجبنى وخلص

قالت بمكر : خلاص ياستى طالما عاجبك يبقى خلاص .. سارة ونهلة مش خارجين معانا انهاردة .. أنا وإنتى وبس

قالت بعدم فهم : يعنى إيه ؟ .. هنتخرج سوا بس !؟

-وأنا مش عجباكي ولا إيه ؟

-والله مش قصدى بس أنا معاكي علطول .. انما هما مش بشوفهم غير فى العيد بس

قالت بمكر : أحسن برضه إنهم مش جايبين أنا أصلا اللي وزعتهم عشان نبقى براحتنا ..

اتسعت عينا منار فأردفت سمية : بصراحة أنا اتفقت مع رامى هيجيلنا على المنتزه فمكنتش عايزة حد يبقى معايا

غيرك

صاحت بفرع : إيه !!! .. وانتي فاكرة انى هاجى معاكى وانتي رايحة تقابلى الزفت بتاعك دا !

تذكرت أنها قطعت وعداً ألا تسب أحداً فأخذت تستغفر الله فقالت سمية بسخرية : إيه ياست الشيخة ؟ .. مانتي

كنتى بتغطى علينا بعد درس الكيميا وبتنزلى وانتي عامله فيها من بنها .. جايه دلوقتي تعترضى

ارتبكت منار وقالت : ربنا يسامحنى إنى كنت بغطى عليكوا بقى .. وأنا مش هغلط نفس الغلطة تانى ..

-إنتى هتزلينى بمجيتك ! .. خليكى .. وأنا هروح لوحدى

قالت منار بتحدى : باباكى مش هيوديكى فى حنة لوحذك .. أنا هروح أقوله إنى مش هخرج معاكى .. وهو مش

هيخرجك

ارتبكت سمية ولكنها أشارت لها بسبابتها وقالت فى تهديد : لو قولتى لبابا انك مش خارجة معايا هقول لأبوكى إنك

كنتى بتكلمى عمر وبتسهرى معاه للصبح ع الفيس ! .. ولو مسحتى الرسايل هوريله الشوت اللى كنت باخدها

لدردشتكم لما كنت بتفتحنى من عندى فى الدروس عشان تكلميه ..

انهارت منار على الفراش وبدأت تبكى وهى تتخيل صديقتها الوحيدة وهى تتجسس عليها وتأخذ أدلة ضدها لكى

تساومها عليها فيما بعد ! .. اقتربت منها سمية ومالت على أذنها وقالت : خدى بالك بقى ياحلوة من تصرفاتك

معايا اليومين دول ! .. أنا رامى هقابله يعنى هقابله وإحمدى ربنا إنى مش هجبرك تيجي معايا ! .. بس لو أبويا عرف

هتشوفى منى وش تانى !!

ثم خرجت من غرفة منار وهى تصدر صوتا عاليا بكعبها المرتفع .. تتبعته منار من خلفها بعينيها ولكنها اشمزت من

شكل بنطالها فأدرات وجهها وهى تبكى بمرارة .. قامت من جلستها وتحركت ببطء نحو المذبايع وضغطت زر

التشغيل وارتمت على الفراش بوهن .. وجائتها الايات تلمس قلبها .. لأول مرة تشعر بهذا الشعور .. وكأن الآيات

قد نزلت من أجلها هى .. إنخرطت فى البكاء وهى ترتجف وأخذت تردد تلك الايات التى مست قلبها

" وَيَوْمَ يَعَضُّ الظَّالِمُ عَلَى يَدَيْهِ يَقُولُ يَا لَيْتَنِي اتَّخَذْتُ مَعَ الرَّسُولِ سَبِيلًا (27) يَا وَيْلَتَى لَيْتَنِي لَمْ أَتَّخِذْ فُلَانًا خَلِيلًا (28) لَقَدْ أَضَلَّنِي عَنِ الذِّكْرِ بَعْدَ إِذْ جَاءَنِي وَكَانَ الشَّيْطَانُ لِلْإِنْسَانِ خَذُولًا (29) " - الفرقان

دخلت والدتها غرفتها وتفاجئت بها على تلك الحالة من الهذيان كما كانت تظن .. صرخت وهرولت نحوها وأخذت تمسح على رأسها وهي تردد الايات وهي تبكى وترتجف .. احتضنتها بشدة وبدأت تبكى هي الاخرى وهي تترجاها أن تتوقف

ظلت تبكى بين ذراعى والدتها وأحست بالأمان بين يديها .. حتى نامت

"ابيه رأيتك يانور في الشياكة دى .. أنفع عريس ؟ "

ضحك نور وقال : أيوا يا حازم يلا نروح نخطبك

قال بمرح : لا يا عم موشكرين .. لما الثانوية تخلص الأول

-إن شاء الله تخلص على خير وأنا فى صيدلة وإنتم فى طب يا حازم

قال ساخرًا : طب مرة واحدة ! .. يلا الله يسلهو

-يا بنى ثق فى قدراتك شوية واستعين بالله على كل صعب .. وبصراحة خطك خط دكاترة ميمشيش حاجه تانيه

ضحك حازم بشدة وقال : اتريق اتريق ماننا عارف إن عمري ما هزعل منك .. ،ثم تحولت نبرته لشيء من الحزن وقال : لسه معرفتش إيه حكاية بنت أخو الحاج محمود دا ؟

هز رأسه بالنفي وقال : ومش عايز أعرف حتى .. معرفش ازاي هعاكس واحدة أنا معرفهاش ولا فاكرك حتى شوفتها امته .. لأ وايه كنت مع رام ..

قطع كلامه ذكرى وردت في رأسه تذكر حين رأى رامى أعلى السلم وتلك الفتاة التي هرولت نحو البوابة .. بدأت تتجمع عنده بعض الخيوط حتى رُسمت الصورة في مخيلته .. وتردد في ذهنه أن تلك المهرولة هي ابنة أخته وقد ذهبت لعمها وقصت له ما حدث ووصفت له أنه كان يحمل صناديق وقابلته عند البوابة .. وتذكر كلماته التي ألقاها على رامى وأنب نفسه بشدة لأنه تفوه بتلك العبارات كى يلفظ الجو مع رامى .. ، قطع حازم تفكيره قائلاً : إيه ؟ .. سكت ليه ؟ .. افكرت حاجه ؟

-هاه ؟! .. لا ابداً

وأخذ يستغفر فنظر له حازم بتعجب فأردف نور : كنت بسبيئ الظن ! إستغفر الله العظيم .. ربنا يسامحنى

حاول حازم الابتسام ولم يسأله مجدداً كى لا يضايق صديقه الشارد .. صمت نور قليلاً ثم قال بيسمة : كل أمر المسلم خير

لم يفهم حازم ما كان يقصده فأردف نور بذات البسمة : لو مكنتش إطردت من الشغل مكنتش هعد فى البيت أذاكر .. يعنى دلوقتى بقى عندى فرصة أكبر للمذاكرة

-الحمد لله يانور .. تصدق يانور إنى بحمد ربنا إنى اتولدت هنا فى اسكندرية فى نفس المنطقه بتاعتك .. دى حكمة من ربنا عشان لما أحب أتغير ألقى حد يشجعنى .. بجد أنا لو بدى نصايح عن الالتزام هقول الصحبة الصالحة ثم الصحبة الصالحة ثم الصحبة الصالحة ..

قال نور : زود قبلهم حب ربنا .. لأن دا اللي هيخليك تدور على الصحبة الصالحة .. وأنا عايز أقولك إنى بدأت لوحدى وبدأت غلط وبقي عندى سطحية فى العبادات ومكنتش لاقى اللي يوجهنى .. وفضلت أخبط كام شهر

ومش عارف أعمل إيه؟! .. وبعد كذا قررت أعلم نفسي بنفسى وأبدأ مع نفسي .. نزلت كمية فيديوهات وبرامج لمصطفى حسنى وسمعتها ووجدت غيرت فيا جامد أوى .. وكنت بسجل وراه .. الدماغ بتتسى انما الورقة لأ! .. وأجمعهم فى كشكول خاص بيا .. الكشكول دا بقى كنز دلوقتى وأحلى حاجة فيهم إنه تجميعى وإخراجى .. وبعدين بدأت اتوسع بقى بعد مصطفى حسنى لناس تانية

ابتسم حازم لأنه تذكر أمر كشكوله هو الآخر

فأردف نور : وبعدها بفترة ربنا رزقنى بيك.. شاب جميل وأخلاق وبيحب ربنا

—ربنا يقدرنى وأبقى ملتزم

قال بضيق مصطنع : أنا مباحش كلمة ملتزم دى بحسها عنصرية أوى .. كلنا على الطريق ومحدث هيوصل لآخره أبدأ .. عشان محدش هيوصل لكمال الحبيب عليه الصلاة والسلام .. المهم بقى اننا نموت على الطريق وربنا راضى عنا ومنموتش على أى طريق تانى غير طريق ربنا

—ايه دا؟! .. يعنى أنا كذا ممكن أبقى على طريق الله؟ .. وأنا لسه فى الاول؟

—مفيش حاجة اسمها الاول .. لما تقول فى الاول معناها انك هتوصل لنقطة معينه وتقف انما احنا ان شاء الله مش هنوقف الا لما نبقى فى الجنه قدام ربنا .. وطول مانت عايش ومبتعملش حاجه حرام تبقى على طريق الله .. ولما بتعمل حاجات تحببك فى ربنا بتخطو على الطريق دا .. أهم حاجة إنك تعمل حاجات تحببك فى ربنا عشان تفضل متعلق بيه علطول .. دا أنت لو بصيت حواليك وحمدت ربنا على نعمة الام والبيت والامان تبقى بتحجب نفسك فى ربنا .. لو شوفت حد محتاج مساعدة وساعدته هتبقى بتحجب نفسك فى ربنا .. لأن من جواك هتسمع صوت بيقول ربنا دا جميل اووى لأنه بيحنن قلوبنا على بعض ويخلينا نساعد بعض .. وتبقى مطمئن بحبك لربنا وقربك منه .. والله يا حازم أنا معرفش أنا بقولك كل دا ليه بس حسيت إن ربنا كريم أوى إنه مدينى حد يسمعنى أطلعته مشاعرى والحاجات اللى بحس بيها

ابتسم حازم وقال بعطف : بجد إنت عسل أوى يانور ماشاء الله .. بحسك رقيق كدا.. مش زيينا

ضحك نور وقال : أنا طالع مع أخت بنت واحدة .. وكنت زمان بسبب صحابي وأروح أَلعب معاها هي .. فخذت شوية من رقة البنات والعيال كانوا بيتريقوا عليا ويقولوا عليا بنت .. بس دلوقتي حسيت بنعمة ربنا اني طلعت معاها ..

-الحمد لله إن إنت مش بنت .. شعر أشقر وعيون زُرق .. كنت هتعمل مشكلة فى الحته

-بطل تريقه ينفع ؟ .. מבحبش الهزار فى المواضيع دى (قالها بمرح) الحمد لله انى ولد طبعاً.. لو كنت بنت مكنتش هعرف أصلي فى المسجد براحتى وفى أى وقت .. يلا ياخويا روح على بيتكوا عشان تلحق العيدية قبل ما تخلص

-طب وانت هتعمل إيه ؟

ضحك وقال : هروح ألحق العيدية برضه

-طب قبل مانمشي كنت عايزة أسألك فى حاجة .. ، طأطأ رأسه فى خجل وقال : لو أنا بحلم إني بعاكس بنت أو بأذيها .. وأنا أعرف البنت دى .. دا بيبقى إيه ؟

-إنت بتغض بصرك عنها ؟

-اه والله بقيت بغض بصرى عنها من فتره .. وعمرى اصلا ما بصيت على بنات اصلا بس دلوقتي مبقيتش ابص فى وشهم خالص !!

ابتسم نور ابتسامة اربكت حازم وقال : تبقى اضغاث احلام .. متاخذش على الاحلام يا حازم .. كبر دماغك يعنى

فتحت منار عينيها بوهن وبدأت تبكى اقتربت منها والدتها ومسحت على رأسها بحنان وقالت : مالك يا منار ؟ ..
طميننى عليكى يا بنتى ؟

تهدت منار بقوة وقلبا يرتجف خوفا من أن تفضح سمية علاقتها بعمر .. نظرت لوالدها وقالت : اتخانقت مع سمية ياماما !

-ليه يابنتى إيه اللي حصل !!؟ .. ماكنتوا زى السمن ع العسل من شويه ؟

-اهو حصل اللي حصل بقى ياماما

دلف والدها وقال بابتسامه : أحسن برضه أنا مبحهاش وربنا يسامحنى

نظرت لوالدها الذى خانت ثقته بها بكسرة وطأطأت رأسها خجلاً من فعلتها .. اقترب منها ومسح على رأسها وقد أحس من كسرتها أن لموضوع عمر دخل فى الامر .. ابتسم وقال لها : انتى عملتى الصبح لما اتخانقتى معاها بس متعوديش على كدا ياختى .. ومش عايزك تصالحيها ولا ترجعى تكلميها أبداً .. خليكى مع هدير .. بنت كويسة ومحترمة وبتحبك أووى !

قالت بصوت مختنق : بس هدير بعيدة أووى يابابا ! .. ومش بتيجى هنا كثير ! .. وأنا مش عايزة أبقى لوحدى !

-إنتى مش لوحدىك .. أنا معاكى وأمك معاكى .. ومعاكى أهم وأغلى حد..ربنا .. ربنا اللي قادر يرجعها لك زى ما بعدكوا عن بعض

-يعنى أبقى لوحدى يابابا لحد ما ربنا يرجعها لى .. دا ان رجعت اصلا !!

-((وَإِنْ تُطِغْ أَكْثَرَ مَنْ فِي الْأَرْضِ يُضِلُّوكَ عَنْ سَبِيلِ اللَّهِ)) .. يعنى أكثر اللي حواليكى هيضلوكى .. تحبى تبقى ضالة ومعاكى ناس كثيرة تتخلى عنك فى أقل موقف .. ولا تبقى حفيدة النبى ومعاكى ربنا وصفوة من الناس هو هيختهارلك بعنايه ان شاء الله

هدأت منار قليلا من كلماته ونظرت له وقالت : تفتكر ربنا هيسامحنى على كل اللي فات ؟

-أيووا طبعاً .. ((إِنَّ اللَّهَ لَا يَغْفِرُ أَنْ يُشْرَكَ بِهِ وَيَغْفِرُ مَا دُونَ ذَلِكَ)). دا كلام ربنا مش كلامى .. يعنى تقدرى تفتحى معاها صفحة جديدة وتقوى الرابط اللي بينك وبينه وهو العبادة .. حببها يامانار .. عشان هى اللي بتتواصل بيها مع اللي بتحببه

-أنا بحبك أووى يابابا

احتضنها وقال : وأنا كمان بحبك أووى يامنار .. ، نظر لزوجته بطرف عينيه التى وضعت يدها فى خصرها وفتح ذراعه الاخر لها وقال بمرح :وبحك إنتى كمان يا حبيبتى .. ، ارتمت بين ذراعيه كالأطفال فى حضن عائلى حنون جمع العائلة بأسرها

دخل نور منزله وإبتسم حين رأى عمته عزة واقترب منها وقبل يدها وقال ببسمة : إزيك ياعمتمو وحشانى والله قبه بحارة وقالت : والله ليك وحشة يا بن الغالى .. عامل إيه ؟

رد ببسمة : الحمد لله تمام ياعمتمو

قالت ببسمة : مش تسلم على نسمة ؟

لاحظ نور وجود ابنة عمته بجواره قال ببسمة ووجه بالأرض : إزيك يانسمة عاملة إيه ؟ ..

ردت ببسمة : تمام يانور الحمد لله وانت ؟

-الحمد لله .. عن اذنكم ياجماعه جاى مش برا هل كان منمش من انبارح .. بعد اذنكم !

ثم اتجه بسرعة الى غرفته .. دخلها وأغلق الباب خلفه تحسس قلبه الذى تتلاحق دقاته بسرعة ..ابتسم بسعادة وقال : اللهم لك الحمد حتى يبلغ الحمد منتهاه .. الحمد لله هربت منهم قبل ما أتدبس فى تسليمه

-أكبر منى ياماما ومش محرم ليا .. والمفروض إنى محجبة ولا إيه ؟

-طيب يامنار على راحتك يابنتى .. بس الجو حر ومكنتش عايزاكى تبقي متضايقه من البتاع دا يعنى

-سيبنى على راحتى يامامتى .. المهم بقى ياست الكل .. عايزة أساعدك فى إيه ؟

وبعد مايقارب الساعة

“والله منور يا أخويا ”

“بنورك ياسارة والله .. أخبارك إيه يامنار ؟ ”

ردت ببسمة : تمام ياخالو

قالت سارة : أمال فىن عمر ؟!

قال معتذراً : معلى معرفش يجي والله .. هو بيقولكم كلكم كل سنة وإنتم طيبين ..

تبادلت معهم السلام والتحايا ودخلت غرفتها وارتمت على فراشها وأخذت تفكر .. “ هو مجاش ليه ؟! .. هو ممكن يكون مجاش عشانى ؟!! .. مش عايز يشوفنى .. يارب أنا بحبه بس مش عايزة أغضبك فيه ياررب بقى ريح قلبى أنا تعبانة عشان مشوفتوش .. أينعم كدا أريح عشان هقلع الاسدال وأقعد براحتى بس برضه كان نفسي أشوفه ”

نهضت ومسحت الدمعة التى تحركت فى عينيها ونهضت من الفراش خلعت الاسدال وارتدت طقم العيد ذو البنطال ورسمت الابتسامة على وجهها وخرجت ببسمة لتجلس معهم

وبعد العيد بيومين .. اتجه نور للمسجد لأداء صلاة العصر بصباحة حازم وأدا الصلاة وبعد أن سلم نور .. مد الجالس بجواره يده ليصافحه قائلاً : تقبل الله يانور

صافحه نور ببسمة : منا ومنكم إن شاء الله .. إزيك عامل إيه ؟

-تمام الحمد لله وإنت ؟

قال مبتسماً : بخير الحمد لله .. كل سنة وإنت طيب

-وإنت طيب يانور .. ، انتبه لحازم وقال : ازيك يا حازم ؟

رد حازم وكان بختلج صدره شئ من الضيق : تمام يا يوسف !

خرجوا سوياً من المسجد فقال يوسف بشئ من الاحراج لنور : أنا بقالى كام يوم بشوفك ونفسي آجى أسلم عليك بس كنت مكسوف منك ..

أشاح حازم وجهه فى الاتجاه الآخر كى لا يرى يوسف علامات الضيق على وجهه فلاحظ نور ذلك ورد بمرح : إنت كنت سالف منى فلوس ولا حاجة يا يوسف ولا إيه .. هات الربع جنيه اللي عليك يالا !

ضحك يوسف وكذلك حازم الذى لم يستطع ضيقه أن يتغلب على فكاهاة نور فقال يوسف ببسمة : مش هديك حاجة .. اللي فات مات يا صاحبي

ضحك ثلاثتهم وقال حازم : أنا بيتى جه بقى يارجاله .. سأخلعن أنا .. ألقاك فى صلاة المغرب يا حج نور

اتجه حازم الى بوابته ثم التفت لنور الذى لم يتحرك وينظر له رافعاً حاجب فقال حازم وهو يضحك بشدة : متفرد بصابتي .. متفرد بكأبتي ..

ضحك نور وقال : الله يفتح عليك بلاش مطران بدل ما أطلع عليك الأيام

ضحك حازم ورفع كفه مشيراً لهما أنه سيرحل .. صعد لشقته فنظر نور ليوسف الذى قال بخوف : هو دا منهجكوا ؟

-أيوا

قال وقد زاد خوفه : شكله صعب أوى !

رد نور ببسمة منحت يوسف بعض السلام : مفيش حاجة إسمها منهج صعب ومنهج سهل .. فى حاجه إسمها أنا بذاكر فيزيا مثلاً اذا الفزيا سهلة .. أو أنا مبذاكرش فيزيا اذا الفيزيا صعبة .. أصله بيقى نفس الامتحان وناس بتقفل وناس ربنا يعينها بتطلع بالمادة .. بس اللي بيقفلوا دول أقنعوا نفسهم إنها سهلة وهتقفل ..، نظر ليوسف الذى ينصت باهتمام بالغ وأردف : إذاً هى بتقفل

ابتسم يوسف ثم طأطأ رأسه وقال باحراج : إنت مش زعلان منى ؟

قال نور ببسمة وقد فهم ما يقصد : لأ طبعاً مش زعلان منك يا يوسف

-بجد يانور ؟ .. طب انت زعلان من بابا ؟

رد بنفس بسمته : لأ طبعاً مش زعلان من باباك .. دا بابايا أصلاً يا يوسف .. المهم بقى ياباشا هتيجي فى المغرب ولا إيه ؟

-بصراحة مش عارف .. أنا جيت انهاردة بس عشان أكلمك

قال بلهجة حانية : ربنا يخليك ليا .. يعنى انت جيت عشان تقابلنى وتكلمنى عشان بتحبى .. امال بقى هتعمل إيه بقى عشان تقابل حبيبك الاكبر والاعظم .. والله المثل الأعلى طبعاً يا يوسف

لم تظهر عليه معالم الاقتناع ولكنه ابتسم وقال : هحاول آجى ان شاء الله يانور ..

قال نور مبتسماً : ربنا يسهل ان شاء الله يا يوسف باشا .. بس برضه أنا عايز أشوفك .. ليش دعوة ياخويا

ضحك يوسف وقال : حاضرر يانور هاجى ان شاء الله

بعد عدة أسابيع وقت صلاة الفجر .. فتح الحاج محمود عينيه مع صوت الاذان نهض من الفراش بتكاسل .. وغلس وجهه وتوضأ واتجه لغرفته كي يصلي .. أحس بحركة فى غرفة يوسف اتجه نحوها وطرق الباب بخفة وفتحه .. فتح يوسف وخرج بعجلة وهو يقول : ازيك ياابا .. معلش مستعجل لازم أنزل لحسن إتأخرت !

قال بتعجب : رايح فين !؟

-رايح أصلي فى الجامع

ابتسم الوالد بحنان وقال : تحب آجى معاك ؟

رد بسعادة بدون تفكير : ياريت ياابا

ثم تذكر أمر نور فتلاشت البسمة من على وجهه ولكن والده لم يلاحظ فقال ببسمة : ماشي يلا بينا يا يوسف

تحرك يوسف برفقة والده وقلبه يكاد يخترق صدره .. يخاف من المواجهة بين والده ونور .. كان يخشى أن يفقد صداقة نور الذى سعد جداً بحصوله على صديق مثله .. ظل قلبه ينبض بشدة حتى وصلا للمسجد ولما دخل جال بعينيه فى المسجد ولما لم يجد نور انفرجت أسارير وجهه رغم قلقه لعدم وجود نور .. اقترب منه حازم وصافحه هو والحاج محمود ولم يشأ حازم الذى لا يعلم شيئاً عن غياب نور أن يسأل يوسف عنه لوجود الحاج محمود معهم ..

أقيمت الصلاة واصطف المسلمون صفا واحداً متساوياً كالبنيان المرصوص .. وشرعوا يصلون بدون نور ..

ركع الأمام ومعه المصلون دلف النور المسجد واصطف معهم وكبر تكبيرة الاحرام وركع معهم وأكمل الصلاة معهم وسلم معهم لأنه ركع معهم .. اقترب منه حازم واحتضنه بشدة وقال : قلقتنى عليك يا نور !! إيه اللى خلاك تتأخر

كدا !؟

-معلش والله يا حازم حبيبة كانت تعبانة أووى وسخنة جدا وفضلت جنبها بدل ماما أعملها كمادات طول الليل وقبل
الفجر بنص ساعة نمت .. والحمد لله صحيت ولحقت الصلاة الحمد لله

قال حازم بتوتر : الحمد لله .. ألف سلامة على حبيبة يا نور وان شاء الله تبقى كويسة

تنهد نور بقوة وقال : يارررب يا حازم لحسن هي بتسخن علطول وأنا قلقان عليها أووى !

“سلامتها يانور ” .. جاء الصوت من خلفه فالتفت ليرى الحاج محمود مبتسماً .. ارتبك نور وطأطأ رأسه في خجل
وقال : الله يسلمك يا حج .. حضرتك بخير؟

أحس بسيل من المشاعر تعتمر قلبه تجاه ذلك الشاب المهدب وأحس أن صلاة ابنه بالمسجد لها علاقة بنور ..
فابتسم وقال : الحمد لله يانور .. مش هتسلم على عمك ولا إيه يانور ؟

مد نور باحراج يده ليصافحه فجذبه الحاج محمود الى أحضانه وقال بحنان : وحشتنى يا نور أووى فى الكام أسبوع
دوول !

ارتاح نور بين ذراعيه وقال : أنا آسف والله يا حج !

تذكر هدير فترك نور وقال بصوت مختلف قليلاً عما سبق : حصل خير يانور

لاحظ تغير نبرته فنظر لحازم وقال : بعد إذن حضرتك لازم نروح بقى عشان عندنا مذاكرة .. السلام عليكم

ثم أشار ليوسف بكفه مودعاً وأخذ حازم ورحلا .. تحرك يوسف ووالده لمنزلهما فالتفت الحاج محمود ليوسف وقال
: هو إنت بتقابل نور ؟

رد مدافعاً عن نور : أيوا بابا .. دا شاب كويس أوى وأنا عايز أبقى زيه ماشاء الله عليه شاطر أووى ومؤدب ويعرف
ربنا كويس ..

رد بشئ من الفتور : ربنا يديله على قد نيته بقى يا يوسف

سأله بفضول : ألا بالحق إنت مشيته ليه من عندك؟؟

-مش لازم تعرف يا يوسف !! .. ومتسألنيش تانى !!

عاد حازم لمنزله ودخل غرفته ووقف أمام النافذة ورفع يده وتنهى بقوة وقال : الحمد لك يا الله حتى يبلغ الحمد منتهاه .. يارب إصلاح حالى وإهديني ديماً ليك يارب .. يارب أفضل معاك ديماً وقريب منك .. يارب إصلاح حال منار يارب .. واهديها ليك يارب .. يارب صحيحها تصلى دلوقتي وقربها منك يارب لو ليا خير فيها ارزقني اياها

فتحت منار عيناها قامت وتوضأت وصلت الفجر ورفعت يدها للسماء ودعت لعمر كثيراً أنه يهديه الله ويصلحه ويرزقها اياه فى الحلال ..

“ايه يا عمر صاحي بدرى كدا ليه ؟ ”

رد ببسمة : صحيت أصلي الفجر يا بابا .. كنت عايز حاجه ؟

جلس الاب بجانبه وقال بجديية : هو إنت بتكلم منار ؟

ارتبك عمر وقال : آه يعنى .. عادى يا بابا

-طيب ..

-فى حاجه يا بابا ؟

-لأ بسألك عادى يعنى ياعمر .. أصلى قلقان عليها عشان الثانوية العامة وكدا وعارف ان انتو صحاب وعلطول
بتتكلّموا فكنت عايز اطمئن عليها منك .. بس كدا

-ماشي يابابا .. بس احنا مبتتكلّمش بقالنا فترة اصلا يابابا فمعرّش إيه اخبارها بس انا بدعيّلها علطول ..

جاء الوالد يخرج من ابنه ولكن عمر قال بشئ من الاحراج : بابا ! .. كنت عايزك فى حاجه كدا ؟

عاد الوالد بعد أن أغلق باب الغرفة وجلس بجوار ابنه وقال : خير ياعمر ؟

استجمع قواه وقال : بصراحه انا عايز أتجوز يابابا !

ابتسم الاب وقال : ماشي ياعمر .. بس انت لسه فى الكليه .. ؟

طأطأ رأسه بنججل فأردف والده وهو يبتسم من مشهد ابنه : بس مفيش مانع من ربط كلام وانت لسه بتدرس

قال بأمل : بجد يابابا ؟

هز رأسه بالاثبات فتهلل وجه عمر فقال والده وهو يبتسم بمكر كأنه يعرف اجابة سؤاله : ومين سعيدة الحظ دى
بقى ؟

قال بنججل : منار !

ابتسم الاب وقال : على بركة الله منار بنت محترمة وتمدنية وبنيت عمّتك كمان

قال عمر وكأنه لا يُصدق نفسه : بجد يابابا !؟ .. يعنى إنت موافق ؟

-طبعا موافق بس المشكّلة فى العروسة بقى .. هتوافق ولا إيه ؟

قال بثقة : لأ متخافش يابابا هتوافق ..

تظاهر وكأنه يظبط ربطة عنقه الغير موجودة من الاساس وقال : ابنك جامد أووى يا حج

ضربه بخفة على رأسه وقال : طيب ياخويا إما نشوف هتوافق ولا هتترفض ويبقى شكلك وحش

-خلاص يبقي نسأل عمتي ونجس نبضها

قال بمرح : نبض عمته ؟ !!

-عمتي مين ياعم ؟! .. عمتي أصلاً متجوزة مينفعش .. أنا بتكلم على منار وركز معايا شوية

-ماشي يا عمر .. هبقى أتكلم مع عمته وأسألها بس يكون في علمك مفيش أي حاجه هتحصل حتى لو قعدة
تعارف قبل ماهي تخلص ثانويه عامه .. متفقين ؟

-ماشي يا حجوج ربنا يخليك ليا

-ربنا يكرمك يا بنى ويخليك ليا ويفرحنى بيك

قبّل عمر يده وهو بيتسم بسعادة

صعد نور الى شقته واتجه نحو غرفة حبيبة .. طرق الباب بخفة ودلف الى داخلها .. حين رأته ابتسمت واعتدلت
في جلستها .. اقترب منها وقبلها بين عينيه .. وقال بحنان : السخنية عامله إيه ؟

قالت بوهن : الحمد لله يا نور .. تعالى اسندنى عشان أقدر أقوم أصلي الفجر

أسندها بالفعل وساعدها حتى توضأت وصلت الفجر وهو يراقبها بعينه وقلبه خائف أن يغشى عليها وهي تصلي ..
وعندما فرغت من الصلاة ساعدها في النهوض وأجلسها في الفراش وبدأ يضع الكمادات على رأسها كي تزول
الحرارة .. مدت يدها اليه بوهن ومسحت على رأسه وقالت بصوت متهدج : أنا آسفة يا نور

قال مبتسماً والتوتر واضح على وجهه : بس يا حبيبة مبحبش العبط بتاعك دا !!

-بجد يانور أنا حمل ثقيل أوى عليك ..

ضغط على يدها برفق وقد شعر من كلماتها بشعور غريب يراوده لأول مرة وتردد في ذهنه عبارة واحدة فقط "ماذا لو فقدتها!!؟" .. حاول الابتسام وقال : خسي شوية وهتبقي حمل خفيف

قالت وهي ترتجف : أنا سفروثة أصلا يانور حرام عليك

ضحك نور رغم قلقه على أخته ودفعها دفعه خفيفة وقال مماًزحاً : وسعى يابت خدينى جنبك بدل مانتى واحدة السرير كله كدا

تعالص أصوات ضحكاتهم .. دخلت والدتهم على أصواتهم وقالت بيسمة : ماشاء الله عليكموا ياولادى .. شكلكوا يفرح

ابتسم كليهما فى خجل من اطراء والدتهما فأردفت : ربنا يشفيكى ويعافيكى ياحببىة ويخليكوا ليا يا ولادى

وفى الصباح الباكر استيقظت منار وغسلت وجهها ورتبت غرفتها وفتحت حسابها على الفيس بوك والتي لم تفتحها منذ أيام واتسعت عيناها حين قرأت " إزيك يامنار ؟ .. كل سنة وإننى طيبة بمناسبة العيد اللى كان من شهرين دا وبمناسبة العيد اللى قرب .. بابا كان عايزنا نيجوا عندكم فى العيد بس أنا مرضتش عشان مذاكرتك .. ربنا معاكى إن شاء الله والسنة الجاية تكونى فى المكان اللى تتمنيه "

ارتبكت منار ولم تدرى ماذا عليها أن تفعل؟ .. هل تجيبه أم لا ؟ .. إذا لم تجبه قد لا يأتى كالمرة السابقة وهى تتمنى بشدة أن تراه ولو عن بعد .. لقد تحملت شهرين دون محادثته ولكنها تحبه جداً .. بدأت الدموع تنهمر من عينيها وهى تفكر بعمق " أرد عليه ولا لأ؟! .. هو مقلش حاجة غير انه بيعيد عليا وبس ! .. أنا هرد عليه بس بسيط بسيط كدا وهقفل علطول "

أمسكت هاتفها وكتبت " وانت طيب يا عمر تنوروا فى أى وقت ! "

تفاجئت به يرسل لها بعدها بثوان معدودة "عايز أقولك على حاجة ؟ "

تسارعت دقات قلبها وكتبت " خير ؟ "

"أنا .. أنا هكلم عمتو فى العيد الجاى وأقولها إني عايز أتقدملك ! "

انتفضت منار وسقط الهاتف من يدها حين قرأت كلماته وأخذ يتردد فى بالها " إيه اللي هيحصل لو اتقدملى فعلا ! .. إيه اللي هيحصل لو بابا وماما عرفوا انى كنت بكلم عمر وبجبه ع الفيس ؟!!! .. أنا طول عمرى بحلم باليوم اللي هيتقدملى فيه بس مكنتش عارفة انى هبقى مرعوبة وخايفه منه كدا !! .. مانا لومكنتش غلطت من الاول واتنازلت وكلمته كان عمرى ما هبقى خايفه دلوقتى !! .. ياررب بقى انجدنى أنا محتاجك أووى .. اهتز هاتفها على الأرض مُعلنًا وصول رسالة أخرى منه ..

"روحتي فين يامنار ؟! .. أنا قولت حاجة زعلتك ؟ والله أنا آسف ومكنتش قصدى أضايقك !.. بابا قالى أصلا مقولكيش أى حاجة عشان مشغلكيش ولحد ما نكلم عمتو بس انا كنت عايز أعرفك .. كنت فاكرك هتفرحى بس شكلى طلعت غلطان .. أنا آسف تانى ! .. وعلى فكرة مش لازم تردى "

ابتسمت وردت عليه بدون تفكير وقد نجح شيطانها أن يخدعها ويجعلها تتجاوب معه " أنا مزعلتش ولا حاجه ومقولتش حاجه غلط تتأسف عليها .. "

ابتسم حين رأى ردها وكان قد يأس من أن ترد عليه .. ، كان قد عاهد نفسه ألا يحدثها كثيراً وأن يكتفى بإخبارها بما عزم عليه من خطبتها من والدتها .. ولكن شيطانه زين له الحديث معها .. واشتعل الشوق فى قلبه لتلك الايام الخوالى التى كانا يتحدثان فيها الى صباح اليوم التالى.. تنهد بقوة وقال لنفسه " هكلمها حبة صغيرين وهقفل علطول "

علا صوت رنين هاتف منار بنغمة يارب لحمزة نمرة .. نظرت لهاتفها بوهن من شدة البكاء .. تهلل وجها حين رأت

اسم هدير ردت ببسمة : إزيك يا هدير يا ندلة ياللى سيانى لوحدى !

ضحكت هدير وقالت : طب السلام عليكم الاول يا اوختى ولا إيه ؟

-وعليكم السلام .. جيتى فى وقتك ! .. أنا بنهار يا هدير

تعجبت هدير من أسلوبها المرح وقالت : بتكلملى جد ولا هزار ؟

قالت بأسلوب مرح : آه والله .. إدعيلى جامد أووى بالله عليكى

-فى حاجة يامنار؟! .. أنا بدأت أقلق عليكى ؟

ظلت منار تضحك بهستيرية وقلق هدير يتزايد مع علو ضحكاتها

قالت هدير بحزم : منار ! فيكى إيه؟!!

ردت وهى لازلت تضحك : ولا حاجة يا هدير .. بشتغلك شوية !

قالت غير مصدقة : بجد يا منار ؟

قالت محاولة أن تخفى ألمها وراء نبرتها المرحية : أيوا يابنتى أنا الحمد لله بخير .. إبقى إدعيلى جامد يا هدير .. يلا

سلام !

قالت بتعجب : هو أنا لحقت أكلمك؟!!

-كفاية كدا عشان رصيدك .. سلام !

اتصل حازم عدة مرات على هاتفه ولكنه لم يجب .. وذهب حازم لأداء صلاة العصر بالمسجد فلم يجد نور !! .. ساوره شعور بالقلق حياله فنور لم يفوت صلاة بالمسجد منذ أن عرفه ! .. ذهب حازم لمنزله وأخذ حقيبة كبيرة وجاء ينزل ولكن والدته أوقفته قائلةً : رايح فين يا حازم ؟

ارتبك حازم وحاول أن يخفى الحقيبة خلف ظهره ولكنها كانت كبيرة كفاية لتراها الأم .. قال حازم : رايح لنور فى البيت !

-طب إيه اللي معاك دا !؟

حاول أن يرتب كلماته كى لا يكذب وفى نفس الوقت لا تعرف والدته ما معه .. : دى حاجات تلزم نور ياماما

قالت ببسمة : ينفع أعرفها ؟

رد بشئ من الاحراج : ينفع متعرفيهاش ؟

ابتسمت وقالت : ينفع يا حازم .. بس متأخرش

ثم تحركت نحو المطبخ فترك حازم الحقيبة واندفع خلفها وقبل يدها وقال برجاء : بالله عليكى متزعليش منى .. بس مش عايزك تعرفى أنا واخدله إيه .. مش عشان حاجة والله .. متزعليش منى بقى ياماما

ابتسمت مما فعله ولدها ومسحت على رأسه وقالت : مش زعلانة منك يا حبيبي .. روح يا بنى ربنا يسهلك ويوقفلك ولاد الحلال ويرزقك ببنت الحلال عشان أطلع عينها

ضحك حازم وقال : ركزى فى الدعوة دى ياسحورة بس لحد بنت الحلال وخطين حمر عشان أنا زملكاوى

صاحت بفرع متصنع : زملكاوى !! .. برا بيتى ! .. لا إنت ابني ولا أعرفك

ضحكوا واستأذن حازم ليذهب لنور وأخذ الحقيبة وخرج وبمجرد خروجه ساوره شعور بالقلق حيال صديقه الذى لا يجيبه .. وشعر بالاحراج لأنه سيذهب له بدون موعد سابق أو بدون حتى أن يعلمه

وصل لعمارتة وصعد السلالم وقف أمام بابيه .. تردد للحظة وفكر فى أن يرجع .. مد يده ورن الجرس الباب

مدت يدها بوهن ومسحت قطيرات العرق من على وجهها .. نهضت بوهن وقد أثقلتها حرارتها المرتفعة .. ارتدت
إسدالها وتحركت نحو الباب .. فتحته ببسمة وفي لحظة تلاشت بسمتها ..

رجع حازم خطوة للخلف ونظر للأرض وقال باحراج : هو نور هنا ؟

ردت بوهن : لأ

ارتبك وقال : آسف انى جيت من غير معاد بس هو مبيردش عليا .. أنا جايله الشنطة دى لما يجي إبقى قوليله
حازم جابلك دى .. وفي فى الجيب ميمورى

ترك الحقيبة على الأرض وقال : بعد إذنك

تحرك الى الأسفل ورفعت هى الحقيبة الثقيلة بوهن وأدخلتها الى غرفة نور وعادت الى فراشها وتدثرت جيداً بالغطاء
ونامت

سار حازم الى منزله وفى الطريق كاد يصطدم بشخص .. ارتفع صوت رامى مماًزحاً : إيه ياعم هتدوسنى كان
نظر حازم بتعجب لرامى الذى يمزح معه رغم شجارهما سوياً منذ مدة .. رد حازم بفتور : آسف يارامى .. عن اذنك
!

أمسكه رامى من ذراعه وقال : أنا آسف والله يا حازم .. حقتك عليا يا صاحبي

حاول الابتسام وقال : حصل خير يارامى

رد رامى ببسمة : متزعلش منى بقى يا حازم .. قلبك أبيض بقى يازوما

ابتسم من طريقة رامى فسأله: اخبار المذاكرة إيه يارامى ؟

-الحمد لله يا صاحبي .. ادعيلي بقى أدخل هندسة زى ما فى نفسي

-يارب يا رامى ..

-أنا خارج أتفسح كمان كام يوم تيجي معايا ؟ .. يعنى أنا وانت والعيال ونظيط زى زمان بقى

-معلش يارامى مش هعرف آجى .. عندى مذاكرة كثيرة ومش هينفع أخرج ..

-طيب براحتك .. بعد اذنك بقى هروح البيت .. سلام

تحرك رامى نحو منزله وهو يحمل فى نفسه ضيقاً .. رد على مكالمة وردته : أيوا يا سمية ! .. لأ حازم موقفش ييجي ! .. متحرقيش بقى صور المحادثات اللي معاكى خليها مرة تانية يكون حازم جاى .. لأ طبعاً مشكش فيا خالص ! .. انا جامد برضه مش أى حد .. فكرة إيه اللي عندك؟! .. يانهار إسود !! .. إيه الدماغ دى !! .. دى أجمد ميت مرة من اللي كنت ناوى أعمله ! .. خلاص ياباشا إبدأ التنفيذ ..

وبعد العشاء ذهب "على" والد منار الى غرفتها وطرق الباب بخفة ودلف منه .. كانت جالسة على فراشها تضم ساقيها الى صدرها وتحيطهما بذراعيها .. كانت شاردة الذهن حتى أنها لم تلاحظ دخوله .. اقترب منها ووضع يده على كتفها..صاحت بفرح فقال لها : متخافيش يا حبيبتى دا أنا .. مالك ؟

تحركت الدموع فى عينيها فضمها اليه وقال بخوف : مالك يا بنتى !؟

انفجرت باكية بين ذراعيه وعلا صوت شهقاتها .. وتعلقت بعنقه وهى تبكى كالأطفال .. ظل ضامها اليه عدة دقائق ثم ابتعدت هى وقالت وهى تبكى بحرقة : هتسامحنى يابابا ؟

أحس من لهجتها أن لعمر دخل فى الأمر .. فضمها اليه مجدداً وقال : أنا عمري ما هزعل منك أبداً يا بنتى

-أبدأ يا بابا ؟

-أبدأ يا منار .. عمري ما هزعل أبدأ منك

-بابا أنا .. أنا كنت بكلم عمر على الفيس وقالى إنه بيحبني وأنا كنت بجاريه فى الكلام علطول يا بابا ! .. انا خنت ثقتك فيا !

ابتسم الاب ابتسامه لاشت ألمها وقال : لسة بتتكلموا ؟

مسحت دموعها وقالت : لأ !

مسح على رأسها بحنان وقال : الحمد لله إن إنتى بعدتى عن الحرام يا منار .. ربنا يرزقك فرحة الحلال اللى مفيش زيها فرحة

عاد نور لمنزله برفقة والدته بعد العشاء واتجه لغرفة أخته التى أخبرته بما جاء به حازم .. دخل غرفته وفتح الحقيبة فاذا بها مذكرات المدرسين الذى يأخذ حازم برفقتهم ولكنها مصورة .. وكثيرة جدا .. ابتسم بشدة بسبب ما فعله صديقه من تصوير مذكرات الدروس له .. أخرج الميمورى وفتحه فوجد به تسجيلات لشرح المدرسين فى جميع المواد .. منظمة ومرتبطة ومجمعه فى ملفات خاصه بكل مادة .. تركهم نور وهروا الى هاتفه الذى قد نساها بالمنزل واتصل بحازم وقال له : أنا بحبك أووى يا حازم

اتسعت ابتسامه حازم وقال : وانا كمان يا نور

-انا مش عارف اقولك إيه بصراحة ؟

-متقوليش .. اقد ذاكر وانت ساكت .. كنت فين يا ض ؟

-ياض؟! طيب مقبولة منك .. كنت مع ماما عند خالي وناسي الموبيل هنا

-ماشي يا نور .. وأنا آسف والله إني جيت من غير معاد بس إتصلت ببيك كثير أوى وإنت مردتش وقولت هقابلك

بالمسجد بس انت مجيتش فقلقت عليك اوى بصراحة وخوفت ليكون حصلك حاجة

-لأ الحمد لله أنا بخير .. شكرا بجد يا حازم .. أنا مش عارف أشكرك إزاي

-بطل عبط يا نور بقي ..

وفى صباح اليوم التالي

“ أنا آسفة والله يا منار عشان قولتلك اللي قولته فى العيد .. وعمري ما كنت بتجسس عليكى ولا باخد صور

للمحادثات بتاعتك مع عمر ! .. أنا قولت كدا بس عشان اتعصبت ساعتها وخلص ! “

قالت بصوت مختنق : بجد يا سمية ؟

-آه والله بجد يا منار.. أنا آسفة تانى

ابتسمت منار وقالت بفرحة : بجد يا سمية إنتى مش عارفة إنتى فرحتينى قد إيه

قالت بابتسامة خبيثة : ربنا يخلينا لبعض يا حبيبى

وأكملا حديثهما بسعادة فقد نسيت منار كل ما يحزنها من سمية وعادات تحادثها كالسابق ..

مرت عدة شهور ابتعدت منار خلالهم تماماً عن عمر .. وهو كذلك فقد توقف عن ارسال الرسائل لها .. وأخبر عمته بحبه لمنار وطلبت منه ألا يخبرها الا بعد إنتهاء الثانوية العامة ورحب عمر بشدة بذلك لما بدى من عمته من الموافقة عليه .. انتظم نور وحازم فى دراستهما وكذلك حبيبة التى درست باجتهاد .. وانتظم يوسف فى دراسته وفى الصلاة بالمسجد وبدأ يحضر دروس حفظ القران وتفسيره برفقة نور وحازم .. والحاج محمود يلاحظ التغير الواضح على تصرفات ابنه منذ أن رافق نور .. وكان كثيراً يرق لنور ويتمنى لو يعيده للعمل برفقته ولكنه كان يتذكر هدير دوماً وهى تبكى فيتراجع فى امر اعادته .. عادت سمية ومنار صديقتين قريبتين كالسابق ولكن سمية كانت دوماً تخبر منار بأنها توقفت عن مقابلة رامى وهذا عكس ما كان يحدث ! .. ظلت العلاقة بين منار وهدير وطيدة وكانت منار دوماً تشعر بالراحة والسعادة حين تتحدث مع هدير .. فقد كانت تمنحها الأمل دوماً وتشجعها دوماً على القرب من الله وشجعته على الذهاب الى دار لتحفيظ القران اسبوعياً وبالفعل ذهبت منار وكادت تطير من الفرحه حين أتت حفظ اول جزء من البقرة فى شهرين فقط

تبقى شهر فقط على امتحانات الثانوية العامة .. ذهبت منار لآخر مرة الى الدار كى تودعهم حتى تنهى امتحاناتها .. خرجت بجيباتها الجينز والقميص الوواسع يعلوها وتلك الطرحة التى تغطى كتفيها .. جلست معهم قليلاً فى الدار وسمعت ما عليها من حفظ وأخذت ما ستحفظه الى نهاية الامتحانات وقامت لترحل ولكن صاحبة الدار طلبت منها أن تبقى قليلاً .. وافقت منار وظلت تستمع الى غيرها من الفتيات الذين يتلون القرآن بأصواتهم العذبة .. دخلت صاحبة الدار الى مطبخ الدار ثم خرجت وهى تحمل بيدها "تورته" عليها قطعة عريضة من الشكولاته مكتوب عليها بالكريمة " أهل الله وخاصته "

وانتظرت الى أن فرغت الفتيات من التسميع ثم وضعتها على الطاولة فى المنتصف وقالت بصوت واضح تملؤه السعادة : إحنا اتعودنا نعمل حفلة للبنات اللى بيحفظوا القران كله بس انهاردة احنا عاملين الحفلة لبنوتة جميلة بجد .. رغم انها ثانوية عامة بس فضلت تيجي وتحفظ ومهماش كلام الناس انها هتتعطل ! .. انهاردة عاملينها

حفلة عشان تشجع على الامتحانات اللي كمان أربع اسابيع .. بجد يامنار انتى بابتسامتك بتشيلى الحزن اللي جويا .. وبتتمنى ليكي نجاح باهر

ارتفع صوت ضحكات الفتيات وقالت إحداهن : باهر ولا ماهر ؟

ضحكن مجدداً وقالت صاحبة الدار : بتريقوا عليا عشان من أيام الزمن الجميل يابنتى دى اسمها شياكة الحديث ثم أخذت تضربهن بخفة وهن يهربون منها ويضحكون ..ومنار تبتم بشدة ولا تصدق ما يحدث حولها .. اقتربت منها صاحبة الدار وطبعت قبلة على جبهتها وقالت : رينا معاكى يامنار يا حبيبتي وطول مانتى عايشة عشانه هتعيشي بسعادة وراحة وعلطول

ارتفع صوت حبيبة قائله : يلا يامنار ادخلي فى الامتحانات شمال .. احنا عاوزين الكاس ياماما .. وحننا هنقف وراكى ونشجعك " go منار go ! "

ضحكوا جميعا من أسلوب حبيبة المرح .. اقتربت حبيبة من منار وأخرجت كيساً من حقيبتها وناولته لمنار .. فتحته منار وصاحت صيحة طفولية : الله ! .. الخمار الماليزي اللي نفسى فيه

احتضنته بشدة وأخذت تقفز فى مكانها وسط ضحكات الفتيات .. هرولت الى المرآه وخلعت طرحتها ووضعت على رأسها وساعدتها حبيبة وعلمتها كيف تلفه لتراه عليها ..

ارتدته منار وهى مبتسمة بشدة ونظرت للمرأة وقالت بفرحة : الله حلو أووى

قالت حبيبة ببسمة : مغطى الكتف والصدر وايدك لحد الكوع وزى العسل وممكن تطوليه عن كدا كمان

احتضنت حبيبة بشدة وقالت بسعادة : متشكرة أووى يا حبيبة إنتى بجد جدعة أووى

ابتسمت حبيبة وقالت : أنا بحبك أووى يامنار .. اقلعيه بقى يامنار ولما تفررى تلبسيه قوليلي وانا هنزل معاكى
ونجيب الالوان الى انتى عاوزاها

-لأ مش هقلعه ! .. أنا هفضل لابساه علطول

اتسعت عينا حبيبة وقالت : إيه دا ؟! .. بجد ؟!

-أيوا بجد

-طب وباباكي ومامتك ؟ .. مش لازم تقوليلهم الاول ؟

-هقولهم لما أروح بس وأنا لابساه .. متضيعيش فرحتى بيه بقى

-ماشي يامنار .. ربنا يفرحك ديما

عادوا الى رفيقاتهم .. بعض من هنا منار بالخمار والبعض الاخر لم يعجبهم لأنه يعطيها سناً كبيراً ونصحوها بأن تنوع
بينه وبين الطرح العريضة وتقبلت كلماتهم ببسمة أعرض

تناولوا التورتة سويا وغادرت منار برفقة حبيبة وبينما هم فى الطريق .. قالت منار لحبيبة : بجد يا حبيبة أنا ربنا كرمنى
بيكى لما اتعرفت عليكى هنا فى الدار

ابتسمت حبيبة بخجل بينما أردفت منار : بصراحة إنتى وواحدة صحبتي كمان بتشجعونى أووى عشان أبقي أحسن
.. عمري ما تخيلت إن فى حد ممكن يكون كويس كدا ويساعدنى كدا ! .. بس برضه حاسة انى مقصره علطول ..
كل ما اخذ عهد مبقدرش أنفذه للآخر وبرجع تانى .. بيجيلى فتور غريب وبزعل أوى لما مبقدرش أوفى بعهودى مع
ربنا فبطلت أوعد ربنا بحاجة لأنى بضعف

ابتسمت حبيبة وقالت : لو انتى بتعملى 5 حاجات غلط واخذتى عهد تبطلى ال 5 .. بس بطلتى 2 بس من ال 5 ..
انتى كدا خسرانه ولا كسبانة ؟

قالت : خسرانة طبعاً عشان موفتش بعهدى !

-بس يامنار ال5 حاجات بقوا 3 بدل خمسة.. يبقى انتى كدا خسرانه ولا كسبانه ؟

ابتسمت منار لانها فهمت ما ترمى له حبيبة وقالت : كسبانه

-هتشتى بقى ال3 دول بحيث ميزيدوش وبعدين تاخدى عهد انك تبطلهم وبالفعل هتبطلهم لانك هتبقى اتشجعتى

وقدرتى تبطلى 2 قبل كدا ف المرة دى هتبطلى تلاته

-طب آخذ قرار بايه دلوقتى ؟

ابتسمت حبيبة وقالت : قررى تحبى ربنا يامنار تحببه بالاعمال اللى بيحبها بالطريقة اللى بيحبها ..، ابتسمت منار

فأردفت حبيبة : إيه رأيك أبعثلك برنامج أحبك ربي ؟

-موشي ..

دخل نور الى منزله .. نادى حبيبة فلم تجبه فعرف أنها لم تعد بعد من الدار .. دخل غرفة والدته كى يطمأن عليها

.. وجدها ممددة على الفراش فهمس فى أذنها : أنا جيت ياماما

ولما لم تجبه علم أنها نائمة بعمق فلم يرد أن يوقظها .. قبّل يدها ولكنها كانت باردة كالثلج ! .. أحس أن قلبه

ينتفض .. نظر لها وقال " لأ ! .. بالله عليكى متخضنيش ! .. أنا مش حمل هزار ياماما ! "

لكنها لم تستيقظ رغم صوته المرتفع .. هزها من كتفها برفق ولكن لا إستجابة ! .. بدأ يهزها بقوة وهو يقول "

إصحي يأمى بالله عليكى متعمليهاش فيا أنا وحبيبة ! .. هتسيبها لمين دى ملهاش غيرك !! .. إصحي يلا بقى قبل

ماتيجى عشان متخضش عليكى ! " .. بدأت دموعه تنهمر حتى سألت على وجهها .. اقترب منه وأخذ يقبله بحرارة

.. وهو يبكي .. أخذ ينطق الشهادتين .. وأحس بالغرفة تدور من حوله !! .. ماذا سيفعل؟! كيف سيخبر حبيبة بأن والدتهما لن تبيت معهما منذ الليلة ! .. كيف سيتصرف ؟ .. كيف ستُغسل وتدفن؟! .. انهار على الارض باكياً واضعاً وجهه بين كفيه لا يدري ماذا يفعل !! ..

ظل على تلك الوضعية عدة دقائق حتى سمع طرق على الباب .. قام يجر قدماه بتثاقل لا يجد ما يقوله لأخته .. مسح دموعه وحاول أن يتماسك وفتح الباب بوهن ولما رأى ابتسامتها ابتسم تلقائياً وكأنه قد نسى العالم بأسره.. قالت بمرح : إيه يا عم مش هتعديني ولا إيه ؟

وفي لحظة عاد للواقع وتلاشت بسمته .. حاول أن يُظهر ثبات فقال: لأ مش هعديكي ! .. مش عايزين انهاردة ! ابتسمت ووضعت يدها في خصرها وقالت بغرور مصطنع : أنا ألف بيت يتمناني !على فكرة .. ، ثم تكلمت بجدية : عديني بس يا عم أستأذن من ماما أروح مع واحدة صحبتى البيت .. اخلص عشان البت واقفة تحت ..

جاء بباله فكرة فقال بجدية : خلاص روحى وأنا هبقى أقول لماما متوقفيش صاحبتك تحت -بجد؟! .. شكرا أووى يانور وهى والله مؤدبة ومعندهاش إخوات ولاد و ..

قاطعها : متسييهاش تحت بقى يا حبيبة يلا روحيلها !

ابتسمت وهرولت الى الاسفل فى سعادة بالغة أغلق نور الباب .. وتجمعت عليه شجونه وحاصرته فى الزاوية الضيقة .. فتحرك نحو الهاتف ببطء وبعد لحظة واحدة قال : خالى منصور .. لو سمحت تعالى ! .. أمى ماتت

وفى مساء اليوم التالى .. وبعد انتهاء العزاء الذى أقيم لوالدة نور .. كان منصور يقف مع نور فى الصلاة .. قال له بجدية : إنت يانور هتيجي تعيش معنا إنت وأختك !

رد نور بوجه خالى من المشاعر : ملهاش لازمة ياخالى .. أنا وحببية هنعرف ناخذ بالننا من نفسنا كويس

-يابنى مش هينفع تعيشوا لوحدكم

رد عليه بفتور : ما احنا طول عمرنا عايشين لوحدنا ! .. متتعيش نفسك احنا هنتصرف

حاول منصور أن يقنع نور بسطحية ولكن نور كان ثابتاً على رأيه وبشدة

ودعه منصور وعاد الى بيته حتى أنه لم يعرض عليه البيات معهما .. اتجه نور الى غرفة حبيبة وطرق الباب ودلف منه وكانت ممددة على الفراش تدفن وجهها بالوسادة وتبكي بحرقة .. احترق قلبه عليها وعلى حزنها وكادت الدموع تخترق عينيه ولكنه أمسكها وأبى أن يطلق سراحها لتسيل على خدوده .. رسم تلك البسمة الفاترة على وجهه واقترب منها .. أزاح الوسادة من على رأسها ومسح على رأسها برفق دون أن ينطق .. رمقته بنظرة معاتبة لم يعلم سببها .. تجمعت الدموع فى عينيه ولكنه مسحها بسرعة وتذكر أنه عند حالات الوفاة يجب أن يكون هناك شخصاً قوياً يعين من حوله على الصبر .. وان لم يكن نور هو ذاك القوى فمن سيكون؟! .. لا يوجد غيره هو وحببية وأخته منهارة .. لذا عليه أن يتجلد ويصبر ..

وبعد خمسة أعوام ..

“ انا تمام يا يوسف الحمد لله .. إنت عامل إيه ؟ ”

رد عليها بسعادة “ الحمد لله يا هدى أنا كويس ”

“يارب ديماً يا يوسف .. إيه أخبار المذاكرة؟”

“ماشية يا هدى .. إدعيلي بقى ! ”

“ربنا معاك يا يوسف وينجحك وتدخل الكلية اللي تحبها “

“هدى أنا بحبك “

احمرت وجنتيها وكتبت بنجمل " طيب "

“طيب إيه ؟!!! .. بقولك بحبك “

“وأنا كمان بحبك يا يوسف .. ارتحت بقي ؟ “

كتب بأريحية " طبعاً وعالاخر كمان “

ترددت قليلاً ثم كتبت " أنا خايفة من حازم ! “

قرأها بتعجب وكتب وقد بدأ التوتر يظهر على وجهه

“خايفة منه ليه ؟! “

انتفضت قلبها وقالت في نفسها "خايفة تكون معقد زيه يا يوسف !! “ .. وكتبت : خايفة منه وخلاص يا يوسف !

تسارعت نبضات قلبه وكتب " خايفة عشان أنا بكلمك من وراه .. صح ؟ “

“دا سبب واحد من الاسباب اللي مخوفاني ! “

مسح شعره بقوة وكتب " خايفة منه ليه تاني ؟ .. هو بيجبرك على حاجة ؟؟ “

أرسلها وشعر بتأنيب الضمير لأنه يخون ثقة صديقه !

ارتبكت ونظرت حولها في خوف .. هي تعلم أنه ليس معها ولكن تشعر بأنها مراقبة ! .. وكتبت بخوف " أنا خايفة

أوووى يا يوسف .. ومش لاقية اللي يطمنى ! .. وبفضل أعيط طول الليل “

رق قلبه لها وتحركت مشاعره وكتب " أنا آسف ياهدى ! .. أنا حاسس إن كل اللي انتى فيه دا بسببى ! .. بس والله مش بقدر أبعد عنك ومكلمكيش ! .. أنا بحبك أوى وعمرى ما هسيبك أبداً ! .. بس لو هترتاحى وانا بعيد عنك .. هدوس على نفسي وأبعد !! ..

أدمعت عينها لأنها شعرت انه يحاول التهرب منها فكتبت : بس أنا عايزاك تفضل معايا ! .. أنا ماليش حد غيرك

تنهد بحزن وكتب " وأنا عمرى ما هسيبك "

مسح دموعه تحركت فى عينيه وقال لنفسه بحزن " أنا آسف والله يا حازم !! .. مش قادر أحافظ عليها حتى من نفسي ! "

مال نور على أذن حازم فى الاتوبيس العام وقال : قوم يا حازم

قال حازم بتعجب : أقوم فين ! .. احنا ماصدقنا اننا قعدنا دا احنا واقفين من اول اليوم

قال نور بصوت خفيض : فى انسه واقفة فى آخر الاتوبيس .. وأنا مش هقوم وأقولها تيجي جنبك أكيد هتكسف

نظر حازم بطرف عينيه فرأى امرأة منتقبة واقفة فى الاتوبيس فقال لنور : وايش عرفك انها انسه .. ممكن تكون ست

كبيرة ومش هتضايق من القعدة جنبى .. بالله عليك يانور أنا رجلى مش شيلانى

نهض نور ونظر لحازم وقال وصوته لازال منخفض : قوم يا حازم وأنا هشيلك .. قوم يلا بلاش دلح حد لاقى ثواب ؟؟

تنهد حازم ونهض ووقف واتجه نحو تلك المرأة وقال ناظراً للأرض : اتفضللى اقعدى فى كرسي فاضى ورا ..

ارتسمت بسمه على وجهها لم يراها هو .. واتجهت نحو الكرسي وجلست وقالت بصوت لم يسمعه : ربنا يكرمكوا
يارب رحمتونى من البهدة

اتجه حازم ونور نحو الباب لبيتعدا عن كرسيها .. فوكز نور حازم فى ذراعه وقال له : فك الشكيرة دى يابنى ..
خليها بنية ادخال السرور على قلب أو مساعدة محتاج .. وخذ حسنات بدل مانت مكشر
رد حازم : أنا نايم أصلا يابنى ومش قصدي أكشر ولا حاجه ! ..

-طويب ..

-عارف يانور ؟ .. سلام على دنيا ليس فيها صديق زيك

ضحك قائلاً : صديق زيي ؟؟..بوظت بيت الشعر يا حازم

قال باسمًا : نصيبه بقى

وقال فى نفسه : ربنا يديمك نعمة فى حياتي ديمًا بتسدني للخير حتى لو غصب عنى

ظلا واقفين حتى وصلا الى محطتهما ونزلا وكذلك تلك الفتاة المنتقبة ولكنهما لم يلاحظا ذلك .. ظلت تسيير
خلفهما على بعد خطوات واسعة .. ودع نور حازم ودخل حازم عمارته وأسرعت الفتاة كى تلحق بنور .. جاء نور
يكمل سيره ولكنه تفاجأ بها تجذبه من ذراعه .. التفت للخلف وتفاجأ بصوتها الضاحك بخفوت يقول : إيه يا عم
معقوله مش واخذ بالك منى ؟

ابتسم وقال : يابت الايه يالديننا ؟ .. مش تنبهينى طيب .. كنت لسه هتخانق ونطلع ع القسم

ابتسمت بخجل وقالت : يا عم روح اجرى ! .. وخذنى معاك

ابتسم وقال : طيب يلا قدامى ع البيت وهناك هشوف تصرفى معاكى

ابتسمت وسارت معه حتى وصلا لبيتهما .. دخلت ورفعت النقاب ونظرت له بحنان وقالت : سبحان الله يا نور ..
قومت تقعد واحدة مزنوقة فى الاتوبيس .. وربنا يكرم أختك ويفك زنقتها

تنهد وقال : فعلا سبحان الله .. أنا جيه فى بالى ان مش لازم أقوم لأنى تعبان طول اليوم فى الكلية وكنت واقف على
رجلى .. وقولت مش مشكلة بقى أكيد حد تانى هيقوم وهى هتقعد .. بس افتكرتك وقولت جايز تتحطى فى نفس
الموقف فقومت انا وحازم وقعدناكى

-الحمد لله إنه زرع فى قلوبنا من رحمته وخلانا نرحم بعض ونساعد بعض

ابتسم وقال بحنان : الحمد لله .. يلا يا أختى قومي غيرى عشان تجهز الأكل وأتغدى قبل ما أروح السوبر ماركت

دلف رامى من باب الفصل بقوة فقالت المدرسة الواقفة بفرع : مش تحبط قبل ماتدخل !؟

قال بلا مبالاة : أخبط ليه ؟

حاولت أن تسيطر على أعصابها وقالت بثبات انفعالى : حضرتك مينفعش تدخل أى مكان من غير ماتحبط

-المفروض إن حصتك ضربتك يعنى تطلعى من الفصل .. إتفضلى لو سمحتى عشان عندى حصة

جمعت أغراضها بسرعة وخرجت من الفصل وهى تدب الأرض فى غيظ !.. دخلت الغرفة الخاصة بهم .. نظرت لها
هدير وقالت ببسمة : مالك يا تقى ؟

زفرت بضيق وقالت : الزفت اللى اسمه را..

قاطعتها هدير بصرامة : خلاص مش عايزة أعرف

قالت تقى بانفعال : امال بتسألني فيه من الأول !!!

-أنا مش بسألك عشان تشتمني في حد وتبقى غيبة ياتقني

قالت بنفاد صبر : منا معنتش قادرة أستحمل تصرفاته خلاص ..

قالت هدير : لازم تصبري ياتقني .. معنديكش حل تاني

قالت بصيحة مكتومة : أصبر إيه؟! .. دا بيدخل عليا الفصل من غير ما يخبط

-لا حول ولا قوة الا بالله .. ربنا يهديه يارب

قالت بانفعال : طب أنا راضية ذمتك .. ترضي يدخل عليكي الفصل ويطردك قدام الطلبة بحجة إني المفروض أطلع

أول ما الحصنة تضرب ..

صمتت هدير وقالت بحزن : دا لو عملها معايا هروح أشتكيه في الادارة .. أنا منتقبة وبقي رافعة النقاب في الحصنة

عشان أتفاعل مع البنات بكل جوارحي

قالت تقى : طب انتي حكمتي أهوو وقولتي هتشتكيه .. بس أنا بقي خايفة لما نشتكيه المشكلة تكبر ونتنقل من

هنا .. انا ماصدقت ان التوظيف جيه قريب وفي مدرسة بنات زي مافي نفسي

-معرفش والله ياتقني هنعمل إيه .. الله المستعان بقى

“أنا جيت يابابا .. إنت فين ؟ ”

قالتها منار بسعادة عندما دلفت الى شقتها وتقفز في مكانها من السعادة .. ناداها والدها من غرفة الصالون : أنا فى
أوضة الصالون وعمر كمان هنا

اعتدلت فى مشيتها ودخلت غرفة الصالون بوقار وقالت برأس منحني بخجل : السلام عليكم ..

ردا ببسمة : وعليكم السلام .. قال عمر : إزيك يامنار ؟

-الحمد لله يا عمر .. عن اذنكم هروح أوضتى

خرجت منار بسرعة فابتسم عمر وقال : إيه اخبارها فى الكلية ؟

-تمام يا عمر الحمد لله .. وبدأت تشتغل فى الصيدلية اللى تحتنا كمان

-ربنا يوفقها ان شاء الله يا عمرو .. امال عمته هتيجي امته عشان اسلم عليها قبل ما أمشي ؟

نظر فى ساعته وقال : قدامها بتاع تلت ساعة .. هتفرح أوى لما تشوفك

ابتسم عمر وصمت قليلاً وعلى يراقب حركات يده المتوترة .. وبعد عدة لحظات سادها الصمت قال عمر : أنا ..

أنا عايز أتجوز منار يا عمى

ابتسم على ولم يرد فأردف عمر : عايزك تعرض عليها الموضوع .. ولو موافقتش فدا مش هياثر على علاقتى بيكوا

وبيه كبنت عمتى

ابتسم على وقال : ربنا يسهل يا عمر .. بس استنى لما تخلص دراستها الاول

تنهد وقال : حاضر .. هصبر !

طرق حازم باب هدى ودلف منه .. قال محاولاً : ازيك ياهدى ؟

ردت بصوت يعتربه خوف : ك .. كويسة ة !

آلمه خوفها فاقترب منها ومد يدها ليمسح على شعرها فابتعدت بخوف .. جلس الى جوارها وقال بحزن : هدى هو انتى بتخافى منى ؟

ارتبكت هدى وقالت بخوف : أ أنا ؟ .. لا أبدا مش بخاف م منك

أحس حازم بها .. ومد يده ومسح على رأسها وهو يحاول الابتسام .. أحس بها ترتعش تحت يده فابتعد عنها وقال : عن اذنك ياهدى

خرج حازم من غرفتها ومن الشقة بأسرها وهو هائماً على وجهه لا يدري لمّ تعامله هدى بذلك الحذر والخوف ! .. وقد كان أقرب الناس اليها .. لا يدري لمّ اضطربت علاقتهما وصارت تخاف منه وصار هو لا يعرفها .. اتجه نحو السوبر ماركت الذى يعمل به نور وحين دخل ألقى السلام وقال بضيق : أنا مخنوق أوى يانور

تعجب نور وقال : خير يا حازم ؟ .. استعيز بالله من الشيطان الرجيم وقولى فى إيه ؟!

كان يوسف متجهاً الى محل والده ودلف على صوت حازم وهو يقول " هدى بقت تخاف منى يانور .. أنا مش قادر أقرب منها ولا بقيت حتى بفهمها ! .. بحسها مش بتحبنى وبتترعب منى ! .. أنا نفسي أعرف هى اتغيرت كدا ليه !! .. أنا معنتش أعرفها !! "

ارتبك يوسف وتسمر أمام الباب .. نظر له نور نظرة معاتبة كادت تخترقه من الداخل .. لاحظ حازم دخول يوسف فصمت وقال لنور : هنبقى نكمل كلامنا بعد الصلاة ! .. بعد اذنك يا يوسف

غادر حازم وقرر أن يدور بالشوارع حتى الآذان .. نظر نور ليوسف نفس النظرة المعاتبة فنظر للأرض في خزي .. جاء نور يتحدث ولكن صوتاً قطعته " السلام عليكم .. لو سمحت عايزة ربع جينة بيضا و5 بيضات " ..

قال نور دون أن ينظر لها : حاضر .. لحظة واحدة

وتحرك ليحضر لها ما طلبته .. نظرت ليوسف الذى يتصبب عرقاً ويقف في خزي وقالت : إزيك يا يوسف ؟

قال بحزن : كويس الحمد لله .. وانتي ؟

-الحمد لله ..

قال : مرتاحة هنا ؟ .. ولا هترجعي هناك ؟

قالت بهدوء : لأ أنا إتوظفت هنا خلاص زى ماكانت رغبتى وهستقر هنا ان شاء الله فى شقة بابا الله يرحمه

ابتسم يوسف بفتور وقال : الله يرحمه

ناولها نور طلباتها وجاءت تعطيه النقود ولكن يوسف قال بجدية : عيب عليكى يا هدير ! .. دا عمك لو عرف انك

عملتى كدا وانا واقف هيرمينى ف الشارع

ابتسمت بخجل ابتسامه لم تظهر بسبب النقاب وقالت : شكراً أوى يا يوسف وبعد كدا هاجى وانتوا مش موجودين

.. السلام عليكم

خرجت هدير من المحل فنظر يوسف الى نور منتظراً معاتبته لكنه وجده واجماً .. ظل واجماً عدة لحظات ثم نظر

ليوسف وسأله : هى دى هدير بنت عمك ؟

رد يوسف بقلق : أيوا هى

رد نور بفتور : طيب

تعجب يوسف من أنه لم يعاتبه وظل جالساً بجواره في جو يسوده الصمت حتى أذن الأذان وذهبا للصلاة .. وهناك التقيا بحازم .. وبعد أداء الصلاة رحل يوسف ونظر نور لحازم وسأله : تحب نكمل كلامنا ؟

تنهد حازم وقال : لأ .. ورايا مذاكرة وانت وراك شغل .. ولبيل العكس .. فهنبقى نتكلم بكرا في الكليه ان شاء الله

عاد يوسف الى منزله وهو يشعر بضيق شديد من نفسه .. فهو يخون صديقه العزيز .. ولا يدري ماذا عليه أن يفعل ! .. في الواقع هو يعرف الحل جيداً ولكنه يأبى أن يترك ما يجد به متعته وسعادته .. حاول أن يدرس لكن سرعان ما أغلق الكتاب ودفعه بيده بعيداً عنه .. زفر بضيق وفتح هاتفه فإذا برسالة منها تصله بعد دقيقة من فتحه .. " إزيك يا يوسف ؟ "

زفر بضيق ورمى هاتفه على الفراش وخرج من الشقة وأغلق الباب خلفه بعنف .. ظل يدور بالشوارع هائماً على وجهه لا يدري ماذا يفعل !

وفي صباح اليوم التالي وصلت تقى الى المدرسة قبل الطابور بما يقارب النصف ساعه .. كانت تذهب مبكراً لأنها توصل ابن أختها في طريقها الى مدرسته التي يسبق طابورها طابور المدرسة التي تعمل بها بحوالي نصف ساعة ..

فتحت الحجرة الخاصة بها وبزميالاتها لأنها أولهم وصولاً .. جلست على مقعدها الخاص وأخرجت مصحفها وبدأت تقرأ به .. اندمجت في القراءة وبدأت تتساقط الدموع من عينيها .. حتى أنها لم تلاحظ ذلك الذى كان يراقبها من على الباب .. ظل يحرق بملامحها ودموعها التى تتساقط والتى لم تمد يدها حتى لتمسحها .. ربما لأنها لا تشعر من الأساس بوجودها ! .. أغلقت مصحفها بهدوء وجاءت تنهض لكنها عادت للخلف بفزع حين رآته .. ابتلع ريقه بصعوبة وقال باحراج : صباح الخير

انتفض قلبها ونظرت للأرض ولم ترد واندفعت نحو الباب لتغادر الغرفة كي لا يكونا وحدهما .. ولكنه سد الطريق وقال : قولت لحضرتك صباح الخير !

عادت للخلف وقالت بضيق : ينفع تعدينى ؟

قال بجدية : هو إنتى ليه مش بتردى عليا .. حتى صباح الخير خلتيوها حرام !؟

ظن أنها ستثار وتدافع عن تفكيرها وأنها ليست معقدة ولكنه تفاجئ بها تقول بجدية : حضرتك لو مخرجتش أنا هنزل على مكتب المدير وأعمل فيك شكوة

ابتسم بمكر وقال : ياريت ! .. بس ابقى سلمى على سمعتك وخاصة إنك عارفة المدير بتاعنا كتوم قد إيه !!

قالت بضيق : لو سمحت اطلع برا ! ..

بدأ يخطو نحوها وهى تعود للخلف بخوف حتى اصدم ظهرها بالمكتب .. مد يده فتحركت من أمامه واندفعت الى الباب ولكنها توقفت حين سمعته يقول : ينفع أستلف المصحف دا ؟

ارتبكت وقالت بدون تفكير : إيه !؟

رد دون أن ينظر لها وهو يقلب في المصحف بتمعن : بقولك هستلف المصحف .. عندك مانع ؟

ردت بجدية : خده ! أنا عندى كتير منه بس مش عايزة أشوفك تانى

تحرك نحو الباب وخرج منه دون أن ينظر لها حتى .. ولما خرج وضع المصحف فى جيب معطفه ولم ينظر له حتى وكان يفكر بتقى وكيف سيتصرف معها !

أغلقت تقى الباب بخوف وارتمت على مقعدها وإنفجرت باكية .. لا تعلم هل مافعلته كان خطأ أم صواب !؟ .. كانت تمنى لو تقدم شكوى ضده ولكنها تعلم أن المدير لن يفعل شئ وأن الوحيد الذى سيتأذى هو سمعتها !! .. رفعت يدها للسماء وأخذت تدعو الله أن يرحم ضعفها وأن يحميها منه !!

فتحت منار عينيها وقامت وتوضأت وصلت الضحى ارتدت ملابسها وذهبت الى كليتها .. كلية الصيدلة برفقة حبيبة .. التى معها بنفس الكلية لكن تتأخر عنها بعام .. ذهب حازم برفقة نور الى كلية الصيدلة أيضاً .. كان يتمنى نور أن يذهب برفقة أخته ولكنه آثر أن يتركها تذهب برفقة منار ويذهب هو بصحبة حازم .. عاد للعمل عند الحاج محمود بانتهاء الثانوية العامة لأنه ماكان ليجد وظيفة أخرى .. هذا غير أنه يحب العمل برفقة الحاج محمود لأنه يحترمه كوالده ويحبه

فتح عمر عينيه وارتدى ملابسه ليذهب للمشفى التى يعمل بها .. ساوى شعره أمام المرآة وفتح الباب ليخرج لكنه عاد للدخل وتوضأ وصلى الضحى وبعد أن فرغ من صلاته رفع يده للسماء وقال " يارب .. يارب إهديني الصراط المستقيم فى الدنيا والآخرة .. " .. ودعا الدعاء الذى كان يدعوه النبي صلّ الله عليه وسلم .. " اللهم آتنا فى الدنيا حسنة وفى الآخرة حسنة وقنا عذاب النار "

ارتسمت بسمة على شفتيه حين تذكر حسنة الآخرة وهى الجنة .. وحسنة الدنيا وهى -حسب تفسير بعض العلماء - المرأة الصالحة .. رفع يده مجدداً للسماء وقال " يارب إغنينى بحلالك عن الحرام .. يارب إنت الوحيد اللى

عالم بحالى وعالم أنا إتغيرت قد إيه بعد آخر مرة كلمتها .. يارب أنا إتغيرت عشان بحبك يارب مش عشانها !..
يارب لو كنت إتغيرت عشان أرضيها فإبعدها عنى يارب وإحرمنى منها .. يارب إهدينى وثبت قلبى على دينك "

قَبَل يد والده وغادر الى المشفى .. وبينما هو بالمواصلات أخذ يتذكر آخر حديث دار بينهما بعد ظهور نتيجتها ..
ابستم بـلتقائية وأحس بألم يختلج صدره .. ذلك الألم الذى لا يطيقه ولا يقدر على التخلص منه .. أطلق العنان
لبصره وشرد فى موجات البحر المتلاطمة محاولاً أن يتناسى ألمه !

فتح يوسف عينيه بصعوبة ونظر للساعة واتسعت عيناه حين رأى أنها التاسعة والنصف !! .. لقد فاته الفجر !
.. كيف لم يستيقظ وقد ضبط منبهه ! .. نظر لهاتفه فوجد 5 مكالمات من نور و 7 من حازم من وقت الفجر وحتى
الشروق .. كيف لم يسمعها كلها ! .. ما الذى أصم أذنه لتلك الدرجة .. نهض وتوضأ وجاء يصلي الصبح ولكنه
قرر أن يلقي نظرة سريعة على حسابه فى الفيس بوك من هاتفه قبل أن يصلي بحجة ألا يكون مشغول البال أثناء
الصلاة .. فتحه وفتح ما قد ورده من هدى من رسائل .. تذكر أنه لم يجيبها عندما حدثته بالأمس وترك هاتفه وهام
على وجهه بالشوارع بلا هدف .. شعر بضيق حين قرأ رسائلها

“إزيك يا يوسف ؟ ..

إنت مبتردش ليه مع إنك فاتح ؟ .. على فكرة الرسالة seen يعنى إنت قريتها ومش عايز ترد عليا !

هو أنا عملتلك حاجة؟! .. تصدق فعلا إني غلطانة إني بكلمك أصلا!! .. أنا كنت خايفة لتطلع زى حازم وأديك أهو طلعت زيه! .. حازم برضه كان قريب منى أووى وفجأة بعد عنى واهتم بنفسه ويس وحسسنى إني ولا حاجة بالنسبale وإنه هو اللي صح بس! .. دلوقتي إنت بتعمل زيه! .. أنا آسفة إني كلمتك أصلاً من الأول! "

زفر يوسف بضيق وكتب " أنا مش عارف إنتى زعلتى ليه؟! .. أنا فعلا فتحت إنبارح وشوفت رسالتك بس اضطريت أنزل الشارع فنسيت الموبيل هنا مفتوح! .. معرفش ليه بتزعلنى بسرعة كدا وبتقلبنى مرة واحدة! .. عموماً ياستى أنا آسف إني مردتش وبعد كدا موبايلى هيبقى معايا علطول ومش هسيبه .. ماشي؟ "

أرسلها يوسف وتوقع أنها ستستمر فى عتابه ولكنه تفاجئ بها ترسل له " طب ومذاكرتك؟ .. الفيس الكثير هياثر عليها؟ "

ابتسم من اهتمامها به ومذاكرته وكتب " طب أعمل إيه عشان أرضيكي ومتزعليش منى؟ "

ابتسمت وكتبت : ولا حاجة يايوسف .. أنا آسفة إني ملتستش ليك عذر وزعلت وبعثتك الكلام اللي فوق دا!!

ابتسم وكتب متعذريرش ياستى أنا مبزعلش منك أصلا .. بس كنت عايز أسألك فى حاجة .. هو إيه مشكلتك مع حازم؟ .. ليه خايفة أبقي زيه؟ .. أنا مش فاهم حاجة!

تلاشت بسمتها وكتبت : لازم تعرف؟

-طبعاً! .. بس إحكى بصراحة!

" أنا مبعرفش أكذب عليك أصلا يايوسف! .. وإنك عارف كدا كويس .. "

تنهدت وكتبت " مشكلتي مع حازم إنه من ساعة ما بدأ يتغير ويقرب من ربنا على كلامه يعني بقى عايز يغيرنى معاه .. عايزنى أعمل زيه وأبقى زيه وكل ما آجى أجرب حاجة يقولى لأ .. دى هتبعك عن ربنا .. أو دى أنا جربتتها وفشلت معايا .. ومش بيحط فى إعتباره إنى مش زيه ! .. وإن اللي فشل معاه ممكن ينجح معايا والعكس صحيح .. وماما طبعاً فرحانة بيه كدا عشان هيخلينى كويسة ! .. وعشان هو فى صيدلة ويصلي فى الجامع فخلاص بقى ملاك ولازم أسمع كلامه فى كل حاجة .. دا حتى بقى يقولى إمشي مع مين ومتمشيش مع مين ! .. وبيقيم صحابى بالحجاب ! .. ميعرفش إن فى مختمرات ومنتقبات وحشين وفى بنات مش مسلمة أصلاً وكويسين جداً وبيتعاملوا بما يرضي الله !! .. دا حتى خلانى أسيب الدروس اللي كنت بروحها مع صحابى وأروح عند مدرسينه بحجة إنهم كويسين ودخلوه صيدلة .. الله يحرق صيدلة اللي تخليه يعمل فيا كدا !! .. دا غير طبعاً إنه خلانى ألبس الحجاب أول ما خلصت أولى إعدادى .. ودلوقتي بياكل ودانى عشان أبطل بناطيل .. رغم إن ليسي طويل ومحترم وبناطيلي واسع .. شوفت بقى صاحبك الملاك عامل إزاي ؟! .. تصدق أنا ساعات بدعى ربنا إن حازم يرجع زى زمان ! .. ميصليش فى الجامع أو حتى ميصليش أصلاً عشان يبطل يعمل عليا شيخ !! "

اتسعت عينا يوسف حين قرأ ماكتبته هدى وكتب " ياه ! .. بقى حازم يطلع كدا ؟! .. أنا مش عارف أصدق اللي بتقوليه !! مش بكذبك والله ! .. بس حازم طول عمره جدع وراجل وعمري ماحسيت إنه عايز يعمل عليا شيخ .. أكيد إنتى فاهماه غلط أو مش فاهماه أصلاً .. هو أكيد مش قصده يتحكم فيكي هو عايز مصلحتك بس .. مش عايزك تمشي مع البنات اللي مش كويسة عشان انتى عارفة إن الصاحب ساحب ! وهو أكيد مش بيقهيم بالحجاب لأنى عمري ماحسيت فيه بكدا .. بس فعلاً لما بشوفك مع صحابك فى الشارع بيقوا بيضحكوا بصوت عالي ويزقوا بعض فى الشارع بهزار بايخ وطبعاً دا مينفعش والمنظر مش بيعجبني وعمري ماكلمتك فيه بس اللي هيشوفك هيحكم انكم مش مؤدبين !! .. أكيد حازم خايف إن أخته يتقال عليها كدا .. هو نفسه تبقي أحسن منه عشان كدا عايزك تروحي عند مدرسينه عشان كويسين مش أكثر !! .. وبعدين بقى فى موضوع الحجاب دا فالحجاب فرض يا هدى ودى مفهانش كلام "

زفرت بضيق وكتبت " فرض طبعاً .. بس مش تانيه إعدادى .. أنا لابساه من أربع سنين وكل ما أفتكر إن حازم اللي خلانى ألبسه بالعافيه أكرهه ! .. كل ما افتكر إنى كنت ممكن أقعد سنة وشويه كمان بشعرى وهو اللي فرض عليا الطرحة أكره حازم !! .. وبعدين إنت عمرك ما تهتس باللى بقوله لأنك وحيد .. مجربتش معاناة أخ كبير يفرض نفسه وشخصيته عليك ! "

أخذ نفساً عميقاً وكتب " لو كان حازم بي فرض شخصيته عليكي فعلاً كان أخذ الباسورد بتاع الفيس بتاعك ! .. وكان زمانه شايف كل محادثاتنا دى ! .. أنا عمري ماشوفت حازم وحش ولا عمري هشوفه وحش لأنه من أحسن الناس اللي قابلتها فى حياتى ! "

كتبت بحزن " ماهى دى مشكلة حازم ! إنه بيعامل الغرب كويس جدا ويعامل صحابه كويس جداً ويجي عندى أنا .. ويتعامل وحش ويسيطر عليا ! .. أنا خايفة لتطلع زيه يايوسف .. أنا خايفة لتحب تثبت رجولتك فتفرض شخصيتك عليا .. ويبقى صوتك خشن وتقولى إعملى ومتعمليش .. أنا بيعط كل يوم لأنى خايفة من اليوم اللي هتيجى تقولى فيه .. أنا مش عايز أزعل ربنا فلازم أسيبك ! .. إنت أكثر واحد عارف أنا بحبك قد إيه .. ولو سبتنى هيجرالى إيه .. وانت عارف انى مش بدلع عليك ولا حاجة وعارف انى صريحة ومش بخبي حاجة فى قلبى !! "

قرأها يوسف وظل واجماً عدة لحظات يفكر .. " هو ربنا فعلاً ممكن يكون زعلان منى ! .. طب ربنا أكثر واحد عارف انى بحبها وهتجوزها وعمري ما هسيبها .. وأكثر واحد عارف انى مش بضحك عليها ولا بتسلى .. وهو أكثر واحد عارف هى محتجاني قد إيه عشان تعوض النقص اللي مسببه ليها حازم .. يارب أنا مش هسيبها وهفضل جنبها وإن يارب غفور رحيم .. هتسامحنى لما أوفى بوعدى وأتجوزها فعلاً ! وأنا يارب هحاول ألينها شويه وأحبها فى أخواها بس بالتدريج عشان متحسش إنى بفرض عليها نفسى ! "

كتب لها " أنا بحبك ياهدى ومش هسيبك فى يوم أبداً ! .. وان شاء الله حازم يتغير ويبقى أحسن معاكى .. وأنا ياهدى هتجوزك يعنى هتجوزك .. حتى لو انتى مش موافقة فدى مش مشكلتى ياهانم .. اعتبريني بفرض شخصيتى بقى "

اتسعت ابتسامتها وشرعا يتجاذبان أطراف الحديث حتى سمع يوسف آذان الظهر ! .. ضرب جبهته بكفه وكتب لها
" أنا هقفل عشان الصلاة ! .. "

ذهب للحمام وتوضأ مجدداً وهو يستغفر الله بحزن لأنه قد ضيع الصبح بسبب حديثه مع هدى !! .. وقبل أن ينزل
رأى رسالة منها على هاتفه " هتفتح تانى ؟ "
" ربنا يسهل ياهدى .. "

"بص عشان مذاكرتنا .. نفتح سوا ع الساعة 10 مثلاً ؟ "

"ماشي ياهدى .. سلام "

"سلام "

اتجه نحو المسجد وصلى الظهر به ولكنه لم يقابل نور وحازم هناك فعلم أنهما لازلا بالجامعة ..

"غمضي عينك ونامي وأنا أوعدك أول ما محطتنا تيجي هنزل وأسيبك "

قالتها حبيبة بمرح لمنار حين جلستا بالأتوبيس في طريق عودتهما من الكلية .. ابتسمت منار بخفوت وقالت :
" ماشي يا حبيبة .. وأنا أوعدك أول ما هتنتزلي هصوت وأقول حرامى وأخلى الشعب كله يجري وراكى "

ضحكت حبيبة بدون صوت .. وقالت : وأهون عليكى ؟ .. ماشي يا منار نردهالك فى الافراح

ابتسمت منار ابتسامة خفيفة وقالت بلهجة مختلفة : أنا فرحانة أوى .. انهاردة هدير هتاخذ شهادة انها ختمت
القرآن

ابتسمت حبيبة وقالت : ماشاء الله عليها عقبالك يامنار

قالت منار وقد تلاشت بسمتها بعض الشيء : ان شاء الله يا حبيبة .. بجد زعلانة أوى من نفسي ! .. أول ما دخلت الكلية هي قعدت تتحايل عليا عشان أروح أكمل فى الدار .. وأنا كنت بتحجج إن الكلية صعبة ومعرفش إيه مش كان زمانى ختمته دلوقتى زيها ماشاء الله .. أو زيك ختمتية من سنتين وبقى بتحفظى كمان

-ان شاء الله يامنار تشدى حيلك وتختميه انتى كمان وتلبسي أهلك التاج وتبقى من أهل الله وخاصته

ابتسمت منار وقالت : بجد لما سمعت حديث الرسول عليه الصلاة والسلام بتاع " أهل القرآن هم أهل الله وخاصته " .. فرحت وقولت هبقى من أهل ربنا .. بس لما سمعت مصطفى حسنى وهو بيشرحها فى أحبك ربي شجعنى جامد أوى إنى أرجع تانى وأبدأ من جديد .. والحمد لله فى السنين اللى فاتوا خلصت 12 جزء .. والحمد لله عايشة بيهم وفكرهم .. أنا كنت بقعد أقول بيااه هقعد أربع سنين احفظ فى القرآن وبعدين لازم أقعد أرجع عشان منساش .. كنت بحس إنهم كتير أوى ! وانى لازم أبقي متفرغة للقران وبس .. بس بعد كدا اكتشفت ان القران دا لازم يبقى جزء من حياتى .. مش حمل هشيله شوية وخلص .. نفس فكرة الصلاة بالظبط .. أنا ربطت يومى بيها .. يعنى طالما انا عايشة يبقى لازم أوصل نفسى بربنا عشان لما أموت الصلة دى تشفعلى لأنى كنت بكلم فيها ربنا .. والقران كمان يشفعلى لأنى كنت بسمع من ربنا ..

تنهدت وأردفت وحبيبة تنظر لها فى سعادة : عمرى ما تخيلت إن السنين بتعدى بسرعة كدا ! .. وان الأربع سنين اللى كنت بقول انهم كتير وعايزين تفرغ عدوا على هدير وختمته والحمد لله .. هى اينعم ختمته فى أكثر من اربع سنين بس هى مكنتش عايزه تختمه وخلص ! .. هى كانت عايزة تعيش بيه وكل شوية تزود حفظها عشان تزود حياتها وتزينها بالقران .. بجد متعة وراحة مفيش زيهم أنا لسه مختموش بس فرحانة أووى إنى عايشة باللى حفظته وفهمااهم مش حفظاهم بس

لفت حبيها ذراعها حول ذراع منار فى حنان وقالت : أنا بحبك أووى يامنار .. بجد إنتى كلامك رائع وفوق الوصف وأنا عمرى ما سمعت كلام حلو بالشكل دا .. بجد انتى لازم تعملى محاضرة وتسميها فى حب الله ..

وتكلمى فيها البنات من غير تحضير زى دلوقتى .. وتطلعى مشاعرك فيها .. إنتى انسانة جميلة أوى يامنار ربنا
يحبك ديما ويكرمك

ابتسمت منار بخجل صمتت وتفهمت حبيبة صمتها .. شردت منار في حياتها الماضيه .. كيف كانت وكيف
أصبحت ! .. نعم هى لم تكن سيئة فى نظرها وكانت رائعة فى نظر أخريات .. ولكنها فى كل الأوقات كانت "عادية
" .. تستخدم لفظ "عادى" فى تبرير جميع تصرفاتها وأفعالها .. ولكنها اكتشفت الان أن عادى تأتى من الاعتياد
على الشئ وهى الان لم تعد تشعر بذلك الاعتياد لأنها تجدد مشاعرها باستمرار ولا تسمح لنفسها بالاعتياد عليها
أغمضت منار عينيها وتبادر الى ذهنها بعض الذكريات التى تاهت فيها .. لاتدرى لم تذكرتها الآن ! ..

منذ خمسة أعوام .. بعد ظهور نتيجة الثانوية العامة بساعات

“ ألف مبروك يامنار .. الحمد لله جتلك الكلية اللى كنتى عايزاها .. ويارب ديما متفوقة ومتقدمة “

استلمت منار هذه الرسالة بمجرد أن فتحت حسابها على هاتفها .. اتسعت بسمتها وكتبت " الله يبارك فيك يا عمر
.. “

“ايه أخبارك ؟ .. طبعاً فرحانة “

كتبت ببسمة " فرحانة جدا الحمد لله .. أنا مش مصدقة انى جبت المجموع دا .. انا حاسة انى هطير “

أرسلتها وشعرت بضيق يختلج صدرها لأنها عادت تحدث عمر كالسابق ولكنها سمعت بداخلها صوتاً يقول "
هنتكلم انهاردة بس بمناسبة النتيجة .. هو هيباركلى وخلص .. وأنا هسيطر ومش هفتح مواضيع متطرفة “

رد بسرعة " أنا مش عارف أقولك إيه ولا إيه ؟ .. جوايا كلام كثير اوى .. انا حاسس ان أنا اللى نجحت مش إنتى !
.. أنا عايز أطلع فى البلكونة وازعق بعلو صوتى وأقوول .. أنا نجحت يابشر "

لم تجد رداً فأرسلت بسمة

كتب مجدداً "كنت عايز أقولك حاجة ..النصايح اللي انتى بتنزليها جميلة أوى .. بجد أنا بستفيد منها جداً ..
وفعلا بدأت أغير حاجات كثير فيا .. إدعيلي بقى "

شعرت بسعادة لأنه يقرأ ماتكتبه ويستفيد منه فأرسلت "ربنا معاك ويصلحك ويشبتك ويشتنا جميعاً يا عمر "

أرسلتها وظلت تنتظر بلهفة رسالته التالية ولكنها تأخرت .. شعرت بأن الحديث بينهما قد انتهى وأنه لن يتكلم
مجدداً فأرسلت له " إيه رأيك تقرى فى الحلال .. رواية جميلة أوى وهتساعدك كثير .. صدقنى هتلاقى حياة تانيه
غير اللي احنا عايشينها أصلا وبجد كانت بداية تغييرى يا عمر .. "

قرأ رسالتها وابتسم .. لأنه علم أن مكانه لازال موجوداً بقلبها .. رغم البعد بينهما .. وكتب لها " هبدأ فيها حاضر
وهقولك رأيي .. بس ابعيلى اللينك "

"هتلاقينى نشره فى صفحتى عشان انا موبيل ومش هعرف أعمله كوبي وبست .. ابقى قولى رأيك بقى لما تقرى "
كتب ببسمة " ليه هو انتى اللي كتبها ؟ "

" أنا ورقية واحد وبعدين أنا بحسها روايتى أصلا ..ومحدث قرأها الا وحس انها بتتكلم عنه "

فكر للحظة وكتب " لأ .. إنتى ورقية اتنين عشان أنا مش هاخذ اتنين .. هى واحدة بس "

نظرت لرسالته للحظات حتى فهمت ما يرمى له وأحست بالذنب لأنها من حادثته كالسابق .. فأرسلت له " ماشي ..
روح اقراها بقى .. عشان احنا المفروض مش بتتكلم .. سلام ! "

تلاشت بسمته ولام نفسه لتسرعه .. وكتب بحزن " سلام ! "

“ايه يامنار روحتى فين ؟ ”

–هاه ؟ .. لا أبدا طلعت على أول الشارع وجيت

ابتسمت حبيبة وقالت : طب حمدا لله ع السلامة .. يلا يابطة عشان هننزل

نزلا سويا وسارا معاً حتى منزل منار وقالت حبيبة : أنا هروح بقى صيدلية د نوران أسأل على شغل.. وادعيلي بقى
أرشق زيك

–ترشقى طيب يا حبيبة .. ويارب لو في خير ترشقى في الشغل او ترشقى في ابن الحلال ايهما اقرب

قالت حبيبة : لولا اننا في الشارع كنت ضربتك .. لينا كلية تلمنا .. يلا سلامات

ردت منار السلام ورحلت حبيبة نحو الصيدلية لتسأل عن وظيفة .. رحبت بها صاحبة الصيدلية (وكانت تعرفها منذ
أن كانت طفلة) واتفقت معاها أنها ستقف بالصيدلية من الساعة الرابعة وحتى التاسعة منذ بداية الشهر الجديد ..
كانت حبيبة تتمنى أن يكون الموعد مبكراً ولكن هذا لن يناسب دراستها كما أن صاحبة الصيدلية يجب أن تتواجد
في الفترة الصباحية بسبب التفتيشات .. اتفقت مع حبيبة على راتب صغير ووعدتها أني يزيد عندما تتخرج ..
وغادرت حبيبة الصيدلية وهي تكاد تطير من السعادة وتدعو الله أن يقبل نور بهذا الموعد ويتركها تعمل !

عادت الى شقتها وجهزت الغداء لحين وصول نور .. وصل نور وكان يبدو مشغول البال فلم تشأ أن تحدثه في أمر
العمل حتى يتناول غداؤه .. وبعد الغداء طرقت باب غرفته بخفة وظلت واقفة الى أن فتح لها ببسمة التي يحاول أن
يخفي بها أمراً يشغله !

دخلت غرفته وجلست الى جواره وقالت بجديبة : مالك يانور ؟

–مفيش يا حبيبة

نظرت له بعيون معاتبة فقال محاولا اضعاء المرح : يابت متبصليش كدا ! إنتى عارفة إنى بضعف قدام عيونك

ابتسمت وقالت وقد عقدت ذراعيها أمام صدرها : كلنى بالكلام ياخويا كلنى

ابتسم وقال : والله يا حبيبة قلبى مش باكلك بالكلام ولا حاجة .. كل الحكاية انى بفكر فى موضوع كدا .. ولما مش هلاقيه حل هقولك ..

-طب ماتقولى من دلوقتى يمكن نلاقى حل سوا ومتتعبش نفسك يعنى ؟

-معلش يا حبيبة سيبنى على راحتى .. وبعدين الموضوع ملوش علاقة بيا دا تبع حازم صاحبى يعنى أنا مش تعبان ولا حاجة

مط شفتيها وقالت : ماهى المشكلة إنك مش بتتعب ولا بالك بيتشغل كدا غير لو كان الموضوع له علاقة بحد من صحابك وخاصة حازم

حاول نور أن يبتسم وقال : حازم دا مش صحبى يا حبيبة !.. حازم دا أخويا .. معرفش ممكن أقول إيه أكثر من كلمة أخويا .. ممكن أقولك إن حازم دا أنا

ابتسمت حبيبة وقالت : ربنا يخليهولك

قامت من جواره وإتجهت نحو الباب لتغادر ولكنها تذكرت شيئاً فالتفت له وقالت : الله يسامحك نسيتهى كنت جايه ليه أصلاً

نظر باهتمام لها ونظرت هى للأرض وقالت باحراج : أنا بصراحة روحت لدكتورة نوران وسألتهى على شغل وقالتلى إنى ممكن أشتغل معاها من أول الشهر

جاء يتحدث ولكنها سبقته وبدأت تتكلم بسرعة : والله يانور هما خمس ساعات بس وعندى يومين أجازة عشان هى مقدره انى فى دراسه .. وبعدين هطبق اللى باخده عملى .. وأكتسب خبرة ومش هياثر على مذاكرتى إن شاء الله

..دا إنت أكثر واحد مجرب تنظيم الوقت وإنه إزاي بياخد حاجات كثير مع بعض وافق بقى ..ها ؟ ها ؟ ها ؟

تنهد باستسلام وقال : هتجربى شهر ولو أثر على مذاكرتك فمفيش شغل قبل ما تخلصي دراسة ! .. إحنا مش محتاجين فلوس الحمد لله

-إوعى تكون فاكر انى نازلة شغل عشان الفلوس .. لا يابابا إنسى أنا مش هبطل أخذ منك مصروف أصلا

ضحك نور وقال : قولتى هتشتغلى عند دكتورة نوران ؟

-أيون .. من أربعة لتسعه

-مش متأخر تسعة دى ولا إيه ؟

مطت شفيتها بحزن فقال : والله يا حبيبة أنا مش معترض على الشغل بس مش عايزك تتأخرى كدا فى الشارع

-دا الصيدلية تحت البيت يانور يعنى ممكن تبقى تبص عليا وأنا راجعه !

-طيب .. ربنا يسهل ان شاء الله يا حبيبة .. بس كنت عايز أقولك حاجة .. حازم بيشتغل فى الصيدلية دى برضه . عارفة ؟

هزت رأسها وقالت : بصراحة لأ .. بس أنا مالى بيه أصلا .. الدكتورة قالتلى إن بنوتة اللى هتبقى معايا فمفيش مشاكل بقى

-ماشي يا حبيبة اشغلتموا انتوا فى الصيدليات وسييتونى أنا ألون (ALONE) كدا

-طب مانت اللى ماسك فى السوبر ماركت انا خايفه لما تتخرج تجيب دوا وترصه فيه وتبيعه هناك

ضحك نور وقال بجدية : أنا بحب الحاج محمود دا أوى يا حبيبة وبحب ابنه يوسف جدا ! .. وبشتغل معاه لأنه مريحنى وأنا مريحه ولما أتخرج يبقى ربنا يحلها ان شاء الله

-ان شاء الله .. هروح بقى أذاكر وانت البس وانزل عشان متأخرش على الشغل

تناولت منار غدائها برفقة والديها وتم بدلت ملابسها وذهبت لتقابل للدار ليقيموا حفلة لهدير بمناسبة ختمتها للقرآن .. وكان معها حقيبة كبيرة ..

وصلت إلى هناك وأعدوا الحفلة لهدير هي وزميلاتها بالدار وتأخرت حبيبة قليلاً ولكنها أتت .. وجهزوا كل شيء وجلسوا يستريحون بانتظارها ..

وصلت هدير الدار وفاجئوها بالحفلة .. وبدوا يمرحون سويًا ويحتفلون بختمتها للقرآن وقدمت لها صاحبة الدار شهادة بذلك وقدمن لها بعض زميلاتها هدايا واقتربت منها حبيبة وناولتها هدية مغلفة .. فتحتها هدير بسعادة فاذا به مصحف تجويد كبير وبه التفسير الميسر أيضاً .. قالت حبيبة بفرحة : أنا فكرت كثير أجلك إيه .. وملقتش غير كتاب ربنا .. العهد اللي بينا .. ودا مش لحضرتك .. دا اللي هتحفظي منه البنات وتعلميهم التجويد وفيه تفسير ميسر عشان يبقى تذكرة ديما بمعاني الآيات

اتسعت ابتسامة هدير واحتضنته في سعادة وهي تكاد تطير من الفرح .. ربما هي تملك مصاحف أخرى ولكن هذا سيكون بداية عهدها مع نقل العلم .. وتذكرت حديث الرسول -صلى الله عليه وسلم - " خيركم من تعلم القرآن وعلمه " .. فازدادت بستمها لأنها ستستطيع الآن تعليم كلام الله لغيرها ذلك بالإضافة إلى أنها تدرس للطلبة بالمدرسة " لغة أهل الجنة " .. جذبت حبيبة واحتضنتها بقوة لعدة لحظات حتى جاء صوت منار من خلفها .. " شجرة واتنين لمون يا جماعة "

ضحكوا جميعاً فأردفت منار بمرح : كدا حلقتولى يا أندال ! .. دا اللي عرفتكم ببعض من شهر

ضحكت هدير وقالت حبيبة : الغيرة هتشتغل ولا إيه يا منار ؟ .. صفى النية الله يكرمك

وكرتها منار في ذراعها بخفة ودفعتها بخفة بعيداً عن هدير والتفت لهدير وناولتها تلك الحقيبة الكبيرة التي كانت تحملها .. وضعتها هدير على الأرض وبدأت تخرج ما بها .. أخرجته ونظرت له بفرحة غير مصدقة وصاحت حبيبة " الله الله الله .. منار جابت من الآخر "

ضحكت منار وقالت : يابت بطلى لماضة شوية لما نشوفها هتقول إيه ؟ .. دا هتلبسيه ف الفرحة يا هدير ..

ثم نظرت باهتمام لهدير التي تنظر للهدية بسعادة بالغة .. تبدلت نظرة السعادة ونظرت لها هدير بعتاب وقالت بحزن :
يعنى ينفع كدا يامنار ؟

لم تفهم منار سبب حزنها وعتابها فقالت بتعجب : إيه يا هدير ؟ مش عجبك الكاب ؟

قالت هدير بنفس نبرة الحزن : يعنى جيتلى كاب حلو كدا ألبسه فى الفرحة .. طب فىن العريس يابت

اتسعت عينا منار غير مستوعبة لما يحدث .. هل هدير سعيدة أم حزينة .. مطت شفيتها وقالت بهدوء : ان شاء الله هيجي ..

علقت حبيبة بمرح : هيجي يا هدير متخافيش مش هيغلط فى العنوان

قالت هدير بنفس هدونها وهى تضع الكاب فى حقيبتها : يلا .. الله يسامحك بقى فتحتى نفسى ع الجواز

تعالت ضحكات حبيبة وهدير ومنار لا تفهم شيئاً .. ركضت هدير نحوها واحتضنتها بشدة ورفعتها من على الأرض ودارت بها قليلاً ... ثم سقطتا على الأرض وشرعا يضحكان .. دخلت صاحبة الدار وقالت وهى تضحك من شكليهما : إنتوا إتجننتوا ولا إيه يابنات .. اهدوا شوية احنا فى دار برضه مينفعش كدا

ابتسمن بخجل ونظرن لبعضهن باحراج كالأطفال .. واعتذرن لها ونهضوا وأكملوا حفلتهم وغادروا .. وبينما ثلاثتهم فى طريق العودة قالت منار لهدير : يلا يا هدير بقى اتخطبى كمان خيلنا نفرح

قالت هدير : ماتتخطبى إنتى يامنار .. إنتى عايزة تلبسينى فى أى حد عشان نفرحى

قالت حبيبة : هى أكيد مش عايزة تلبسك فى أى حد .. رينا يرزقك الزوج الصالح

قالت منار : مش هلبسك طبعاً ! .. أنا بس أقصد إنك خلصتى الكلية وبقيتى مدرسة عربى جميلة واشتغلتنى كمان .. ليه بقى رافضة تقابلى أى حد : .. غيرك يا أختى مزنوق لآخر السنة مش عارف يخلع منهم

ابتسمت هدير وقالت : ماهى المشكلة مش فيا أنا ... فيكوا إنتوا .. إنتى وعمى ومراته .. نفسكوا تجوزونى عشان خلاص خلصت دراسة مش واخدين بالكم انى لسه هكمل الـ 23 سنة كمان كام شهر ! .. يعنى لسة صغيره بدأت منار وهدير يتكلمان عن هذا الأمر ولم تشاركهما حبيبة واكتفت بالانصات لهما ببسمة .. وبالحا كان مشغولاً بأمر آخر ..

عادت الى منزلها وهرولت نحو غرفة نور وجلست دون أن تبدل ملابسها بانتظاره هناك .. ولم تمر عدة دقائق حتى عاد .. وحين رآها بغرفته ابتسم وقال بمرح : دا احتلال دا ولا إيه

ابتسمت حبيبة فجلس نور الى جوارها وقال : خير .. بقلق لما تجيلي

قالت ببسمة : لأ خير ان شاء الله ، نور .. هو إنت مش ناوى تتجوز ؟

بدأ نور يضحك بشدة وقال بنفس أسلوبها : حبيبة .. هو انتى مش ناوية تزهى ؟

وكزته فى ذراعه وقالت : لأ يانور أنا بتكلم جد ! .. مش هتتجوز بقى ؟

-مش لما أخلص كلية الأول يا حبيبة ولا إيه رأيك ؟

-مانت فى آخر سنة .. ممكن تخطب وتتجوز بعد ما تخلص

ابتسم نور وقد فهم ما حدث معها .. وقال : هاتى من الآخر يا حبيبة .. شوفتيلى مين تانى ؟ .. سوري .. أقصد
عاشر

ابتسمت وقالت بخجل : واحدة صحبتى .. اتعرفت عليها من شهر تقريباً .. كانت عايشة فى محافظة تانية ونقلت هنا لما باباها مات عشان تعيش مع عمها .. ولك أن تتخيل عمها دا يبقى مين ؟

نظر لها وقال مجارياً اياها : هالها ؟ .. مين ؟ ..

-الحاج محمود أبو يوسف

تلاشت البسمة من وجه نور واتسعت عيناه وقال : تقصدى هدير؟

-ايه ياعم مانت طلعت واخذ بالك منها أهوو

قال بدهشة : انتى بتكلمى جد ؟

قالت بغير فهم : وههزر ليه يعنى ؟ إيه هدير مش عجبك ؟

-عجبانى مين !! .. هو انا كنت شوفتها فين قبل كدا !! .. كل الحكاية ان واحدة جت المحل وكان يوسف واقف

ومرضيش يحاسبها وعرفت منه انها بنت عمه بس كدا !.. وبعدين اشمعنه دى اللى عايزانى أتجوزها !؟

مطت شفيتها وقالت : عشان محترمة جداً و ..

قاطعها نور بجديفة: ماخدتيش بالك من حاجة ؟ .. إنى لو هطلبها هروح أقول لعمها ! .. اللى هو أنا بشتغل عنده

أصلاً !

قالت بجديفة : لأ يانور إنت مش بشتغل عنده ! .. إنت دكتور صيدلى وهتتخرج السنادى وتشتغل فى مستشفى

حكومة وفى أى صيدلية .. وإنت مش راضي تشتغل فى صيدلية عشان هو بيتق فيك .. ولسه مش هييجيب حد

جديد عشان يسرقه !! .. فانت بشتغل عنده عشانه .. مش عشانك

تنهد نور بحزن وقال : لأ طبعاً .. الناس الامينة كثير ويقدر يلاقى ألف زبي وأحسن كمان .. بس أنا اللى مرتاح معاه

.. ومحتاج المرتب اللى بيديهولى .. وكفاية إنه بيسينى أروح أصلى فى المسجد علطول .. لو روحت عند حد جديد

ممکن يقولى لأ متسبش الشغل وتقفل عشان الصلاة .. ويقولى صلي فى المحل وخلاص ! .. وأظن إنتى فاكرة هو

وقف جنبنا قد إيه من ساعة ما ماما الله يرحمها ماتت .. وقف معانا وقفة موقفهاش حد من قرابيننا أصلاً

-ماهو أنا نفسي تتجوز هدير عشان إنت بتحب عمها اللى هو هيبقى حماك

-هو إنتى ليه متمسكة بهدير أوى كدا .. ما كل مره بتقوليلى على واحدة معينه وأنا برفض وإنتى مش بتناقشيني كدا

-إنت رافض فكرة الارتباط قبل ما تخلص .. وأنا مش متمسكة بحد زى ماانا متمسكة بهدير ونفسي تبقى مراتك ..

وخايفة بقى انها تتخطب لحد تانى

“قريت قد إيه فى رواية فى الحلال ؟ .. ”

ابتسم حين وردته رسالة منها وكتب " قريت خمس حلقات ولسه شغال فيها أهو .. "

“موشي ..وايه رأيك ؟ ”

“هى كويسة .. مشكلتى إني مش بعرف أدى آراء أو إعجابات ! ”

“طيب .. ”

“لما هخلص قراية هقولك على حاجة حلوة نويت أعملها ”

“ايه هتعمل زى سلمى وتخلينى حفصة ؟ ”

“لأ .. هقولك حاجة ليها علاقة بيا أنا .. ماشي ولا هتضايقى ؟ ”

فكرت قليلاً ثم كتبت " لأ مش هضايق ان شاء الله "

أخذت تفكر كثيراً فيما فعلته .. هل هذا عهدا مع الله أنها لن تحادثه مجدداً ؟ .. تشعر الآن أن باباً قد فُتح

للحديث ولن تستطيع أن تغلقه أبداً !! ..

أغلقت هاتفها ساعتين وفتحته مجدداً وأرسلت له

“عمر!”

جاءها الرد بسرعة " !!؟ ”

كتبت " فى حاجة كنت عايزة أقولك عليها .. هى جامدة شوية بس لامفر منها ! ”

“لو حاجة هبلة بلاها لو جد قولى ”

أشعرها رده بالضيق فكتبت " أنا مش هقولك حاجة هبلة ! ”

“أنا آسف .. كملى كلامك ”

“أنا كنت قولتلك انى مش عايزانا نتكلم تانى وعملتك اوف لايين مدة طويلة !.. ومكلمتكش فعلا ! وانت اكثر واحد تشهد بكدا ! .. بس رجعنا تانى نتكلم أهو ! وأنا مش عايزة كدا ! .. أنا بتحرق من جوايا عشان بخون عهدى مع ربنا وحاسة انى منافقة وأنا لابسة خمار وبكلمك !! “

“أنا آسف يامنار حقتك عليا ! .. أوعدك إنى مش هكلمك تانى ! ..”

“دا مش حل ياعمر !.. احنا قعدنا مدة منتكلمش بس أنا رجعت أكلمك تانى !! .. وأنا خايفة أرجع أغلط زى الأول وأظن إنت أكثر واحد فاهم قصدى !”

“أنا عندى حل يامنار .. بس جاوبى سؤالى بصراحة ومن غير كسوف .. هو انتى ليه رجعتى تكلمينى تانى ؟ .. أقصد يعنى كنتى ممكن تقوليلى الله يبارك فيك وتقفلى معايا الكلام بس انتى كلمتينى ! “

كسبت منار بحزن : عشان الشيطان عارف انى ضعيفة فيدخل من مداخل أنا ضعيفة فيها .. وعلى فكرة أنا مفيش جوايا أى مشاعر لأنى خبيتها كلها وقفلت عليها !! “

تتهدت بحزن وكتب "أنا بنى آدم يامنار .. ربنا خلقنى ابن خالك عادى !.. والمشاعر دى مش هنقدر نخبيها مهما حاولنا.. ومهما كانت قدرتنا ! .. والحل اللى عندى بقى إنك تنسى إن عندك ابن خال إسمه عمر أصلا ! .. كأنى متولدش من الأساس ! .. دا لو إنتى عايزة كدا ! .. جايز ترضي نفسك "

شعرت أن أطرافها قد تجمدت حين قرأت " تنسى إن عندك ابن خال إسمه عمر أصلا " .. وبدأت ترتجف رغم دفء الجو ! .. كتبت له وهى تحترق " أنا مش عايزة أرضي غير ربنا ! .. إنت ليه مش عايز تفهم كدا !! ..وعلى فكرة أنا فعلا فى يوم كنت بحبك ! .. بس دلوقتى أنا بحب واحد تانى خالص ! .. وبكتبله فى كشكول خاص من ساعة ما بطلنا كلام ! .. الواحد دا هو اللى ربنا كتبولى ! .. وأنا مش هنسأك .. إنت هتفضل ابن خالى .. ابن خالى ويس .. نتقابل فى مناسبة او فى تجمع عائلى بس هتبق زى آخر مرة اتقابلنا ! .. مش هنتكلم أصلا !! ولا هسلم عليك حتى !.. “

“بما ان الحل دا عاجبك يبقى خلاص .. انسينى .. ومين عالم يمكن فعلا فى يوم تنسينى ! .. ومحدث عارف هو هيعيش لحد امته !! “

كنت بانفعال " أنا عندى حل تانى أفضل من دا لأن دا مش هيجيب نتيجة لأننا جربنا جو الأف لاین ومنفمش ! “
“قولى ”

“أنا عايزة أقولك حاجه قبل ما أقولك حلى .. أنا مكذبتش ولا حاجة لما قولتلك ان مفيش جويا مشاعر وانى دفتتها وقفلت عليها .. وكلامى معاك دلوقتى دا ضعف منى وان شاء الله هغلبه .. وعايزة اقولك حاجه كمان عشان أكون طلعت كل اللى جويا .. أنا عمري ما هرتبط بحد مش شبهى فى التفكير مش شبهى فى الطموح .. معندوش نفس أحلامى .. والراجل اللى هترتبط بيه هيحافظ على قلبه عشانى مش هينحسر علاقته بربه عشانى !! وعايزة أقولك بقى ع الحل .. الحل هو البلوك ! .. أنا عمري فى حياتى ما تخيلت إن دا فعلا الحل الحقيقي ! .. أنا مش هشوفك ولا انت هتشوفنى ! .. ومش هنقدر نتكلم بعض تانى ! .. وانا ع فكرة كنت بعرف انك فاتح رغم انى عمالك اوف لاین !! .. فعشان بقى مغلطش تانى أنا هعملك بلوك ! .. وصدقنى انت هتحب الحل دا لأنه هيقفل باب حرام كان مفتوح قدامك .. أنا مش هعمل البلوك غير لما استلم ردك .. ؟ ”

“ربنا يوفقك فى حياتك وييسرك للخير لأنك فعلا تستحقه ! .. “

“ خلصت ؟ ”

“ايوا خلصت ! .. أعمل أنا البلوك ؟”

“لأ .. أنا اللى هعمله ! .. سلام! بس كنت عايزة أقولك نصيحة قبل ما أقفل ومتاخدهاش بشكل شخصي ! .. حافظ على قلبك وعفه وصدقنى هتحس براحة غريبة وهتعيش حياة تانية ! .. إعمل بنصيحتى ياعمر ”

“باذن الله يامنار .. سلام ! “

تلقت رسالته وتنهدت براحة ودخلت على صفحته وضغطت حظر ! .. وابتسمت براحة لم تشعر بها من قبل ..

ابتسم عمر وتنهى حين صار اسمها امامه فى المحادثة باللون الاسود وأخذ يقرأ ويردد كلماتها " أنا عمري ما هرتبط
بجد مش شبيهى فى التفكير ولا شبيهى فى الطموح ! .. حافظ على قلبك وعفه وحتس براحة غريبة ! "

عاد عمر الى الواقع مجدداً وشعر بدموعه التى انهمرت على خديه ومسحها بسرعة وقال لنفسه : ياه ! .. سبحان
مغير الاحوال فعلا .. ربنا ليه حكمة فى كل حاجة ! .. حكمة فى الألم اللي بنحسه لما بنفارق .. حكمة فى
الذنب اللي بنعمله ونرجع نتوب منه .. حكمة فى الدمعة اللي بتنزول وبتاخذ معها وجعنا .. يارب أنا أخطأت كثير
اووى وانت ديما ساترنى .. يارب ثبتنى على طريقك اللي مكنتش أعرف إنى هبقى سعيد ومرتاح بجد وأنا ماشي عليه
.. كلنا عارفين الطريق وكلنا عارفين نبدأ منين .. بس مشكلتنا إننا ديما بنستسهل ونقول منعرفش ! محدش دلنا !
... يارب إنت الهادى يارب .. واللى بيصدق معاك يارب إنت بتهديه وبتعتله الاسباب .. يارب أنا بحبك ..
بحبك أوى.. وهرضيك يارب .. وهفضل أحبك حتى لو منعت عنى منار ..

دخل يوسف المسجد قبل صلاة الفجر بساعة وكان قد ترك هاتفه فى المنزل كى لا يحدث هدى بالمسجد أيضاً !!
.. تمر الساعات بهما ولا يشعران بها !! .. اقترب منه نور وجلس الى جواره وقال ببسمة : إزيك يا باشا ؟

ابتسم يوسف وقال : الحمد لله يانور .. بتعمل إيه هنا قبل الفجر بساعة ؟

-أنا هنا من بدرى.. كان عندى شوية أمور كدا كنت عايز أقولهم لربنا .. فحييت أكلمه فى بيته

ابتسم يوسف لما أحسه من صدق كلمات نور.. وحين تذكر ماكان يفعله منذ دقائق عدة تلاشت بسمته وقال بحزن
: هو ربنا ممكن يسامحنى يانور ؟

ابتسم نور لأنه يعلم مايقصده يوسف : طبعا يايوسف هيسامحك بس إنت إصدق التوبة ومتكررش الذنب

قال يوسف بضيق : هو إنت ليه مقولتش لحازم ؟.. مش هو صاحبك وإنت المفروض بتخاف على أخته من حيوان زبي !

ابتسم نور بهدوء منح يوسف بعض السلام وقال : ولما أقول لحازم هكسب إيه ؟ .. هيتخانق معاك إنت وأخته وهخسرك وخلاص

قال يوسف بحزن : ع الأفل كان وقفنى عند حدى ! ..

-طب ليه إنت متوقفش نفسك عند حدك .. ليه متخليش خوفك من ربنا مش من حازم !!

صمت يوسف بحزن فأردف نور : أنا عارف إنك بتحبها يا يوسف .. بس متخليش حبها يغلب حبك لربنا

اتسعت عينا يوسف وقال بسرعه : لأ طبعا أنا بحب ربنا أكثر منها

-لما تعصي ربنا ومتسمعش كلامه عشانها يبقى بتحب مين أكثر ؟

أطرق يوسف بحزن فقال نور : مش مهم يوسف إنت كنت إيه أو غلطت قد إيه .. المهم إنك توقف الغلط دا وتبقى حد كويس من دلوقتى

-بس أنا بحبها يانور .. وهى محتجاني أوى عشان حازم بعيد عنها .. وهى هتتحس بالنقص او انى كنت بلعب بيها لو بعدت عنها

-ربنا قادر يزرع جواها احترام ليك عشان حافظت عليها من نفسك .. ولما تتقدملها هتأكد إنك فعلا بتحبها .. من ترك شيئاً لله عوضه الله خيراً منه

-طب أنا خايف عليها .. أنا كنت قريب أوى منها وبخفف عنها .. هى تعبانة أوى وبتخاف من حازم أوى .. حاسة إنه بيفرض نفسه عليها .. بتقولى بيتحكم فى أصحابها وتصرفاتها وكل حاجة .. ويعمل عليها شيخ

قال نور بغير اقتناع : حازم !؟ .. استحالة !! .. دا حازم دا بالذات عمره ما بيفرض نفسه ولا يحب يتحكم ولا عمره عمل فيها شيخ .. هي أكيد فاهمة تصرفاته غلط .. أكيد هي فاهمة إنه عايز يتحكم فيها مش خايف عليها مثلاً .. أو يمكن بتكرر كلام أصحابها عن إخوانهم من غير تفكير

زفر يوسف بضيق وقال : معرفش بقي يانور !! .. أنا اتضايقت أوى لما قالتلى إنها خايفة لأكون زيه .. من ساعتها بقي وأنا قررت إن عمرى ما هقولها هنبطل نتكلم عشان حرام عشان هتكرهنى وهتفتكرنى عايز أتحكم فيها زى حازم .. تصدق إنه لبسها الحجاب بالعافية أصلاً وهي كانت صغيرة .. ودلوقتي عايزها تبطل بناطيل .. وبيقولها إمشي مع مين كمان!!.. بجد أنا كانت حاطط فى دماغى صورة لحازم والصورة دى اتغيرت تماماً لما هدى قالتلى على اللى بيعمله معاها

اعتدل نور فى جلسته وقال بجديّة : بص يايوسف .. أنا مش عايز أسمع كلام تانى من اللى هي بتقولها لك عشان نقل الأخبار ده اسمه نيمه!.. وكمان كلامها وكلامك عن حازم دا اسمه غيبة !! .. حتى لو كانت الصفة فيه وأنا أشك فى كدا أصلاً فده مش يدريك الحق عشان تتكلم عليه !! .. فلتقل خيراً أو لتصمت .. دى حاجة ثانياً إنت مدخلتش بينهم عشان تعرف الحقيقة .. ومتكرهش حد لمجرد كلام سمعته عنه .. هي أكيد فاهمة تصرفاته غلط .. المفروض هو يفهمها هو بيعمل كدا ليه أو هي تروح تسأله .. وفى كل الحالات إحنا ملناش دعوة!!.. ملناش حق نتدخل فى حياتهم حتى لو هما عايزين يدخلونا .. ولو إنت خايف إنها تتعب لما تبعد عنها فإدعى ربنا ديمماً يكون معاها ويجبر قلبها ويحفظه .. وهو أطف بيها منك يايوسف بكتير أوى.. إرضيه وإبعد عنها يايوسف ومتشغلش نفسك بغير المذاكرة عشان إنت فى سنة مهمة .. ومتقوليش إن كلامكم مش بيأثر على المذاكرة !! .. استحالة تكون بتغضب ربنا وأمورك متيسرة وماشية كدا عادى !.. يوسف والله أنا بحبك جداً وعايز مصلحتك وعايزك تبعد عنها عشان ترضي ربنا ..

-طب وهدى ؟

-تعالى نقوم نصلي سوا وندعيها .. وبالمرة ادعيلي عشان كلامك فتح نفسي ع الجواز

اتسعت ابتسامه يوسف وقال بلهفة : مين ها ؟ مين ها ؟ مين ها ؟ .. ها ؟ ها ؟ ها ؟ ..

-هتعرف لما أخطبها إن شاء الله

غمز يوسف بعينه وقال : انت غيران عليها ولا إيه ؟

قال نور : آه طبعا غيران عليها .. رغم انى لسه محددهاش أوى يعنى .. بس أنا قررت أحافظ عليها حتى من كلامى وتفكيري .. وعملت استخارة أفتح أهلها ولا لأ .. وبصراحة حاسس براحة غريبة .. رغم انى عملتها من شوية صغيرين .. ادعيلي بقى توافق عليا وربنا يسهلى لو فى خير

ابتسم يوسف وقال : ربنا يوفقك للى فيه الخير يانور، وقال لنفسه بحزن " شوفت يا يوسف ..مش عايز يتكلم عليها ولا يقول اسمها حتى!..عشان يحافظ عليها وانت عمال تقول لهدى انك بتحبها وعمرك ما هتتجراً وتقول لأخوها عشان إنت بتغلط وتكلمها إنما نور حافظ على قلبه وقلبها فمعندوش حاجة يخاف أو يتكسف منها زيي ربنا يسعدهم ويخلينى زيه !! "

قام يوسف ونور وصلا سوياً ودعا يوسف كثيراً أنه يرزقه الله عفة نور وأن يبعده عن الحرام وألا يضع فى قلبه حباً يغضبه وانخرط فى البكاء ولم يشعر بنفسه حتى سمع صوت الفجر ..

بعد عدة أيام .. دخلت تقى فى الصباح الباكر غرفتهم بالمدرسة وتفاجئت بعلبة على مكتبها .. لا تدرى من أين أتت ..أو كيف أتت حتى ؟ .. فلقد أغلقوا الغرفة بالأمس ولم تكن موجودة ..

فتحتها فاذا بداخلها ورقة مكتوب فيها " متخافيش مكسرتش القفل .. أنا إستلفت المفتاح من العامل وحطيتها وقفلت تانى..ياريت مكونش ضايقتك بس حبيت أردلك الهدية وأجبلك حاجة بدل المصحف اللى إديتهولى..عفواً مقدما ياتقى "

انتاب جسدها قشعريرة حين قرأت رسالته وأحست أن الأمر قد زاد عن الحد !! وقالت نفسها بانفعال : هو أنا إديتك حاجة أصلاً دا انت اللي أخذته !! وبتقول عليه هدية كمان .. حسبي الله ونعم الوكيل مانت عارف إني مش هقدر أرد عليك .. فوضت أمرى ليك يارب !! .. فوضت أمرى لملك الملوك !! “

تناولت ما في العلبة وكان كتاباً مغلفاً ! .. نزعت الغلاف بضيق فاذا به مصحف .. سقطت منه ورقة تناولتها وقرأت ماعليها " جيتلك حاجة مش هتقدرى ترميها “

صاحت : لاحول ولا قوة الا بالله !! ربنا يهديك يارب !!

وضعت المصحف في حقيبتها وألقت العلبة والورقتين في القمامة .. وأحست أنه قد هزمها في تلك المرة لأنها بالفعل لن تستطيع أن تتخلص من المصحف !! ..وقالت لنفسها "هى الناس دى ازاي مش بتخاف من ربنا كدا!! .. استغلّيت كتاب ربنا عشان تخلينى أقبل هديتك بالعافية !! .. حسبي الله ونعم الوكيل أنا برضه مش هقبله وهحطه في أى مسجد أو في أى دار.. ثواني بس كدا ..أنا عندي حل تانى ! .. وأحسن بكثير !! “

فتح رامى عينيه وهو يبتسم بمكر .. يحاول أن يتخيل شكل تقى بعد أن رأت العلبة .. أخذ يتقلب في فراشه بمتعة وكان قد قرر ألا يذهب للمدرسة اليوم .. كى يجعلها تفكر به أكثر .. ولم لم يأتى ؟! .. كان يثق في أن خطته ستنجح وبكل سهولة .. ولكنه لم يكن يعلم بقوة من يعتصم بالله ! .. أخذ الوسادة في حضنه بسعادة وهو يتخيل تقى وهى تلين له وتشكره على الهدية والجهد الذي بذله لايصالها اليها وتخضع له ولما يريد .. هو يعلم أن تلك الهدية الصغيرة لن تفي بالغرض ولكنه لن يمل أبداً .. ففي جعبته كثير من الحيل والمكائد !!

شخص ببصره الى المكتب حيث ذلك المصحف الذى أخذه منها ولم يفتحه من حينها .. أحس بشعور قد يكدر صفو فرحته .. فأشاح بوجهه بعيداً عنه وأغمض عينيه ونام ..

“أيوا يانور .. روح الكلية من غيري إنهاردة .. أنا معنديش حاجة مهمة .. سلام“

أغلق المكالمة وأخذ يقلب فى محتويات هاتفه حتى وصل لذلك المجلد .. فتحه وقلبه يخفق بشدة وكأنها أول مرة .. وأخذ يقلب فى الصور والدموع تتحرك فى عينيه .. خرج منه بحزم وضغط "مسح " .. تردد للحظة ولكن الآوان قد فات وتم مسحهم بالفعل !!

تنهد بحزن وأخذ يتذكر حين أرسل له رامى تلك الصور بمجرد انتهاء الثانوية العامة .. صور محادثات بين منار وعمر .. أحس حينها أنه يركض خلف السراب وأن منار لم تحبه يوماً !! .. وأن قلبها معلق بعمر حتى إن تغيرت فسيظل قلبها معلقاً به .. هو لا يعلم أنها توقفت عن الحديث معه ولكن حتى إن علم ذلك ! .. فهو يعلم الآن أنها تحب عمر .. ولن يرضى أبداً أن يكون الرجل الثانى بقلبها !!

كان يدخل هذا المجلد من الحين للآخر كي لا يعلق قلبه بها.. ولكنه اليوم قرر أن يمحوه من حياته بأسرها.. قرر ألا يعذب نفسه بحبٍ يحاول أن ينسأه وغير دعواته .. حيث صار يدعو أن يرزقه الله بالزوجة الصالحة التى تنسيه منار .. صار يدعو تلك الدعوة منذ أعوام .. والآن أحس أن تلك المحادثات ماهى إلا تجسس على ما دار بين عمر ومنار.. وإن كل مرة يشاهدهم فيها يكون فى رصيد سيئاته .. لذا .. وبكل بساطة .. مسحهم !! .. وكم تمنينا أن يكون لقلوبنا ذلك الزر الذى نمحو به آلامنا .. ولكنه لم يوجد قط !.. ولكن هناك دوماً بديل .. أن تعلق قلبك بما يعوض عنك ألمك .. وقد قرر حازم أن يعلق قلبه بالله أكثر وأكثر كي يتم شفائه من حب منار على أكمل وجه

تنهد حازم بقوة ورفع يده للسماء وقال : يارب إنت الوحيد اللى عالم بيا وبحالى ! .. يارب خفف عنى ألمى ووجعى .. يارب إحفظ هدى يارب .. ومتخليهاش تغلط فى يوم زى منار .. يارب إنت عالم إنى خايف عليها .. بس هى

خايقة منى يارب أنا مش عارف هرجعها تحبني إزاي وتثق فيا إزاي؟! .. إنت القادر على كل شئ يارب .. يارب
ثبت منار لو كانت بعدت عن الغلط دا .. وارزقها وارزقنا جميعا أحلى حياة معاك يارب

عاد نور من كليته ووجد أخته لم تعد بعد .. أخذ يدور فى أركان الشقة وهو يفكر .. ظل يدور مايقارب النصف
ساعة وهو وعقله مجهد بالتفكير .. حتى صاح بنفسه : بس بقى !! .. كفاية تضيع وقت !!

إتجه نحو مصحفه وفتح سورة يس .. وهو موقن أن يس لما قرأت له .. قرأها ورفع يده للسماء وقال : يارب إنت
العالم فين الخير يارب .. يارب ثبت خطايا يارب .. لما حبيبة قالتلى الموضوع مكش فى دماغى .. بس لو عملت
استخارة حسيت براحة وحاجة من جوايا بتزقنى أروح أكلمه بس أنا خايف يارب ! .. يارب كن معى أنا محتاجك
أوى أنا خايف أروح أقوله ميقبلنيش ويفتكرنى طمعان فيه .. استغفر الله العظيم .. أنا والله مش بسئ الظن .. بس أنا
خايف ومش لاقى اللى يطمنى غيرك .. يارب ثبت خطواتي ويسرلي أمرى لو فيه خير فى الموضوع دا ! .. يارب أنا
مش عارف إيه هيكون رأيها لما تعرف ان انا اللى شكته لعمها من كام سنة ومشتنى من الشغل بسببها .. هى فكرانى
عاكستها ومعرفش هى رد فعلها إيه لما تعرف إنى طالبها .. أكيد هتفرضنى من غير ما تقابلنى حتى .. خلاص ملهاش
لازمة أتقدم من أساسه !! .. بلاش أوتر العلاقة بينى وبين الحاج محمود .. أنا ما صدقت إنه الحمد لله نسي حكاية
هدير خالص ! .. بس برضه حبيبة بتقول عليها كويسة أوى وعمري ماشوفتها متمسكة بحد كدا .. بس أنا مش هينفع
أتقدم وأنا لسه طالب ! .. وكمان مش هينفع أتجوز قبل ما أطمن على حبيبة .. وكمان لو رحى إتقدمت هقوله إيه ؟
.. هتجوز فى شقتنا لما أوزع أختى !! .. طبعاً مينفعش وكمان حبيبة ليها تلت الشقة .. ياررررب بقى !

تنهد باستسلام وقال : أنا هعمل استخارة تانى وربنا يسرنى للخير بقى

عادت منار من كليتها بيستمها المعهودة .. وألقت التحية على والديها ثم دلفت غرفتها وارتمت على الفراش وتنهدت براحة لأنها وصلت بيتها بعد معاناة مع المواصلات .. حمدت الله على نعمة لم تكن تشعر بها من قبل وهي نعمة البيت .. ربما هي تعاني في المواصلات ولكنها تعلم في النهاية أن لها مكاناً يؤيها .. محال غيرها ممن لا يملكن حتى رداءً يستترهن ويقيهن برد الشتاء .. ظلت واجمة عدة لحظات وهي تفكر بحال غيرها ممن ينهش البرد في عظامهن .. انتفضت من مكانها وهرولت نحو خزانتها وفتحتها وأخذت تقلب فيها عدة دقائق .. وهي تحدث نفسها " اممم حلو الجاكيث دا أوى .. ودا كمان لذيد .. بس الحلو واللذيد مينفعوش مع بعض .. يانهار تبذير جاكيتين اسود.. هو واحد بس كفاية والتانى هيطلع .. اممم هطلع الجديد وأخلى القديم ليا عشان الايه بتقول ((لن تنالوا البر حتى تنفقوا مما تحبون)).. وأنا بحب الجديد .. بس هطلعه والقديم شغال برضه وحلو عشان أنا بحافظ على أشيائي امممم طب انا عندي هدوم كثيرة وحلوة وطرح حلوة مبعملش بيهم حاجة وطولها معقول مش قصيرة .. ليه مطلعهمش برضه .. ياررب إنت عارف نيتي يارب .. يارب إرزقني الإخلاص فى العمل ياررب "

دخل والدها وقال وهو يضحك قائلاً : إيه يانار اتجننتى خلاص ؟

ضحكت بشدة وقالت : تقريبا كدا يا حج .. المهم بقى كنت عايزة أقول لماما حاجة وهى مش هتوافق .. فإنت اللي هتقنعها بقى

-خير يانار ؟

-كنت عايزة أطلع اللبس الزيادة اللي عندى ..وعارفة إن ماما مش هتوافق وهتقولى خسارة وخليهم لما تتجوزى والكلام دا

تظاهر الوالد بالتفكير لكى يرى شغف ابنته .. صمت قليلاً وقال باهتمام : وإنى عايزة تطلعهم ليه ؟

قالت بحماس : بابا هو إنت مش سقعان ؟؟ .. طب مش إنت تقدر تروح تلبس جاكيت واتنين عشان تتدفا ! ..وتقدر تشغل الدفاية كمان غيرنا بقى ميقدرش ومعدوش حتى بطانيه طب مش أنا لما حبيت أغير نظام هدومى قدرت أغيره ؟ .. ركنت كل اللي عندى وإنت جبتلى غيره .. ولما أقولك خلاص هبطل الجيبات وفساتين وهلبس

عبايات أو كاب مش انت هتدينى فلوس أجيب ؟ .. يعنى أنا الحمد لله ربنا فاتح عليا ومن عيلة مقتدرة فلازم بقى
يبقى عندى دم وأحس باللى حواليا وهما أولى يستفيدوا بالهدوم دى

قال الاب ببسمة : يعنى بدل ما الحاجة مركونة فى الدولار هتطلعها .. فكرة حلوة برضه يامنار وممكن تكلمى
رسالة وهى عارفة هتوديهم فين

تلاشت البسمة بعض الشئ من وجه منار وقالت لنفسها " والله يابابا مش بطلعهم عشان مركونين ..ربنا يعلم انى
هطلع من اللى بلبسه برضه .. الحمد لله انك يارب عارف اللى جوانا "

ابتسم مجدداً وقالت : هشوف دار الايتام اللى جنبنا الاول بس بعد ما أغسلهم وأكويهم وأعطرهم وأكيسهم كأنهم
جداد بالظبط

ابتسم الوالد وقال : طب تعرفى بقى إن السيدة عائشة رضى الله عنها كانت بتعطر الدنانير قبل ما تخرجها فى سبيل
الله لأنها كانت بتقول إن الفلوس دي بتسقط فى يد الله أولاً ..

اتسعت ابتسامه منار وقالت : الله بجد! ربنا يقدرنى وأقدر أتشبه بيها هى وزوجات الرسول عليه الصلاة والسلام

دخلت حبيبة منزلها وهى تتمايل بسعادة .. ابتسم نور لرؤيتها وقال : إيه اللى مفرحك كدا ؟ .. لغوا امتحانات نص
السنه ؟

ضحكت حبيبة ورفعت نقابها واقتربت من أخيها وقالت بفرحة : لأ ملغوهاش للاسف .. بس فى حاجة أحلى بكتير
حصلت

-خير فريحنى معاكى ؟

قالت بمكر : هتعرف كل حاجة فى وقتها بقى ياسي نور

-لأأش شكراً

مسح على رأسها وقال بحنان : هدى أنا مش عايزك ترعلى منى .. إنتى عارفة إنى بحبك أوى !

-وأ أنا كمان ب بحبك

أحس بعدم رغبتها فى بقاءه معها فاستاذن ورحل ! .. دون أن يعبر عما يطويه قلبه من خوف عليها وحب لها ! ..
ودون أن تكسر هى حاجز الخوف وتخبره بما يطويه قلبها من خوف منه !

بعد عدة أيام وفى أول يوم فى الشهر الجديد

“خلاص يا نور والله حفظت اللى قولت عليه .. خلينى أنزل بقى بدل ما أتأخر ! “

-ماشي يا حبيبة .. مع السلامة وخلي بالك من نفسك

ضحكت وودعته وذهبت إلى صيدلية الدكتورة نوران .. إنه أول يوم لها بالعمل .. وصلت الصيدلية وألقت السلام على الشابة الواقفة هناك (رحمة) وجلست معها تتعلم منها رغم أنها ليست صيدلانية ولكنها صاحبة خبرة بهذا المجال .. لذا جلست معها وحاولت التعلم منها بقدر الامكان .. مرت الساعات حتى قاربت الساعة التاسعة .. دخل شاب من الباب وصافح " رحمة " بسمته ومد يده ليصافح حبيبة قائلاً بسمته : أنا د/ حسام شغال معاكم هنا بس فى الفترة المسائية

ارتبكت حبيبة التى لا يبدو منها أى شئ وقالت : أنا آسفة بس مبسلمش !

أحس بالاحراج الشديد وقال : ولا يهملك !

مرت عدة دقائق من الصمت فالتفت حبيبة لرحمة قائلة : مش هنمشي ؟

ردت : لما حازم يجي هنمشي

وفى تمام التاسعة دلف حازم من باب الصيدلية وألقى السلام خافضاً بصره .. عد حسام ما فى الدرج من أموال وطابقه مع ما دونته حبيبة ورحمة بكراسة الحسابات وقال بعد أن أنهى ببسمة : نقدر نقول دلوقتى تصحبكم السلامه

غادرت الفتاتان من الصيدلية فالتفت حسام لحازم وقال : شوفت الدكتورة الجديدة ؟

قال حازم : أيوا مالها ؟

قال باستهزاء : مديت إيدي أسلم عليها كسفتنى والبت رحمة وقفت تضحك على منظرى .. بوظت البرستيغ !! .. معرفش هي ليه مبتسلمش .. يعنى التسليمة دى هتخلينى أقع فى دبايها !!

قال حازم بضيق : فى إيه يا حسام ؟! .. ماكل واحد حر ! .. وبعدين متكلمش على حد بالأسلوب دا !! .. إنت ترضي أتكلم على أختك كدا !

-الحمد لله معنديش أخوات ..

حاول حازم أن يجعل أسلوبه ليناً كى يتقبل منه النصيحة وقال : بص يا حسام .. كل واحد فينا ليه حريته الشخصية .. يعنى لما بنت بتلبس بنظرون ضيق أوى مش بتقولك دى حرية شخصيه .. أهى برضه هي حرة تلبس وتعمل اللي تريحتها والأهم يرضي ربنا

-بس المثل بيقول "كل اللي يعجبك وألبس اللي يعجب الناس " .. وهى بتبقى لابسة خيمة ولا معرفش بيقولوا عليها ملحفة ولا عباية ! .. ولا بسه بتاعه على عينها مش مييناها حتى !! ..

ضحك حازم وقال : هو أنا منخدتش بالي هي لابسه إيه انت عارف مش ببص بس هي بيبقى اسمها ملحفة أيوا ياعم والبتاعة بتاعت العين دى اسمها بيشة .. وبعدين هي حرة بقى يا حسام وفكك بقى وخلينا نشوف شغلنا

ابتسم وقال : أنا مالى أصلاً ياخويا .. طب آخر سؤال ؟ .. متعرفش اسمها إيه ؟

هدأت نفسها قليلاً وكتبت : هو ربنا راضي عنا ؟

كتبتها وهي تتأمل أن يواسيها قليلاً .. قرأها واتسعت عيناه وكذلك ابتسامته أحس أنها إختصرت الطريق الطويل وكتب بسرعة : لأ !

صُدمت حين قرأت رسالته فقد كانت تتوقع أن يواسيها قليلاً ويخبرها أنهما يوماً ما سيكونا أفضل ! ولكنه لم يفعل وأخبرها الحقيقة .. الحقيقة وحسب !!

شعرت بالغيظ من رده وكتبت : وإنت ليه بتغضب ربنا فيا ؟..مش إنت عايز الجنة ؟!

كتب بحزن : ماهو أنا بحبك ! .. ومش عايزك تقولى عليا معقد لما أبطل كلام معاكى أو إنى كنت بشتغلك أو بتسلى بيكى ! .. خايف لتفكرى فيا كدا

أرسلت بحزن : أنا آسفة يا يوسف

ابتسم باشفاق لأنه تخيلها أمامه تبكى الآن وكتب : هدى أنا هتغير وهغيرك معايا

أدمعت عينها وكتبت : بس أنا عايزة أعيش حياتى ! ومش عايزة أبعد عنك فى نفس الوقت !!

تنهد باستسلام وكتب : وأنا مش هبعد عنك ! .. إحنا هنتغير سوا وربنا يسامحننا بقى فى الذنب دا لما نتجوز .. بس إيه رأيك نخط حدود للكلام .. وأولها إنا هنبطل كلمة بحبك وما فى معناها ونتكلم عادى .. قولتى إيه ؟

ابتسمت حين قرأت كلماته أحست أن هذا هو الحل المناسب والذى لن يكلفها شيئاً سوا بعض الحدود فى محادثاتهما .. وكتبت : موافقة وهداً كمان ..

-امممم أنا هبدأ أحفظ قرآن تبدأى معايا ؟ .. وبالمره لما تروحي تقولى لحازم انك عايزة تحفظى قرآنك ممكن يغير نظرتة ليكي شوية ويعرف برضه انك تعرفى ربنا من غير ما تبطلى بناطيل

-إنت شايف كدا ؟

-أيون .. هاا قولتى ايه ؟

رد نور وحازم الذى برفقته : تمام الحمد لله

وكز حازم نور فى ذراعه وقال : أسبيكم أنا بقى شوية

فهم نور ما يرمى اليه حازم فقال بسرعة : إستنى يا حازم أنا مروح معاك مش رايح الشغل ..

وجاء يمشي ولكن حازم دفعه دفعة خفيفة قائلاً : لأ إنت عندك شغل لازم تخلصه مع الحاج محمود إنت نسيت ولا إيه

-لا يا عم معنديش حاجة خدنى معاك ! (قالها كالأطفال)

دفعه حازم مرة أخرى وقال : إيه اللزقة دى ماتبطلوا تسول بقى .. خدوا يا حج وديه القناطر ههههه يلا السلام عليكم !!

رد الحاج محمود السلام وهو يتعجب من تصرفاتهما الطفولية وانصرف حازم بسرعة قبل أن يعلق به نور من جديد فالتفت له الحاج محمود وقال بتعجب : مالكو إنهاردة يانور ؟

ارتبك نور وقال : هاه ؟! .. لا أبداً مفيش !

نظر له وقال بعتاب : هتخبي على عمك الحاج حاجة يانور ؟ .. مكنش العشم يابنى !!

-لالالالالالا والله مبخبيش حاجة عليك وانت عارف كدا كويس دا حضرتك فى مقام أبويا والله

-أمال فى إيه بقى ؟

مسح على رأسه وقال بحيرة : موضوع كدا يا حجاج ومش عارف أسلك فيه أو بمعنى أصح مش عارف أبدؤه إزاي

-توكل على الله وإبدأ فيه يانور

أخذ نور نفساً عميقاً وقال : بسم الله الرحمن الرحيم .. اللهم إني توكلت عليك فيسرلى أمرى إن كان خيراً لي .

اتسعت عينا الحاج محمود وقال : هو الموضوع دا معايا أنا ؟

تنحج باحراج : احم .. اه ! .. بصراحه بصراحه .. بصراحه يعنى .. وانت عارف طبعاً إن الصراحة هي أقصر الطرق .. فى الموضوع دا الشباب بيبدأ بذكر محسانهم وكدا وفى الآخر بيقولوا هما عاوزين إيه .. وأنا تقريبا مش فاكرة أى حاجه عدلة فىا حالياً .. فاستحملنى لو لغبطت .. بصراحة أنا عايز أطلب إيد الأستاذة هدير بنت أخو حضرتك قالها نور ثم نظر للأرض بخجل .. ود لو يغلق عينيه كى لايري رد فعل الحاج محمود الذى كان خائفاً منه ولكن تركهما مفتوحتان لثقتة بربه وأنه هو القادر على كل شئ

دُهِش الحاج محمود وظل ينظر عدة لحظات لنور ولا يجد ما يرد به .. ابتلع نور ريقه بصعوبة وأحس بالاحراج الشديد من الموقف الذى وُضِع فيه ..

أحس الحاج محمود أنه قد أطل السكوت وأحس بإحراج نور أيضاً فمد يده وربت على كتفه وقال وهو مبتسم :
يابنى الله يجازيك وقعت قلبى !.. كل دا عشان تقولى عايز أخطب هدير .. آمال هتتعد معاها إزاي؟؟

تهلل وجه نور ونظر له قائلاً بفرحة الأطفال : يعنى حضرتك موافق ؟

ضحك الحاج بشدة وقال : يابنى المواضيع دى مش بتتاخذ قفش كدا ولا فى وقفة فى الشارع !!

-احم .. انت صح .. المفروض آجى البيت ..عندك حق .. بس أنا والله معرفش أصلى معنديش خبره خالص بمواضيع الجواز دى

ابتسم الحاج محمود ووضع يده على كتف نور وبدأ يسير وهو معه وقال : بص يانور .. أول مرة بيتيجى لوحداك وبعد كدا تجيب حد من أهلك

-احم تقريبا كدا حضرتك أنا هاجى كل المرات لوحدى .. حبيبة ينفع أجيها؟؟

ضحك الحاج محمود وقال : عايز حد كبير يانور .. عمك أو خالك .. كدا يعنى ..

-ربنا يسهل نيحى امته بقى ؟ .. لأ أقصد أنا آجى إمتة بقى لوحدى .. وهل لوحدى دى تتضمن حبيبة ولا لأ ؟

-إنت ماسك فى حبيبة كدا ليه يابنى ؟

-موشي هاجى الجمعه عشان اجازة من المدرسه والدروس عندى

-مستنياكى يا قمر

دخلت رحمة المعمل لأنها أحست بالملل من حوارهما .. ففتحت حبيبة حقيبتها وناولت شيئاً لهدى .. ابتسمت هدى وقالت : الله حلو أوى البتاع دا مع بنات كتير وييعجبني لونه أوى

ضحكت حبيبة وقالت : البتاع دا اسمه خاتم تسبيح كل ماهتشوفيه هتفتكرى ربنا بسبب الغرض بتاعه اصلا فهتذكرى الله .. دا هدية ياهدى عشان القرار الجميل دا ولما تشدى حيلك الهدايا هتزيد .. انتى وشطارتك بقى

-هو انتى شيلاهم كدا جاهزين فى شنطتك؟ .. شكله جديد يعنى!؟

-اه منا بقى شايله فى شنطتى خاتم تسبيح جديد ديما وكتيبات وحركات كدا ياباشا عشان أول ما بنوتة زيك كدا تفرحنى بخبر كدا يفرحنى أديها حاجة علطوول تشجعها

-دى أكيد ميزانيه تانيه لوحدها ؟

-ربك بيرزق بقى ياهدى

ابتسم هدى وقالت : أنا هروح بقى عشان متأخرش أنا كنت راجعة من درس فقولت أعدى عليكى وأنا مروحة

-طب ماتستنى عشر دقائق بالظبط وهمشي معاكى

-ماشى يا حبيبة

جلست برفقة حبيبة حتى وصلت الساعه للتاسعة وصل حازم فى الموعد تماماً .. دخل الصيدلية وتفاجأ حين رأى هدى التى تبسمت بخجل وقالت : إزيك يا حازم ؟

ابتسم لما رآها تجلس بجوار الدكتورة المنتقبة وقال : الحمد لله وانتى عامله إيه ؟

-تمام

-احم.. طب أنا هستنى برا لحد ما حسام يجي .. تعالى لو سمحتى ياهدى

خرجت هدى بخوف لأخيها وقالت بتوتر واضح : خير ؟

ابتسم وقال : خير ان شاء الله ..خير يعنى مستينانى ليه؟(قالها بسعادة بادية على وجهه)

-مش مستنياك ولا حاجة أنا كنت جايه لحبيبة أقولها إنى هروح أحفظ معاها قرآن

-ماشاء الله عليكى.. حبيبة مين ؟

-حبيبة أخت نور صاحبك اللي هى قاعدة جوادى

-طوبعا طوبعا يلا ادخلى اقعدى معاها وأنا هكمل حصة التذنيب

ابتسمت هدى لأنه لم يؤنبها كعادته وقالت : حاضر

وفى اليوم التالى

دخلت هدير محل الحاج محمود وفى يدها ذلك الطفل اليتيم "حسن" الذى اعتبرت نفسها مسئولة عنه منذ أن إنتقلت إلى الإسكندرية لأنه يذكرها بحالها .. يتيم الأب والأم !

وأوقفته أمام المكان المخصص للحلويات وقالت ببسمة : نقى اللي يعجبك ياباشا

أشار كأى طفل مصري أصيل على أحد أكياس " الشيبسي " دوناً عن باقى الأنواع .. فقالت له : مابلاش الشيبسي
دا خد حاجة تانية

أنزل سبابته بكسرة دون أن ينطق .. شعرت بألمه وحزنه .. وفرحته التى تلاشت فى اللحظة بعد رفضها لطلبه الأول
وقد وعدته من البداية وقالت "نقى اللي يعجبك "

تناولت كيس الشيبسي تحقيقاً لرغبته وظلت ممسكةً به وقالت ببسمة : هتاخذ إيه تانى ؟ وهاتلى معاك حاجة على ذوقك بس بلاش شيبسي

بدأ الولد يختار وهى تتابعه بعينها ولم تلاحظ الذى اقترب منها وفجأة سحب كيس الشيبسي وهو يقول بمرح : مش كبرتى ع الشيبسي دا يا حبيبة !!

نظرت له بفزع وكادت أن تصرخ لولا أنها تماكنت أعصابها فى اللحظة المناسبة .. لم تجد ماتقوله .. وفى أقل من ثانية وجدت حسن يسحب الكيس بقوة منه يده وصاح به : مش هتاخده دا ماما هدير اللى جابتهولى !!
صُفق نور ونظر للأرض وقال بإحراج شديد : أ أنا آ آآسف بس والى .. والله ..

قطع جملته مبتعداً عنها وهو فى غاية الإحراج مما فعله .. توقف عند مكان الدفع وأعطاهما ظهره وتحسس وجهه الذى سخن بشدة وأخذ يستغفر كثيراً .. ياالله !! ما الذى فعله !!

ظلت هدير واقفة مكانها مدهوشة مما حصل لم تُفق إلا على صوت "حسن" وهو يقول : دا غلس أووى !! عايز ياخذ الشيبسي بتاعى ..

ابتسمت هدير بتلقائية لكلماته .. ابتسامة أخفاها النقاب .. وقالت بصوت هامس : خد الفلوس وروح حاسبه بقى .. مش إنت الراجل بتاعى ولا إيه ؟

ابتسم نور حين سمع كلمات الطفل ولكن تلك البسمة لم تقضي على ضيقه مما صدر منه .. وكان يتردد بدخله " الله يسامحك يا حبيبة !! مش تقوللى إنك إديتى الشنطة اللى أنا عملاهالك لحد عشان متلغبطش وأقع فى كسفة زى ! .. "

اقترب حسن منه وحاسبه ووغادر هو وهدير

فى المساء

كانت منار وهدير تتحدثان فى الهاتف : والله يابنتى كان قلبى هيقف .. الحمد لله على كل شىء بقى .. كويس إنى
مصرختش

ضحكت منار وقالت : تلاقيه افتكرك حبيبة .. أصلاً يابنتى ماشاء الله نور وحببية دول علامة من علامات التدين
عندنا فى الشارع .. فأكيد هو مكنش يقصد يضايقك بدلالة إنه قالك يا حبيبة شوفتى العبقرية ؟ .. أنفع مخبر ؟ .
ضحكت هدير وقالت : طيب ياعم المخبر .. أنا هقفل بقى عشان الباب بيخبط ..

-مين !؟

-أكيد عمو .. وزمانه زهق ع الباب .. السلام عليكم يا قلبى

أغلقت معاها وفتحت الباب لعمها بعد أن تأكدت من هويته .. وبعد أن جلس وسألها عن أخبارها بدأ يفرك يديه وقال
: بصي ياهدير .. إنت عارفة طبعاً إنك بنتى وأنى أبوكى بعدما ما أبوكى الله يرحمه مات .. ومش هعيشلك العمر كله
.. ولازم أبقى مطمئن عليكى قبل ما أموت ..

نظرت له هدير وقالت بمرح : أبوا أبوا أنا عارفة الدخلة دى وعارفة إيه اللي وراها

ابتسم الحاج محمود وقال : طالما عارفة سيانى ليه أتكلم لحد ماقرت أشحت .. المهم بقى هو لسه بيدرس عشان
فى صيدلية ووالله شاب كويس جداً وملتزم من زمان وأعرفه من فترة طويلة وأخلاقه سيقاه

ابتسمت هدير وقالت بضحك : ومين دا بقى اللي الحاج محمود بيشكر فيه أكيد حاجة كبيرة أووى على كدا

تنحج باحراج وقال : بصي يابنتى .. هو الشغل مش عيب .. هو فى صيدلة أصلاً وهيبقى دكتور بعون الله بس هو
من زمان وهو بيشغل عندى .. بس دا ميعبوش أبدا وأنا برضه مش هجوزك لأى حد ..

تبسمت بتفهم وقالت : أنا مكنش قصدى والله أنا بس بحب أهزر معاك وبعدين مش مهم هو شغال إيه .. المهم هو
إيه ..؟ هو إيه فى أى شغل بس برضه انت مقولتش مين ؟

-نور

صاحت بتعجب : نور !؟

قال مدافعاً عنه : بصي الحكاية القديمة دى إنتى طلعتى ظلماها فيها وهو مكنش شايفك أصلاً ساعتها وأنا قولتلك إنه كان بيكلم رامى ومكنش يعرف إن الحيوان كان بيعاكسك ..

نظرت له بلوم فأخذ يستغفر الله عن سبّه لرامى ونظر لهدير وقال : هتقابليه ولا إيه ؟

فكرت عدة لحظات وقالت : هعمل استخارة وأقولك ياعمو

وفى صباح اليوم التالى بالمدرسة التى تعمل بها تقى .. فتحت غرفتهم ودخلتها وأغلقت الباب بالمفتاح من الداخل .. وجلست فى مقعدها وأخرجت مصحفاً لتقرأ فيه .. ذلك المصحف الذى أهدها إياه رامى بالإكراه .. فقد قررت أن تقرأ فيه بدلاً من وضعه فى أى مسجد أو دار وأن تدعو لرامى وغيره بالهداية كلما رأت المصحف .. عسى الله أن يصلحه هو وأمثاله من الشباب

وبعد أقل من نصف ساعة طرقت هدير الباب ففتحت لها تقى .. دلفت هدير الغرفة وأغلقت الباب بإحكام ورفعت نقابها وقالت ببسمة مشرقة : الجميل حفظ ولا هيضرب إنهاردة !؟

ضحكت تقى وقالت : لا بلاش ضرب يابيه أنا حفظت والله

أخرجت هدير مصحفها وقالت بتوعد مصطنع : إما نشوف

وبدأت تقى تسمع ما حفظته لهدير وبعد أن أنهت تناولت المصحف من هدير وقالت ببسمة شريفة : يلا ياهدير إختبار مفاجئ إممممم إبدأى سمعى سورة يوسف لحد جرس الطابور

إبتسمت هدير وقالت : حاضر .. بس بالله عليكى بالراحة عليا عشان أنا براجع من عم ولسه موصلتش ليوسف ..
إحم إحم .. بسم الله الرحمن الرحيم

نزل رامى من شقته متأخراً كعادته وهبط السلم بسرعة كى لا يتأخر على الحصة الأولى ويوبخه المدير وجاء يخرج
من بوابة العمارة لكن يداً قد شدته للدخل مجدداً .. نظر بفرع ثم ظهرت علامات الغضب على وجهه وصاح :
عايزة إيه منى مش خلاص خلصنا !!؟

ردت بغضب : لأ مخلصناش !! .. أبويا جايبلى عريس والمرة دى مصمم عليه !!

قال غير مبالٍ : طب ربنا يتمم بخير .. سلام !

جاء يخرج ولكنها جذبتة مجدداً للدخل وقالت : رامى أنا بحبك إنت !! وعايزة أتجوزك !! وإنت وعدتني بكدا !!
زفر بضيق وقال بنفاذ صبر : سمية !! مش فضيناها سيرة !! .. وأول مادخلنا الجامعة فهمتلك إنى عمرى ماهتجوزك
وإنتى قبلتى ومشيتى معايا ! عايزة إيه منى بقى دلوقتى ؟! .. عايزانى أتجوز واحدة محافظتش على نفسها ومشيت مع
واحد موعدهاش حتى بالجواز !!

كانت كلماته كالسيوف التى تمزق أوصالها .. بكى بحرقة وقالت : بس إنت بعد كدا قولتلى إننا هنتجوز

-يووووه بقى !! .. من الآخر ياسمية أنا مش هتجوز واحدة رخصية ! واحدة كانت بتسهر بالليالى تقعد تستنى رد
منى ع الفيس ! .. أو تقعد تكلمنى ساعات ومردش عليها وبرضه تفضل تتصل !! .. واحدة كانت بتخرج معايا من
ورا أهلها !! واحدة باعت صحبتها وخانتها !! .. واحدة لو كنت قولتلتها تعالى معايا نطلع شقة عمرها ماكانت
هترفض !! .. إحمدى ربنا إن علاقتنا وقفت لكدا ومحصلش أكثر من كدا ! وإلا كان زمانك مفضوحة دلوقتى !!

ثم أمسكها من ذراعها بقوة حتى كاد يعتصره وقال : إبعدي عني أحسنك ياسمية وشوفى البنات اللي حواليكى عاملين إزاي وإنتى عاملة إزاي !! وساعتها بس هتعرفى إن العيب كان من الأول خالص منك !! إقبلى بالمغفل اللي أبوكى جايهولك وإبعدي عن طريقى !! بدل وشرف أمى لأكون فاضحك ومش هتلاقى الى يعبرك !! أرسلها بقوة حتى اصدمت بالحائط وغادر وهو يزفر بضيق منها ويلعن اليوم الذى رآها فيه ..

((ملاحظة .. لايجوز القسم بغير الله أو سب اليوم أو الزمن .. أو لعن شخص أو مكان أو يوم أو ساعة أو أى شئ .. خدوا بالكم بتقولوا إيه يرحمكم الله “

وفى بيت نور.. كانت حبيبة تتناول الإفطار برفقة نور قبل أن تذهب لكليتها برفقة منار ..

“خلاص يانور بقى متزعلش قلبك أبيض بقى .. “

قالتها حبيبة وهى تتوسل نور كى تخفف عنه حزنه .. رد بهدوء : والله يا حبيبة بقولها لك للمرة العاشرة .. أنا مش زعلان منك .. أنا زعلان من نفسي .. كل ما تخيل نفسي وأنا بشد منها الكيس وبتكلم بغلاسه كدا ببقى عايز أضربنى ياااارب سامحنى ياارب مكنتش عارف إنها مش أختى ..

قالت حبيبة : إنت كنت فاكرها أنا عشان هى كانت ماسكة شنطتى ولابسة نقاب زيبى وكمان أنا بدأت ألبس ملحفة زيهما فبقينا توأم .. فإنت كدا مش غلطان !

قال بحزن : لأ غلطان .. حتى لو كانت إنتى مكنتش ينفع أشده منك كدا وأهزر معاكى فى الشارع يعنى أى حد معدى مش هيقول إنك أختى وهياخد فكرة غلط عن المنتقيات !! يارب والله ماكان قصدى

اقتربت منه حبيبة وربتت على كتفه وقالت بحنان : خلاص يانور .. إنت غلطت وإتعلت من غلطك حاجة كويسة .. ودى أحلى حاجة إنك تتعلم من أخطائك

ارتسمت شبهة بسمه على شفثيه ولكن سرعان ما تلاشت وقال بحزن : طب وهى !؟ .. تفتكرى هتفكر كدا ؟ ..
تفتكرى هتقبل تقابلنى أصلا بعد اللي حصل دا ؟

ضحكت حبيبة ونظرت للأخيهها بمكر وقالت : أيوا كدا بانة القولة !.. إنت شايل هم إنها ترفض تقابلك بعد
الموقف العسل بتاع انبارح دا هيح .. ماشي ياعم الرومانسي

ضربها فى يدها بخفة وقال : إمشي يابت من هنا أنا مبفكرش أصلا فى الحكاية دى ! تقبلنى ولا ترفضنى مش فارق
معايا أصلا

قالت بسخرية : طبعاً طبعاً .. أنا هقولها ترفضك بقى وخلاص طالما مش فارق معاك وبقى نشوفلك واحدة تانية

قال بانفعال : وحياة أبوكي الموضوع مش ناقص ! هى هترفضنى لوحدنا من غير ما حد يسخنها

عدلت حبيبة أسلوبها وبدأت تتكلم بجدية : بلاش وحياة أبوكي دى يانور .. أنا من فترة قريبة بس عرفت إنها تعتبر
قسم بغير الله .. زى والمصحف والكعبة .. وإحنا المفروض منحلفش غير بالله بس ماشي ؟

إبتسم وقال : ماشي يا حبيبة جُزيتى الجنة عرفتيني معلومة جديدة .. خلصي بقى فطار وإنزلى لصحبتك وأنا هشىل
الأطباق بدالك على ما حازم يجيلى

أشارت له بسبابتها وقالت بتواعد مصطنع : عارف هعمل فيك إيه لو كركبتوا حاجة ؟

ضحك نور وقال : هتضريينى أنا عارف ههههه مش هنلحق نبوظ حاجة هننزل علطول أصلا .. يلا بقى كدا إنتى
إتأخرتى وإحنا عايزين نبقى قدوة ولا إيه ؟

قفزت من مكانها وغسلت يدها بسرعة وأنزلت النقاب وإتجهت نحو الباب وفتحته وأشارت بالسلام إلى أخيهها
فتبسم وقال : حلوة الملحفة دى على فكرة كملى بقى فيهم

إبتسم بشدة وقالت : حاضر يلا السلام عليك يا حبيبي

أحست حبيبة بجفاء رد والددة منار ولكنها لم تشأ أن تناقشها فى الأمر وقالت : ماشي ياطنط .. لما تصحى خليها
تكلمنى بعد إذنك ! .. مع السلامة

التفت لترحل ولكن سارة (والدة منار) أوقفته قائلةً : إيه اللى أنتى لابساه دا ؟

ردت بسرعة : ملحفة ياطنط

ردت ببرود قاتل : وهتلبسيها لبنتى برضه؟؟

تنحنحت بإحراج وقالت : هى براحتها ياطنط تلبس اللى هى عايزاه مش أنا اللى هلبسها !

-ليه يا حبيبتى هو مش إنتى اللى بلبسيها (من كلمة بلوة) بالخمار دا وهى لسه فى ثانوى !!؟

قالت حبيبة بصدمة : بلتها !!؟ .. (حاولت أن تتمالك نفسها وقالت) والله ياطنط منار كبيرة وعاقلة وعارفة هى
بتعمل إيه .. بعد إذنك

ثم بدأت تهبط السلم وهى لاتكاد تصدق ما حدث معها للتو !!.. هل تكرهها والددة منار لتلك الدرجة ؟! .. هل لا
تطبقها لذلك الحد !!.. بدأت عيناها تدمعان بتلقائية .. مدت يدها تحت النقاب لتوقف لذلك السيل المتدفق من
الدمع ولكنها لم تستطع !! .. توقفت قبل أن تخرج للشارع لكى توقف دموعها .. أحست بحزن شديد يختلج قلبها
لم تكن تعلم أنها ضعيفة لتلك الدرجة كى تجرحها بضعة كلمات صغيرة بهذا الحد ! .. قررت أن تمضي فى سبيلها
وأن تترك همومها ورائها .. خرجت وبدأت تسير وهى لا تدرك شيئاً مما حولها .. لم تفق إلا على إنحراف سيارة
كادت أن تصدمها !! صاح صاحبها " إنتى إيه !!! طارشة !! مش سامعة الزيت الكلاكس !! .. روحى يا شيخة ربنا
يربحنا من أشكالكم كنتى هتودينى فى داهية ! "

صاح بتلك الكلمات التى عبر بها غضبه وسخطه عليها وإنطلق بسيارته فى طريقه بعد أن أسمعها ما أراحه هو ومزقها
هى من الداخل !! .. سقطت حقيبتها من يدها ووضعت يدها على عينيها وانفجرت باكياً كالأطفال فى الشارع
الخالى فى الصباح الباكر ! ..

تبعها بعينيه منذ أن نزلت من عمارة منار .. أحس بثقل خطواتها وأحس بالهم الذي تحمله .. وكيف له ألا يشعر بها وهي توأم روحه .. ظل يراقبها بعينيه وهو يسير مع حازم .. رأى ما حدث معها ومع السائق ولكنه لم يسمع ماقاله لبعده عنهما .. ركض نحوها ووصل إليها وهي تبكي فى الشارع !! لحقه حازم حين رآه يركض بلا مقدمات ولكنه توقف على بعد خطوات منهما !

أمسك نور يديها وأزاحهما عن عينيها ونظر لها وقال بعطف : حبيبة ! بالله عليكى ما تعيطى !

أعادت رؤيته روحها إليها فارتمت بين ذراعيه وزاد بكائها بحرقة !! .. تجمعت الدموع فى عينيه وأخذ يردد بهستيرية : بالله عليكى متعيطيش ! بالله عليكى متعيطيش أنا معاكى

بدأت تتحدث بهستيرية وهي ترتجف وتبكي بقهر : مامت منار بتقولى إنى بليت بنتها بالخمار !! ودلوقتى الراجل دا يشتمنى نا مش قادرة يانور !! أنا تعبانة أووى .. متسبنيش لوحدى تانى

تعلقت بمعطفه وأخذت تردد وهي تبكي : متسبنيش لوحدى تانى !!

أحطاها بذراعيه بقوة أكبر كى يشعرها بالأمان .. وأنسته دموعها العالم بأسره .. حتى أنه قد نسى أنهما بالشارع ونسى أمر وجود حازم من الأساس

رق قلبه لرؤيتها تبكي تمنى بشدة أن يخفف عنها ولو بكلمة !! ولكن كيف له السبيل لمحدثتها ! .. فإن لم يكن نور موجوداً بينهما .. فالله دائماً وأبداً معهما ! .. لا يعرف لم يشعر الآن فقط .. أنه يريد أن يقترب منها أكثر .. أحس من بكائها وكلماتها المرتجفة بتلك الطفلة الموجودة بداخلها .. لا يعلم لم أيضاً لكنه قد تمنى من الله أن تكون تلك الطفلة .. يوماً ما .. من نصيبه

شعر حازم أن عليه تنبيه نور أنهم فى الشارع .. دنا منهما وسمع صوت نور الخفيض وهو يتمم بضع من آيات من سورة يوسف ليهدأ نفس أخته .. لمس ذراعه بحذر كى لا يقترب من حبيبة وأشار له حتى أفهمه أنهما بالشارع ..

هز نور رأسه أى أنه تلقى ما يرمى له حازم .. ابتعد حازم عنهما مجدداً فهمس فى أذن أخته .. “حببية .. حببية
ياحبيبتى إحنا كدا فى الشارع وهنتفهم غلط“

ابتسمت حبيبة بتلقائية لكلمات نور فابتعدت عنه وجاءت تتكلم ولكنها تفاجأت بوجود حازم فصمتت !! .. نظر نور
لحازم الذى لم يسمع ما همس به نور لأخته وقال : معلش يا حازم روح لوحدك أنا هغيب إنهاردة وأقعد مع حبيبة ..
أنا آسف جدا إني آخرتك والله مش عارف أعتذرلك إزاي !!

ابتسم حازم وقال : بس يلا بلاش عبط سلام بقى خلى بالك من نفسك .. السلام عليكم

رحل حازم بسرعة وحاول أن يشغل رأسه فى أى شئ حتى لا يفكر فى حبيبة ..

نظر نور لحبيبة وقال ببسمة : كنت لسة بقولك إيه من شوية وإحنا عملنا إيه

نظرت حولها بقلق ثم قالت : الحمد لله مفيش حد فى الشارع

إبتسم وقال : الحمد لله إحكيلى بقى ياستى إيه اللى حصل فوق عند منار ؟

-مش لازم بقى يانور ... هبقى أقولك لما نروح .. على فكرة أنا كويسة .. روح إنت كليتك ومتعطلش نفسك

-إمشي يابت ع البيت أنا مش رايح كليات إنهاردة .. إن مكش عند سيادتك إعتراض يعنى !؟

ابتسمت وقالت : خلاص إنت حر هتروق معايا البيت كله بقى بما إنك قاعد

-قال يعنى مبروقهوش وأنا واقف

قال بضيق مصطنع : نوور بطل قلش .. دمك ثقيل

-طيب طول عمرك بتكبتى مواهبي كدا

وفى مكان آخر ..

إبتسم يوسف بشدة حين قرأ ماكتبته ورفع يده للسماء وحمد لله بشدة وكتب بسرعة : أهم حاجة إن ربنا بعون الله
هيكون راضي عننا

كتبت بيأس : طب وإنت ؟ .. هتفضل تحبني حتى وأنا بعيدة عنك ؟

كتب بسرعة : والله ياهدى هفضل أحبك لحد آخر نفس فيا .. ،، جاء يرسلها لكنه تردد ومسحها وكتب " ربنا
ياهدى هيسرنا الخير .. خليكى واثقة فى كدا "

شعرت بالحزن من رده أحسته يقول لها تلك العبارة تأدباً عوضاً عن " كل شئ قسمة ونصيب "

كتبت بفتور : طيب عايز منى حاجة قبل ما أقفل؟؟

تنهد بحزن حين قرأ رسالتها .. رغم فرحته بأنها سترك هذا الذنب ولكنه حزين لفراقهما .. كتب : خلى بالك من
نفسك ياهدى وحافظي عليها .. خليكى غالية زى ما ربنا خلقتك غالية .. إحنا هنصبر عشان ربنا يرضي عنا ويباركلنا
فى حينا .. أنا هعملك بلوك بس بعد ما أستقبل ردك .. والله ياهدى وأنا بضغطة هبقى كأنى بدوس على قلبى ..
بس حينا لربنا لازم يكون أكبر وأهم حاجة فى حياتنا "

أدمعت عيناها وأحست من كلماتها أنها قد أهانت نفسها من البداية حين حادثته .. كتبت بحزن : يوسف هسألك
سؤال وترد بصراحة ! .. وبعدها إعمل اللي إنت عاوزه ! .. إنت شايفنى وحشة ؟ .. لألألاً هى مش وحشة .. إنت
شايفنى رخيصة !!

كتب بسرعة : والله أبداً !! .. إنتى غالية عندى جداً .. عشان كدا نفسي أحافظ عليكى وأعفك ! ..
حتى من نفسي !! .. نفسي تفهمينى زى عادتك

إبتسمت وسط دموعها وكتبت : فهمتك يا يوسف شكرا بجد .. أنا همشي بقي .. كفاية سيئات لحد كدا.. يلا روح
إعمل بلوك للشيطان اللي عايز يوقع بينا ويزعل ربنا منا

أرسلتها وقرأتها مجدداً .. لم تعرف كيف صدرت تلك الكلمات منها !! .. لم تعلم مين أين أتت حتى !! كل ما تعلمه أنها نابغة من قلبها

إبتسم وقال : أستودعك الله

أرسلت له ابتسامة سعيدة

إستلمها ودخل على صفحتها وضغط على ذلك الزر .. وهو يودع صفحتها لآخر مرة ..

أحست ببرودة سرت في أطرافها حين إسود إسمه أمامها ولكنها تبسمت حين تذكرت كلماته عن رضى الله عنهما

بدأ يوسف يمسح الرسائل التي كانت بينهما رسالة برسالة .. من الأحدث إلى الأقدم .. بالطبع لم ينته منهم إنهم يحتاجون لعدة أيام متصله .. أغلق هاتفه وارتمى على الفراش يتأمل السقف وقلبه يخفق بشدة ويدعو الله أن يثبتها ويثبتها

فكرت أن ترتدى على الفراش ولكنها هرولت نحو الحمام وتوضأت وصلت ركعتين ك "بداية صلح مع الله " .. وأخذت تدعوه كثيراً أن يُصلح حالها وحاله .. وبعد أن أفرغت مشاعرها في دعوات صادقة أرسلتها لله .. نهضت وجلست على مكتبها وقالت في نفسها " أنا غايبة إنهاردة عشان أذاكر .. وفعلا هذاكر بعون الله بسم الله نبدأ ونحط جدول .. الامتحانات قريت "

قبل الظهر بساعة فتحت منار عينيها بوهن .. فإقترب منها والدها ووضع يده على جبينها وقال : الحمد لله الحرارة نزلت

بدأت تتكلم بصعوبة وقالت : الساع عة ك كامم ؟

نظر لساعته وقال : 11 وخمسه ..

قالت بوهن : حبي .. حبيبة عايزة أعتذ أعتذرلها عش عشان مرو مروحتش !

قالت والدتها بامتعاض : جت الصبح وأنا قولتلها إنك مش رايحة !

أشارت منار بوهن لمكتبها وقالت لها : نا ناوليني ي موبا..بايلي أكلم مها لو سمحتي !

زفرت الأم بضيق وناولته لها وخرجت من الغرفة.. جاءت منار تتصل بها ولكن والدها قال لها : أكيد هي فى الكلية دلوقتي خليها كمان شوية حتى تكونى إنتى فوقتى شوية ومتقلقيهاش عليكى

تبسمت منار وهزت وأومأت برأسها موافقةً فمسح والدها على رأسها وقال : حلمت بيكى حلم جميل يامنار

ابتسمت منار وقالت بمرح لم يمنعها المرض منه : خير يا حج ماهو باين من أول اليوم

ضحك والدها وقال : طيب يا جزمة مش هقولك وإنتى الخسرانة

-خلاص خلاص قول

ابتسم وقال : حلمت خير اللهم إجله خير .. إنى كنت عند الكعبة وكنت فرحان أووى وكان فى ريحة حلوة أوى

تنهد منار براحة وقالت بوهن : الله اكمل

ابتسم وأردف بسعادة : بصيت على يمينى شوفت واحد بيصلى وواحدة تانية بتصلى وراه وساجدين مكنش فيه غيركم على يمينى .. ولما قام من السجود شوفته وشوفتك واستتببت بقى إنه جوزك .. وبصي الناحية التانية شوفت نفس المنظر .. كانت هدير صاحبك وقدامها نور أخو حبيبة .. عرفاه ؟

أومأت برأسها بسعادة وقالت : أيون وأنا كان قدامى مين !!؟

-معرفش مشوفتش وشه

ضحكت وقالت : دا إنت عليك حركات يا حج

ضحك وقال : مانتى فوقتى أهو وبقيتى كويسة قومي بقى بلاش دلع ..

-بس بقى يا حج سيبني أسرح شوية فى الحلم الجميل دا

تنهدت براحة ثم قالت : يعنى مش عارف تشوفلى وشه !؟

ضحك وقال : لما هتجوزى هنعرفه

ابتسمت وقالت : طيب .. قومنى بقى الله يكرمك عشان مصلتش الفجر ومسمعتش المنبه اصلا وكدا حرام عليا
مأخرة الصلاة أووى

ابتسم وناولها يده وقال : صح قومي يلا صلى حتى على كرسي وربنا هيسامحك إن شاء الله عشان تعبانة

نقر نور بخفة باب حبيبة وقال : بيتى صاحية ولا نايمه

ردت من الداخل : إتفضل يانور !

دلف نور ببسمته واتعدلت هى فى جلستها وجلست على الفراش وعلى وجهها علامات العبوس .. اقترب منها وقال
: فكى ال 111 دول حواجبك كدا هتلق ومش هنعرف نجوزك

حاولت أن تبسم لكنها لم تستطع فجلس الى جوارها وقال : إيه اللى مزعل الجميل !؟ مش ناوية تقوليلى بقى إيه
اللى مزعلك ؟

قالت بحزن : خلاص يانور اللى حصل حصل بقى خلاص .. أنا بس اللى مضايقتنى إنى .. إنى أول مرة أحس إنى
يتيمة !

بدأت عيناها تدمعان فاقترب منها وضمها إليه ومسح دموعها وقال : ربنا يرحمهم يا حبيبة خليكي قوية يا حبيبة إوعى
تضعفى مهما حصل .. إحنا ممكن نكون من غير أهل بس ربنا معانا إحنا أقويا بيه .. هو إدانا رحمة فى قلوبنا وإدانا
حب لبعض وخوف على بعض ربنا بيعوضنا ويخفف عنا هو جميل أوى ورحيم أوى بينا

ارتسمت بسمه على شفيتها وقالت : أنا بحبك أوى يانور

دفعها بخفة بعيداً عنه وقال : خلاص ياماما شطبنا .. مجيتيش ليه من بدرى

ضحكت حبيبة من أسلوبه وقالت : أيوا .. ما اللي على على ياعم ..

ضحك فأردفت : هو لسه مدرش عليك ؟

-لأ بفكر أروح بعد الظهر أسأله عمل إيه .. بس دا أنا لسه مكلمه من يومين بس مش من كثير

-بلاش تسأله .. هو لما يقولها هى هتعمل إستخارة وبعدين تقوله هتقابلك أصلا ولا لأ .. فالاستخارة هتاخذ وقت

وكدا

-طيب .. لأقعدن على الكرسي وأنتظر وأمرى لله

وقبل آذان الظهر بقليل خرج يوسف من بيته متجها للمسجد .. وكان قد قرر أن ينتظم بالصلاة فيه مجددا .. وصل

أمام مسجد المنطقة ولكنه آثر أن يذهب للبعيد كى يأخذ حسنات أكثر .. أخرج هاتفه فى الطريق وبدأ يمسح

الرسائل بينه وبين هدى .. بدأ يعبر الشارع دون أن يلتفت أو ينتبه حتى أنه عليه الالتفات ..

“كابتن !!! حاسب !!!!!!!!!!!!!!!”

خرجت تقي من فصلها فلحقتها إحدى الطالبات ووأوقفتها : ميس تقي ينفع أقولك حاجة ؟

إلتفت لها تقي ببسمة وقالت : ينفع يياسمين إتفضلى

-ينفع على جنب ؟

تعجبت تقي ولكنها أخذتها من يدها ووقفنا وحدهما ثم قالت لها : ميس تقي أنا بحب حضرتك جداً .. رغم إن إنتى صغيرة أووى بس شاطرة أووى ويجد متقنة لشغلك

ابتسمت تقي من كلماتها فأردفت بتوتر : وأنا بصراحة فى حاجة حصلت كدا وأنا لازم أقولك عليها !

نظرت تقي بقلق فقالت الفتاة : بصراحة مستر رامى بتاع الانجليزى صور حضرتك قبل كدا ! .. أنا شوفته ! .. كان واقف فى آخر الطرقة .. وأنا كنت رايحة أسأله على حاجه .. أنا كنت جاية من وراه فمكنش شايفنى .. لما قربت منه شوفته مطلع موبايله ومقرب الكاميرا خالص عليكى وإنتى واقفة على باب فصل بتتكلّمى مع بنات وصورك كذا مرة ورا بعض وكانت الصورة واضحة عشان موبايله كاميرته جودتها عالية .. أنا إترعبت أصلا منه ومشيت من غير ما يشوفنى !! .. أنا آسفة أوى ياميس تقي

سرت قشعيرة بجسد تقي ولأول مرة تشعر بالخوف فعلا من رامى !! .. حاولت أن تبقى ثابتة وهادئة أمامها وقالت : شكرا عشان قولتلى .. بس عايزة أعرفك حاجة .. إن مهمما الإنسان طغى وافترى فلينا كلنا رب هيجمعنا يوم القيامة وياخذلنا حقنا .. وهياخذلنا حقنا فى الدنيا برضه

ابتسمت الفتاة بغير اقتناع ورحلت تاركة تقي غارقة فى التفكير .. ماذا سيفعل رامى بتلك الصور !! .. وماذا عليها أن تفعل كى تحفظ نفسها منه !! .. تخبطت الأفكار فى رأسها ولم تجد مفرأ سوى الهروب والرحيل من المدرسة بأسرها

“لا إله إلا الله دا الواد ورور !! “ .. “ مش تفتحوا يابهيم !؟ “

“وأنا مالى أنا مش هو اللى باصص فى الزفت دا !! “

“بطلوا خناق محدش يعرف مين أهله !! “

“أهله مين ياعم .. اللى خبطه ينقله مستشفى قبل مايتصفي وتروح فى داهية !! “

إتجه السواق إلى العربة التى يقودها وقال بنفاذ صبر : يلا يا أفندية إنزلوا ورايا بلوة أوديتها المستشفى .. الموقف فاضله خطوتين إمشوهم !!

نزلوا من عربته وهروا أحدهم ناحية يوسف حين رآه وهو يصرخ : يوسف !! يووووسف بالله عليكى فوق متموتش !!

نظر له الرجال المتجمعين بالشارع فصاح بيهم : ساعدونى نشيله ونوديه مستشفى !!

حملوه سويا الى "الميكروباص" ونقلوه الى المشفى .. أدخلوا يوسف إلى حجرة العمليات ومكث حازم والسائق بالخارج .. اقترب السائق منه وقال : والله إنت شوفت الحادثة !! .. هو اللى كان باصص فى الموبيل دا ومش باصص قدامه !! الغلط راكبه .. بس عموما ربنا يقومه بالسلامة !

حاول حازم أن يتسم وهو يتقبل كلمات السائق التى هو محق فيها بنسبة مئة بالمئة .. مد السائق يده وقال : الموبيل دا اللى كان معاه .. ينفع أروح أشوف أكل عيشي بقى ؟

-لازم القسم يعمل محضر ! .. يعنى لازم تستنى !

زفر الرجل بضيق وقال : يووه بقى على العطلة دى ..

لم يأبه حازم لأفأفته وأخرج هااتفه واتصل على نور وقال : وعليكم السلام .. معاك رقم الحاج محمود ؟ .. هو معاك أصلا دلوقتى ؟ .. طب هاته وتعالى لو سمحت على مستشفى "...حادثة بسيطة إن شاء الله .. يوسف ! .. أنا مستنيكم سلام !

وفى بيت منار

“وعليكم السلام يا عمر .. أنا بخير يا بني الحمد لله ”

قال عمر : ومنار أخبارها إيه ؟ عرفت إنها تعبانة ؟

إبتسم وقال : هي عمته دي تونة كدا علطول .

إبتسم عمر إبتسامة لم تخفى توتره وقلقه الواضح على منار .. أردف والدها : هي سخنت أووى قبل الفجر بس
بالكمادات بقت كويسة الحمد لله

-الحمد لله يا عمي

نظر له على بتفحص وقال : هو إنت يلا ما بتصدق تلاقى أى حاجة فتسيب شغلك وتيجي عندنا ؟

-لولا إنك بتحبني كنت إفتكرتك بتطرديني

-مين قالك إفتكر ! .. أنا بطردك فعلا

قالها ثم ضحك كليهما

نظر عمر حوله ثم اقترب من عليّ وقال بصوت خفيض : بقولك إيه ..

ارتفع صوت عليّ : يا بني إرحم أمي العيانة بقي !! .. ما قولتك لما تخلص دراستها

-طب مانعمل خطوبة دلوقتي والفرح وكدا بعد ما تخلص بالله عليك وافق بقي أنا صابر بقالي كثير أووى

ضحك عليّ وقال : مين قالك إنها هتقبلك أصلاً دي عاملة مواصفات قياسية لرفيقها للجنة ياعم ويتقعد تحكيلى
بقي

قال بلفهة : طب جابلتك سيرتي ؟

ضحك بشدة وقال : لأ عمرها ما جابت سيرتك وإطلع من دماغى بقى

-طب هطلع منها حاضر بس إوعدنى الأول إنك هتعرض عليها الموضوع ؟

-حاضر هقولها

-إنهارة هقولها

ضحك وقال : لو لقيتها قادرة هقولها إنهارة .. يلا قوم روح بقى !!

وفى المشفى كان حازم يجلس على أعصابه بانتظار خروج الطبيب من العمليات .. وييده هاتف يوسف الذى أخذه من السائق .. لا يعلم لم فعل ذلك ولكنه أراد أن يشغل نفسه بأى شئ كى لا يتوتر .. فتح الشاشة .. وسبحان من أخرجته من الحادث سليماً لم يحدث به أى ضرر .. إتسعت عينا حازم وهو يقرأ آخر ماكان يفتحه يوسف قبل الحادثة .. أحس بغضب شديد !! .. لا يعرف كيف له أن ينفثه !! .. تمنى لو يستطيع أن يدخل ويلطم يوسف أو يركله حتى يخرج به غيظه !! أو أن تكون هدى أمامه ليضرب بها عرض الحائط !! .. بدأ يجز على أسنانه بقوة ولا يجد ما يفعل سوى أن يقرأ الرسائل .. والتي مسح يوسف آخرها .. وهو اتفاقها على البعد ! .. قرأ حديث هدى عنها وكلماتها القاسية بخصوصه وقرأ كلمات الحب بينهما !! .. كاد أن يحطم الهاتف فى يده !! .. لولا أنه رأى نور والحاج محمود يهرولان نحوه .. دس الهاتف فى جيبيه وهو يتوعد لهما بداخله ولكن .. ليس الآن !

سأله الحاج بلهفة : إيه اللى حصل !؟

حاول حازم أن يمسك أعصابه وقال : خير إن شاء الله يا حاج يبقى كويس !

وبعد ساعتين

دلف على غرفة منار بعد أن طرق الباب وقال ببسمة : كنت عايزك فى موضوع كدا يا قمر

-قووول يا حج

-عمر كلمنى إنهاردة لما جه .. وقالى أسألك يعنى لو يعنى .. بصي .. هو عايز يتجوزك وواكل دماغى من زمان وأنا

كل شوية أقوله لما تلخصي .. هو بقى إنهاردة قالى تعلموا خطوبة وتتجوزوا لما تلخصي .. بس إنتى توافقى ؟

-بس يابابا .. أنا ممكن موافقش فعلا ! .. يعنى عمر مش شبهى ! .. وأنا راسمة واحد فى خيالى مش شبه عمر !

.. أنا عايزة حد يفكر زيي .. مبقولش إن عمر وحش .. بالعكس دا أحسن من شباب كثير موجودين دلوقتى !! ..

بس برضه يابابا أنا عايزة حد مختلف مش أى حد كويس وخلاص .. عايزة حد يبقى فعلا رفيقى للجنة

نظر لها الأب قليلاً ثم قال : بس عمر إنغير كثير عن اللي كان بيكلمك زمان !

صمتت قليلاً حين تذكرت ما دار بينها وبين عمر بالماضى وأحست بالحزن .. مسح والدها على رأسها وقال : أنا

مش بفرضه عليكى يامنار .. أنا بقولك قابليه مرة وإثنين وثلاثة وعشرة .. وإعماليله إختبارات ياستى .. بنتى بقت

مخبر ع اخر الزمن .. وشوفى ف الاخر هتقبليه ولا لأ

-طيب يابابا .. هصلي استخارة وأقولك

نهضت حبيبة من فراشها وبدلت ثيابها وإرتدت ملحفتها التى تحبها بشدة .. ونقابها الذى يُشعرها بأنها حقاً " ملكة

" .. و جهزت نفسها للذهاب للدار الذى تُحفظ فيه القرآن الكريم .. وبعد عدة لحظات سمعت طرقات على باب ..

إقتربت منه وسألت : مين؟؟

-أنا هدى يا حبيبة

فتحت حبيبة الباب بتعجب فهذه أول مرة تأتي لها هدى .. لكنها قالت بسعادة : إزيك يا هدى ؟ .. إيه النور دا ..

تبسمت هدى بإحراج فجذبتها حبيبة للداخل وأغلقت الباب ورفعت نقابها وقبّلتها .. وقالت بفرحة طفولية وهي تغمز بعينها : إيه يا عم الحلاوة دي ؟

تبسمت هدى مجدداً بخجل وقررت أن تتكلم .. تنحنت ثم قالت بإحراج : معلش يا حبيبة جيت من غير معاد بس أنا معرفش رقمك للأسف عشان أكلمك ..

ضربتها بخفة على كتفها وقالت : بس يا عبيطة إنتي .. قال آسفة قال !

تبسمت هدى وأردفت : أنا عارفة إنى قولتلك إنى هاجى يوم الجمعة الدار بس معرفش ليه حسيتنى عايزة أروح إنهاردة .. وأنتى قولتيلى إنك بتروحي ثلاث وجمعه من 3 ل 5 .. فقولت أجيلك على 2 كدا تكونى لسه هنا ونروح سوا

إبتسمت حبيبة وقالت بسعادة : ماشي يا دودو .. ربنا يجعله فى ميزان حسناتك ويجعلك من حفظة القرآن الكريم

إبتسمت هدى لما أحست بفرحة حبيبة التى أردفت : ويجد يا هدى الجيبة تحفة عليكى ومطولاكى ومخلياكى مزة (قالتها وغمزت بعينها) فضحكت هدى بشدة وقالت بدهشة : إيه دا !!؟ .. إنتي عارفة كلمة " مزة " ؟

ضحكت حبيبة وقالت : طبعاً يا بنتى بس نظرتى للمزة تختلف .. يعنى كل ما البنات زادت "حشمة " كل ما بتبقى مزة فعلاً

-بس الولاد مش بيقولوا كدا هما عندهم المزة اللى بتبقى ستايل وع الموضة .. وع فكرة أنا مش هلبسها غير وانا جاية الدار بس عشان محدش يبصلي بصة مش حلوة

توقعت أن تتلاشي بسمة حبيبة ولكنها ظلت كما هى مبتسمة وقالت : الولاد اللى مش مؤدبين بس أو اللى جاهلين بدينهم هما اللى عايزين كل البنات استايل وع الموضة عشان ينسطوا بالمعصية وببلاش !! .. إنما الولاد المسلمين بجد مش هينسطوا لما يلاقوا واحدة بترقص ف وسط الشارع أو ف وسط الجامعة وتقولك "حرية شخصية " ! ..

مش هينسبتوا لما يلاقوا اللحم رخيص ومرطوط فى الشوارع .. والله نور بيقولى إن زمايله الولاد فى الجامعة لما بيقولهم غضوا بصركم أو ميصحش تعاكسوا البنات وكدا بيقولوا " بضاعة ببلاش وصاحبها راجل مغفل !!! " .. عارفة يعنى إيه ياهدى البنت تبقى بضاعة ببلاش !! .. يعنى بدل ما يتعب نفسه ويفتح موقع أو فيديو بيلاقى كل دا فى الجامعة و الشارع عادى وببلاش !! .. أظنك كبيرة وفاهمة قصدى ياهدى ! ..

تجهمت هدى قليلاً ثم قالت : بس أنا ليسي مش وحش أوى ! .. وبعدين أنا رفيعة جدا فمفيش مشكلة عندى .. والبنطلون مش بيبقى ضيق أوى زى مانتي متخيلة وبعدين أنا تعبت جدا على ما لقيت جيبة مقاسي !! تنهدت حبيبة وقالت : أنا مش هجادلك ياهدى .. أنا كل اللي عايزاه منك إنك تفكرى مرة وإثنين وثلاثة وعشرة .. وكل يوم قبل ماتنزلى قولى لنفسك ليسي دا يرضى ربنا ولا لأ .. بس المهم تبقى عارفة مواصفات اللبس اللي يرضى ربنا

-اللى هي إيه بقى ؟

-لا يصف ولا يشف .. يعنى مش بيوصف جسمك قد إيه وإيدك قد إيدك ورجلك قد إيه ! .. مش البناتيل اللي بنشوفها دلوقتى بتبقى أضيق من الرجل وتحسيها هتفرقع أصلاً !! .. ولا يشف .. يعنى مش شفاف .. مش ألبس بلوزة كمها شفاف أو شيفون من غير بدى تحتها .

ضحكت هدى بسخرية وقالت : دا حتى البدى الكارينة هيبقى مينفعش ! على كدا أروح أولع فى الدولاب وأخلص!

تبسمت حبيبة وقالت : مقولتش كدا .. قولتلك بس بصي على نفسك وإنتي نازلة كل يوم

قالت بغير رغبة فى إكمال الحديث عن الملابس : طيب .. مش هننزل بقى ؟

تبسمت حبيبة وقالت : ماشي يلا بينا

خرجتا من الباب ورن هاتف هدى ردت بقلق : أيوا يا حازم .. أنا فين؟! .. أنا رايحة الدار .. خير في حاجة؟؟ .. طيب سلام !

ظهرت علامات التوتر على وجه هدى فسألته حبيبة : فى حاجة ياهدى ؟

كانت هدى واجمة لدرجة أنها لم تسمع ماقالته حبيبة .. فأعادت حبيبة سؤالها حتى تنهت هدى لها وقالت : هاااه
!؟ .. لأ أدبا.. أبدأ دا حا حازم ! .. معش معرفش ع عاوز ز منى إيه ؟!

تبسمت حبيبة بإشفاق على حال هدى التي تعثرت في الكلام منذ أن سمعت صوت أخيها .. وقالت بمرح محاولةً
أن تنسيها أمره : طب هنروح الدار بالذوق ولا نستنى لما الأستاذة تعلقنا ؟؟

تبسمت هدى وقالت : م ماشي يلا نر نروح بدل ما نتع علق

سارتا سويا إلى العمارة التي بها لدار وبمجرد دخولها من بوابة العمارة وجدتا حازم ينتظرهما ويبدو عليه إمارات
الغضب .. حاول أن يتماسك كي لا يفقد أعصابه أمام حبيبة فنظر لهدى وقال بلهجة جافة : تعالي معايا يا هدى
عايزك !

تعجبت هدى من أسلوبه وقالت : بس أنا عندي حفظ يا حازم دلوقتي !

حاول أن يتمسك بآخر ما لديه من أعصاب وقال : تعالي معايا دلوقتي وإبقى روحى الدار بعدين !!

قالت بعناد طفولى : لأ !! .. أنا هطلع دلوقتي وأبقى أجيلك إنت "بعدين" !

أمسكها حازم من معصمها وقال بجدية : بالله عليكى يا حبيبة ما تعصينى وتعالي معايا دلوقتي !!

لا حظت حبيبة الواقفة على بعد خطوات بسيطة أنه نعتها ب " حبيبة " بدلاً من هدى ..

ضحكت هدى بمكر عندما نعتها بحبيبة وقالت : خلاص ياعم ماشي هاجى معاك ! .. والتفت لحبيبة وقالت :
معلش بقى يا حبيبة هبقى أجيلك يوم تانى معلش !

تحرك حازم خارجاً من مدخل العمارة وهو ممسك أخته وهو يشتعل غضباً من الداخل !! .. أحست هدى أنه
لايمزح ! .. وأحست أن يضغط على يدها بعنف !! .. سحبت يدها من بين أصابعه بسرعة وهرولت نحو حبيبة
وقالت : لأ متسيبهوش ياخذنى !!

.. لم تدري ماذا عليها أن تفعل !! .. تهديد حازم واضح !! فالمرة القادمة لن يبالي أين هدى أو خلف من تختبئ !!
فهو سيأخذها عنوة !! ..

قامت حبيبة وأسندت هدى وأطلت برأسها على الشارع ولما لم تجد حازم سارعت مع هدى التي تهذى ولا تشعر
أنها تتحرك من الأساس .. أخذت تفكر أين تأخذها لتكون بعيدة عن حازم !! .. فكرت في بيت منار ولكنها تذكرت
ما فعلته والدتها معها هذا الصباح !! .. فكرت في الذهاب لهدير ولكن .. ماذا لو تصعد الأمر !! .. ما ذنب
هدير !! .. تنهدت بإستسلام وأخذتها إلى بيتها وأحكمت إغلاق الباب ووضعت هدى في فراشها وغطتها جيداً ..
وأخذت تتصل بنور وهو لا يجيب فاطمأنت قليلاً لأنه سيكون بالتأكيد في المسجد لصلاة العصر وسيقابل حازم
وسيهدها قليلاً .. تركت هاتفها بعدما إتصلت بالدار وإعتذرت عن المجئ لأول مرة !.. وتوضأت لتصلي هي الأخرى
وأخذت تدعو الله أن يمر الأمر على خير.. وبعد أن أنهت صلاتها تلقت إتصلاً من نور على هاتفها .. ردت بسرعة :
أيوا يانور إنت فين ؟

رد : كنت في المسجد بصلي يا حبيبة خير مكلماني كل دا ليه !؟

قالت بلهفة : قابلت حازم ؟؟

تعجب من سؤاله وقال : اه قابلته بعد الظهر بشوية بس دلوقتي لأ عشان أنا مش عندك أصلاً !

-أمال إنت فين ؟

تنهد وقال : في المستشفى .. يوسف عمل حادثة وأنا لازم أكون مع الحاج محمود !

-لا حول ولا قوة إلا بالله .. طب ينفع تكلم حازم ؟

-أكلمه ليه ؟ .. ويتسألني عنه ليه أصلاً ؟

-بص أنا هقولك اللي حصل ...

وبدأت تقص له ما حدث من البداية وصولاً إلى أخذها هدى معها ..

تنهد نور وقال : أنا هحاول آجى يا حبيبة و ..

قاطعته قائله : لأ إنت لازم تيجى !! .. أنا مرعوبة يانور ليعمل فيها حاجة !! .. وبعدين إنت الوحيد لى هتقدر تسيطر عليه !! .. أنا خايفة ليعرف إنها هنا فيطلعنا !!

حاول نور أن يطمأنها وقال : متخافيش يا حبيبة حازم عمره ما هيطلعلكم .. حازم يعرف ربنا كويس وعمره ما هيطلع وأنا مش هناك .. خوفاً من ربنا ثم إحتراماً ليا فى وجودى وغيابى .. وإن كان إتعصب فأكيد الموضوع يستدعى العصية دى وإن شاء الله يهدى ! .. أنا هكلمه وأقوله إنى عايز أقابله وآجى علطول !! .. السلام عليكم ومتخافيش -وعليكم السلام ورحمة الله وبركاته

تحرك نور نحو الحاج محمود الواقف أمام غرفة العمليات بانتظار خروج الطبيب وربت على كتفه وقال :ربنا هيقومه بالسلامة بعون الله .. معلىش يحاج أنا لازم أروح دلوقتى لحبيبة فى مشكلة بس هخلصها وآجيلك علطول أنا آسفة جداً والله !

تبسم الحاج بوجهه الفاتر وقال : ربنا يكرمك يانور يارب .. روح يا بنى شوف أختك وإن شاء الله خير

قالها ونظر لزوجته التى تبكى بحرقة وقال : خد أم يوسف معاك

قالت المرأة الباكية : لأ والله أبدأ مش همشى غير لما أطمئن على ابنى !! دا هو الحيلة !!

ثم انفجرت باكياً مجدداً فاحتضنتها هدير وأخذت تواسيها ..

ظهرت معالم الحزن على الشيخ الكبير فنظر لنور وقال له : خلاص يا بنى روح إنت شوف أختك

حاول نور أن يتبسم ليخفي ألمه وتمزقه على تركهم وهم بتلك الظروف وليخفي قلقه وخوفه على يوسف !! .. لكن حبيبة أيضاً بحاجة إليه ! .. جاء نور يتكلم ولكن الطبيب خرج من غرفة العمليات فهرول الحاج نحوه متسائلاً بلفهه : عايش يادكتور !!؟ .. الطبيب بسرعة وقال : الحمد لله .. ربنا كتب له عمر جديد ! ..

رفع نور يده للسماء وأخذ يحمد الله بحركة عشوائية !! .. وإحضنت والدة يوسف هدير بفرحة تملأها الحمد والشكر لله .. جذب الحاج محمود نور في حركة لا إرادية لحضنه وإحتضنه بشده وسعادة وهو يحمد الله على إنقاذه لابنه ..

تبسم نور من حركة الحاج الا إرداية وأحس به بيكي من فرط السعادة .. ، ظل عدة لحظات بين ذراعيه والشيخ بيكي فهمس له بمرح كى لاتسمعه هدير : معلىش يا حاج بس أنا مرتبط

أبعده عنه وضحك بشدة وقال بصوت مسموع : مرتبط بمين بقى إن شاء الله يا سي نور ؟

قال نور لنفسه " ربنا يسامحك فضحتنى يا حاج " .. ضحك نور وقال : إنت هتلبسنى مصيبة يا حاج .. أنا سنجل وربنا ! ..

إبتسمت هدير من كلمة "سنجل " .. فقد توقعت من كلام عمها عن نور أنه جاد لا يعرف للمرح سبيلاً ولكنها تفاجئت به يمرح .. غضت بصرها عنه على الفور .. ضحك الحاج محمود وكذلك أم يوسف .. ربما ليس بسبب حديث نور .. ولكن بسبب فرحتهمما بنجاة ابنيهما الوحيد ..

إستأذن نور ليغادر وأخرج هاتفه واتصل بحازم وقال : حازم .. بالله عليك يا حازم متخلّش الشيطان يغلبك !! .. أنا فهمتك قبل ماتمشي من هنا وإنت برضه روحت وعملت اللي ف دماغك لأ أقصد لى ف دماغ الشيطان !! .. العصبية مش هتجيب نتيجة عمرها .. صدقنى !! .. هو أنا عمري ضربتك !؟

دخلت حبيبة الغرفة التي بها هدى فوجدتها جالسة على حافة الفراش واجمة .. دنت منها وقالت متبسمه :
متخافيش ياهدى

حاولت هدى أن تبسم وقالت : أنا معنتش خخخايفة .. أنا بس زرززعلانة إني ورططتك مععايا .. مكنش ينفع
أستخخخي وراككى كدا .. أنا آسفة أوى يا حبيبة

-بس يابت إنتي مفيش حاجة إسمها آسفة بين الإخوات

-طب أنا عايزة أروح ح!

تعجبت حبيبة بشدة فأردفت هدى : عارفة إنك مستغربة جداً بس أنا فككرت شوية ولققت إني كدا ككدا هرجع
البيت .. فأرجع بقى من دلوقتى بدل ما الموضوع يكبر أكثر من كدا

-خير إن شاء الله ياهدى هو بعون الله هيهدى وكله هيبقى تمام

قالت بيأس : وحتى لو مهددديش يعنى إيه اللي هيحججججججج ! .. ولا أى حاجة .. شوية ززععيق أو خخناققة
جامددة وخخلاص !!

قالت حبيبة بغير فهم : طب هو إيه اللي حصل أصلاً؟!

طأطأت هدى رأسها بإحراج فقالت حبيبة بسرعة : على فكرة مش لازم أعرف .. وإن شاء الله مش هتخانقوا ولا
حاجة ومامتك مش هتخليه يزعقلك

-ماما مشش ف البيت .. راحتت لخخالي من انبارح عشان مراته تعبانة وهتقعد معاه شوية .. إددعيلي ججامدد
ياحبيبة ربنا يعددى الموضوع على خخير

-حاضر ياهدى ..

نهضت هدى كي تغادر فأرادت حبيبة أن تلفت نظرها لصلاة العصر التي لم تؤدها بعد فقالت : بقولك إيه ياهدى ؟
.. ما تصلى هنا العصر وبالمرة تدعى ربنا ..

تبسمت هدى وقالت : حاضر هصلى العصر وأنزل ..

وبالفعل صلّت العصر وأخذت تدعو الله بشدة أن ينجيها .. أخذت تعدّه بأنها لن تكرر خطأها مجدداً وأنها ستتوب إليه .. بل بالفعل تابت وتركت يوسف نهائياً !! ..

رحلت إلى شقتها وهي تجر أقدامها خلفها بخوف ..

فتحت الباب بمفتاحها واتجهت صوب غرفة أخيها كأنها لا تود أن تأجل المواجهة .. طرقت بابه ودلفت منه .. رآته جالساً على الفراش بيده مصحفه .. حاولت أن تبسم وقالت : السلام عليكم

رفع نظره إليها بعتاب ورد بفتور : وعليكم السلام ورحمة الله وبركاته

دنت منه وجلست إلى جواره بخوف وهو ثابت لم يحرك ساكناً .. يكتفى بالنظر إليها بعتاب وحسب .. نظرت له بخوف وقالت بدون تعثر : هتضربنى ؟

هز رأسه نافياً دون أن ينطق .. سقطت دمعة من عينها وقالت : طب هتشتمنى؟؟

هز رأسه بالنفي للمرة الثانية .. طأطأت رأسها فى خجل وغلبتها الدموع ..

ظلت تبكى عدة دقائق .. توقعت أن يرق قلبه فيمنعها البكاء أو يشفق عليها فيهدأها بكلمة .. ولكنه لم يفعل .. تركها تبكى !! .. بكت وبكت وبكت .. وهو لم ينطق !!

ظلا هكذا لدقائق طويلة مرت كالسنين .. رفعت عيناها له وقالت : إنت مش بتكلم ليه ؟

قال ببرود : مش لما أعرف إنتى بتعيطى ليه !؟

إخترقت كلمته صدرها وصولاً لقلبها .. أعطته أملاً فى الحياة ! .. نظرت بشيح أمل وقالت : يعنى إنت مش عارف أنا بعيط ليه ؟

هز رأسه نافياً بوجه خالٍ من المشاعر .. لم تعرف إن كان صادقاً أم لا ؟؟ .. ظلت تنظر له للحظات ثم إستجمعت قوتها وقالت : أمال كنت عايزينى فى إيه ؟؟

لازم أشوفك .. بس إستغربت من رد فعلك جداً .. واتعصبت أوى لما اتلغبطت وقولت حبيبة بدل هدى فمسكتك جامد فاستغربت أوى إنك جریتی وراها وعيظتى وقولتى هيضربنى .. هو أنا عمرى ضربتك أصلاً طوووول حياتك ياهدى ولاحتى هددتك بالضرب؟! .. وهضربك ليه أصلاً؟! .. فروحت متعصب بقى معلىش بس موقف يوسف كان لسه مأثر عليا

أنهى كلامه ونظر لها وهى لا زالت تبكى حاول أن يتسم وضمها إليه وقال : متعيطيش بالله عليكى بقى أنا آسف والله .. أنا والله من ساعة ماشوفته قدامى فى الحادثة وأنا مش مطبوط .. عمال أفكر لو كنت أنا اللى مكانه .. ولو مت !! هقابل ربنا بأى وش !! .. دا أنا مقصر أوى .. وأول تقصير هو إنتى !! أنا آسف أوووووووووى ياهدى سامحيني

أبعدت يديه عنها وقالت : حازم إنت مش فاهم أى حاجة

نظر لها بتعجب مصطنع فأردفت وهى تبكى : أنا اللى آسفة يا حازم .. أنا غلطانه !! .. أنا عملت معاصى كتير أوى وربنا ديما ساترنى .. لو إنت مت هبقى ربنا بيعاقبنى بحرمانى من أخ زيك

إرتمت بين ذراعيه وهى تبكى بهستيرية وشرد حازم قليلاً فيما حدث للتو .. تخيل لو أنه كان تعصب عليها أو ضربها (وسيكون معه الحق فى ذلك) .. كانت ستظل تبكى ويتصاعد الأمر بينها ويحمل كلاً منهما فى نفسه كراهية للآخر !! .. وماكانت ناره لتهدأ حتى وإن ضربها عشرات المرات !! .. ربما هى لم تهدأ الآن ولكنه على الأقل قد ربح قلبها .. وأيقن أنها لن تكرر خطأها مجدداً لأنها أحست بفضل الله وستره لمن يتوب .. يالله .. كم أحس الآن بحديث حبيبتنا المصطفى حين قال ((لاتغضب)) .. كلمتان اثنان .. لكن إذا أخذ بهما المرء .. تحولت حياته إلى راحة .. وزادت علاقته بمن حوله .. فمن منا لا يحب الهادئ الذى لا يغضب .. ويستطيع أن يملك نفسه فى أصعب المواقف .. يالله .. كم هو حديث رائع .. لا تغضب !

“أجمل حاجة في الدنيا وقت الخناق إنك تقول للى قدامك أنا آسف !! .. أنا غلطانلك !!! .. وتعترف بغلطك .. هو ساعتها بدوره هيعترف بغلطه هو كمان والموضوع هيخلص من غير ما نخسر بعض بل بالعكس هنكون كسبنا قلوب بعض واحترام بعض ! .. انما لو كل واحد فضل يركب التانى الغلط والتانى فضل يدفع الغلط عنه ويركبه للى قدامه فمش هنخلص أبداً !! .. أنا إنهاردة إتنازلت شوية ودوست على نفسي شوية .. بس حالياً مرتاح جداً ! وسعيد أووى باللى حصل إنهاردة .. بجد نور دا مفيش زيه .. نصايحه وكتبه بتفيدنى جامد .. إفتكرت موقف الأعرابي لما بال في المسجد والنبي -صلّ الله عليه وسلم- أشرف الخلق وأحسنهم .. هدى الصحابة ومخلهمش يعنفوه .. وقاله بكل بساطة إن المساجد للصلاة والقرآن .. بس كدا !! مقعدش يبكت فيه ويقوله غلط غلط !! .. فالراجل دا وقت السجود دعا ربنا وقاله يارب إرحمنى أنا والرسووول بس !! .. الرسول الكريم أسر قلبه في موقف كان رد فعله فيه لّين لطيف .. علمه فيه من غير ما يؤنّبه ولا يوبخه .. أينعم هو (صلّ الله عليه وسلم) ندهله تانى وقاله بطريقة لبقة وحلوة ميحددش رحمة ربنا في دعاؤه .. بس برضه كان على قلب الأعرابي زى العسل .. أنا إنهاردة حاولت أقتدى بالرسول الكريم في تصرفاته .. حاولت أتصرف بعقلانية .. وبحمد ربنا ع الشوية اللى قعدتهم لوحدى قبل ما هدى تيجى .. بجد وازنت فيهم أمورى ونور كلمنى فيهم خلانى أعيد تفكير فى رد فعلى وهو اللى نصحني أقرأ شوية في المصحف ((والكاظمين الغيظ والعافين عن الناس والله يحب المحسنين)) أول آية عيني جت عليها لما فتحت المصحف تلقائي زى ما هو قالي .. بجد ربنا يخلينا لبعض ونبقى صحبة صالحة لحد الجنة وأنا مش هسيب هدى غير لما أكون ليها أخ كويس وقريب منها .. وهحاول مزعلش منها عشان اللى حصل وأسامحها رغم إنها محكتليش .. بس مش مشكلة .. المهم إنى أكسب قلبها وأأسره زى ما قدوتى الرسول الكريم كان بيعمل مع كل الناس “

كانت هذه الكلمات أول ما سطره حازم فى كشكوله الخاص بعد أن نامت هدى فى تلك الليلة .. شعر براحة كبيرة وخاصةً أن الموقف قد مر بسلام بفضل الله - تعالى - .. نهض من جلسته وتوضأ وصلى وشكر الله تعالى ودعى لهدى بالهداية ودعى لنفسه أيضاً .. ودعى لنور بالهداية أيضاً .. ما أجمل أن يكون لك شخص .. يحدث الله عنك دون أن تعلم في أواخر الليل .. ويدعو لك دوماً بالهداية !

وبعد الفجر .. خرج نور وحازم من المسجد بعد أن صلاً الفريضة بالمسجد .. ظلاً صامتين طوال الطريق ونور بين حين وآخر يختلس النظر إلى صديقه الذى يبادلُه النظر بعتاب (لاشك أن حازم يحبه فقد كان يحدث الله عنه منذ قليل .. ولكنه يعتب عليه إخفاؤه ذاك الأمر عنه .. وهو محق في ذلك) .. توقفاً أمام بيت حازم وجاء يصعد لشقته لكن نور أوقفه وقال : إستنى يا حازم عايزك فى حاجة !

رد بفتور : خير ؟

طأطأ رأسه بنجمل وقال : أنا آسف

تنهد بحزن وقال : حصل خير يا نور !

-أنا فعلاً آسف إنى خبيت عليك بس صدقنى أنا كنت ديما بكلم يوسف وهو كان ديماً يقولى إنه حاسس بالذنب وأنه هيتغير وأنه هيسط ..

قاطعته حازم بضيق : خلاص يا نور مش عايز أسمع كلام تانى .. مش قادر

قال نور بحسرة : متزعلش منى يا صاحبى .. حقك عليا ! .. مطلعتش قد الثقة اللى إنت حاططها فىا والحب اللى حبيت هولى ..

صمت نور منتظراً أى رد من حازم ولكنه ظل صامتاً ! .. ذلك الصمت الذى قتل نور .. ربت على كتف حازم بفتور وقال له : عن إذنك

تركه ورحل بسرعة قبل أن تنهمر دموعه أمام حازم ! .. تسارعت أنفاسه وهو يزيد خطواته .. لعل سرعتها تهدأ من جأش نفسه قليلاً!!

دخل شقته ودلف غرفته بسرعة دون أن تراه حبيبة كى لا تفزع من حالته .. أغلق الباب على نفسه وترك دموعه تنهمر ! .. ارتدى على فراشه وأخذ ييكي بحرقه لمدة .. كان يوبخ نفسه على ما فعله لقد خان ثقة صديقه الأقرى وطعنه فى ظهره ! .. إنه لا يستحق حتى لقب صديق ! .. فلو كانت حبيبة محل هدى ما رضى أبداً أن تظل تحدث ذلك الشاب ولو دقيقة أخرى ! .. فكيف يرضاها لأخت صاحبه وأخيه

ظل على حاله مدة طويلة ! .. لا يشعر بما يمر من الزمن .. حتى طرقت حبيبة باب غرفته .. ودلفت منه بخفة ودنت من أخيها ببسمة ووضعت يدها فى خصرها وقالت بتذمر طفولى : شوف بقى اللى بيستعبط عشان ميروحش الكلية رملها بنظرة فاترة ولم يجبهها فصاحت به : آلوووووووووو ياعم .. هل تسمعنى ؟

تبسم بهدوء لكلماتها فقالت بحنان : مالك يا نور؟

رد بفتور : تعبان بس شوية يا حبيبة

قالت بحيرة : يعنى مش رايح الكلية ؟ مش كفاية غبت انبارح بسببى ؟

-لأ هروح بعون الله عندى أصلاً إنهاردة متأخر ..

-طب تمام .. أنا هنزل أنا بقى عشان متأخرش وأنا هعدى على منار أقعد معاها شوية قبل ما أروح عشان تعبانة

-ماشي بس متتأخرش يا حبيبة على الكلية

-تمام يانور .. السلام عليكم ورحمة الله وبركاته وخلقى بالك من نفسك

وفى بيت منار ..

تبسمت منار بوهن وقالت لصديقتها : إزيك يا حبيبة ؟ .. والله أنا آسفة جدا عشان وقفك انبارح كل دا ع الفاضى

-بس يابنتى متقوليش كدا عيب عليكى .. المهم إن إنتى الحمد لله بنخير وكويسة .. أنا كان نفسي أجبلك محاضرات من أى حد سجلها ومعاكى فى الجروب إنبارح بس أنا كمان مروحش .. بس بعون الله هتنزل على القيس

ضحكت منار وقالت : بوظنا مع بعض وغبنا سوا ..

-طوبعا إن شاء الله .. عايزانى فى حاجة ولا أطير .؟

-إنتى لحقتى تقعدى !؟

-معلش والله بس إنتى عرفانى يامنار لو مفيش حاجة مبقعدش .. بطير علطول

-تمام ياعم الطائر .. إبقى ظبطى معاد مع هدير وتعالولى عايزاكم فى أمر مهم .. هاتيها وإنتى مروحة من الكلية

-معتقدش إنه هينفع يوسف ابن عمها عمل حادثة انبارح فمظنش انها هتعرف تيجي مؤقتاً ..

شهقت منار بفرع فقالت حبيبة : إنا لله وإنا إليه راجعون .. ربنا يقومه بالسلامة

صاحت : إيه يابنتى هو مات !! الآية دى بتتقال فى الموت بس !!

-مين قال كدا !؟

قالت باحراج : إحنا عارفين كدا

-لأ يامنار إحنا عارفين حاجات كتبيير غلط .. الآية بتقول ((الذين إذا أصابتهم مصيبة قالوا إنا لله وإنا إليه راجعون

((.. يعنى أى مصيبة مش لازم موت يامنار

فكرت منار قليلاً ثم قالت : تصدقى صح ! احنا سبنا المعنى اللى فى الايه واخذنا باللى اتعودنا عليه ..المهم هبقى

أكملها بس بعد الظهر بعون الله

-ماشي يا حبيبتى .. هعدى عليكى المحاضرة لو عرفت أجيبها لك وأنا مروحة .. السلام عليكى ورحمة الله وبركاته

وبعد عدة أيام ..

قالت هدير بفرحة : بجد يامنار؟؟ .. ياخلاشي هتبقى عروثة

ضحكت منار وقالت : مالك تحولتى كدا ليه يا هدير ؟

-فرحانة بصحبتى بقى ..

وكرتها حبيبة فى ذراعها وقالت : عقبالك يامدوخانا

قالت منار بتعجب : نهار ابيض ! كل دا لسه مقابلتيش نور يا هدير !!

-أعمل إيه طاه ؟ .. هو انا اللي خبطت يوسف

قالت حبيبه: أيوا اتحججى اتحججى .. لمعلوماتك بقى ان عمك قال لنور يجي يقابلك الخميس وهو قالى قبل ما

اجيلكم

قالت هدير بتعجب : عمى بيدى مواعيد لعرسان من غير مايقولى

-هو أخويا نور بقى عرسان على آخر الزمن !! ..

ضحكوا الثلاثة ثم قالت هدير : بس بقى يا حبيبة إما نشوف البت اللي هتقابل بكرا دى .. ها يامنار إشجينا بقى

هتعملى إيه ؟

نهضت بحماس وأخذت دفتر من على مكتبها وقالت : إحم إحم .. إسمعوا يا سادة ..

تنهدت بقوة ثم فتحت دفترها وبدأت تقرأ : أول ما هنقعد هسأله الفجر بيأذن الساعة كام .. ومن إجابته هعرف إذا

كان بيصليه ولا لأ ! .. دى أولا .. ثانيا .. هسأله بيقم ليل ولا لأ .. وبيقم قد إيه كل يوم .. وحافظ قد إيه من

القران؟! .. ويعمل إيه باللى حافظه .. وهسأله هينفع الدين والأمة إزاي .. وطبعا الصلاة فى المسجد واللحية شئ مفروغ منهم .. وعيزاه يحفظنى ويصلي بيا .. ويسبح على إيدي .. عيزااه مجاهد فى سبيل الله ويشجعنى عشان اصوم كل اتنين وخميس مش الايام القمرية بس .. ويعلمني علووم شرعية كتشير كتشير كتشير ..

تنهدت بقوة وقالت : كنت فاكرة إني هجمع أكثر من كدا بس قعدت أعصر دماغى ملقتش حاجة للأسف

مطت هدير شفيتها وقالت : مش عارفة ليه يامنار حساكي معمة الموضوع أووى .. يعنى حساكي بتنتقمى مش هتقابلى حد للجواز

نظرت لها بعدم فهم وسألتها : طب ليه ؟

—مش عارفة يامنار بس انتى كدا اتدخلتى أووى فى علاقته برينا .. وبعدين ممكن حد أحسن من كدا كمان بس مينفعش معاكي .. مش كل اتنين كويسين ينفعوا لبعض .. فهمانى ؟

قالت بغير فهم : لأ

قالت حبيبة : بصي يامنار .. لازم تشوفيه طبعا متدين ولا لأ .. بس برضه لازم دماغكوا تركب على بعض .. بمعنى أوضح .. مش لازم تاخدى واحد عالى أووى .. بس اللى لازم انك تاخدى واحد عايز يعلي نفسه ويقرب من ربنا .. وتمشوا سوا .. وبعدين فى حنة إنه يجاهد فى سبيل الله دى .. هو ممكن يجاهد نفسه من الوقوع فى المعاصى وفى غض البصر وغيررره وغيررره ويبقى يجاهد نفسه .. وشغله دا مش عبادة مثلا؟! .. المشكلة اننا ساعات بنتخيل جواز الملتزمين دا غلط .. بنفتكر انهم طول اليوم بيصلوا ويحفظوا قران وذكر وصيام ويس .. طب هما كدا هياكلوا مينين؟! .. مش هيشغلوا مثلا؟! .. تنهدت وقالت : فهمانى يامنار ؟

تنهدت وقالت : طيب .. كدا إنتوا بوظتوا كل الاسئلة اللى كنت ناوية أقولها له .. أقوله إيه بقى بكرا!!?

جاءت حبيبة تتكلم ولكن هدير سبقتها : معلىش يا حبيبة هقول حاجة واحدة بس .. منار .. إنتى هتتجوزى .. يعنى راجل لازم تستحملى عيوبه .. ولازم يستحملك .. لازم يكون صاحب اخلاق .. مش حد بيصلي ويصوم بقلب فاضى وفاصل الاخلاق عن الدين .. وكمان لازم تشوفي فيه مستقبلك اللى جاى معاه هيبقى شكله إيه .. حد

يشبهك يامنار .. مش تبقى دماغكوا متضاده !! .. مش انتى بتفكرى فى الستاير هو يفكر فى العريه --_-- دا مش جواز دا اسمه خطة مالية ! .. يعنى الناس فاكرة ان الجواز فسح وخروجات وانتقام من حرمان السنجلة .. وفى الاخر هى تتصدم فيه ان همه هيتغدى إيه وهو يتصدم فيها انها مينفesch تقوم قبل ما المونيكيير ينشف !! .. ربنا خلقنا أزواجنا عشان نسكن إليها ! .. نسكن إليها دا لفظ دقيق جدا بما انى بتاعت عربى بقى .. انتى مش بتسكنى غير فى مكان آمن بتحببه .. مكان يحتويكى بمعنى الكلمة .. المكان دا لازم يبقى شبهك عشان يريحك .. يعنى مينفesch أكون مباحش الاسود وأوضتى تكون أسود !! .. لأ دى أكيد هتبقى بلون بحبه وبيرىحنى ... لون يشبهنى .. هو دا البيت .. هو دا السكن .. هو دا الزوج اللى ربنا جعل بينا مودة ورحمة .. ربنا قال الطيبون للطيبات .. يعنى لازم تكونى كويسه .. وكويسه جدا كمان .. ليه؟؟ عشان انتى هتدورى على حد كويس جدا .. باختصاررر .. لازم هيشبهك .. وتكونوا إنتوا الاتنين واحد ! .. فهمانى ؟

إتسعت إبتسامه منار وقالت : قولي الكلام تانى بقى كدا من الأول عشان أكتبه

ضربتها هدير على كنفها وقالت : لا بجعد !! .. شغالة أنا عنددد .. سعادتك

ضحكت حبيبة وقالت : المهم تكونى حسيتيه يامنار .. بجعد ياهدير تسلمى كلامك إخترق معاميع قلبى من جوا كدا .. وبصراحة فتحتى نفسى على الجواز

شهقت منار وهدير وصاحت منار : البت الاوزعة دى متقعدش معانا تانى !! إنتى صغيرة لسه ياماما على كلام الكبار
دا

وضعت حبيبة يدها فى خصرها وقالت كالأطفال : ياسلاام !! .. مكنتش سنة دى اللى تعمل كدا .. إمشوا بقى من قدامى بدل ما أشبط وآجى أتجوز معاكوا

قالت هدير وهى تضحك : خلاص جوزيتنا إحنا الاتنين .. طيب يا ست حبيبة موشكرين .. يلا قومى بينا نمشي بقى قبل ماعمو على يجي ويمسك فينا نتغدى

صاحت منار : لا بجعد !! .. طب إطلعوا براا بقى ومفيش عزومة حتى ع الغدا !

دخلت حبيبة شقتها بسعادة وحين رأت نور هرولت نحوه وجذبتة من عنق قميصه وقالت بسعادة : شد حيلك بقى
عشان أفرح ببيك إنت كمان

ضحك نور وأبعدها عنه وقال ساخراً : أشده إزاي يعنى مش فاهم .. ناس غريبة ! ..

أخذت تضحك ثم قالت : الحمد لله فوقت وروقت وبقيت كويس .. أحلى مافيك إنك بتروق بسرعة

ضحك وقال بسخرية : عرفتي قيمتي دلوقتي ؟ ..

قال بضجر مصطنع : آه ياخويا عرفتها .. عرفتها وإنك خلاص على وش جواز .. تصدق هدير اتصدمت لما عرفت
إنك هتقابلها يوم الخميس !

اختفت البشاشة من وجه نور وقال بحزن : بجد ؟! .. يعنى اتضايقت ؟!

شهقت حبيبة وقالت : حد جاب سيرة مضايقة دلوقتي !! متبقاش أوفر بقى ياعم نور .. هي اتفاجئت بس أكيد
متضايقتش ! .. هتضايق من إيه اصلاً!!

-ماشى

-هي أصلاً ..

قاطعها نور بضيق : لو سمحتي ينفع متتكلميش عليها قدامي خالص !

تعجبت حبيبة وقالت : ليه ؟!!

-عشان هي مش مراتي ولا حتى خطيبتى يا حبيبة يعنى مينفعش نتكلم عليها !

-هو أنا قولت حاجة يابنى !!

-بالله عليكى يا حبيبة ريعينى وخلاص ومتكلميش عليها خالص غير لما أخطبها ع الأقل

صمتت حبيبة قليلاً ثم قالت بلهجة عتاب : ساعات كثير مش بفهمك يانور !

تبسم وقال بفتور : مش لازم تفهمينى يا حبيبة .. إدعيلي وبس

تبسمت حبيبة وقالت : ربنا يريح بالك المشغول ديما دا يانور!

عاد حازم من صلاة فجر هذا اليوم وقبل أن يدلف غرفته أحس بصوتٍ خفيضٍ قادم من غرفة هدى .. تحرك بهدوء نحوها وفتح الباب بهدوء وتبسم حين رأى هدى وهى ساجدة وتدعو الله بصوت خفيض .. أو تحسبه هى كذلك ! أخذ يدعو الله من قلبه أن يردها إليه رداً جميلاً وأن يهديه هو الآخر وأن يوفق بينهما ويقرب تلك المسافات الشاسعة بينهما ! ..

شرد حازم وهو ينظر إلى أخته بحنان وأخذ يفكر لم لا يبحث لها عن من تعينها وتشجعها !! .. لم لا تكون حبيب ..

قطع تفكيره صوت هدى التى تنحنحت فى احراج حين رأته يحدق بها .. تبسم لها قائلاً : تقبل الله يا هدى

قالت ببسمة : منا ومنك .. منكم يا حازم

سرت رجفة فى أوصاله حين سمعها تتعلم فاقترب منها وجلس على المصلية بجوارها وقال بحزن: إنتى لسه بتخافى مني يا هدى !؟

طأطأت رأسها فى خجل وقالت : لأ ليه بتقوول ك كدا ؟

قال بحزن: عشان النطق

تبسمت بألم وقالت : إنت ت عارف ممشككلة النطق دي معايا من يو يوم ما اتو ولدتت

نظر لها بفخر وقال : زي إيه بقى يا حبيبة

ارتسمت بسمه سريعه لانها نعتها بحبيبة ولكنها سرعان ما مطت شفيتها وقالت : معرفش .. بس إنت أكيد عارف
مش إنت إتغيرت قبلى؟؟

فكر قليلاً وأخذ يحك لحيته فى اهتمام ثم صاح بحماس كأنه قد وجد ضالته : الصحبة ! .. الصحبة الصالحة
ياهدى ! أنا متغيرتش غير لما قربت من نور ورحت معاه المسجد وقابلت أحمد يوسف ! .. دورى على بنوتة كويسة
وصاحبها وهى بجد هتشجعك وتتغيروا للأحسن

فكرت هدى قليلاً ثم قالت : هشوف فى صحابي بس مظنش إن حد منهم زى مانت بتقول كدا ولا فى دماغهم
أصلاً

قال بثقة : إستعيني بالله ياهدى وهو هيساعدك

تثأبت وقالت : هاااووووم ماشي يا حازم

دفعها بخفة وقال : ما براحة شوية هتشفطيني بعد كدا !

ثم أمسك يدها ووضعا عند فمها وقال : بعد كدا تعملى كدا وتقولى أعوذ بالله من الشيطان الرجيم

وقالت وهى تقاوم النوم : أوكيه أوكيه ! إمشي بقى عشان عازة أنام ..

نهض من جلسته وقال متجها نحو الباب : ماشي هقووم بس لو مقومتيش قبل تمانية أنا هاجى أصحيكى بالعافيه!
الامتحانات قربت

وقبل أن يخرج من الباب سمع صوتها يقول : بقولك إيه يا حازم ؟

نظر لها باهتمام فقالت : إيه رأيك فى حبيبة ؟

رفع حاجبه فقالت بسرعة : أصحابها يعنى وكدا كـ "صحبة صالحة " يعنى؟؟

تبسم وقال : أيوا طبعاً .. يارررريت ياهدى

ضحك مجدداً من أسلوبها المرح الذي لم يراه يوماً ثم تلاشت البسمة وقال : مينفعش برضه أقول لنور ! هقوله إيه أصلاً

قالت بانفعال : يابنى مش انت بتحبها !!

هزت تلك العبارة حازم وصاح بسرعة : لأ طبعاً !! .. إنتى إزاي عايزانى أفكر فى أخت نور كدا !!

قالت بدهشة : تفكر فيها إزاي ! .. أنا بسألك مش إنت بتحبها ؟ .. الحب مش حرامم ياعم حازم .. مش دا كلامك ع الفيس ؟ .. وإن الحرام هي تصرفاتنا .. يبقى إنت هتروح تقول لنور أنا بحب أختك وعايزها فى الحلال ! .. بس كدا

ارتدى على أقرب مقعد وأخذ نفساً عميقاً ثم قال : ربنا يسامحك يا شيخخة أنا حاسس إنى هقع من طولى

قفزت من فراشها وقالت له : عشان أنا واجهتك بنفسك اللي خايف تواجه نفسك بيها ! .. إنت مش عايز تغضب ربنا .. وقفلت على قلبك من زمان عشان متغضبوش .. بس دلوقتي إنت مش هتغضبه إنت هتتجوز .. إنت بتحبها يا حازم ! .. ومحترم ومؤدب وف كلية كويسة وبتشتغل .. إيه المانع بقى إنكم تتخطبوا دلوقتي وتتجوزوا لما تتخرج .. متحاولش تكبت مشاعرك يا حازم لازم تخرجها

نظر لها باهتمام فأردفت بسرعة : تخرجها فى الحلال طبعاً !

ابتسم وقال : ماشاء الله

تبسمت وانتظرت أن يثنى على قولها ولكنه هب من جلسته بطريقة أفرعتها وقال : ماشاء الله صحيتى دلوقتي وبقيتى قردة .. ولسانك بقى لبلب .. إتفضلي روحى نامى

ثم أخذ يداعب لحيته بفرح وهو يقول : والله وبقيت عريس يا حازم

رفعت هدى حاجبها وقالت : ماليش دعوة أنا عايزة الحلاوة بقى أنا اللي شجعتك أهو

ضرب جبهته بيمينه وقال : صدقى نسييت

ثم أخرج من جيبه شokolates وناولها لهدى وقال ببسمة ساخرة : معلىش بقى اتفحصت من قعدتي جنبك ع الأرض
أخذتها منه ودفعته بيدها الى خارج الغرفة وأغلقت الباب بمرح وقالت : امشي يا حازم مش عايزة أعرفك تانى يابو
شokolates مفعصة !! .. عايزة واحدة سليمة والا مش هعرفك تانى

ثم انفجرا ضاحكين حتى قال حازم : خلاص ياستى هجبلك واحدة اول ما هنزل بعون الله وهعمل استخارة وأقول
لما لما ترجع من عند خالو وأكلم نور وساعتها هجبلك علبة شokolates مش واحدة بس

-yesssss! تسلملى يا حازم تصبح ع خيررر بقى يا جميل

-يابت دى مش بتاعتنا

-احم .. السلام عليكم يا أخ حازم ..

جاء يتكلم ولكنها قاطعته : يابنى سيبنى أتخمد بقى

قال : اسمها أنااااا مش أتخمد

-يووووه سيبنى sleep بقى

ضحك حازم ودخل غرفته وهو غير مامصدق لما حدث بينه وبين هدى وكيف عادت الأمور الى سابق عهدهما بينهما
ربنا إلى أحسن مما كانت عليه

وفي صباح اليوم التالى دخلت هدير غرفتهم بالمدرسة وحين رأت تقى هرولت نحوها واحتضنتها بشدة وقالت بقلق :
وحشتيىنى أووووى ياتقى فينك يابنتى اليومين اللى فاتوا دول !! .. أنا قلققت عليكى جدا .. لا بيتيجي المدرسة ولا
موبايلك مفتوح ولا بتفتحي فيس !!

قالت تقى بفتور : معلىش ياهدير ! كان عندى ظروف خلتنى أغيب

نظرت لها بتعجب وجلست إلى جوارها وأخذت كفها بين كفيها وقالت بحنان : مالك ياتقى ؟ فيكي إيه ؟

وهنا وبدون أى مقدمات أدمعت عيني تقى وبدأت تبكى بهستيرية فاحتضنتها هدير بقوة وأخذت تقى تقول وهى ترتعش (وكانا وحدهما بالغرفة) : را..رامى الزفت دا حسبي الله ونعم الوك.. الوكيل ! .. صورنى وأنا واقفة قدام الفصل وبكلم البنات ! وفى واحدة شافته وجت قائلتى ! .. أنا مرعوبة يا هدير !! .. من ساعتها مبطلعش من بيتنا أصلا وطول اليوم فى أوض.. أوضتى بعيط !!

سرت رعشة بجسد هدير حين سمعت ما قالته تقى وأخذت تردد : حسينا الله ونعم الوكيل .. حسينا الله ونعم الوكيل.. اللي معاه ربنا ميخافش من عبد أبداً ياتقى ! ..

تلقت منار مكالمة من حبيبة فى هذا الصباح وطلبت منها أن تستمع إلى حلقات الشيخ هاني حلمي للزواج والشيخ محمد الغليظ أيضاً وامتثلت منار لأوامرها .. هدأت تلك الحلقات كثيرا من توترها وأشعرتها أنها مقابلة عادية وليست نهاية العالم !!

وبعد العشاء.. خرجت خلف والدها والخجل يزين وجنتيها وجلست إلى جواره فى توتر .. أحس بها والدها فوضع كفها بين راحتيه كى تهدأ قليلاً ، سمعت صوت عمر الذي قرر أن يقطع الصمت قائلاً : إزبك يامنار ؟ إزدادت ضربات قلبها لسماع إسمها بصوته .. حاولت أن تتماسك وقالت وعيناها لم تُرفع عن الأرض : كويسة الحمد لله وحضرتك ؟

إتسعت إبتسامته حين سمعها تنعته ب "حضرتك" وقال : حضرتى كويس برضه الحمد لله

قال علىّ بمرح : وبالنسبة لحضرتي فأنا هقوم شوية مش هعمل حاجة وجاى

نظرت له منار بسرعة فقال وهو يكتف ضحكاته : والله هقعد جنبكم فى آخر الصلاة مش هسيبكم ..

نهض من جلسته وإتجه لآخر الصلاة وجلس على أحد الكراسي بحيث يراهم ويسمعهم إن شاء وتناول الجريدة وبدأ يتصفحها ثم نادى بصوت واضح : خلاص إتكلّموا أنا مشيت

إبتسم كليهما ولكنها أخفت بسمتها بسرعة كي لا يراها عمر الذى أخذ يفكر كيف يحدثها أو بالأخص فيم يحدثها !

مرت عدة لحظات صامتة ثم إعتدل عمر فى جلسته وقال : طب وبعدين ؟

قالت بخجل : بعدين إيه ؟

تبسم وقال غاضباً بصره عنها :يعنى الحاج علىّ اللى عامل نفسه مش بيسمعنا دا قعد يقولى فى اختبارات وكشف هيئة وحاجات كدا .. وأنا حضرت ال C.V بتاعى للمقابلة

تبسمت ولا زالت عيناها بالأرض فقال بجدية : على فكرة إنت المفروض تبصيلي .. مش المفروض تعرفي شكل اللى هتتجوزيه ولا إيه ؟

قالت فى نفسها (منا أكيد لمحتك يعني وانا داخلة مع بابا حركات قرعة بقى) وقالت له بخجل : بس أنا عارفة ملامحك من زمان .. ملهاش لازمة أبصلك

-طيب حقك عليا .. مش المفروض هتختبريني ولا أختبر أنا ولا إيه؟؟

قالت بتردد : بص ! .. هو أنا بصراحة لحد إنبارح بس كنت فاهمة الموضوع غلط .. فلما فهمت صح ملحقتش أجهز أسئلة بصراحة واللى كان فى دماغى طار

عاد بظهره للخلف وقال : حيث كدا بقى يبقى أسأل أنا ، صمتت قليلاً ثم أردف : أكلمك عنى ولا أسألك؟؟

-يووووه ماتخلصوا بقى أنا زهقت !

ضحك عمر وقال : بس يا عمي الله يكرمك متوترنيش كفاية هي !

تنهد والتفت لمنار وتبسم حين رأى وجهها مزينا بالخمير وبدون أى مساحيق .. من يراها لا يقول أبداً أنها قمحية البشرية ! فوجهها منير كالبدنر .. فقط لأنها لا تضع من المساحيق شيئاً .. سرعان ماغض بصره عنها وقال : بصي يامنار .. إنت متعرفنيش .. إطلاقاً ! .. فمتعمدش فى حكمتك عليا إني ابن خالك وتعرفيني من زمان والجو دا .. دا

أولاً.. ثانياً بقى فأنا حابب أكلمك شوية عنى .. أنا طول عمرى بصلي بفضل الله وكنت بقول إنى بتعامل بما يرضى الله .. وكان ديما الناس بتشكر فيا وتقول إنى محترم وكدا لحد ما صدقت إنى فعلا كويس .. لحد ما اكتشفت إنى بطيخة كبيرة .. جاهل بتقدير امتياز فى دينى ! .. للأسف كنت عايش باستهتار غريب وديما أقول إنى كويس .. ماهو عادى أصلا كلنا هندخل الجنة برحمة ربنا ! .. أصلاً كلنا بنضحك على نفسنا بالكلام دا عشان منفكرش نغير نفسنا للأحسن ! .. مبقولش إنى كدا كويس بس على الأقل أنا الحمد لله أحسن من زمان ! .. وهفضل أتغير لحد ما أموت .. المهم أصلا بقى سبب التغيير دا كان قلم أخذته من خمس سنين وشوية !

صمت قليلاً ففهمت مايرمي إليه ثم أردف : حسيت بجد إنى بقول أنا بحب ربنا بلسانى وعمرى ماعملت حاجة تثبت دا !.. آه انا بصلي وبصوم ومش بعمل حاجة شنيعة ! .. بس أنا أصلا بعمل كدا عشانى ! .. ربنا سبحانه وتعالى مش محتاجنى أصلاً ! .. حسيت بجد إن فى ناس بتبعد عن حاجات بتحبها عشان ترضي ربنا ! .. حسيت بجد إنى بعيـد أووووى ! .. بس إنتى عارفة؟؟ .. أنا عنيد جداً ! .. وكل ماكنت بقع كنت بعاند أكثر وأكمل طريقي .. وقررت أصبر ! ..هصبر عشان بجد فى حد شوفت فيه يقين بالله ! .. عرفت منه يعنى إيه ثقة بالله .. إنى هسيب حاجة بحبها وربنا هيعوضنى بخير منها بإذن الله .. قررت أبعد عن حاجات حرام بعملها .. وطول منا ماشي حطيت قدامى هدفين .. ربنا والجنه ويس ! .. كلامى اللي فات دا جميل أوى .. مشكلته الوحيدة إنى ماشي بسرعة النملة .. يعنى فى الخمس سنين دول .. يدوب بطلت الأغاني الحرام وبسمع حلال بموسيقى .. وانتظمت على الصلاة فى المسجد ..هو بصراحة كان بالنسبالي صعب فى الأول مع إنى شوفت ناس كثير إنتظمت بسرعة عليها بس أنا مكنتش متخيل إنى هنزل 5 مرات فى اليوم !! .. بس عانددت وقولت إشمعنا أنا !! هو أنا أقل من اللي بيصلوا فى المسجد ولا أنا مبحبش ربنا زيهم ! .. مشيتها فرض بفرض يعنى الأول كنت بصلي العصر والمغرب بس بعمل إذن وأروح أصلية وبقيت أظبط معادى ومطلعش من المستشفى أرغى مع صحابى عشان ألحق العشا .. ومشيت على كدا شهرين تقريباً وبعد كدا قولت هى جت على الظهر .. فبقيت أنزل أصلية وفضلت مدة طويلة أوى بفكر أصلي الفجر كمان بس مقتنع إنى مش هقدر ! ..وإنى إزاي هنزل فى الوقت دا بس لما جربت مرة لقيت الموضوع سهل أووى بس الشيطان هو لى بيكسلنى .. لدرجة إنى فى الأول كنت بحلف عليا عشان أروح أصلية ..

أقول كل يوم والله هرووح أصلي الفجر بكرا وبعده وطووول الإِسبوع بس كدا .. وأحياناً بس مش كثير بصراحة بصلي النوافل .. قيام أو ضحى أو وتر وكدا يعنى .. وبطلت سلام .. وبقيت بغض بصري .. الخطوة بتاعت الأفلام والمسلسلات هى الخطوة الجاية بأمر الله .. أنا قللتهم بس هوقفهم بقى كمان بعون الله وبقيت بتقن شغلى وبجدد نيتى إنى أنفع الدين والأمة وإن دا العمل عبادة وكدا يعنى بس كدا .. احكيلى انتى بقى عن نفسك وزوجك المستقبلى ..

صمتت قليلاً تشعر بسعادة عامرة مما تسمع وتتسائل في الدهشة أهذا عمر !! .. أتغير فعلاً لتلك الدرجة ؟ أصار يحب الله بتلك الدرجة .. ثم أخذت تفكر فيم تقوله له ثم قالت : بالنسبة ليا فأنا بحب ربنا جداً .. وعايشة بقالى خمس سنين من ساعة ما بدأت التغيير وأنا بحاول أخليه رقم 1 ديما فى حياتى مش بقول إنى نجحت من أول مرة بس أنا ماشية على الطريق ومش هموت إلا عليه بإذن الله .. عارفة إننا عايشين في دنيا وإن كلنا بشر وبنغلط بس اللي بيختار الجنة لازم يكون قدها بعون الله إخترت إنى أبعد عن زحمة الدنيا وشغل الدنيا وقرف الدنيا .. بقيت عايشة في الدنيا بس بحاول ديما مفكرش فيها بدرجة تنسيني الآخرة .. بص .. هو الكلام سهل أووووووووى وجدا كمان .. يعنى سهل أووي أتكلم عن الدين وبوستات وأنزل روايات وأبقى داعية .. وعلى فكرها سهل أووي إنى أختمر وأحفظ القرآن كله .. كل دا سهل أووي إنى أعمله من براا .. المشكلة في اللي من جوا بقى (وجمت منار وطأطأت رأسها وأردفت وقد كسا الحزن نبرتها) : أنا خايفة يوم القيامة أبقى عملت كدا عشان الناس يقولوا عليا إنى ملتزمة ويوم القيامة ميقاش ليا وزن ولا حسنات عند ربنا ..

حاول عمر أن يخرجها من ذلك الحزن فقال مغيرناً الموضوع : إنتي ماشاء الله ختمتي القرآن ؟

-لأ لسه .. أنا بتكلم عامةً

تبسم وقال : عايزة أسمع الباقي ..

أخذت نفساً طويلاً وقالت : أنا بحاول ديما أكسر نفسي كل ما أحسها عجبتني .. (أحست أن هذا أمر بينها وبين الله ولا يحق لها الإباحة به لأى مخلوق فتحولت عنه قائلةً) : يعنى أنا الحمد لله كان سهل بالنسبالي أختمر وصاحبتي جابتهولي ولبسته وأنا مروحة في يومها .. وبصراحة الخمار بيربي جداً .. يعنى بجد أنا ضد اللي بيقولوا

ألتزم من جوا وبعد كذا أبقى ألبسه عشان مبقاش منافق .. إيه النفاق في دا ؟ .. يعني في أخطاء معينة الواحد بيطلبها بسهولة وأخطاء بيطلبها بصعوبة .. زي مانت قولت الصلاة مثلا في المسجد كانت صعبه شوية ولسه قدام التلفزيون شوية على ماتبطله .. بس كان سهل مثلا إنك تنتظم على الصلاة أو تبطل أغاني .. أنا مثلا كان سهل أني أغير لبسي الحمد لله بس كإنا صعب عليا أووي إنني أنتظم على الصلاة .. فدى حاجة أخذت مني وقت كبير .. يعني لابسة الخمار ومبصليش بانتظام .. بس كان عندي يقين بالله إنه هيهديني ..

أخذت نفساً عميقاً وأردفت : كنت كل ما بيأس أو بضعف بفتكر الخطوات الإيجابية اللي حققتها .. ودي حاجة كانت بتشجعني .. وكل ما أحس بكثرة الفتن حواليا كنت بفتكر حديث الرسول -صلّ الله عليه وسلم-

((إن من ورائكم زمان صبر ، للمتمسك فيه أجر خمسين شهيداً منكم)) رواه الطبراني في الكبير وصححه الألباني رحمه الله

وكنت بفتكر برضه ((طوبى للغرباء)) .. وبرضه ((طوبى لمن رآني وآمن بي ، ثم طوبى ثم طوبى ثم طوبى لمن آمن بي ولم يرني)) رواه أحمد وصححه الألباني

الأحاديث ودي وغيرها كثير أووي كانت بتشجعني أووي .. وبصراحة برامج أ-مصطفى حسني شجعتني أووي وغيرت فيا حاجات كثير أووي .. أهم حاجة إنها غيرت فيا تفكير خاطئ كان عندي بفضل الله .. يعني إحنا حجتنا إن مفيش حاجة تشجعنا .. رغم إن الكتب والبرامج والدعاة ماليين الدنيا بس إحنا بنبقى بنكسل ونستسهل ..(شعرت أنها قد تحدثت كثيراً .. كثيراً جداً ! .. نظرت للأرض بخجل وقالت بخفوت): خلصت كلامي

قال ببسمة : مكلمتنيش عن زوجك المستقبلي ؟

قالت بخجل : بس انا اتكلمت كثير

-لأ أنا عايز اسمعك ..

صمتت قليلاً ثم قالت : عارف نفسك ؟

قال بغير فهم : آه

-عمرك بتضرها أو بتأذيها أو بتكرها لها الخير؟؟

-لأ طبعاً

-أهو زوجي دا هيبقى كدا .. ثقة في الله .. هيبقى باختصار شديد " أنا " .. دماغه شبه دماغي وتفكرينا واحد .. هدفنا واحد .. هو حب ربنا ورضاه .. هيشجعني وياخد بايدي للجنة .. هيبقى رفيقى للجنة .. هنشغل ديماً على نفسنا بصدق عشان نكون خليفة الله في الأرض .. هنزود عبادتنا سوا .. باختصار زواجنا هيبقى خطوة بعون الله للجنة .. (ثم قالت بخجل) أقصد زواجي أنا وهو .. زوجي المستقبلي

تمنى عمر في تلك اللحظة أن ييوح بالكثير والكثير .. لكنه لم يقدر .. لم يستطع .. كيف يعدها بأن يأخذها للجنة وهو لم يتق الله فيها ولم يعف قلبه حتى عنها .. لقد صبر سنين طويلة ابتغاء مرضات الله .. أتى له أن يغضبه الآن !! ..

صمت قليلاً ثم قال وهو يلزم عيناه الأرض .. فقد رأى ملامحها وارتضاها ملامح زوجته .. فلم ينظر إليها وقد أمر بغض البصر؟! .. : عايز أعرفك حاجة .. أنا يوم ما قررت أتغير قررت عشان نفسي ومش عشان حد .. وأنا الحمد لله مبسوط جدا بالتغيير اللي ربنا وفقني ليه وربنا يهديني أكثر ويشبتي .. كنت عايز أسألك يعني إنتي شايقة إني ممكن أكون الحد دا؟ .. رفيقك للجنة؟

-لو إنت عايز هتقدر تكونه وأحسن منه بكثير كمان ..

-طب معلش لو فيها غلاسة ينفع تساعدني أتوسع أكثر في تطبيق معاملاتني .. يعني عايز أسمع كثير وأقرأ كثير في الدين .. عايز أتعلم أكثر بجانب شغلي .. يعني لو تنصحيني ببرامج أسمعها مثلاً أو حاجة أقرأها

-في مصطفى حسني كويس أووي .. وفي محمد الغليظ كمان وممكن تبقى تحضرله كمان لوتقدر في المسجد يوم السبت بعد المغرب .. كل دروسه على يوتيوب أصلاً .. كنت بقول لنفسي مشوار الألف ميل يبدأ بخطوة .. وإن أى حلقة بسمعها لازم أتعلم منها حاجة .. معلومة .. موقف من حياة الرسول .. كدا يعني ..

-طب لو لسه معاكي البرامج دي ممكن آخذها منك أو اسم كتاب ابتدى بيه مثلاً؟

-هما لسه معايا آيون لأنى بسمعهم كل فترة .. بقوا حاجة أساسية في يومى .. ممكن أبقى أجهزهملك على فلاشة وأبعتها لك مع بابا أو كل ماتيجي عندنا أنقلك شوية من اللاب عشان متحسش إنهم كتير وتمل بسرعة وممكن تستغل وقت المواصلات وتسمعهم وإن رايح الشغل وراجع منه .. وممكن أديك أسامي كتب وممكن أسلفلك اللي بدأت بيهم .. زى ماتحب برضه ..

-حلوة فكرة السلف دي موفرة بصراحة .. ولو مش هضايقك تبعيلي شوية كل ما آجى عشان مملش يعنى لما ألاقهم كتير .. بس أفهم من كدا إنى هتقعد معاكي تاني ؟

تنبتهت أنها قالت "كل ماتيجي عندنا " فقلت ببراءة : هو إحنا مش هنقعد تاني ؟

تبسم وقال ناظراً للأرض : ولو إنتي عايزة يبقى هنقعد تاني

قالت بعدم فهم : ولو مش عايزة ؟

-يبقى إنتي رفضتيني .. هنقعد تاني ولا إيه ؟؟

قالت بخجل : إن شاء الله .. بس أستخير ربنا الأول

-ماشي .. كفاية كدا إنهاردة .. أنا همشي بقى ..

قالت بخجل : ثواني أجبلك أول كتاب قرأته

قامت ودلفت غرفتها ثم خرجت ويدها كتاب وضعته على الطاولة فتناوله وقرأ العنوان ببسمة " ليلة في بيت النبي - عليه الصلاة والسلام- " .. مقرأتش لمحمود المصري قبل كدا

-وانا برضه .. أقصد أنا كنت برضه .. ودى أول تجربة في القراءة المفيدة بالنسبالي وبجد أسلوبه حلو اووى وبسيط أوى وبجد ملهوووش حل

أوما برأسه قائلاً : تمام

تبسم ونهض من مكانه وقال بصوت عالٍ : طاب أحاج علىّ مش عايز مني حاجة ؟

اقترب منهما والدها وقال وهو يضحك : لا يارغاي مش عايز ومتجيش عندنا تانى ..

قال عمر بمرح : مش تعزم أفعد أتغدى طاهاه؟؟

ازداد خجل منار فضحك الأب وقال : لأ يا حبيبي هنرش ميا خلاص .. إمشي بقى كفاية لازقة !

ضحك عمر وصحبه علىّ إلى الباب وعندما فتحته جذبته للخارج وقال بلهفة : هتوافق صح؟؟ .. ها .. ها .. ها؟؟

دفعه بخفة وقال : قوول يارب ييسرلكم الخير واعمل استخارة يااض .. وإمشي بقى .. دا إنت غريب جداً

مرت الأيام تباعاً وحازم يستخير الله فى أمر التقدم لحبيبة بعد أن وجد الترحيب من والدته .. وكذلك منار التى شعرت براحة غريبة تجاه عمر لكنها لا تريد أن تتعجل فى قرار كهذا ! .. صارت تقى تتخفى من الأعين بطريقة هيستيرية فقد صارت تذهب للمدرسة ولا تحادث أحداً فيها إلا هدير أحياناً ولا تظهر فى فنائها إلا فى مواعيد الححص ولا تقف مع طالبة تحدثها كعادتها .. بمعنى آخر إنعزلت خوفاً من رامى .. ذلك اللثيم الذى لا يهमे أحد ! .. كلما مرت الأيام زاد توتر هدير فعلى الرغم من الثبات والهدوء اللذين تُظهرهما دوماً فهى تشعر بالتوتر من ذاك اللقاء مع نور يوم الخميس ! .. نور الذى بات يعد الايام ليقابل هدير .. ليُفصل الأمر ولينتهى قلقه .. ربما هو ليس ميمماً بحبها لأنه لم يجالسها قط ! ولكنه يشعر براحة تتزايد مع كل إستخارة يصلها

ربما قد حالت الأقدار بين قلوبهم ولكنهم مؤمنين بأن الله لن يضيع صبرهما .. القلبان المتحابان .. يوسف وهدى .. هى تسهر كل ليلة تدعو الله فى السر أن يصلحها له ويصلحه لها .. حاولت أن تقترب من حبيبة عبر محادثات هاتفية ولكنها لم تجدى نفعاً فقررت أن تحادثها يوم الجمعة فى الدار وتخبرها بعزمها على التغيير وقررت أن تقص لها حكايتها مع يوسف فعساها تنصحها نصيحة تخفف عليه قليلاً .. فهى ستصبر .. لا خيار آخر ! .. ولكنها تعلم أنه سيطول ! .. سيطول كثيراً! .. ولكن بعد تفكير عدلت عن هذا الأمر وقررت عدم إخبارها بحكايتها القديمة مع يوسف .. خافت أن تكون من المجاهرين بالمعاصي .. فقد توقف هذا الذنب .. فلم تخبرها إذا؟؟

وفى مساء الخميس .. جلس نور بانتظار خروج هدير برفقة عمها وهو يرسم تلك البسمة الهادئة على محيآه .. خرج الحاج محمود من غرفتها وهى تتبعه مرتدية نقابها وملحفتهأ كأى مرة تخرج فيها !.. لم تتنازل عن شئ من نقابها متعلقة بذلك السبب العقيم أنه "عريس " !! .. وهل سيمنعها إلتزامها بأوامر الله خير قد كتبه الله لها ؟!! ..

خرجت متزينة بالخجل والعفاف خلف عمها وجلست على استحياء إلى جواره وماهى إلا دقائق حتى نهض عمها وجلس على بعد عدة خطوات تاركاً لهم المجال للتعارف ..

تبسم نور وقال ناظراً للأرض : إزيك يا أستاذة هدير عاملة إيه ؟

أجابت بصوت خفيض : تمام بفضل الله وإنت ؟ .. أقصد وحضرتك ؟

قال مبتسماً : تمام الحمد لله

رفعت عينيها إليه فتبسمت ثم نظرت للأرض مقررة ألا ترفع طرفها إليه مجدداً .. فقال لها : هو إحنا ممكن نتكلم عادى ؟

قالت مستفهمة : عادى إزاي ؟

إعتدل فى جلسته وقال باهتمام : يعني أنا بصراحة نفسي نتفق على الصراحة من الأول خالص يعنى أنا مش هقولك مثلاً " أختى " وأنا مبقولهاش براا ! .. ولا هحاول أزين كلامى عشان أطلع السوبر ملتزم .. حضرتك فاهمة قصدى ؟

-تمام فهمت .. طب أنا ينفع أسألك على كذا حاجة ؟

قال مبتسماً : طبعاً إتفضلى بس عموما الفجر بيأذن الساعة 4:23 عشان حبيبة قالتلى إن دا أول سؤال هتسأله

وتبسمت ذات النقب فلم تُرى بسمتها وقالت بخجل : مكنتش هسألك ع الفجر ..

-إسألني في اللي يعجبك

قالت بخجل : هو أنا عارفة إن حضرتك ماشاء الله ملتزم .. وبتصلي في المسجد من زمان وحافظ القرآن ماشاء الله ومحترم وكويس وطبعاً كل دا حبيبة اللي قالتهاولى منها لنفسها أنا مسألتهاش ! .. بس في ملتزمين كثير ! بس مش أى إثنين ملتزمين يتجوزوا ؟ .. صح ؟

قال موضحاً : إسمحيلي بس أقول لحضرتك حاجة .. أنا مش بحب كلمة ملتزم دى نهائي لأنى طالما مسلم يبقى المفروض أسمع كلام ربنا وأطبق الشرع .. بس للأسف في زماننا دا بقى اللي يطبق شرع ربنا ملتزم ! .. والباقيين إيه طيب؟؟ .. أنا بحس الكلمة دى عنصرية أوى .. ومع ذلك احنا بنضطر نستخدمها عشان نعبر لما الكلمات بتعجز معنا !

تبسمت هدير بشدة حين سمعت مانطق به لأنها شعرت به يتحدث بلسانه معلناً عما فى قلبها .. ذلك هو ما تضمه تجاه لفظ " الملتزم " الشائع بيننا .. لانلوم على استخدامه ! .. انما نلوم على سوء استخدامه ! ..

تنفست وقالت : دا تقريباً نفس كلامي عن فكرة الملتزمين .. بس زى ما حضرتك قولت احنا بنستخدمها لما الكلمات بتعجز معنا .. المهم .. أنا كنت عايزة أعرف .. لو أنا قولتلك ليك هدف واحد فى الدنيا بس .. هيبقى إيه ؟

قال بدون تفكير : الجنة

-ولو هدفين ؟

-الجنة

-ولو ثلاثة؟؟ أو خمسة ؟

قال مبتسماً : الجنة برضه .. أقولك ليه ؟ .. أصلاً أصلاً الجنة هي كل حاجة .. أصلاً كلنا نفسنا نشوف ربنا وهو راضي عنا .. بس الحقيقة إننا مش هنشوفه راضي عنا غير فى الجنة .. لأنها إما جنة وإما نار مفيش خيار تالت !! .. فإما أمشي فى طريق الجنة وأشوف ربنا وهو راضي عنى هناك ! .. أو أسيب نفسي لهوايا ياخذى هو للنار ! .. أى

نجاح فى الدنيا لازم أربطه بالجنة .. أو بمعنى أصح بقى أربطه بربنا .. وأى هدف أو حلم لازم يتربط بالله وطالما هيتربط بالله يبقى يندرج تحت الجنة .. يعنى فى ناس أحلامها تعيش كويسة ومرتاحة ومعها فلوس وعربية وزوجة صالحة وولاد كويسين .. طب مين فينا مش عايز كدا اصلا؟! .. طب منا هسعى فى الدنيا لكل دا .. مش عشان الحاجة بعينها بقى .. لأ عشان أرضي ربنا .. ورضى ربنا دا هيرضى نفسي طبعاً .. هو أنا المفروض أقول رضى ربنا مش الجنة .. بس أنا بحسها كلمة كبيرة عليا ومش حاسس نفسي بشتغل فعلاً وعايش بس عشان رضى ربنا .. بحاول والله .. بس طول منا بحاول هفضل أقول الجنة .. الموضوع ملغبط عندى شوية معلش .. أنا لغبطتك؟

قالت بعفوية دون أن يُرفع صوتها : آه بصراحة توهدت شوية بس تقريباً فهمت قصدك .. ولو إنت فعلاً بتطبق الكلام دا وعايش حياتك لله فعلاً مش كلام ويس يبقى أنا مش هحتاج أسألك فى حاجة تانى

طأطأت رأسها فى خجل وأحست أنها تسرعت فى عبارتها الأخيرة فقال نور مبتسماً : لأ طبعاً هتحتاجى تسألينى السؤال اللى أنا هقولهلوك دلوقتى .. هتعملى إيه للجنة؟

قالت بثبات : هعيش فى الحلال

قال مبتسماً : زى الرواية؟

قالت بسعادة : إنت قرأتها؟؟؟

هز رأسه بالإثبات : أيوا .. حبيبة خلتنى أقرأها ويجد غيرت فىنا للأحسن إحنا بعون الله هنشتغل عشان نعيش زيهم فى الحلال

ثم تنح فى احراج وقال : ان شاء الله لو ربنا أراد والموضوع تم على خير

أحست أن عليهما أن يتجادبا أطراف الحديث أكثر لتعرفه أكثر فقالت : بالنسبة لزوجتك هتعاملها إزاي؟؟

عاد بظهره للخلف كأنه يحضر شيئاً كان قد دفنه فى ذاكرته منذ زمن ثم قال : زوجتى هتبقى جزء منى .. الجزء اللى قررت أحافظ عليه من زمان أووى .. قررت أخبى المشاعر ومطلعتش حتى فى فترة المراهقة .. قررت أحفظ بصري وسيرة بنات الناس .. قررت متفرجش على أفلام ومسلسلات هابطة بحجة إن دى الرومانسية .. قررت

أحافظها على جزء برئ منها .. نقي .. لحد ما هي جويا بقت بتمثل الجزء دا ! .. الجزء اللي عمره ماخرج للدنيا ولا شاف نور

تنهد بقوة وقال : زوجتي هتبقى أول واحدة أحكيها وأفضضلها .. هتبقى المحفز بتاعى إني أكمل ديما ومتراجعش أبداً .. هتبقى رفيقتي للجنة بجد .. الحد اللي هيشجعني وهشجعه عشان نعيش في الحلال فعلا ونرضي ربنا .. سقطت دمعة من عين هدير بسبب الصدق المنبعث من كلمات نور وأحست أنها تريد أن تستمع أكثر إليه وإلى ذلك الجزء البعيد من نفسه ولكنها ليست زوجته ! .. فلتصبر لقضاء الله الذي تثق به ثقة بلا حدود

سادت عدة ثواني من الصمت قطعها قائلاً : طب وزوجك ؟

أخذت نفساً عميقاً وقالت : زوجي هيكون رفيقي للجنة .. ومن الجمل اللي بحبها أوى " أحلى ما في الدنيا رفيق صادق للجنة " .. حد هنتفق سوا على كل حاجة هنعملها .. وديما هيشجعني ويشدني لقدام .. هحاول إني أرضيه ديما وأعامله بما يرضي الله .. إحنا عندنا مفهوم قاصر إن الراجل بس هو اللي المفروض يعامل زوجته بما يرضي الله .. طب وهي ؟ .. لازم طبعا ترضي ربنا في زوجها لأنهم هيكونوا سوا بيت إسلامي صغير كدا هيطلع منه خلفاء لله في الأرض باذن الله ..

ابتسم نور وقال : طب وأولادك ؟

قالت مبتسمة : أولادى فى الإسلام .. بمعنى إنهم هيتولدوا فى مناخ إسلامي بحت بعون الله .. مش لازم يعيشوا زينا شوية فى الجاهلية .. هقرأ كتبيير عن تربية الأولاد وإزاي أكون زوجة وأم سالحة .. وإزاي أكون قد مسئولية بيت وأقدر أتعامل مع زوج و .. بالمناسبة ! .. هي الموسيقى حلال ولا حرام؟؟

تبسم نور لأنه يعلم غرضها من وراء ذلك السؤال فقال : الأئمة الأربعة قالوا حرام .. بس مينفعش أقول إنها حرام بالإجماع لأن فى أئمة تانيين قالوا إنها حلال .. بس أنا ك نور بعدت عن الشبهات ومبسمعهاش .. طبعا الأغاني بتاعت اليومين دول حرام والموسيقي لي فيها بقوا حرامين !! .. انا بتكلم ع الموسيقي لي فى أغاني ماهر زين أو الاغاني الكويسه عامةً .. مافى مغنين بيغنوا أغاني كويسه تتسمع .. بس أنا رغم إني مش بسمع موسيقي مقدرش أقول لواحد بيسمع بموسيقي حرام عليك .. يعني أنا بطلت موسيقي تماماً من اربع سنين .. بس لو اتعرضت قدامي

حاجة بموسيقى مش هتثور على صاحبها وأزعقله زى مابشوف بعض الأخوة "الملتزمين" بيعملوا دلوقتي .. عشان كذا قولتلك أنا مبحش لفظ ملتزم ! .. لأنى يوم ما أبقي ملتزم وأروح أزعق لواحد بيحرب يسمع حاجة كويسة وأقوله برضه إنه حرام عليه لأنها بموسيقى أول كلمة هيقلها إن الالتزام دا تعقيد !! .. ودي صورة احنا ساعات كثير بنقلها غلط للأسف من غير ماناخذ بالناس

تبسمت هدير وقد نجح نور فى الاختبار بدرجة امتياز وقالت : أنا مش لاقية تعليق على كلامك بصراحة ..

-مش لازم تعلقي .. عندك أسئلة تانية ؟

أخذت تعصر رأسها لتتذكر أى شئ مما سمعته فى الحلقات الخاصة بالزواج والتي أوصتها بها حبيبة أيضاً .. بعد ثواني من التذكر قالت : يومك بتقضيه إزاي ؟

صمت قليلاً ثم قال : أنا يومي بيبدأ من الفجر أو قبله بشوية .. بصلي الحمد لله الخمس فروض فى المسجد .. بروح الكلية الصبح ويحاول على قد ماأقدر أستغل المواصلات سواء فى قراءة وردى أو اسمع أى حاجة مفيدة .. معلقين ورقة على باب بيتنا فيها كام جملة تشجيعية كذا من ضمنهم إنك تجدد النية وإنت خارج .. يحاول أجدها ديماً .. بروح البيت وبقضي شوية مع حبيبة وبنزل الشغل .. برجع هل كان طبعاً بس بقعد أذاكر .. فكرت أذاكر فى الشغل بس حسيت إنى هقصر فى شغلى اللي بقبض عليه وهقصر فى عبادة الوقت اللي هى مذاكرتى .. يعنى والله بستعين بالله وربنا بيسهلي المذاكرة .. وبنام وبصحى أعيد اليوم .. عارف إنى مقصر بس دي ظروفى كذا .. فى الأجازة بخلي الشغل الصبح وأروح المسجد وبنعمل أنشطة صيفية بصراحة حازم اللي بيشجعنى كل أجازة .. بنلعب مع الولاد ونحفظ سوا قرآن وبنروح نتفصح سوا .. نعمل عمل خيرى .. نعلق زينة فى رمضان والعيد كنوع من ادخال السرور .. وبروح أحضر دروس فى المسجد فى الأجازة برضه للأسف معنديش فرصة أحضرهم فى الدراسة بس بسمع تسجيلاتهم وكذا .. إمام تقريباً بس كذا .. وإنتي يومك بيتقضى إزاي ؟

صمتت قليلاً ثم قالت : يومي بيبدأ قبل الفجر بشوية برضه .. يحاول أجدد نيتي قبل ماأروح المدرسة علطول بس هعلق ورقة على باب البيت تفكرني برضه فكرة كويسة أوى .. أنا بحس إن وظيفتي دي حياتي .. يعنى أنا حاسة إن ربنا حاططني على ثغر من ثغور الإسلام ووالله ما ببالغ .. يعنى المدرس فى إيده يطلع شخصيات ناجحة جداً ومتدينة

ومتفوقة وبتشغل بضمير وبتحب دينها وبلدها .. بصراحة أنا شايفة إن التعليم هو اللي بيخلق الشعب .. فأنا بحاول أراعى ربنا وأتقيه في شغلي لأنى في وظيفة مهمة جداً .. وبحاول ديما أعمل مع البنات حاجة جديدة تقربنا من ربنا سوا .. بس دا ميقصرش على شغلى فى الحصة .. لأن الأصل دي حصة عربي مش دين فلازم أخلص شغلي بما يرضى الله .. مش أقعد أكلهم عن ربنا وأنا مقصرة في منهجي !.. بحاول أستغل المواصلات ديماً برضه حتى لو كانوا عشر دقائق .. بروح أشوف هعمل إيه اجتماعى .. هروح لعمو أو هكلم قرايى أو هعمل حاجة اجتماعيه يعنى .. بحضر درس في الدار بعد العصر أربع أيام في الاسبوع .. ديما معايا كتب بقرأها فى البيت سواء بستعيرها أو بشترها .. ليا ساعه ف اليوم على الفيس بحاول أجدد النية قبل ما أقعد بحاول أتصاحب فيها على البنات اللى ف فصلى ومخوفهمش منى بحيث انهم يحبونى لما يلاقونى معاهم ع الفيس عادى مش متنشنة .. وليا ساعة كتابة في اليوم ..

قالم باهتمام : بتكتبي ؟

-آه ..

-وبتنشري بقى ع الفيس وكدا ؟

-مش علطول .. يعني بحاول منشرش أي حاجة غير لما أتأكد إنها صحيحة تماماً .. أنا مش حمل وزر حاجة خطأ نشرتها

صمت قليلاً وقال : ربنا يبارك في أي حد بيراعي ربنا في شغله .. عندك أسئلة تانية ؟

-لأ! .. مش متجمع فى دماغى حاجة تانى

-خلاص إبقى إعملى زى الروايه وإكتبى لى عندك فى ورقة وأنا هعمل كدا برضه .. بعد إذلك

نهض وسلم على الحاج محمود وغادر على الفور .. نظر الحاج محمود ببسمة لهدير وقال : إيه رأيك ؟

صاحت بذهول : إيه دا !! .. بجد مكنتش متخيلة الرؤية الشرعية دة حلوة أووووى كدا !

-انا بقولك إيه رأيك فى نور ???

-هو ماشاء الله كويس أووى بس هحتاج قعدة كمان معاه بس بعد فترة أكون جمعت أسئلة وعملت استخارة كذا مرة

تنصح باحراج وقال : طب وقالك حاجة عن شغله أو ظروفه المادية أو أى حاجة من دى ؟؟

هزت رأبها نافيةً وقالت : إطلاقاً .. وأنا أصلاً مجاش في بالي أسأله في حاجة زى دى ! .. وبعدين ثوانى كدا .. هو إنت مكنتش سامعنا ياعمو ؟؟؟؟

-يعنى لو ركزت كنت هسمعكوا بس أنا مركزتش

قالت بضيق : مينفعش ياعمو كان لازم تسمعنا !

-يابنتى أنا سألت فيها قبل كدا والشيخ قالي إنه ممكن أشوفكم بس

-بس في شيوخ تانية قالوا تسمعنا عشان متعبرش خلوة .. ماحنا ممكن نقول اللى احنا عاوزينه وانت مش سمعنا بقى ! .. معلىش ياعمو خلىنا فى السليم وبعد كدا ابقى اسمعنا .. مش عايزة ربنا يزعل منا فى أى حاجة ..

قالت بلفهة : هاا عملتوا إيه ؟؟

ارتمى على مقعده وقال بمرح : اتكلمنا هنكوون عملنا إيه

-طب إيه رأيك ؟؟ .. هدير كويسة صح ؟؟ .. ومخها حلو ومتفهمة كدا وت ..

قاطعها : يابت انتى مش سألتينى على رأيي ؟؟ .. سييلي فرصة أجاب !

-أكيد موافق ياعم نور ! ..هاا هتروح تانى إمتة عشان تنفقوا على الجهاز والحاجات دى ؟؟

تحولت لهجته الى الجدية وقال : حبيبة دا بيتك ومش هطلعك منه عشان اتجوز ! .. وبعدين لسه بدري أوى على الكلام دا

-أنا أقصد عشان لما تروح وتقوله إن عندك شقة .. فالموضوع هيبقى أسهل من إنك تدور على شقة جديدة .. وبعدين انت لو هنعوز شقة تتجوز فيها هتبقى اقل حاجة اوضتين .. دا اقل حاجة .. انما لو أنا أجرت شقه أوضة واحده دا هيبقى أقل فى المصاريف وبعدين منا كلها سنة وشويه واخلص الكلية واكيد باذن الله هتجوز واروح بيت جوزى .. ساعتها شقتنا دى هتبقى فاضية

صمت قليلاً يفكر ثم قال : متستعجلش الأمور يا حبيبة .. مش يمكن ميحصلش نصيب .. رروحي نامى بقى عشان أنا خلاص فصلت ..

قبلت رأسه وقالت : ماشي يا حبيبي .. تصبح على خير وسعادة وجنه ياذن الله

وبعد عدة أيام ..

كان نور عائداً من عمله إلى البيت حين رأى الحاج محمود فى الشارع .. خطى نحوه وصافحه بحرارة وبعد أن سأله عن صحته سأله بلهفة : الأستاذة هدير عملت إستخارة؟؟

-آه عملت بس لسه مقررتش ..

-طب إحنا ممكن نقعد تانى؟؟

ثم عدل من كلامه : أقصد يعنى أنا مقولتلهاش أى حاجة عنى وعن ظروفى .. والله نسيت أصلاً .. وبعدين..

قاطعته ببسمة : هى مش هتمانع على فكرة تبتدوا مع بعض من الصفر ..

قال بلهفة : حضرتك سألتها؟؟

رد بثقة : من غير ما أسألها دي بنت أخويا وأنا حافظها وعارف دماغها ..

تبسم نور فى سعادة وقال : طب وهى هترد عليك امته ؟

-معرفش والله بس إنت ممكن ترشيني وأنا هسألهاك انهاردة ..

-لا يا حاج أنا استنى أحسن

ضحك الحاج محمود وربت على كتفه قائلاً : طيب ياعم هسألهاك من غير حاجة ..

تنهد نور براحة وشكره بشدة ثم قال : يوسف أخباره إيه ؟؟

-بخير بفضل الله هيطلع أخيراً من المستشفى الاسبوع الجاي ادعيله بقى يانور .. أنا خايف عليه أوى السنادى ..
وبصراحة مش عارف أشكرك إزاي على اللي عملته معاه وقعدتك وياه ومتابع معاه المذاكرة وانت بتشتغل وبتدرس
برضه بصراحة مش عارف أقولك إيه ولا اشكرك ازاي و ..

قاطعه نور بأدب وجدية : عيب لما حضرتك تقولى كدا إنت كدا بتشتمنى ! .. يوسف دا أخويا وحضرتك والدى
والله

احتضنه الحاج محمود وقد ادمعت عيناه حين تذكر حال ابنه وقال بحب : ربنا يكرمك يانور ويرزقك ببنت الحلال
اللى تستاهلك ..

ابتسم نور فأردف الحاج : على فكرة هدير هتوافق

زادت ابتسامته وقال فى نفسه : ياررب لو فى خير ربنا يبسر

صعد نور إلى شقته ففتحت له حبيبة ويبدو على وجهها الحزن وقالت له : خالو كلمنى يانورور

قال متعجباً : وفيين المشكلة ؟ .. مالك مكشرة كدا ليه ؟؟

ارتمت على أقرب مقعد وقال بحزن : بيقولى جايلي عريس ..

لم بيد على وجهه إمارات البهجة من طريقة حديث حبيبة وقال : طب وإنتي مضايقة ليه ؟؟

قالت وقد أدمعت عيناها : عشان هو ماسك فيه أوى ولما قولتله مش عايزة أتجوز دلوقتى شخط فيا وقالى "أنا

كلامى مش معاكى أصلا ! .. أنا كلامى مع الراجل ! .. أنا غلطان إنى قولتلك أصلا ! "

-طب ماترعليش يا حبيبة .. أنا هقوله إنك مش هتتجوزى وانت بتدرسى وكدا ..

قالت وهى تحاول مسح دموعها : منا قولتله كدا فراح قالى العريس هيستنانى السنه ونص لى فاضلين دول بس

هيكتب الكتاب فى نص السنه لأنه بيسافر وكدا ..

-طب ماشي ياستى يجي ينور طالما الموضوع هيتأجل لحد مانتى عايزة

قالت بصيحة مكتومة : مانت مش فاهم !! .. إنت عارف أصلا جايلي مين !! .. عايزنى أتجوز سامى ! .. سامى

اللى مش ملتزم أصلا ولا ..

وضع يده على فمها وقال : متكلميش على حد

دفعت يده وصاحت : ماهو من قهرتى يانور !! .. إنت مسمعتوش بيزعقلي إزاي وقعد يحلف إنه هيجوز هولى

-مش عشان مقهورة يبقى تغضبى ربنا .. استغفرى كدا واهدى والموضوع هيتحل

-هيتحل إزاي بس

قال مبتسماً : هيتحل بأمر الله ..

قالها وغادر الى غرفته وهو مشغول البال .. فهو يعلم طباع خاله الشديدة وإنه لن يتنازل عن رأيه بسهولة .. كما أن

يخشى حين يخبره بأمر ذهابه للتقدم لهدير دون علمه .. ارتدى على الفراش وأخذ يفكر طويلاً وحين لم يجد حلاً

توضاً وصلّى وأخذ يدعو الله ويتذلل له .. لأنه وحده القادر على كل شئ .. فالله يقول للشئ كن فيكون

وفى هذا المساء

-أنا خلصت الكتاب اللي أخذته منك .. وعائز تانى .. شكل القراية دى هتبقى عندى إدمان

اكتفت بابتسامه خجولة لم تُظهرها وقالت بخجل : ان شاء الله وانت ماشي هديك حاجات جديدة

-ماشي .. تحبي بقى نكمل كلامنا يامنار؟؟

-أكيد

تنهد عمر بقوة وقال : بصي .. أنا مش عايز أفضل زي منا .. يعنى أنا عايز أتغير أكثر وأكثر وبسرعة أكبر .. قولتلك إن مشكلتى إنى بتغير بسرعة النملة ! .. فأنا عايز أتغير بقى أكثر من كدا بعون الله .. من ساعة ما سمعت حلقة سحر الدنيا بتاعت التلفزيون وأنا قررت إنى هبعد تماماً بتاتاً .. بس فى حاجة مخوفانى

أنصتت باهتمام أكثر فأردف : يعنى .. أنا ديمماً بقرأ إن الراجل المفروض يكون أعلى فى الدين عشان هو اللي يشد زوجته للجنة .. بس أنا حاسس إنى أقل منك .. فأنا خايف دا يآثر يعنى على قرارك وكدا ..

فكرت قليلاً فى كلماته ثم قالت : طب لو أنا موافقتش عليك .. هتعمل إيه ؟

تنهد بقوة وقال : أكيد هضايق ! .. بس دا هيبقى خير لانه من عند ربنا .. أكيد ربنا هيبقى ليه حكمة فى كدا .. جايز عايزنى أصبر شوية على الجواز على ما أكون إتغيرت أكثر وإتعلمت أكثر .. فلو إنتى موافقتيش فدا حقك طبعاً .. بس ساعتها انا هيبقى عندى فرصه أكبر انى اغير نفسي اكثر قبل ماتقدم لواحدة تانية

شعرت بسعادة كبيرة لأنها أحست أن لديه الهمة والحماس .. وأنه مؤمن بقضاء الله حتى وإن خالف هوى نفسه .. قالت بجدية تخفى خلفها سعادتها : أنا هعمل إستخارة يا د عمر .. واللى فيه خير ربنا هيقدمه .. بس طالما حضرتك عندك الهمة وناوي بجد تحسن نفسك ديمماً فإنك كدا هتشجعنى بعون الله وهتسبقنى وتشدنى للجنة بأمر الله ..

أوماً برأسه ثم قال : بس كنت عايز أسألك برضه على حاجة .. رأيك في العمل التطوعي ؟ ..

قالت بدون تفكير : العمل التطوعي دا أهم من العمل الأساسي أصلاً .. يعني حتى لو مش هشتغل لازم يكون فيه عمل تطوعي .. (ثم أردفت باحراج) : بس بصراحة ساعات بستبعد المسافة عشان رسالة في سموحة وصناع الحياة في لوران فمش بقدر أشارك بشكل مستمر بس نفسي والله أشارك علطول

-يعني هو لازم رسالة أو صناع الحياة ؟ .. مش أقصد والله أذم في حد فيهم دول أصلاً ماشاء الله شغلهم كويس جداً جداً .. بس قصدي ليه مثلاً متفقيش مع صحابك وتروحوا دار أيتام أو مسنين كل إسبوع أو اتنين مرة .. أو تنزلي تحضري درس مثلاً في المسجد أو تحفظي قرآن لأطفال أو توزعي ورق أو مطويات أو كتيبات في الكلية عندك ؟ .. أو تعملي سيديهات مثلاً فيها كولكشن برامج حلوة مصطفى حسني مثلاً عشان أسلوبه سهل وبسييط ودرسين ثلاثة لمحمد الغليظ عشان ماشاء الله رائع برضه أو خواطر بتاع أحمد الشقيري .. أى حاجة يعني مش شرط لحد معين .. في ناس كتير جداً كويسة تتوزعها برامج .. على شوية أناشيد حلوة على كام كتاب حلوين .. حطيمهم في سيديهاية ب اتنين جنيه واديهم لواحدة مثلاً ووصيها متوقفش الخير عندها .. تاخذ نسخة وتديها لغيرها وتقوليلها تقولها متوقفش الخير عندها برضه وهكذا .. يعني في أمثلة كتير أوي للعمل التطوعي .. الفيس مثلاً ممكن تخليه مزرعة للعمل التطوعي بس بلاش جو التلات أربع ساعات في اليوم دا بحجة إنه عمل تطوعي .. يعني آخزرره أوي ساعه أو اتنين بالكثير أوى أوى .. إنما طول اليوم الفيس .. طول اليوم عمل تطوعي .. لأ دا كدا مدخل للشيطان .. يقولك إنتي بتعملي خير وزى الفل أهو .. وإنتي أصلاً بتضيعي وقتك ويومك وهتلاقيكي بتقصري في وردك مثلاً أو الخطة اليومية بتاعتك

أومات برأسها بسعادة وقالت : ياذن الله هبتدي في الأفكار دي من إنهاردة والله المستعان

قال : إن شاء الله .. ليكي في القرآنية غير في الديني ؟

-بصراحة مش أوي .. هو أنا بحب الروايات بس مش كل الروايات بقراها .. بحب كتب التنمية البشرية والاجتماعية وكدا وطبعاً بحب أقرأ في الكيمياء جداً والأدوية والمواد المصنعة والتركيبات وكدا .. بس ماليش خالص

في المواضيع بتاعت المجرات والأقمار وتخليق البشر والمواضيع المستحدثة في الطب دي ولا العلاج بالمعرفش إيه .. في ناس بتهمها أوي .. بس أنا مش منهم مع إني المفروض دكتورة بس هذه المواضيع لاتعيني

كاد أن يضحك رغم أن أسلوبها لم يكن مرحاً ولكنه حافظ على وقاره وقال بهدوء : تمام

-طب وإنت ؟

-لأ بصراحة هذه المواضيع تعيني .. يعني باعتباري طبيب بقى مش صيدلي فأنا احب أوي أعرف أجدد أبحاث بتعمل في الطب .. يعني أنا مقتنع إني هقدر بعون الله أفيد البشرية بحاجة ولوكانت الحاجة دي هي عملي كطبيب عادي خالص بس فاهم شغلي .. يعني فعلاً كل واحد بيحب يقرأ في مجاله .. وكتب التنمية البشرية بحبها بس مش أوي .. برضه ماليش في جو الكواكب والمجرات .. والديني بدأت فيه حديثاً هو وحسيت إني حبيت الكتاب جداً وخلصته بسرعة رغم إني استضخمتة في الأول

قالت : بصراحة أنا إستغربت إنك خلصته دا أنا قعدت فيه أكثر من شهر

-بصراحة جذبني أوووي أسلوب محمود المصري وحببت أعرف النبي عليه الصلاة والسلام كان بيعمل إيه في الموقف دا طب الموقف دا .. بجد حمسني أووي في جزء الصلاة وصلاة الفجر مخصوص جدولي مشاعري بفضل الله .. ولقيته واخد مقطعات جميلة من استمتع بحياتك ودا لو عندك هاخده برضه لو مش عندك هروح أشتريه بإذن الله

قالت بخجل : لأ عندي .. ودا برضه حبيت أقرأه أول ماخلصت ليلة في بيت النبي وحبته بعده وقرأته .. كنت بستعيرهم في الأول وبعد فترة إشتريتهم على ماحوشت وكدا

-تمام .. وردك بقى مشبته ولا على حسب ؟

-هو كان في الأول على حسب .. بس بقالي الحمد لله كام شهر مشبته وكل مدة بيزيد ربع مثلاً .. بيزيد دي بقى على حسب .. بس بحاول مرجعش وبفتكر ديماً "أحب الأعمال إلى الله أدومها وإن قلت " .. لو بقى معاك فلوس .. كتيرررر .. هتعمل بيهم إيه ؟

عاد بظهره إلى الخلف وقال : على حسب هما كثير قد إيه

-مش فاهمة؟؟

-يعني لو كثير أوي هيطلع جزء منهم لله .. وجزء للحاجات الأولى إنها تتعمل .. يعني أجهز الشقة اللي هتجوز فيها ونعجل الجواز بدل ما أستنى سنة على ماتخلص أو كام شهر .. هشوف لو والدي أو حد مزنوق مثلاً في الأسرة أديله .. اللي نفسي بجد بجد فيها إني أطلع عمرة أو حج .. ولو عملت كل دا وفضل فلوس يعني ممكن أحطهم في البنك بدون فوايد بس يكونوا موجودين للطوارئ

-حسبتك هتقول أجيب عربية؟؟

-منا مورثتش بنك مثلاً .. يعني هي العربية مفيدة أوي .. بس لغيري .. يعني مواصلات الشغل مش مرهقة وبعدين أنا بستغلها .. فلو جبت عربية الاستغلال دا هيصيح .. بصي هو أي حد دخل طب هتلاقي دماغه كدا .. وقته عنده بفلوس .. ومش لازم طب بس أي حد في الدنيا بيحاول يعيشها صح هتلاقي إنه يفضل الوقت على أي حاجة تانية .. لأن وقتي هو عمري ! .. حفاظاً على عهد الصدق اللي قطعته على نفسي إني هبالغ في أي حاجة بعملها عشان متاخذيش عني فكرة كويسة أوي .. فأنا مش بحافظ على وقتي بنسبة 100% بس ع الأقل بحاول وربنا بيوفقني في حاجات وبنجح فيها ..

-تمام .. طب لو مش فلوس كثير أوي؟

-هو الطبيعي إني هعمل أكثر حاجة نفسي فيها وهي إني أزور بيت ربنا بس للأسف مش هعرف أعمل كدا .. أنا عارف إن الحج فريضة على كل مسلم قادر .. بس لو بابا أو عمتي أو خالي أو أي حد من قرابي محتاج فلوس وكلنا بنتعثر يعني وانا رايح أطلع حج أو عمرة .. بصراحة مش حلوة .. فيها خُذلان .. لو حد مثلاً ابنه مريض محتاج عملية في العيلة ومش لاقين تمنها وأنا أروح أطلع عمرة .. فيها خُذلان جداً .. بصي أنا معرفش هي حلال ولا حرام بصراحة عشان الحج ركن من أركان الإسلام وكدا .. بس ربنا رحيم .. وممكن ساعتها أبقى أسأل فيها شيخ .. بس كدا

-تمام ..ينفع أسألك سؤال بس هتحلف بالله العظيم إنك هتقول الصدق ؟

-هو إنتي المفروض عرفتي إني إتعاهدت مع ربنا إني هقولك الصدق بس برضه إنتي مش عارفه اللي قدامك وضمناه
فقولي وأنا أقسم بالله هقول الصدق

-هو إنت صدقاً بتصلي كل الصلوات في المسجد وعلطول .. يعني مش يوم آه ويوم لأ .. فرض آه وفرض لأ
؟..أنا عارفة إنك قولتلي إنك بتصلي في المسجد بس إنت قولتها .. أنا مش عارفة اللي قدامي واللي قدامي غريب
عني .. صح ؟

أخذ نفساً ثم قال : صح .. أقسم بالله أنا بصلي في المسجد الحمد لله كل الفروض وكل يوم .. إما في أقرب
مسجد للبيت أو في المسجد اللي جنب المستشفى باخذ إذن وأروح وهما هناك حفظوني اصلاً .. بس برضه عشان
انا حلفت بالله فلازم تكوني عارفة إن الحاجة الوحيدة اللي بتأخرنني عن الصلاة في المسجد إن يكون في أيدي حالة
طارئة ووقت الصلاة دخل ولو سبتها هتموت ودا روح إنسان في أيدي.. والحالات دي نادراً ما بتحصل يعني تقريباً
حصلت من يوم ما اشتغلت تلت مرات إن وقت الصلاة يجي وأنا في أوضة العمليات .. بس عشان أبقى متأكد
دورت على النت وعرفت ان الصلاة في المسجد مختلف عليها هي فرض ولا سنة مؤكدة ..بس حتى لو سنة فهي
ثوابها كبير ان شاء الله ولو صلاة الامام اتقبلت فصلاتنا كلنا هتتقبل ان شاء الله وكمان بتجدد مشاعري فانا بحافظ
عليها بس ساعات الموضوع بيخرج عن إيدنا وربنا يغفرلي بإذنه

تبسمت بخجل وقالت : تمام

-عايزة تسألني في حاجة تانية ؟

هزت رأسها نافية فقال :أنا كدا تقريباً سألتك في معظم الحاجات اللي أنا عايزها .. وإنتي كمان .. وخذنا خلفية عن
شخصيات بعض وكدا والصفات .. فأنا مش شايف إن ليها لازمة نعمل رؤية شرعية مرة تالته .. فكري بقي وبلغني
عمي رأيك .. وربنا يقدم اللي فيه الخير .. بعد اذنك

قامت على استحياء وقالت : ثواني هجبلك موبايلك والكتاب

-تصدقني كنت هنسي

دلفت غرفتها وأحضرت له هاتفه الذي كان يستقبل البرامج من حاسبها وكتابي " استمتع بحياتك .. " لاتحزن "

أعطته إياهم وصافح والدها وغادر على الفور وهو يدعو الله أن ييسر لهما الخير حيثما كان

وحين خرج التفت لها والدها وهي مبتسمة وقال : ها يا منار ؟

قالت بخجل وهي تبتسم : مش عارفة يا بابا .. فرحانة أووي إنه إتغير وبقى كدا وحساه ماشاء الله كويس ودماغه

راكبة على دماغي بس لازم أعمل إستخارة الأول .. وبصراحة لما قالي مش لازم رؤية تالته إتكسفت منه .. يعني

ممكن يجيي في دماغي حاجة أحب أسأله عليها يعني

-لو عملنا خطوبة ممكن يبقى يجيلك هنا مرة في الاسبوع أو كل اسبوعين مثلاً وتتكلّموا في وجودي في اللي إنتوا

عاورينه .. ولو حبيته تخرجوا كمان بس أنا هبقى معاكم

-مش عارفة ليه مش حابة موضوع الخروجات دي .. يعني تكلفة وخلّاص وبعدين هبقى مكسوفين من بعض

فملهاش لازمة دلوقتي .. وبعدين أنا عايزة منتقابلش إلا في الضرورة عشان غض البصر وكدا

-تمام .. دا الصح أصلاً يابنتي .. ربنا يتملكم بخير لو في خير .. إستخارة بقي علطول يا منار مش هوصيكي

قالت بسعادة : حاضر يا بابا .. دعواتك إنت بس

قامت من فراشها الذي لازمته من أعيائها البكاء بخطوات متثاقلة .. وتوضأت وأدت صلاة الفجر .. وبكت بمرارة

وقهر ! .. هي لاتعلم لم تبكي هكذا !! .. فهو لم يبتزها بعد بالصور ! .. أو يحاول مضايقتها حتى كما كان يفعل !

.. لكنها فحسب خائفة منه ! .. أخذت تدعو الله أن ينتقم منه وأن يريه في الدنيا خزي وفي الآخرة عذاب السعير

!! .. هي لم تدعو قط على أحد ! .. ولكن قلبها يعتصر حزناً وقهراً !! .. تتخيل أخاها حين يرى صورها مع رامي !

.. وحسرة والدتها حين ترى ابنتها الصغيرة بصور مخلة ! .. هي تعلم انه لم يصورها لكي يشاهد صورها فحسب !
.. هي تعلم ذلك الصنف من البشر ! .. أخذت تدعو عليه في الدنيا والآخرة وهي تبكي بحرقه ..

وحين فرغت من صلاتها فتحت النافذة واستنشقت بعض نسمات الفجر العليل وجدت نفسها بتلقائية تردد " ليه
بندعي على الظالم ربنا ينتقم منه ؟ .. ليه مبندعيش ربنا يهديه "

" ليه بندعي على الظالم ربنا ينتقم منه ؟ .. ليه مبندعيش ربنا يهديه "

" ليه بندعي على الظالم ربنا ينتقم منه ؟ .. ليه مبندعيش ربنا يهديه "

" ليه بندعي على الظالم ربنا ينتقم منه ؟ .. ليه مبندعيش ربنا يهديه "

رفعت يدها الى السماء وقالت بصوت ينبع من صميم أعماقها ودموعها تنهمر على خديها : إنك تهدي من تشاء
ياالله .. اللهم إهدي عبدك الظالم رامى .. وردة إليك رداً جميلاً .. يارررب إنك القادر على كل شئ

خرج حازم ونور من المسجد فقال حازم مداعباً نور الذى يكسو وجهه إرهاب التفكير بأمر حبيبة : أيوا بقى ياعم
بقيت عررريس بقى وهنروح نأجرلك بدلة من المكوجى

ابتسم نور وقال : إدعي بس توافق وربنا يقدم اللي فيه الخير

قال بتفاؤل : هتوافق ياذن الله .. ماتيجي نطلع على البحر شوية أنا بعشقه فى أيام المطرة الجامدة دي

-لأ بلاش حبيبة هتقلق

-ماتكلمها يانور

-ماهو الموبيل فى البيت

-يابنى اسمه "محمول" عشان يتحمل مش عشان يتساب فى البيت .. خد كلمها على البيت من عندى وخلاص .. ولا مش حافظ رقم بيتكوا كمان ؟

-دا انت لما بتعوز حاجة بتبقى فظييع يا حازم .. احضر يابنى الهاتف النقال لتصل بها

ضحك حازم واتصل نور بأخته وأخبرها أنه سيتأخر .. وانطلق مع حازم الى الكورنيش وجلسا أمام الأمواج المتلاطمة يتأملنها قليلاً .. كان نور يفكر فى أمر حبيبة الذى أرهقه .. لايدرى سوى أن الله سيحدث بعد ذلك أمراً ..

ظل حازم يراقب صديقه الشارد طويلاً فى صمت ولكنه فى النهاية قطع صمته قائلاً : مالك يانور ؟

تنهد نور بقوة وقال : إدعيلي يا حازم

-والله بدعيلك ديما يانور .. ونفسي فى يوم تفضفض معايا .. أنا علطول داوشك بمشاكلتي وإنت عمرك ما قولتلى إيه اللي مضايقتك !.. معلىش يا صاحبي خليها عليك المرادى وقولى

أخذ نور نفساً طويلاً وقال : أول مرة أحس إنى مش هقدر أعمل حاجة لحبيبة !! .. خالو عايز يجوزها لواحد قربينا من بعيد وحبيبة رفضاه تماماً .. قولنا هنتحجج بأنها لسة بتدرس بس هو قال إنه هيستناها لما تخلص

ازادات ضربات قلب حازم حين أحس أن حبيبة قد تنزوج بغيره وقال بتوتر : طب وهى ..؟؟ .. أقصد يعنى رفضاه ليه ؟

قال بحزن : هو مش زي ماهى عايزة .. هو بيشتغل براا ومعا فلوس ومستريح بس هي عايزة حاجة تانية خالص .. عايزة حد ياخذ بإيدها للجنة .. بس المشكلة إن خالو مصمم عليه أوى !.. انا هكلمه بكرا بس أنا عارف رده .. يقولى دى بنت أختي وإنت هتعمل راجل عليا يانور وكلام كدا أنا سمعته فى حياتي كتبيبيير أوى .. يارب إفرجها من عندك

وجم حازم بعد سماع كلمات نور وظل صامتاً يفكر ولكن قطع تفكيره صوت نور : آسف يا صاحبي نكدتك وإنت كنت طالع على البحر تنبسط !

اتسعت عينا حازم وقال كأنه قد وجد الحل وقال بحماس : أنا لقيت الحل ! .. إنت هتقوله لا يخطب أحدكم على خطبة اخيه !.. الرسول عليه الصلاة والسلام قال كذا

نظر له بغير فهم فابتلع ريقه باحراج وقال : إنت هتقوله إني طلبت حبيبة منك قبل العريس دا وإنت مقولتلهاش وقولت هتقولها فى الاجازة !

قال نور بحدة : انا أكيد عايز أحل المشكلة بس مش لدرجة إني أكذب يا حازم !

قال حازم بسرعة : وتكذب ليه منا بطلبها منك قبله أهو

رفع نور حاجبه فطأطأ حازم رأسه فى خجل وقال : والله أنا كنت طالع معاك على البحر عشان أفتحك فى الموضوع دا .. وإنت عارف إني مبكذبش وكمان حلفت !

قال نور بغير تصديق : حبيبة !!؟ .. عايز تتجوز حبيبة أختي ؟

زاد احراج حازم وقال : دا لو هي وافقت يعنى ..

تنهد نور تنهيدة أخرجت كل ما بداخله وقال بامتنان : يالله ! ..

نظر لحازم وقال وقد اتسعت ابتسامته : انت بتتكلم جد؟؟

دفعه حازم فى صدره بقوة وقال بمرح : ايوا بتكلم جد !! .. هو أنا ههزر معاك ليه يعنى .. صاحبي مثلا؟؟

قال وهو يضحك : مثلا !

فتح حازم عينيه ببراعة طفولية مصطنعة ونظر لنور وقال : موافق بقى يا أبيه ؟

كاد نور يسقط من شدة الضحك وقال وهو يترجى حازم : أبوس إيدك كفاية مش متسحمل !! .. حازم طفل !! ..
يانهار ألوان !! ..

أكمل حازم الدور قائلا : يحنى موافق يا أبيه أتدوز أخت ثيادتك المثونة

-مثونة !! .. مثونة دى كان نفسها تبقي مسورة بس مجابتش مجموع .. هاهah

-دا انت دمك ثقيل سم ! .. يابنى إنت مبتعرفش تألش ..سيب الألش لصحابه

ثم أخذوا يضحكان سوياً لبرهة ثم قال حازم بجدية : ها بقى يانور قوالت إيه؟؟

-والله يا حازم أنا نفسي بس ..

قاطعها حازم فى غرور مصطنع : يابنى إنت هتلاقي زبي فين أصلاً .. أنا فريد من نوعى أصلاً .. آخر حنة فى المجموعة

-طب ياعم فريد .. لازم أسأل حبيبة برضه ولا إيه رأيك؟؟

-طبعا طبعا

-أنا عندي طلب يا حازم؟

-اتفضل ..

-ينفع نأجلها شوية لحد منا بس أشوف هستقر فى موضوعي على إيه ؟ .. يعنى لما الحاج محمود يرد عليا وأعرف راسي من رجليا تبقي إنت تيجي تتقدم .. وكدا كدا أختي مش هتتجوز قبل ماتخلص فإنك كدا كدا هتستنى .. فدا طلب بس عشان أنا متلخمش فى كذا موضوع .. ينفع؟

قال بسعادة : طبعا ينفع .. وربنا يتمملك بخير وأفرح بيك

-اللهم آمين يا حازم

-لأ أنا كنت بدعيلي مش بدعيلك

-روحي احازم على بيتكوا الله يكرمك !!

-ماما .. ياما امتى

-ياسلام على الناس اللي صاحية رايقة على الصبح .. ربنا يروق بالك كدا ديماً يابنتى يا حبيبتى

-وربنا يخليكى ليا يا أحلى أم فى الدنيا .. أنا هبقى أروح بعد المدرسة أحضر مقراًة ودرس مع صاحبتى هدير ..

عشان لما ترجعى ومتلاقينيش متقلقيش عليا

وهتخلصى على امته ياتقى؟؟

-معرفش هو هيبدا 5 .. أقل واجب المقراًة هتاخذ ساعه .. ممكن آجى على سبعة تمانية كدا ..

-كتير أووى كدا ياتقى فى الجو دا !

-معلش بقى ياما بس أنا نفسى أغير الموود الكتيب بتاعى دا وحاسة إنى نفسى أحضر حاجة نتكلم فيها عن ربنا

.. أنا هاجى أجهز الغدا يا جميل واتغدى وانزل .. تمام؟؟

-ماشي ياستى .. بس المكان فىن ؟

-ناحية بيت هدير

-طيب ياتقى بس آخرك تمانية .. ماشى؟؟ .. احنا فى الشتا والدنيا بتليل بدرى وحتى تمانيه دى متأخر بس عشان

انتى شبطانة بس ..

-موشي يامانتى ربنا يخليكى ليا

وقبلت يدها وذهبت لتستعد للذهاب لمدرستها ..

وبعد اليوم الدراسي

وبعد المغرب .. كان رامى جالساً بسيارته راکناً إياها بأحد الشوارع القريبة من بيته .. وكان يدخن سيجارته وهو يتفرس وجهها الظاهر على شاشة هاتفه .. أخذ ينفس دخانه فى وجهها .. فتح "تابلو" سيارته ونظر الى الشريطين وأخذ يتذكر كلمات صديقه وما فعله بصاحبه ولم تتذكر هى أى شئ وأخذ يفكر كيف يوصل ذلك العقار الى معدتها .. أعادها مكانهما .. ورفع نظره الى الشارع ثم اتسعت عينيه فجأة !!

-بجد ياهدير انبسطت أوى واحتمال اجى كل اسبوووع .. وصحابك دوووول عساسيل بجد بجد بجد

-تنورى ياتقى وانا انبسطت أكثر بوجودك وانك اتعرفتى على منار وحببية دول إخوانى أصلا .. أنتوا الثلاثة كل حياتى ربنا يباركلى فيكم ..

-هسيح بقى .. ماشي ياقرم بيتك جه أهو عايزة منى حاجة ؟؟

-عايزاكى بخير ديما ياتقى .. بقولك إيه ؟ شكلها هتكمل مطرة من الصبح وهى بتمطر أنا خايفة لتغرقى .. ماتطلعى أجيلك شمسية ولا حاجه ؟

-اسمها مظلة يا استاذة اللغة العربية .. أنا ياستي هروح علطول ياذن الله ومش هتمطر .. سلام بقى إما ألحق أجرى

سلمت عليها وتحركت من مكانها مغادرة غير مدركة بأن عيناً ما على بعد خطوات تراقب خطواتها ..

خرجت من شارع منزل هدير وازدادت الرياح وبدأ المطر يهطل بغزارة !! .. بدأ جسدها يرتجف من البرد وتلفتت حولها فلم تجد أى مكان يقيها من المطر أو أى محل مفتوح .. يبدو أن الجميع قد أغلقوا مبكراً من أجل "النوة" .. "أمطار غزيرة تستمر لعدة أيام" .. أسرع خطاها وسلكت أحد الشوارع الضيقة لأنها تعلم أنه أقصر .. ربما هو أخطر ولكنه أقصر ! .. قلت الأمطار قليلاً فحمدت ربها لأنها إن لم تصل لبيتها بسرعة ستموت برداً بسبب غزارة المطر !! .. أخذت تقطع الطريق بسرعة كى تخرج على الشارع الرئيسي الذى به ستشعر قليلاً بالأمان ! .. ولكنها فجأة شعرت بيد تجذبها بعنف للخلف وأسقطتها على الأرض !!!!

سمعت صوتاً خشناً يقول : على فين ياحلوة المطرة تأذيكي !

نهضت بسرعة وحاولت أن تركض ولكن رجلاً آخرأً ضخماً قد أمسكها من الخلف .. أخذت تدفعه عنها لكن بدون جدوى .. صرخت بهما : إنتوا عايزين منى إيه سيبوني !!

إنخفض الرجل الأول وٱلتقطت حقيبتها من على الأرض وفتحها قائلاً : هنشوف بس معاكي بطاقة ولا لأ !

ضحك الذى يمسكها ضحكة أرسلت فى قلبها الرعب .. ارتجفت أوصالها وقالت بتوسل : خد الشنطة كلها مش عيذاها بس سيبنى أمشي !!

ترك الرجل فجأة حقيقة تسقط على الأرض واقترب منها وأخذ ينظر إلى جسدها الواضح بسبب ثيابها المبللة .. وقال بصوت أجش : يخربيت كدا ! .. إيه الجمال دا كله !!

ثم بدأ يتحرش بيها فضربته بقدمها فى معدته فى حركة مباغته .. اختل توازن الضخم الذى يمسكها فأفلتت منه وبدأت تركض لكنه جذبها بعنف كاد يمزق ذراعها !! .. وضربها بالحائط فسقطت على الأرض .. إقترب منها الذى ضربته بمعدته وأخذ يضربها فى أنحاء جسدها وصفعها على وجهها صائحاً يصوت يوحى بأنه سكير أو ماشابه : أنا تضربيني يابت ****

ثم قال : طب ورحمة أمى لأعرفك مقامك .. وهخليكي تبوسي رجلي عشان أرحمك !!

ضحك الرجل الضخم واقترب منها وحمل اياها على كتفه وهى خائرة القوى تماماً ! .. سمعا صوتاً قادما من بعد عدة خطوات قائلاً : عايزين مساعدة ياكباتن ؟؟

تركها الرجل تهوى الى الأرض لما سمع ذلك الصوت !! .. وبآخر قوة تملكها رفعت طرفها إلى مصدر الصوت .. وكان آخر أمل تملكه ! .. وحين رأت رامى أدمعت عينها وقالت بصوت هش : ساعدنى يارامى !

ثم غابت تماماً عن الوعى .. نظر الرجلين لرامى وصاح أحدهما فيه بصوت قلق : إنت مين يااض؟؟

تظاهر رامى أنه يتحدث فى الهاتف وقال بلهجة جادة تماماً : أيوا ياباشا ! .. بلغ سيادة اللوا اننا لقينا بنته ! .. لأ مش محتاج قوة دول اتنين ولاد ***** .. العساكر هياخدوهم دلوقتى

ثم أغلق الهاتف ونظر لهم نظرة حادة وقال : يا ولاد ***** .. دا إنتوا هتروحوا ورا الشمس
ارتبك الرجلان ونظرا لبعضهما في خوف وفي أقل من الثانية كانا قد اختفيا من أمام رامي !!
ابتسم في مكر معجباً بنفسه ونظر لتقى ببسمة خبيثة وقال : وانتى هتيجى معايا فوق القمر !
ثم حملها الى سيارته التى كانت تقف عند نهاية الشارع وأخذ حقيبتها معه ..

وضعها فى السيارة وجلس على مقعد القيادة وانطلق بسيارته قاصداً أحد المناطق النائية .. وما أكثرها حينما يشتد
المطر !! .. أوقف السيارة ونظر لها يتفرسها في شهوة .. فمنذ مدة قصيرة كان يتفرس صورتها ويبحث عن طريقة
لتبتلع بها الطعام ! أما الآن فهى مجهزة وفى سيارته ورهن إصبعه !

ظل ينظر إلى وجهها وهو يفكر فيما سيفعله بها .. وفى حركة حقيرة مد يده ورفع حجابها الذى يغطى الصدر
والكتفين وأخذ ينظر إليها مجدداً .. فتح "تابلوا" السيارة وأخرج منها الشريط ذو العقار الأحمر وقال بلهجة انتصار
قدر : طالما كدا كدا هعملها .. فليه منبسطتش شوية !! ..

ثم أخرج حباية وأخذها فى يده وأقربها من فمها وهو يقول : خد ياختى بألف هنا وشفا !!

وفي بيت تقى

كانت والدتها وأخاها يجلسان فى توتر بالغ فقد تأخرت جدا!! والحالة الجوية سيئة جدا جدا !! .. زفرت الأم
وقالت بحزن : أختك إتأخرت أوى يا محمد !! أنا هموت من القلق وكمان مش بترد !!
تنهد فى حزن وقال : ربنا يطمنا عليها إن شاء الله ..

قالت الأم وهي تكاد تبكي : الساعة بقت 10 يا محمد !!! .. وهي قالتلى آخرها 8 !

هب محمد من جلسته وإتجه نحو غرفته وإرتدى معطفه .. فقالت الأم بإشفاق: على فين يابنى؟؟

قال بحزم : مش هفضل قاعد وإيدي على خدي كدا !! .. هلف فى الشوارع عليها !! .. وبعون الله هلاقيها !

مسحت الأم دموعها التى إنهمرت وقالت : بالله يابنى ماتسيبني لوحدي فى الظروف دي !! .. كلم أبوك فى الشغل خليه يتصرف !

-وبابا هيعمل إيه بس !! .. هنقلقه على الفاضي وهو مش هيقدر يعمل حاجه .. أنا هنزل أدو..

قطع كلامه صوت رنين هاتفه فقفز من مكانه مهرولاً نحوه ورد بلفهة حين رأى اسم تقى : أيوا ياتقى انتى فين؟؟

أحس بيد باردة تعتصر قلبه حين سمع صوت رجل يحدثه فى الهاتف .. ورد بتوتر : أيوا أنا أخوها هى فين؟؟

اتسعت عيناها وقال بصدمة : مستشفى إيه!؟؟

ثم قال بسرعه : مسافة السكة وهبقى عندك

ثم أغلق الخط فصاحت والدته : بنتي مالها !!!

حاول أن يسيطر على أعصابه وقال بثبات : واحد قالي إنهم نقلوها المستشفى .. أنا هروحلها حالاً

صاحت : أنا جاية معاك استناني هلبس فى ثانيه !

حاول أن يدفعها عن رأيها ولكنها صرخت فى وجهه : أنا رايحة لبتى !! فاهم يا محمد !!

-إزيك ياهدى عاملة إيه؟؟

أرسلت لها على الفيس بوك : تمام يا حبيبة

-إيه اللي مسهرك يا جميل؟؟

تبسمت هدى بألم وقالت فى نفسها : بتفرج على رسائلي مع يوسف .. وحشنى أوى !! .. رغم إني وعدت ربنا هبعده عنه

ثم كتبت لها بفتور : عادى يعنى يا حبيبة

-امممم طب حفظتى ولا هشعلقك بكرا؟؟

ضحكت هدى رغماً عنها وكتبت : لأ حفظت يا ميس

-وأخبار المذاكرة؟؟

-كل المواد تمام ماعدا الكميا دي مادة متخلفة أصلاً !

-طب ماتخلي حازم يشرحها لك ؟ ..

كتبت : ماهو بيبقى الصبح فى الكلية بيحي يريح شويه ويلحق يذاكر قبل ما ينزل الشغل الساعة 9 .. مبرضاش أشغله يعنى بيا كمان ربنا يعينه أصلاً ..

-وبعينك إنتى كمان .. أنا ممكن أشرحها لك ؟

-بلاش أتعبك معايا

-بس يا عبيطة إنتى أختى أصلاً ! .. وبعدين الترم بيشطب خلاص لازم نلحق نلم المنهج بقى

-ماشى .. والله هى المشكلة عندي فى آخر باب بس بقيت المنهج تمام

-خلاص قشطة إنتى هتيجي معايا بكراا بعد الدار البيت وأشرحلك هناك

-طب ماتيجي إنتى معايا ؟

ثم كتبت بسرعة : لأ لأ لأ بلاش حازم هيكون هنا .. هقول لماما وآجيلك بعد الدار

-أو قبله زي ماتحبي أنا بكرة قاعدة فى البيت

-خلاص قبله أفضل عشان مرووحش متأخر ف الجو دا .. هجيلك بعد الظهر كدا تمام؟؟

-لأ هتيجي وقت الظهر عشان نصليه سوا .. هستغلك بقى موشي؟؟

-ماشي

-أنا هقوم أناام بقى .. تصبحي على جنة ياهدى

-وانت من أهلها

أرسلتها بدون تفكير ثم عادت تقرأ ما دار بينها وبين يوسف حتى وصلت إلى حديثهما عن التغيير .. ثم نظرت إلى رسالة حبيبة "تصباحي على جنة" .. وأخذت ترددها فى ذهنها قليلاً .. ثم فتحت المحادثة بينها وبين يوسف فى حزم وضغطت على زر حذف بدون تفكير أو مراجعة فى القرار !! .. ثم قالت بحزم : أنا إخترت الجنة !

وفى غرفة حبيبة دلف نور بعد أن طرق الباب وقال : لسه صاحية ليه ياعسل؟؟

-كنت بكلم هدى ..

جلس الى جوارها وقال : ياريت يا حبيبة تقريي منها وتصاحبها وحاولي تسحبها بجدة ناحيتك ..وتحبيبها فى الدين وكدا يعنى

تنهد وقد أدركت المسؤولية الملقاه على عاتقها وقالت : ربنا يقدرنى يانور

ثم انتبعت فجأة وقالت : آه صحبيييح مقولتليش عملت إيه مع خالو؟؟

ابتسم وقال : خلصت الموضوع متخافيش

قالت بغير تصديق : بجدة؟؟ ..يعنى مش هتجوزه!!!!!!

-يابنتى إنتى مينفعش نجبرك على حاجة زي دى !.. جوزك دا لازم يكون إختيارك وموافقتك .. ولو إنى محبش
نحكم على حد مقعدناش معاه قبل كدا بس طالما أصلا كنتى هتروحي معاه السعودية فأنا أرفض تماما

-يعنى إنت قولت لخالو إنه مينفعش عشان مسافرش وكدا؟؟

-آه .. وقولتله سبب كمان هبقى أعرفك بيه بعدين

قالت بفضووول : سبب إيه هاا هااا؟؟؟؟

دفعها بخفة وقال بمرح : قولنا بعديين ياماما .. سيبينى بقى أروح أنام عشان معنديش حاجة بكرأ

ثم خرج وتركها وهى تضحك وتقول فى نفسها : يا حبيبي يانور .. ياترى هعيش إزاي لوحدى لما تتجوز هدير ان شاء
الله !

وصل محمد برفقة والدته الى المشفى وعلم من الاستقبال الغرفة التى فيها تقى وهوول برفقة والدته اليها ووجدا شاباً
واقفاً أمامها يتحدث مع شابة يبدو من معطفها أنها الطيبة .. قطعاً حديثهما حين رأهما وقالت الشابة : حضراتكم
تبع الانسه تقى ؟

قالت الأم وهى تلتقط أنفاسها بصعوبة : أبوا يابنتى الله يكرمك طمنيى بنتي مالها ؟؟؟

قالت الشابة بحنان : متخافيش يا أمي هي تمام وبخير .. مفيهاش أى حاجة.. اقعدى بس كدا خدي نفسك

قالت الأم : يعنى هي بجد كويسة ؟؟

أخذت الشابة بيدها وأجلستها على أحد المقاعد المجاورة لهم وهى تقول : والله يا أمي هي بخير

قالت وهى تكاد تبكى بحسرة : أمال إيه اللي جابها هنا ؟؟

نظرت الشابة للشاب الذى كان واقفاً برفقتها فتكلم بدوره : أنا شغال مع الاستاذة تقى فى نفس المدرسة فأعرفها
يعنى .. كنت ماشي بعريتي وقت المطرة الجامدة أوى فركنت عشان مسوقش فى المطرة فلقيت اتنين مشبتين الانسة
تقى فى شارع ضيق ويحاولوا يضايقوها .. وطبعاً الدنيا فاضية عشان السيول دى ! فنزلت جري وجريت ناحيتهم بس
لما قربت قوتل إنهم هيقطعونى وأنا مش هعرف أساعدها لأن الكثرة تغلب الشجاعه ! .. فعملت فيلم كدا إنى
ظابط وانها بنت لوا بندور عليها من بدري وعشان هما مساطيل دخل عليهم فجربوا الحمد لله ! بس هى كان أغمى
عليها فنقلتها هنا .. ونسيت أصلاً من الخضة إن أهلها ممكن يقلقوا عليها أو حاجة لحد ما غيداء فكرتني بالصدفة
فطلعت موبيلها من عربيتي وكلمت الرقم اللى كلمها حاجة وخمسين مرة !! .. أنا آسف والله إنى خضيتكم بس
والله الخضة نستنى أصلاً إنى أكلم حد من أهلها !

تنهدت الأم التى بدأت تبكى وأخذت تردد بانفعال: ربنا يكرمك يابنى ويستر عرض إخواتك .. ربنا يبارك فيك ويكثر
من أمثالك ياارررب .. ربنا يباركلك فى عمرك وفى صحتك وفى شبابك ويستخدمك ديما ياارررب

أخذت ترددها ورامي لا يصدق أن تلك الدعوات توجه له !! .. طأطأ رأسه فى خجل من فعلته ومن نيته ومن جزاء
الله وكرمه فى النهاية !

تذكر للحظة ماحدث وتذكر لو كان اتبع هواه فى تلك اللحظة وأخذ منها مراده وأرضى شهوته للحظات معدودة ..
بالتأكيد كان سيسعد ! .. ولكنه ما كان سيشعر أبداً بتلك الراحة التى تساوره الآن !! .. لقد شعر ولأول مرة بحياته
أنه ذا قيمة !!

تنهد بعمق وتذكر ماحدث ..

ظل ينظر إلى وجهها وهو يفكر فيم سيفعله بها .. وفى حركة حقيرة مد يده ورفع حجابها الذى يغطى الصدر
والكتفين وأخذ ينظر إليها مجدداً .. فتح "تابلوا" السيارة وأخرج منها الشريط ذو العقار الأحمر وقال بلهجة انتصار
: طالما كدا كدا هعملها .. فليه منبسطتش شوية !! ..

ثم أخرج حباية وأخذها فى يده وأقربها من فمها وهو يقول : خد ياختى بألف هنا وشفا !!

وضعها على شفتاها وفجأة أحس بها ترمش فارتعد وعاد للخلف بغتة فسقطت الحباية من يده ! .. وظل يحدق بها للحظات خوفاً من أن تفيق !! .. لا يعلم لمَ ولكن الله ألقى فى قلبه الرعب من أن تراه !! .. فكر للحظة أن يتركها وتذكرها حين قالت له بآخر قوة تملكها : ساعدني يارامى !! ثم خارت بعدها فاقدة الوعي !! .. لقد استنجدت به فكيف ألا ينجدها وهي مستضعفة !! .. كيف يؤذيها !! .. هو ليس بتلك الحقايرة وذلك الشر ! .. هو لم يأذي فتاة فى حياته أو يقم معها علاقة برغبتها فكيف يتجرأ هكذا ويغتصب فتاة ضعيفة لم ير منها أى سوء !!

أخذت تلك الفكر تتزاحم فى رأسه وفكرة تركها وشأنها تكبر أكثر وأكثر فى رأسه .. ولكن شيطانه ونفسه الأمارة بالسوء أقوى من أن ينهزما من أول جولة ويتركا المعركة ! ..

بدأ رامى يطرد فكرة رحمتها من رأسه وفى لحظة أعاد ظهر كرسيها الى الخلف وقد عقد النية على عدم تركها وشأنها !! .. بدأ يتهياً للانقضاض وهو يحاول طرد صدى صوتها من رأسه وهو تقول بوهن : ساعدنى يارامى !!

ساعدنى يارامى !!

ساعدنى يارامى !!

ساعدنى يارامى !!

صرخ بصوت عالٍ ليسكت هذا الصوت ولكن دون جدوى !! .. فقرر أن ينجز مانوى فعله كى يسكته بطريقته فما عاد للرجوع من سبيل فالآن قد تقرر كل شئ !! .. اقترب منها وفجأة علا صوت فى السيارة جعل قلب ينتفض !!

"إذا ما قال لي ربي أما إستحييت تعصيني .. وتخفي الذنب عن خلقي وبالعصيان تأتيني ! ..

فكيف أجيب يا ويحي ومن ذا سوف يحميني !..أسلي النفس بالآمال من حين إلى حين !"

ارتضى رامى بفرع على مقعده على إثر صوت رنين هاتف تقى !! .. وأحس أن الكلمات تخترق قلبه !! .. ونظر حوله بخوف حين سمع "إذا ما قال لي ربي أما إستحييت تعصيني .. وتخفي الذنب عن خلقي وبالعصيان تأتيني ! .." .. فالله معه ويراها الآن !! .. نظر لنفسه فاحتقرها بشدة فعاد لموضعه .. وبدأ يمسح دموعه وهو يرتجف من الصوت ..

لا عجب ! فالله قادر على كل شئ ! .. فمننا من هداه الله بآية اخترقت قلبه ! .. أو أغنية حركت مشاعره الى الله ..! أو كلمة من صديق ! .. أو كلمة قرأها ! .. أو أى شئ مما حوله .. أراد الله أن يجعله سبباً في هدايته ! .. والله على كل شئ قدير !

أعاد رامى كرسيها كما كان وأنزل حجابها كما كان أيضاً ونظر لوجهها وبدأ يبكي في حرقه !! .. فربما هو لم يقربها ! .. ولكنه قد خسر كل شئ .. فهي حتماً ستفقد وتعلم ما عزم على فعله بها !!

نظر الى الجانب الاخر وبدأ يمسح دموعه وهو يردد : إن شاء الله هلاقي الطريق .. إن شاء الله هلاقي الحل .. يارررب إبعدين عن الحرام دا مش عايز أعلمه ياررررررب !!

ظل يدعو الله وهو يبكي لعدة لدقائق ثم اتسعت عيناها كأن الله قد ألهمه الحل .. وقال لنفسه : أهم حاجة أبعدها عني دلوقتي عشان مفكرش حتى إني أرجع في كلامي !

وجد نفسه يدير سيارته ويتحرك بها وهو لا يدرى إلى أين !! .. وبعد أن سار مدة من الزمن سمع صوتها وهي تتأوه من الألم نظر لها برعب وهي تتألم وتخرج الصوت من بين شفتيها بمعجزة دون أن تقدر حتى على فتح عينيها :
أءءء..نا ف ففين؟؟

حاول أن يتظاهر بالثبات وقال : متخافيش ياتقى إنتي فى أمان معايا ! ..

قالت وهي لاتستطيع أن تفتح عينيها بصوت متقطع : مي .. ميبين؟

قال بتوتر : أنا رامى ياتقى !

بدأت تبكي لا اردائياً وهي تردد برعب بأنفاس متقطعة : لا رامى لأ ! .. رامى.. رامى صورنى ياهد..هدير !! .. حسبي الله ونعم الوكيل ! متخافيش ..متخ..خافيش ياياسمين ..الانسان مهما يظلم فليبه رب هي..ححاسبه ! ..

اتسعت عيني رامى وهو يستمع الى هذي تقى التى لا تشعر بنفسها وهي تبكي وتهذي ! .. وصاح فى نفسه : هي عارفه انى صورتها !! .. دي زمانها بتكرهنى !! وأكد لما تفوق مش هتصدق لو قولتلها إني ساعدتها لأنها سمعتنى بقولهم عايزين مساعده ياكباتن !! .. مش جايز كانت فايقة أصلا من ساعة ماركبت العربية وحست بكل اللي حصل

وضعت يدها على فمه فعاد يبكي مجدداً ! فقالت بجديّة : رامى إنت أخويا !! .. أنا بحبك وعمرى ماكرهتك حتى لو إنت بتكرهنى !! .. وعمرى فى يوم ما هقصر عن مساعدتك لأنك أخويا الصغير ! .. حته منى !

مدت يدها وبدأت تمسح دموعه وقالت بجديّة : متعيطيش يارامى ينفع؟؟

قال بحرقة : أنا حقير أووى ياغيداء !! .. أنا مستاهلش أى حاجة ! ..

مسحت على رأسه بحنان وقالت : بس أنا بحبك ! .. وطالما إنت شوفت أخيراً نفسك غلط يبقى إنت لسه فىك خير ! .. صدقنى

حاول أن يتسم ليخفي روحه الممزقة فقالت : يلا روح إغسل وشك وروح ع البيت وأنا هروحلهم عشان كمان أشوف تقى هتفوق إمتة ! ..

ابتلع ريقه بصعوبة ثم قال : طب وإنتى هتروحي إمتة ؟ .. الساعه بقت 11 !

—أنا نبطشية إنهاردة يامعلم .. جاية على بيات يعنى

ضحك رامى رغماً عنه ثم قال : بس أنا مش عايز أمشي .. عايز أفضل لحد ما أطمئن عليها

نظرت له بحنان وقالت : ماشي يارامى .. بس روح إغسل وشك بقى وحصلني وربنا يسهل وتفوق انهاردة

وبعد عدة ساعات .. أفاقت تقى ونظرت حولها بوهن وفوجدت والدتها وأخيها ووالدها أيضاً بجوارها .. اقتربت منها

والدتها وقبلت رأسها قائلةً : الحمد لله ع سلامتكم يابنتى !

قالت تقى بوهن : أنا فين ؟

اقترب منها محمد وقال بمرح : حكاية طويولة ياتقى وأنا هتبرع وأحكيها لك لما تقومي كدا بالسلامة باذن الله

قال والدها بحنان : حاسة بوجع ولا حاجة يابنتي ؟

تبسمت وأحست بالأمان حين وقعت عينها عليه وقالت : لأ يا بابا الحمد لله

قال محمد : أنا هروح أنادى د/غيداء وأقولها إنها فاقت وأقول لرامي كمان لحسن الراجل طلع عينه معنا بصراحة !

قالت تقى بغير فهم : رامي؟؟..رامي مين؟؟

رد محمد : دا اللي نقلك المستشفى وقال انه زميلك فى المدرسة

دُهِشت تقى ولكنها أخفت دهشتها وقالت بوهن : أنا مش قادرة أشوف حد يامحمد ! .. يعنى متخليهوش يدخل

الأوضة ماشى؟؟

تبسم محمد وقال : ماشى .. أنا رايح بقى أنادى الدكتور وأقوله يروح

خرج محمد ولما رآه رامي خطى نحوه وسأله بلفهة : فاقت؟؟

قال محمد بسملة : الحمد لله آه !..والله أنا مش عارف أشكر حضرتك إزاي يا أ /رامي ..

-متقولش كدا يامحمد ! .. دا واجبي .. هو إنتم هتباتوا هنا؟؟

ضحك محمد بعفوية فقال رامي بسرعة : والله ما بتريق بس أقصد يعنى لو عايزين تروحوا فأنا أوصلكم وكدا عشان

احتمال متلاقوش مواصلات بليل كدا فى المطرة دى

قال محمد بحيرة : والله معرفش هى هتخرج امته اصلا .. أنا هروح أنادى د /غيداء وهى هتقولنا

-إستنى أكلمها بدل ماتطلع وتنزل وأقولها تيجيلنا ..

وبالفعل حادثها رامي وذهبت لحجرة تقى وكانت تود أن تستبقها يومين ولكن تقى فضّلت العودة الى بيتها وخاصة

إن الألم ليس شديداً لتلك الدرجة ولم تكن تعلم أن رامي هو من سيوصلهم .. فلم تمنع فى الخروج من المشفى

وبعد أن جهزتها والدتها ونهضت تتكأ عليها بينما ذهب والدها ومحمد للحسابات .. خرجت تقى برفقة والدتها من

حجرتها وخطى نحوهما رامي وقال : حمدا لله على سلامتكم يا استاذة تقى ..

ردت بكلمات باردة لاتحمل أي امتنان و دون أن ترفع طرفها اليه : الله يسلمك .. أنا متشكرة لحضرتك

قال بحزن : وأنا آسف لحضرتك جدا على اللى حصل وبعون الله تكون اخر الاحزان

ثم التفت لوالدتها وقال : أنا قولت لعمو ومحمد بعد ما يخلصوا ينزلولنا على تحت علطول ..

قالت تقى بتعجب : ينزلولنا؟؟

قال رامى باحراج : آه ماهو أنا .. أصل ..

قالت والدتها بامتنان : استاذ رامى عرض انه يوصلنا عشان مش هنلاقي مواصلات ولا تاكسي فى الجو دا

هزت تقى رأسها بوهن دون أن تنطق ونزلت مع والدتها وركبت بالمقعد الخلفي معها وانتظر رامى خارج السيارة حتى أتى والدها ومحمد وانطلقوا الى منزلها ..

وحين وصلوا سعدت هى ووالدتها وشكره والدها ومحمد بشدة وبامتنان على جميل صنعه وصعدوا لمنزلهم وغادر هو لبيته ..

ارتمت تقى على فراشها .. وراحت خلال دقائق فى نوم عميق من شدة التعب

عاد رامى الى مسكنه وهو يشعر بسعادة غامرة .. يشعر أنه كان بعالم اخر ! يشعر أنه لم يسعد من قبل مقارنة بسعادة الان !! دخل شقته فسمع صوت أمه صائحة : ما لسه بدري يامحترم !!

وفى لحظة تلاشت سعادته وأحس أنه عاد إلى حياته الكئيبة وأن تقى لم تكن سوى حلم سعيد عابر لن يتكرر !!

زفر بضيق وقال : معلش ياماما

صاحت : أصرفها منين دي ياخويا !!

قال بضيق : طب إنتى عايزة مني إيه يعنى دلوقتي؟؟

صاحت بنفاذ صبر : عيزاك تغووررر في داهية ومشوفش وشك تانى !! .. يقطع الخلفة واللى عايزين يخلفوا ولاد !!

قال بصوت أجش : هو كل يوم نفس الكلام !! .. إنتى مبتزهقيش؟؟

صاحت : ماهو إنت معندكش دم !! لو كان عندك كان الكلام أثر !!

تركها ودخل غرفته وأغلق الباب بقوة فى وجهها وارتمى على فراشه ووضع الوسادة فوق أذنيه كى لا يسمع صياحها ! ..وظل يفكر فى تقى حتى سمع آذان الفجر .. حدثته نفسه بأن يصليه فقام وتوضأ وفكر فى أدائه بالمسجد أيضا ! ولم لا ؟ .. ربما يرضى الله عنه ويقرب منه تقى .. نزل من بيته وتوجه نحو المسجد القريب ثم تركه فجأة وذهب لمسجد آخر .. فقد تذكر أن هذا المسجد يصلى به حازم ونور ! .. حازم الذى قاطعه منذ أعوام .. ونور الذى يراه رامى مصلح اجتماعى فاشل ! ..لذا فقد آثر الذهاب لمسجد آخر لا يجد به من يضيق به صدره

خرج من المسجد وهو يشعر بشئ مختلف .. يشعر أنه لم يصلى فى حياته من قبل !! .. ربما لأنه اليوم فقط إستشعر نعمة الله عليه حين أخرج تقى سالمة من تحت يديه وأخرجه فى صورة البطل أمامها هى و أهلها وهو أحقر من ذلك بكثير !! ..

فكر أن يفعل شيئاً مختلفاً .. لا يريد العودة للبيت حيث يضيق صدره بأمه وأخته !! .. لكن ماذا يفعل ! .. فكر للحظات ثم أخرج هاتفه واتصل بغيداء التى توترت حين رآته يتصل بها على غير العادة !! .. ردت بقلق : السلام عليكم ..

-وعليكو السلام .. إنتى لسه فى المستشفى؟؟

قالت بتعجب :أمال هروح فىن يعنى يا رامى

زفر بضيق وقال : طب ماتردى عدل !

تعجبت من لهجته لكنها قالت بإعتذار : مقصدش والله حاجة أنا بس استغربت من اتصالك .. آسفة يارامى !

تنهد وقال : ولا يهملك .. هتروحي إمتة؟؟

تبسمت وقالت : الساعة سبعة بعون الله ..

-طب ينفع أجي أوصلك ؟

تبسمت وقالت وكأنها لم تسمع سؤاله : ينفع تيجي توصلني يارامي ؟

ابتسم رغماً عنه وقال : ماشي ياستي حاضر .. متتأخريش بقى عن سابعة ! .. سلام يا doc !

-سلام يا مستر

أغلقت الخط ونظرت للهاتف بتعجب وقالت : ربنا يصلح حالك يارامي

وفي تمام السابعة صباحاً خرجت غيداء من المشفى ووجدت رامي يانتظارها لوحته له بيدها ببراءة واقتربت منه

وركبت سيارته وقالت بامتنان : ربنا يخليك ليا يا رامي

نظر لها بغير اهتمام وقال : هتعملي بيا إيه اصلاً؟؟

تعجبت وقالت له : هعمل بيك كتير ! .. ،، صمتت قليلاً ثم قالت : مالك؟؟

مسح وجهه بعصبية وقال بضيق : مخنووق ! .. وعلى آخري !

-لا حول ولا قوة الا بالله .. ربنا يفرج همك ويفك كربك ويسعدك إن شاء الله

صمتت قليلاً وكأنه لم يسمعها وهي لم تزد على ماقالته لأنها تعلم أنه حاد الطباع ومتقلب المزاج وقد يصيح بها إذا

سألته عما به ! ..

وبعد برهة صمتت قال : عارفة تقى ؟

-أكيد !

مسح على شعره بضيق وقال بسرعة كأنما قد رتب الكلام فى رأسه : ينفع أحكيك على شوية حاجات مضياقانى بس متطلعش برا ؟ .. أو مترجعيش تعايريني بيها أو تحسسيني إني زبالة ! .. أو متروحيش تقولي لماما ورايا عليها ؟

قالت بتعجب : هو أنا بكلم ماما ورايا أصلا؟؟

نظر لها بتعجب فقالت باحراج : أقصد مامتك ورايا

ابتسم بسخرية من حاله وقال : إنت المفروض تحمدي ربنا إن بابا طلق مامتك وإتجوز أمى وإنه هو اللى مرباكيش ! .. تحمدي ربنا إن طنط -الله يرحمها- هي اللى ربتك لوحدها ! .. كان زمانك زينا كدا

قالت بصوت خفوت : الحمد لله على كل شئى يارامى .. كل واحد يقدر يغير نفسه للأحسن .. ومش هتقول لربنا يوم القيامة أهلي هما السبب ! .. دى مش حجة ينفع تتقال لربنا !

زفر بضيق وقال بنفاذ صبر : إنتي هتديني محاضرة؟؟ .. أنا قولتلك عايز أقولك كلمتين مضايقيني هتسمعيهم وإنتي ساكتة ولا لأ؟؟

طأطأت رأسها بحزن وقالت : قول أنا بسمعك

ضرب المقود بيده بقوة وقال : أوووف بقى ! .. متزعليش بقى إنتي كمان أنا مكنش قصدي

حاولت أن تبتسم وقالت :أنا مزعلتش .. اتكلم.. أنا بسمعك

تنهد بقوة وقال بضيق : عارفة تقى ؟ .. آه أكيد عرفاها إيه السؤال الغبي بتاعي دا !! .. دي زميلتي فى المدرسة !.. بصي !! .. بصراحة أخوكي دا سافل وزبالة أصلا وأحقر خلق الله !! .. يعني أنا كنت بحاول أضايقها فى المدرسة وروحتهالها أوضتهم مرة وهي كانت هناك لوحدها وحاولت أضايقها .. وبعتهالها هدية وعشان أتأكد إنها مش هترميها جبتهالها مصحف !! .. شوفتى الحقارة؟؟ .. وصورتها على موبايلي وبقيت أقعد أتفرج على صورها فى الموبيل عندي ! .. وانهاردة شوفتها فى الشارع عندي وقت المطرة .. روحت .. روحت فضل ماشي وراها بالعربية ومتابعها بعيني وهي بتجري من المطرة !.. لحد ما دخلت الشارع الضيق اللى اتثبتت فيه روحت داخل وراها ! .. معرفش كنت عايز منها إيه بس .. بس (بدأت أنفاسه تتقطع ثم علا صوته فجأة) : لأ كنت عارف ! أنا حقير وكل تفكيري زبالة

زبي !! .. وبعدين لقيت الإثنين دول بيشتوها .. بدل ما أروح أساعدها ووقت أتفرج عليهم من بعيد وكنت فرحان فيها ! .. وشوفتهم وهما بيتحرسوا بيها ووقفت أتفرج عادي وكنت فرحان ومبسوط !! وبعدين شوفته وهو بيرزعها في الأرض وقعد يضرب فيها برجله الكلب دا ! والحيوان لسه واقف بيتفرج متهزش طولته حتى ! لحد ما لقيت واحد رافعها وخلاص هياخدوها ساعتها طلع في دماغى أخاها أنا ! دا أنا حاطها في دماغى من زمان !

ثم دفن وجهه بين كفيه وإنفجر باكياً وغيداء تنظر له بذهول وكأنها قد ابتعلت لسانها ولم تعقب بكلمة واحدة !! ظل يبكي مدة ثم رفع رأسه وبدأ يمسح دموعه وصاح : عارف إنك شيفاني حقير اوى !..أنا طول عمري بصاحب بس عمري مافكرت إنى أأذي بنت حتى الللى أنا بمشي معاهم ! .. والله أنا مش وحش أووي كدا !

نظر لعينيها الدامعتين وظلت عيناه تترجاها أن تجيبه ولكن دون جدوى !! فقد بقت تبكي بصمت ! .. أخذ رامى نفساً عميقاً وقال : والله يا غيداء أنا مقدرتش أقربلها ربنا فوقني ! مش إنتي كنتي ديما بتقوليلي إن ربنا بيفوقك في لحظة قبل ماتغلط علطول إما تكمل الغلط أو ترجع ساعتها لربنا ! .. مش دا كلالاأمك معايا زمان !! .. ليه دلوقتي مش بتتردي عليا !!

مسحت دموعها وابتعلت ريقها بصعوبة وقالت : كمل بقيت كلامك يارامى

تنهد رامى وقرر ألا يقص لها باقي التفاصيل وقال : فوقت وكلمتك علطول ونقلتها المستشفى .. بس كدا

مسحت دموعها وقالت : الحمد لله يارامى إن ربنا نجاك إنت من المعصية دي والذنب الللى مكنتش هتعرف تصلحه بقيت حياتك أبداً .. دي رسالة من ربنا ليك والحمد لله إنت إستجبت ليها ومستجبتش للشيطان

تنهدت غيداء بقوة فقال رامى بصوت يخالطه الخوف من ردة فعلها :أنا حاسس إنى مقدرتش أغلط عشان .. عشان .. بصراحة !! .. أنا حاسس إنى بحبها يا غيداء

اتسعت عيناه وصاحت : إيه !! .. إزاي يعني ! .. حبتها إزاي ولا إمتة !!

تنهد رامى ونظر للفراغ وقال : معرفش بس إنتى مشوفتيهاش وهي بتقولى ساعدني يارامى ! .. بجد الكلمة لمستني أوى ومقدرتش أذيتها .. كفاية إنى لما بصيت في وشها إفتكرت ربنا وخوفت منه ومغلطش !

صمتت غيداء قليلاً ثم قالت : رامي إنت عايز تتغير ؟

صمت قليلاً وكأن نفسه أعز عنده من أن ينطق بها فأعادت سؤالها مجدداً .. فقال مدافعاً عن نفسه : على فكرة أنا كويس يا غيداء ! .. الموضوع دا بس عايز يتغير وأنا بدأت أهو .. بس أنا كويس ومبحسش إني بغلط ولا حاجة ! هو بس حكاية المصاحبة دا وأنا بدأت لما بعدت عن تقى مع إني مبحسوش غلط أوى برضه !

تنهدت وقالت : إنت بتصلي يارامي ؟

قال بثقة : صليت الفجر فى الجامع انهاردة ! (ثم أردف باحراج) : بصراحة ساعات وساعات مش منتظم أوى .. يووو بصراحة بتعدي عليا أسابيع ميفتكرهاش أصلا !!

سألته مجدداً بحزن : والأغاني ؟

قال بحزن : بصراحة بسمع وكل حاجة ! .. بس مبحسش إني بغلط

-طب وبر أهلك ؟

قال بضيق : هما ميستهلوش !!

-مش مبرر اصلا بس طيب ! .. والسجاير؟؟

قال بثقة : مش حرام !!

صاحت بفرح : نعم !! .. مين اللي قالك كدا ؟؟؟؟؟

قال باحراج : واحد صاحبي ! ..

-لا حول ولا قوة الا بالله ..هو حتى الحلال والحرام مش عارفين يسيوه فى حاله !! .. لازم يفتوا !.. حسبي الله .. قولى يارامي .. بتغض بصرى ؟ .. بتخاف من ربنا ؟ .. بتشتغل للجنة ؟ .. بتراعى ربنا فى شغلك وانت فى أهم مهنة أصلا فى الوجود ؟؟ .. عندك حلم أو هدف للحياة ؟ .. تستحق لقب مسلم ؟

صاح بها : ايه ؟؟ حرام عليكى هو تحقيق !! ..

-لأ مش تحقيق ! .. بس انت بتقولى ان مشكلتك الوحيدة هي المصاحبة بس ! .. فأنا بس بعرفك إننا كلنا عيوب وكل ما بنصلح عيوب بنكتشف عيوب تانية .. هتتظبط عباداتك هتلاقي معاملاتك كلها أخطاء ! .. كل دا لازم يتصلح .. مش تقولي مصاحبة بس !

صاح بغضب : إنتى بتكلمينى كدا ليه !! .. مين إداكي الحق أصلا !! .. أنا مش شايف نفسي غلط وإنتى معقداها أووى ولو أنا كنت غلط كنت حسيت !!

تنهدت بحزن ومسحت دمعة تحركت فى عينها وقالت بتأثر : ((فَإِنَّهَا لَا تَعْمَى الْأَبْصَارُ وَلَكِنْ تَعْمَى الْقُلُوبَ الَّتِي فِي الصُّدُورِ)) -الحج 46

خاف على قلبك يارامي !! .. القلب لما بيتعمي بيعمل الذنوب والمعاصي وهو ولا فارق معاه ولا يبחס بحاجة ولا حاسس بحزن ولا بندم ولا أنه بيعصي وآخر حاجة ممكن يفكرها هي إنه في يوم هيموت .. وديما يستبعد فكرة إنه في يوم هيتحاسب ! .. عمره ما هيجيلك بليل قبل ماتنام ويقولك خاف ! .. الدور عليك ! .. جهزت إيه ؟ .. هتقوله إيه ؟ .. عمره ما هيقولك غير من نفسك ديما هيقولك إنك كويس ! .. والحقيقة إن محدش أصلا كويس ! .. محدش كامل وكلنا عيوب لازم نصلحها .. مش نقول دا هو عيب واحد ومش هنعرف نصلحه عشان مش هنوصل للكمال !! .. لأ طبعا دا كلام الشيطان والنفس المأنتخة اللي مش عايزة تعمل حاجة ! .. كل ماهندور جوانا هنطلع بعيوووووب كثيررررة أووى .. لازم تشتغل عليها كلها وتغير نفسك ! .. أنا مش عايزة منك أي حاجة في الدنيا يارامي ! .. أنا عيزاك معايا في الجنة لأنى بجد بحبك ! ..

إخترقت كلماتها الحُجب التي تغطي قلبه وصمت قليلاً ثم قال بحزن : محدش ينفع ! .. كل اللي بتقوليه دا حلو لو مع حد تانى ! .. أنا كل اللي حواليا بيكرهوني معداكي دا لوكنتى صادقة يعنى ! .. وفعلاً أنا فيا عيوب كتيرة أووى عايزة تتصلح بس مش هقدر !! .. أنا مش هقدر أبطل الأخطاء اللي بعملها دي لمجرد إن ربنا عايز كدا ! ..

-هو إنت مش بتجبه؟؟

قال بحزن : أقولك آه بلساني؟؟ ولا أقولك لأ من قلبي وأبقى كافر !!

-أستغفر الله العظيم يا رامي مينفعش تقو..

قاطعها بغضب : يعنى استغفر الله اصلا !! .. بنقول كلام مش فاهمينه !!

تبسمت بثقة وقالت بهدوء : استغفر الله يعنى اطلب المغفرة منك ياالله .. عشان مفيش حد هينفعنا غير ربنا .. هو اللي باقي والدنيا كلها زائلة .. وبعدين محدش مبيحبش ربنا .. إنت بس مش حاسس بحبك ليه ! .. ومش حاسس إنه بيحبك !

قال واجماً : أنا أول مرة أحس إنه بيحبني كان إنهاردة لما بعدت عن تقى وأهلها فضلوا يدعولي رغم إنى أحقر خلق الله ! .. حسيت أنه كرمني لما معملتش الغلط دا .. حسيت إنه كرمنى انى معملتش أصلا مين قال ان الجزار مبيزعلش لما يدبح البهيمة ! .. كلنا بييجينا تأنيب ضمير ! .. بس بنيمه أو بنعمله سيلنت ! .. بس انهاردة معرفتش أعمله سيلنت ! .. ربنا خلى صوته يعلا جوايا ومخلانيش أغلط ! .. (أخذ نفساً عميقاً ونظر لعينيها مباشرةً وقال) : أول مرة أحس إنه بيحبني !

إتسعت بسمتها وقالت بثقة : ومش هتبقى آخر مرة

ومدت يدها وتناولت كفه وطبعت عليه قبلة حانية ثم نظرت له وقالت : حاسس بإيه ؟؟

ابتسم بحنان وأحس بمشاعر لم تكن موجودة من الأساس وقال : حاسس إنى بحبك وإنك أحلى حاجة فى حياتى

أشارت بسبابتها وقالت : أحلى حاجة ربنا خلقها لك فى حياتك

إبتسم بحنان لأنه فهم ما ترمي له وقال : بحبك

قالت بمرح : وأنا بعشق أملك

ضحك من أسلوبها وقال : وهي مش بتطبق اسمك

غيرت نبرة صوتها وقالت : يابني دي آراء .. آراء

ضحك كليهما فتنهد براحة وقال : ربنا يخليكي ليا ياغيداء

أمالت رأسها ونظرت له بحنان فقال مبتسماً : فهمت خلاص .. ربنا هو اللي بيعملنى أى حاجة بحبها فى الدنيا ..

-والجنة ؟

تبسم وقال : بعيدة شوية بس هحاول

-باذن الله .. أهم حاجة ..

قاطعها : أنا تقريباً عارف هبدأ إزاي .. أو بالأخص هروح لمين ! .. بس إنتي إدعيلي

قالت بحنان : بدعيلك ديما .. بس بلاش تعلق قلبك ببشر .. خلى البشر بالنسبالك أسباب بتاخذ بيها عشان توصلك لربنا .. بس متخليهمش هما سبب الفرحه وسبب تغيريك ! .. انت هتتغير عشان ربنا يبقى تدعي ربنا وتعلق قلبك بربنا .. بربنا ويس

هز رأسه أي نعم .. فقالت : ولا حتى تقى يا رامى اللى هتغض بصرك عنها من هنا ورايح .. تمام ؟

-ولا حتى غيداء .. هحاول معلقش قلبي بحد ! .. بحبك أوى

-مكاننا في الجنة يارامى .. بعون الله .. إدعيلنا نتجمع فيها

ذهبت هدى لبيت حبيبة كما اتفقت معها .. فتحت لها حبيبة ببسمة واسعه وقبلتها من وجنتيها بسعادة وأدخلتها وكانت ترتدي إسدال الصلاة وقالت بمرح : لو كنتي إتأخرتي كنت هنفحك ! .. متوضي ياباشا ؟

-أيوا ياستي متوضية مخصوص عشان سيادتك

-لا ياهانم .. متوضيه عشان نصلي سوا حاضر وجماعة .. ما الواحد لازم يستغلك بقى

صلا سوياً الظهر الذي أذن منذ لحظات .. ثم استأذنت حبيبة لتبدل ملابسها .. وماهي إلا دقيقة حتى خرجت لها وقالت بمرح : تارارارا ! .. أنا جيبييت

اتسعت عينا هدى وهى تنظر لحبيبة وظلت تحديق بها للحظات .. فقد كانت ترتدى بنطال جينز ضيق يصل لأسفل الركبة بقليل .. و"بدي" "فوشيا" نصف كم ضيق .. مفتوح قليلاً من عند الرقبة .. وترفع شعرها بطريقة جذابة .. اتسعت عيون هدى وقالت بدهشة : إيه دا ؟!

قالت بعدم فهم : إيه ؟

-ايه الهدوم دي !

-وحشة؟؟

قالت بسرعة : لأ مقصدش والله ! .. بس مستغربة

ظلت حبيبة صامته فنظرت هدى للأرض وقالت بخفوت : بصراحة شكلك بالملحفة والاسدال بتاع الصلاة أحلى ! .. يعنى شكلك بالهدوم الواسعة أحلى ..

تبسمت حبيبة وقالت : بس أنا لبساهم في البيت .. حتى بتكسف ألبس حاجة زي دى ونور موجود .. بس قولت إنهاردة يعنى ألبسهم بدل ماهما متشالين كدا !

-هو إنتي جبتهم ليه أصلاً؟؟.. إنتي كنتي بتلبسي كدا قبل كدا؟؟

-محدث اتولدت بملحفة ياهدى .. كلنا تدرجنا .. كلنا كنا فري وربنا هدانا !

قالت بدهشة : يعنى إنتي كنتي بتخرجي كدا !!

-لأ .. مش بالظبط يعنى .. يعنى البدى دا على جيبة .. والبنطلون دا كان طويل وأنا قصرته وكنت بلبسه ع فيست طويل سنة .. بس برضه كانوا ضيقين ! .. مينفعوش حجاب شرعى أصلاً !!! .. مينفعوش حجاب أصلاً !! ..

صممت هدى بحزن وقالت : بس أنا بلبس بناطيل زي دا !! .. بس عليهم فيستات طويلة وواسعة !

-طويلة قد إيه يعنى ؟.. لحد الركبة مثلاً؟؟

-لأ أقصر شووية !

-طب وبقيت رجلك المتجسمة بالبتلون دي ؟

زفرت بضيق وقالت : متحسسنيش إني كافرة يا حبيبة !

-استغفر الله العظيم .. والله ما أقصد حاجة .. والله أنا اسفة .. حقك عليا .. أنا بس

قاطعتها بحزن : معلش يا حبيبة انفعلت .. بس بجد مبحبش حد يكلمني في لبسي لأنه مش أوفر أوى .. وحازم بصراحة كان بيقرني عليه كتير أوى فكنت بعاند معاه أكثر .. بس من يوم الخناقة وربنا هاديه ومعدش بيقرني علي لبسي .. فمش أخلص منه تطلعيلي إنتي بقي

نظرت حبيبة للأرض بحزن وقالت : أنا آسفة ياهدى ! .. تعالى أشرحلك الكيميا بقي (حاولت أن تبتسم)

جلستا وبدأت حبيبة تبسط المنهج لهدى التي جلست بجوارها بحزن .. وبعد ساعة ونصف أنهت حبيبة شرحها فقالت هدى بحزن : حبيبة أنا آسفة !

قالت بمرح : حسبتك هتقولي حبيبة أنا فهمت

ضحكت رغما عنها وقالت : لأ أنا فهمت فعلا ماشاء الله شرحك جميل .. بس بجد أنا آسفة رديت عليكي بغلاسة أوى

تبسمت حبيبة بحنان وقالت : انا مزعلش أصلا

-زي حازم .. هو برضه قلبه أبيض وبيسامح علطول ..

-ربنا يخليهولك ..

تنهدت وقالت : ياررررررب .. بس تعرفي ؟..حازم بقي طيب أوى معايا من ساعة ماتعصب عليا قدامك .. هو أصلاً علطول طيب بس أنا اللي كنت بعيدة عنه .. بس بقي بيكلمني براحة ويصحيني أصلي الفجر من غير خناق .. وبيجيلي شوكولاتة وهو مروح ..هيهيح .. بقي عسلة كدا

ضحكت حبيبة وقالت : آه يا آروبة .. كل دا عشان جابلك شوكولاتة !!

ضحكت وهدى وقالت : لأ والله مش قصدي .. أقصد إنه بقى يفرحني علطول .. هو أصلاً قالى إنه اتعصب عليا
عشان يوسف عمل الحادثة قدامه وهو نقله المستشفى وكان خايف عليا عشان ماما مكنتش هنا ! .. فهو اتعصب
جامد لما انا عيلت بقى واتعصب أكثر لما قالى يا حبيبة

ظلت حبيبة صامته فقالت هدى بخبت : معرفش بقى يقولي يا حبيبة كثير ليه .. تفتكرى ليه ؟

نهضت حبيبة وقالت كأنها تهرب من سؤالها : انا هقوم أغير هدومي عشان منتأخرش على الدار

قالتها ودلفت إلى غرفتها بسرعة فابتسمت هدى بمكر وقالت في نفسها : إيه العالم اللي بتستعبط دي ! .. والله
لا يقين على بعض ويابخت من وفق راسين في الحلال

وفى هذا اليوم تلقى نور اتصالاً من الحاج محمود طلب منه أن يحضر اليوم لكي يجلس مع هدير مرة أخرى وهذا
من حق كليهما ..

ذهب نور لأداء صلاة العصر ولما لم يجد حازم ساوره القلق اتصل به وعلم أنه في مشوار وسيصلي هناك فاطمئنت
نفسه ودعا له وودعه .. أغلق هاتفه ووضعها في جيبه كي لا يرن أثناء الصلاة .. ولما انتهى من الصلاة وجد من يصلي
بجوار يمد إليه يده قائلاً : حرماً ..

نظر إليه نور فوجده رامي فتبسم وسارع بمد يده لمصافحته وقال : جمعاً يارامي

وقبل أن يتفوه بكلمة أخرى وجد من يضربه بخفة على كتفه قائلاً : أنا مش قولتلك قبل كدا إن حرماً دي بدعة
يا سي نور !

نظر نور فإذا به يرى إمام المسجد فأحس بإحراج شديد .. فهو يعلم أنها بدعة ولكنه ما استطاع أن يقول ذلك لرامي
كي لا ينفره منه وهو الذي بدأ وصافحه .. فقلوبنا عادة لاتميل لمين يصححون لنا أخطائنا كلما قبلناهم ! .. رد
باحراج : أنا آسف يا عم الشيخ آخر مرة !

تبسم الشيخ العجوز ودقق في وجه رامي وقال : وإنت يا حازم فين لحيتك؟؟

ظل رامى صامتاً كمن ابتلع لسانه فقال نور بسرعة : دا مش حازم دا رامى ..هما شبه بعض شوية

ضحك الرجال وقال : الشباب راح بقى يانور .. معذرةً يارامى يابنى نظرى معدش قد كدا بحكم السن .. والرسول الكريم صدق لما ((..اغتنم شبابك قبل هرمك))..

ربت رامى بحركة تلقائية على كتفه وقال : ربنا يديك الصحة

تبسم الشيخ ومضى وهو يتمتم بصوت غير مسموع " اللهم إنا نسألك العفو والعافية "

ولما غادر التفت رامى لنور وسأله : وانت مقولتليش ليه إنها بدعة بدل ماتوقع نفسك فى موقف زي دا ؟

-إنت أصلاً كنت هتتقبل إنى أقولك إنها بدعة يارامى ؟

قال رامى بسخرية : لأ بصراحة كنت هقول إنت عايش بتتفزلك ع الناس وعامل مصلح اجتماعى ولازم تطلع فينا اخطاء كل ماتشوفنا

ابتسم نور فهز رامى كتفيه وقال : رأيي ومش هغيره

تنهد وقال : طيب .. تقبل الله يا رامى

تبسم قائلاً : منا ومنكم .. مزعلتش منى ؟

هز رأسه بالنفي وقال : لأ .. طول عمري عارف إنك طيب أوى رغم الهالة الخشنة اللي إنت عاملها حواليك .. فمينفعش أزعل من حد طيب أوى كدا ..

ثم هز كتفيه وقال بنفس أسلوبه : رأيي ومش هغيره

ساد الصمت وخرجا سويا من المسجد فقال رامى بتساؤل : يعني إنت شايف إنى طيب ؟

-أيون .. وفيك بذرة خير كمان

نور يعلم أن رامي لم يأتي للصلاة ويحادثه من فراغ .. فربما بذرة الخير هي فعلاً من دفعته لذلك .. فكان عليه أن يشعره أنه ليس سيئاً بل بالعكس بداخله بذرة خير .. إن رواها صارت شجرة لفاء ذات ثمار نضرة .. وإن لم يروها بقيت كما هي تلك الحبة الجدباء .. لا أمل فيها ولا حياة !

تبسم رامي وقال لنور محاولاً إستفزازة : بس انا مبحبكش ! وبشوفك أغلس واحد فى المنطقة كلها

ضحك نور : طب الحمد لله .. أديني بقيت الأول فى أي حاجة

فى الواقع .. رد نور هو من استفز رامي فقال بلغة جافة : إنت ليه ديما معندكش دم كدا ! .. ليه مبتتزرزفش زي البشر وتتنحلق وتتعصب .. دا حتى البرود وحش

رد نور بجديفة : ومين قالك انى مش بتعصب ؟ .. بس اخر حاجة ممكن تعصبي واحد بيهزر معايا

-ومين قالك إنى بهزر معاك !

-هو إنت مبتهزرش معايا ؟

زفر رامي بضيق وقال : عمر ما حد بيغلبك فى الكلام

-مش مهم إنك تغلب فى الكلام المهم إنك تغلب فى السكوت ! .. وقت ما حد يعصبك أو يضايقك أو يسبك حتى .. إنت ممكن تصعد الموضوع وتشتمه أكثر .. وممكن تغلبه بالسكوت وتمشي .. وأنا شايف إن اللى بيغلب بالسكوت أقوى من اللى بيغلب بالكلام .. وأنا بصراحة بفتقد الحتة دي ..

قال بلامبالاة : اه طبعاً طبعاً

قال نور باهتمام : اه صحيح عشان مبقاش قولتلك معلومة غلط .. حرماً وتقبل الله مش بدعة لاننا بندعي لبعض .. تبقى بدعة لو قولنا انها عبادة لازم تبقى بعد كل صلاة

قال بتعجب : امال الشيخ قال انها بدعة ليه ؟؟

-عشان هو قالى بلاش اقولها عشان محدش يقلدني فيها هو شايفني قدوة للاطفال الصغيرين فبلاش اقولها وحد ياخذها عنى ويفتكرها عبادة يعنى

أحس رامي أن نور يستمر في دوره الطبيعي كـ "مصلح إجتماعي" يتفلسف على البشر .. يعطى حكماً في الهواء .. هذا مايراه .. لذا لم يكن معنيا بما يقوله نور .. فقط كان يشعر أن نور يمتلك شيئاً ليس بحوزته وهو يرغب فيه وبشدة .. نور يمتلك شخصية محترمة ممن حوله .. ويمتلك نزاهة في العمل وأمانة .. وعفة .. وعدة أشياء أخرى تميزه لا يمتلكها رامي .. ربما هي لا يطمع في العيون الزرقاء ولا الشعر الأشقر .. لكنه يطمع في شخصيته ومكانته بين من حوله .. وإن كان ينتقده كثيرا ولكنه يعلم أنه على الأقل أفضل منه .. بكثير ! .. طمع رامي دنيوي .. ولكنه من أجمل أن يتحول هذا الطمع الدنيوي الى طموح في الآخرة .. رامي يرى أن نور لن يكون ناجحاً ابداً في علاقة حب .. لن يستطيع أن يأسر فتاة بحبه .. وكيف لمن عاش بين المساجد والعمل والدراسة أن يعرف وسيلة للحب؟! .. ويرى نفسه يتفوق على نور في مجالات حياتية عدة .. ويرى أن حازم في نظره أفضل من نور .. لأنه "عاش شبابه" قليلاً قبل أن يقيد الدين .. رامي بين صراع .. هو يعلم أن الدين سيقيد حريته .. سيمنعه من الحياة ! .. ولكنه الوسيلة الوحيدة التي يصل بها لتقى .. وكما أن حياته تلك لاتعجبه .. فلم لا يجرب ذاك الترياق السحري .. الذي سمع أنه يشفي من آلام الحياة .. ويحيك في جنة بالدنيا وتضمن أيضا جنة بالآخرة .. ((الدين)) .. سيقبل عليه وهو لايعلم ما مصيره حين يتغير .. يتغير؟! .. بل أقصد ينسف كل ما اعتاد عليه من أخطاء وحماقات ! .. رغبته في تركها ليست قوية بدرجة كافية .. ولكن رغبته في تقى أكبر بكثير .. وكأنه أحب أن يكون ملتزماً لأجلها .. أحب أن يكون له أخلاق كي تواصل والدتها الدعاء له ! .. مكسب دنيوي بحث ؟ .. لكنه حتماً سيصب في الآخرة .. مع الوقت .. سيعرف أن الدين يحزر من عبودية الشهوات لا يقيد ! .. وأن الحرية الحقيقية أن تكون عبداً لله وحسب .. ولست عبداً للمال والشهوة والحب والجمال وكل ما حولك ! .. أهناك حرية أكبر من تلك؟!!

عاد نور إلى بيته وكانت حبيبة لاتزال بالدار فبدل ملابسه واتصل بحبيبة التي ردت عليه بسرعه : إيه يانور مش عارف انى فى الدار ؟

-أنا بقولك بس إنى رايح أقابل هدير انهاردة عشان متقلقيش لما متلقينيش

-قشطة ياببي ربنا يعينك

-بيبي؟! .. طيب ياختي خدى بالك من الأمانات اللى فى إيدك .. أي حد بتعلميه حاجة فى الدين أو غير الدين فدى أمانه

-وربنا عارفة .. إمشي بقى عشان مقصرش فى حق الأمانات .. سلام عليكم

-وعليكم السلام ورحمة الله وبركاته

أغلق الخط وتوضأ وذهب لبيت الحاج محمود ..

وفى بيت الحاج محمود وقبل وصول نور

-هو إيه اللى مش هترفعي النقاب؟؟

-معلش ياعمو مرة تانية !

-مرة تانية إيه؟ .. قعدتوا مرة ودى التانية يبقى من حقه يشوفك المفروض كان يشوفك من أول مرة كمان !

-هو أنا مسألته فيها ياعمو بصراحة بس يعنى احنا لسه متفقناش أصلاً .. يبقى يشوفنى ليه ؟ .. لما نستقر يبقى يشوفنى والا بقى كل حد هيجي يتقدملى هيشوفنى المهم بس ياعمو ابقى ركز انت المرادى بنقول إيه متعملش زى المرة اللى فاتت

-حاضر.. بس هو ممكن يضايق .. حقه يعرف شكلك قبل ما يقرر .. فى ناس بتفرق معاها الشكل ..والله مقصدش انك وحشة والله انتى زى القمر ياهدير .. بس هو ماشاء الله يعنى عدى القمر بمراحل

ضحكت رغباً عنها من أسلوب عمها المرح وقالت : ياعم الحج أنا المفروض أغض بصري إزاي وإنى اللى بتعرضني ع الفساد أهو ..

ضحك وقال : والله ما أقصد .. بس يعنى .. لازم يشوفك

-داع اساس إنى رفضت إنه يشوفني .. اتقلل يا حاج ومتبوظلش التكتيك بقى

قال بمرح : ربنا يستر .. شكلك هتودينا في داهيه

ضحكت ولم تنطق لأنها سمعت جرس الباب .. دلفت الغرفة بسرعة وجلست مع زوجة عمها بينما استقبل الحاج محمود نور وقدم له العصير وبعد دقائق من الحديث دخل الحاج محمود وخرج برفقة هدير التي جلست على استحياء في قابلته .. وبدون نقاب !.. فكرت للحظات في كلمات عمها وأحست أنه على صواب .. عليه أن يراها بالطبع .. وهناك من يرفعون النقاب من أول مرة لكنها ودت أن تجلس معه قبل أن يرى وجهها الذي صانته من كل العيون بارتدائها النقاب .. قام الحاج محمود وجلس في آخر الصالة بحيث يراهم ويسمعهم .. قال نور ببسمة : إزي حضرتك عاملة إيه ؟

قالت : الحمد لله .. وحضرتك ؟

-تمام .. بصي أولاً كدا إنتي أكيد جهزتي أسئلة بس أنا كنت عايز أقولك حاجة مهمة أوي عشان نسيته المرة اللي فاتت

رفعت بصرها إليه باهتمام ولكنها سرعان ما خجلت وغضته فأردف بشئ من الاحراج : بصراحة كنت حابب أحكيك عن ظروفى المادية وكدا .. يعنى هي الشقة بتاعتنا اللي ساكنين فيها أنا وحببية هي اللي هتجوز فيها ..

-طب وحببية؟؟

-هاخد لها شقة إيجار صغيرة جنبنا .. أقصد جنب الشقة .. هي تلت أوض .. طبعاً هجددها بأمر الله .. هي المشكلة مش فى الشقة ولا توضيبها .. المشكلة إنى لسه بدرس وبشتغل عند عمك .. ومرتبى مش كبير أوى .. ومعرفش هلاقي وظيفة حكومية لما اتخرج علطول ولا لأ .. وربنا يعينى طبعاً

قالت بصوت خافت : مفهمتش برضه فين المشكلة ؟

ابتسم وقال : مش عارف .. أو مش عارف أتكلم معاكي جايز .. بصي أنا هقول لعمك كل حاجة لما نيجي نتفق وهو هيبقى يقولك وتشوفي هتقبلي ولا لأ ..

-تمام

-أسئلتك ؟

تنهدت بعمق وقالت بصوت مضطرب : كنت عايزة أعرف بس بصراحة يعني .. إيه أكثر حاجة سلبية فيك .. بس اتق الله في كلامك بالله عليكم ..

أخذ نفساً عميقاً وقال بعد تفكير : مفيش سؤال أسهل ؟.. بجد مش عارف أقولك إيه ..

ظلت صامتة فقال : هي حبيبة وحازم ديما بيقولولي إني مش بتكلم ودا غلط .. يعني أبقى مخنوق أو مضايق ومقولهمش .. هما بيضايقوا عشاني .. بس أنا أصلاً مبعرفش أشارك حد همومي والحاجات اللي مخوفاني !..

قالت بضيق : بس اللي مبيقدرش يشارك حد همومه تفتكر إنه هيقدر يشارك حد حياته ؟

فهم ما ترمي إليه فقال بحزن : أنا قولتلك الصراحة .. يعني كان ممكن أقولك أى حاجة بس أنا اتقيت ربنا زي ماقولتيلي .. بس هو أنا نفسي اغير الصفة دي وصدقيني هشتغل عليها جداً .. هرجع كل يوم أقول لحبيبة اللي مضايقتني لحد ما أحنقها .. تمام ؟

ظنته يمزح لكن ملامحه كانت جادة .. ظلت صامتة للحظات فقال : أنا مبعرفش أشكتي .. دي حاجة سلبية ليا مش لغيري يعني عادةً الناس مبتحبش الحد اللي بيشكتني علطول دا .. أنا اتعودت اسمع .. ولما باجي اتكلم بدور جوايا على كلام يعبر بس مبالقيش .. فبقول للي حواليا يدعولي ودعائهم بيوصل ويريحني ..

هزت رأسها ايجاباً فقال بدوره : وانتي إيه أكثر سلبية فيكي ؟

-هتصدق لو قولتلك معرفش ؟

قال في نفسه "عشان لما أقولك إنه سؤال صعب تبقي تصدقيني " .. ثم قال : خلاص نغير السؤال .. رأيك السياسي؟؟

قالت في نفسها " مابلاش !! " .. ثم قالت باستحياء خاصةً أنه لم يعلق أي تعليق على وجهها .. لم يرفع طرفه إليها من الأساس : بصراحة أنا بكره حاجة اسمها سياسة كره أعمى .. الحاجة الوحيدة اللي بكرهها بصدق .. حاجة ملهاش أى لازمة.. أنا باختلاف جدا مع حبيبة .. ديما بتقولي الدم والناس لى ماتت .. بس أنا بصراحة مبقدرش أعمل زيها وأنفعل .. أنا ضد الدم كله ! .. بس مش شايفة إني لما أتابع الأخبار الكدابة أو أحرق دمي إني كدا هستفيد أو هنفع ديني أو بلدى ..! أنا ناس كثيرة بتختلف معايا وناس كثيرة من أيام الكلية وصفتي بأني شيطان أخرس لأنني ساكتة عن الحق .. هو الحق واضح أصلا؟؟.. أنا مبقدرش أشوف بعين واحدة .. وكل القنوات بتنقل بعين واحدة .. أنا بكرهها كره العمى !

تبسم نور ولم يعقب فقالت : معرفش إيه رأي حضرتك

تمنى لو يصرخ ويقول بعلو صوته .. "ياالله ! .. كم هي تشبهني !! .. كم تتشابه آرائنا ! .. اللهم يسر لنا الخير " .. قال بهدوء : زي رأيك .. بالظبط

تبسمت فكم تعشق المرأة أن يُقال لها "إنتي محقة ! " .. ساد الصمت دقائق قطعه قائلاً : كنت عايز أعرف يعني سقف طموحاتك الدينية ؟

أنصتت باهتمام فأوضح قائلاً : يعني سقف طموحاتك الدينية ..

تبسمت ولكنها أخفتها بسرعة وقالت في نفسها "على اعتبار إني مدرسة عربي بقى " ..وقالت بصوت هادئ : هو اللي فهمته من سؤالك إنك عايز تعرف آخري فى الدين إيه؟؟.. تمام اوى .. هو إنت عارف إني خاتمة القرآن وحالياً براجع مع الدار اللي فيه حبيبة وأول ما هخلص بعون الله هبتبدي أحفظ جزء عم للأطفال وبالتفسير طبعاً .. وأنا كنت بعمل حاجة من أيام تالته ثانوي بتفيدني جداً وهتفيدني أكثر لما آجي أحفظ وهي إني كنت بعمل كشكول فيه ملخصات للشعراوي .. كان عندي مجلد الجزء ال 16 بتاع مريم وطه فكنت كل يوم بقرأ آية أو اتنين على حسب حجم شرحهم ألخصهم ف الكشكول دا بدون ما المعنى يقل بس الحجم هو اللي يقل بحيث إن لما أحب

أرجع لشرح آيه أرجع للمختصر دا علطول أو أقوله لحد يعني يكون أسهل وأسرع .. وبعد كدا بقيت أعمل كدا ف القرآن كله .. بقالى ست سنين شغالة أهو تقريباً لخصت القرآن كله الحمد لله من مجلدات الشعراوي .. فدا هيفيدني أوى فى التحفيظ وكدا .. وأنا كان أهم حاجه بالنسبالي إنى أعرف تفسير القرآن مش أبقي بحفظ وخلص ..يعني فكرة إنى أفهم كلام ربنا دى لوحدها حاجة عظيمة فعلاً .. إنك فاهم كلام ربنا إلى حد كبير بجد بجد حاجة حلوة جداً وخاصةً إن أسهل وأبسط وأوفر شرح .. بتاع الشعراوي .. دا بالنسبة للقرآن والحمد لله عندي ورد ثابت يومياً أينعم بيزيد بمعدل بسيط بس المهم إنه يكون ثابت .. بالنسبة بقى للعلوم الفقهية أو علم الحديث والحاجات الكثير دى .. أنا قولت إنى أعرف فى الفقه فى حدود تعاملاتى .. يعني أعرف اللي يفيدني وفى كتاب الفقه الميسر أو فقه المسلمة مش فاكرة الاسم بالظبط بتاع محمود المصري كنت بقراً منه ولازلت يعني بتسلى فيه .. بس اللي كان صعب بالنسبالي إنى أعرف الحديث دا صحيح ولا حسن ولا ضعيف .. ولا موضوع أو منكر مينفعش ناخذ بيه .. بصراحة ف الأول قولت هعقد نفسي وكدا فملهاش لازمة أعرفهم بس بعد كدا اكتشفت إنى لازم أعرف الأحاديث دي صحيحة ولا لأ .. دا أنا اتفاجئت لما عرفت إن " الجنة تحت أقدام الأمهات " حديث موضوع ! .. يعني مينفعش ناخذ بيه فقولت لازم يكون عندي طريقة أعرف بيها الأحاديث دي صح ولا غلط ! .. كنت فاكرة الموضوع صعب بس اكتشفت إنه سهل أوى .. من موقع اسمه الدرر السنية مجمع كل كتب الألباني رحمه الله فى الأحاديث .. بدخل نص الحديث وهو يقولى صحيح ولا ضعيف ولا موضوع وكدا .. واللى خلاني أتق فيه إن اللي عرفته منه مقدم برنامج كان مع الحويني ف حلقة والحويني قال ع الكتاب ف الراجل دا قال لو التدوير ف الكتاب صعب فالموقع أسهل .. أنا اتكلمت كثير أوى صح ؟

تبسم ورفع بصره أخيراً لها وقال : لأ مش أوى .. أنا ف موضوع الأحاديث دا جيت كتاب اسمه صحيح الجامع الصغير الشيخ الحويني برضه اللي قال عليه للألباني وبقيت بدور فيه بترتيب الحروف على حسب الحديث بادئ بحرف إيه .. بس الموقع دا أسهل هدخل عليه بعد كدا بعون الله

لزمت عيناها الأرض وهو يتطلع إلى وجهها وقالت بخجل : هو الدين بتاعنا سهل أوى بجد .. يعني الناس اللي تقولك الموضوع معقد والدين صعب دول مدورش أصلاً .. أنا كنت فاكرة موضوع الأحاديث دا صعب أوى وأنا إزاي هلم بكل الأحاديث حتى موضوع إنى أجيب كتاب هيبقى صعب إنى ألقى فيه كل الأحاديث فلقيت اسم

الموقع دا ف حلقة ملهاش علاقه بالموضوع اصلا .. بس ربنا أراد إني أعرفها وأعرف إن الموضوع سهل اووي بس إنت دور وربنا مش هيصيح تعبك وجهك أبدا .. ونسيت أقولك صح إني حاطه ف دماغى من فترة أحفظ أحاديث بس قولت أخلص القرآن وأختمه وأراجعه وبعد كدا أشوف طريقه سهلة برضه أحفظ بيها أحاديث

-مممكن كتاب رياض الصالحين .. يعنى تفتحي مثلا باب الصوم هتلاقى كام حديث مثلاً .. تحفظيهم على مدار اسبوع أو أكثر على حسب عددهم .. بحيث تاخدى حديث ف اليوم ماعدا الجمعة مثلا يبقى مراجعه .. أنا وحببية علمنا كدا من مدة ووصلنا لنصه دلوقتي الحمد لله

-تمام

غض بصره عنها .. فقد ارتضى ملامحها لتكون ملامح زوجته .. طالما ارتضى ملامحها فهو مأمور بغض البصر .. ربما لا أحد يعلم هل ارتضاها أم لا .. ولكن الله يعلم السر وأخفى .. وهو لا يغض بصره إلا خوفاً وابتغاءاً لرضى الله -عز وجل -

قال غاضباً بصره : عايزة تسألني في إيه تاني ؟

قالت بخجل : حاجات كثير .. وحضرتك ؟

-نفس الحاجات الكثير .. أنا محضر ورقة أهو .. نبدأ بسم الله الرحمن الرحيم

-إزيك يا حازم ؟

كاد حازم يدخل عمارته لولا أن سمع صوت رامي من خلفه .. نظر له في دهشة انقلبت فجأة إلى حدة وقال : عايز إيه ؟

-مش ترد السلام طيب ؟

-السلام عليكم يارامي

-وعليكم السلام .. عامل إيه ؟

-كويس .. جاي هلكان من برا عايز اربح شوية قبل المغرب .. عن اذنك !

جاء يدلّف عمارته لكن صوت رامي أوقفه : يعني هشوفك في المسجد ؟

رقمه حازم بنظرة حادة أربكته وقال : ومن امته وأنا بشوفك في المسجد ؟

-من انهاردة .. بدأت أصلي في المسجد اللي جنب البيت

ولاه ظهره وقال وهو يتحرك : طاب أنا هصلي في المسجد الثاني

صاح رامي في حنق : إنت ليه بتعاملني كدا !!

التفت له وقال بحدة : شوف إنت عملت إيه غلط بيخليني أكلمك كدا !

-دا كان من سنين ! .. إنت إزاي قلبك أسود كدا ؟

قال حازم في دهشة : أنا قلبي أسود ! .. أنا مبعرفش أزعل أصلا !

قال بمكر : لا ماهو باين .. باين أوي بإمارة إنك مش قادر تنسى من خمس سنين يمكن أكثر !

قال حازم بضيق : لما تكذب عليا وتطعن في عرض بنت يبقي ليا حق منساش ! .. ولا إنت اللي نسيت ؟

ضيق رامي عينيه وقال بحدة : ليك حق طبعاً متنساش .. وأنا كمان ليا حق أقول إن قلبك أسود ! .. عن إذنك

ثم تركه وهو يدب الأرض في غضب مقررأ عدم الذهاب للمسجد أبداً كي لا يلتقي به أبداً ! .. زفر حازم بضيق

وصعد درجات السلم ودخل شقته ودلف غرفته دون أن يلقي السلام على أمه وأخته .. أحست هدى بدخوله

فذهبت إلى غرفته وطرقت الباب فقال : لو سمحتوا سيبوني تعبان وعايز أربح !

قالت هدى بخفوت : عايزة أكلمك يا حازم ينفع

تمنى لو يستطيع أن يقول لها لا أقدر .. تمنى أن يخلو بنفسه قليلاً ولكنه لم يستطع ! .. فقد عاهد الله على أن يحفظ تلك الأمانة .. "هدى" .. ويبدل كل مافي وسعه لأجلها .. اتجه نحو الباب وفتحه وقال : إتفضلي .

دخلت وهى تلاحظ اقتضاب وجهه فسألته بعد أن أغلقت الباب : مالك ؟

-ماليش بس تعبان شوية .. خير كنت عيزاني في إيه ؟

نظرت لعينيه وقالت : مالك يا حازم ؟

أربكته نظرتها وتحاشى النظر في عينيهما وقال بسرعة : ماليش أنا بس ..

قاطعته بجدية : هتكذب ؟

زفر بضيق وقال : في حاجة حصلت ضايقتنى !

-ايه؟؟

صمت قليلاً ولكنه أحس برغبته في إفضاء ماتحمله نفسه فقص عليها ما حدث بينه وبين رامى أسف المنزل منذ دقائق ولكنه لم يخبرها عن سبب شجاره مع رامى منذ زمن .. ولما فرغ قال بحدة : أنا مش طايقه ياهدى .. بس برضه قلبي مقبوض حاسس إنى نفرته !

قالت بدهشة : إنت فعلا نفرته !.. حرام عليك يا حازم !.. هو إنت عايز تدخل الجنة لوحداك ؟

نظر لها بدهشة فقالت بتوتر : ليه إنتوا مش بتقبلوا أخطائنا؟.. ليه مش بتقبلونا لما نرجع عن الغلط؟.. ليه ديما بتحكموا علينا من أول غلطة ! ..

-احنا مين؟؟

-أنتوا الملتزمين !.. أو اللي شايفين نفسكم مبتغلطوش .. مانت غلطت يا حازم لما قصرت معايا .. وغلطت زمان لما كنت مبتصليش؟.. ليه سامحت نفسك ومش قادر تسامح غيرك؟.. ليه عايز نفسك بس اللي تبقى كويس .. ليه متخليهوش كويس معاك ..

وجم حازم ونظر للأرض بحزن وقال : بس أنا مش قادر أسامحه !

-بس إنت مبتزعلش أصلاً يا حازم من حد .. يعنى الحمد لله دي نعمة من ربنا إنك بتنسى وتسامح بسرعة من غير اعتذار أصلاً .. وأكد إنت سامحته بس الشيطان هو اللي عمّال يقولك إنك مسامحتوش عشان يبعدك عنه ومتساعدوش .. على فكرة يا حازم إنت مش الأملة أوى .. ربنا هيبعتله اللي أحس منك مليون مرة .. بس إنت ساعتها هتكون خسرت الثواب .. خسرت رجلان تحابا في الله إجتماعا عليه وتفرقا عليه .. خسرت واحد ممكن يشفعلك قدام ربنا ويدخلك الجنة .. خسرت واحد ممكن يتغير ويبقى أحسن منك وأقرب لربنا وأنفع للمجتمع وللدين

ظل صامتاً يفكر في كلامها .. نعم فهي محقة بالفعل ! .. رفع رأسه وقال بدهشة : إنتي جييتي الكلام دا منين ؟

-هو إنت بس يعنى اللي بتتعلم عن الدين .. أنا كنت في الدار ولسة راجعة وحضرت درس لحبيبة هناك كان تحفة .. كان اسمه رفقا بالمخطئين .. هو مكشش كلامها هو كوكشن كتب قرأتهم يعنى وهي اللي قالت كدا

تبسم رغماً عنه حين سمع اسمها ولكن ابتسامته تبددت حين تذكر أنها لا تحل له .. لن يفكر حتى فيها ! .. سيحفظها من نفسه .. ابتغائاً لرضى الله تعالى .. نظر لهدى وقال : ربنا يبارك فيكي

ثم نهض فجأة من فراشه فقالت : على فين ؟

قال بحماس : رايح لرامي .. وحشني أوى

-لحق رأيك يتغير؟

أشار بسبابته وقال بحماس : زي ما الشيطان ضحك عليا بالكلام .. أنا هضحك عليه بالكلام .. عن اذنك يا جميل

انطلق حازم بحماس إلى بيت رامي وظل ينتظره في مدخل العمارة إلى أن سمع صوت آذان المغرب .. ولكنه لم يرى رامي نازلاً ليصلي .. فصعد إليه بسرعة وقابل نور على السلم حيث أن الحاج محمود ورامي يسكنان بنفس العمارة .. قال له بسرعة : أنا طالع أنده رامي قبل الإقامة .. يلا سلام سلام

رحل نور وهو يدعو لصديقه الذي لا يعلم لمَ تبدل حاله مع رامي بلحظة .. طرق حازم الباب وبعد لحظات فتحت له "رانيا" أخت رامي وكانت ترتدي ثياب تجسد جسدها تماماً كما هو ويعلو وجهها مكياج صاحب .. تبدو كما لو كانت تستعد للخروج .. لكن هيهات .. فعينا حازم لاتفارقان الأرض .. فهو لا يريد أن يغضب الله أينما كان .. قال بسرعة وقد ابتعد عن الباب وولاهها ظهره : ينفع أكلم رامي ؟

شعرت بالغیظ من تصرفه هذا ! .. من هذا ليعطيها ظهره ولا ينظر إليها ؟! .. نادى بصوتها الرفیع وهي تنظر لظهره بحدة : يارررامي ! .. صاحبك المعقد براا !

ثم خفضت صوتها قليلاً وقالت : خارجك أهو يا حازم .. أنورك نور السلم .. ولا إنتوا ناس عندكوا الأباجورة دي حرام ؟

وصدق من قال "وإذا حدثك السفیه فلا تجبه .. فخير من إجابته السكوت "

لم يجبها !.. اشتعلت غیظاً وحقداً عليه .. ظلت ترمقه بنظرات نارية حتى جاء رامي ودخلت هي غرفتها وصدفت الباب بعنف .. قال رامي بضيق : عايز إيه ؟

إلثفت حازم إليه وجذبه من يده وأغلق الباب قائلاً : يالا نلحق المغرب وبعد كدا نتكلم !

لم يترك له فرصة للرفض فقد جذبته نحو السلم وهبطا بسرعة سوياً واتجهوا نحو المسجد وصلا المغرب به جماعة .. استأذن نور ليعود لبيت الحاج محمود ليكمل حديثه مع هدير وبمجرد خروجه من المسجد أخرج هاتفه واتصل بالحاج محمود وقال باحراج : السلام عليكم يا حاج محمود .. لالا أنا طالع دلوقتي إن شاء الله بس ممكن تقول للأستاذة هدير تخرج بالنقاب ؟ .. لأ مفيش حاجة والله بس أنا خلاص شوفت وشها ورضيت بملامحها يبقى المفروض متطلعش قدامي من غير النقاب .. (ثم رد بمرح) : آه يا حاج دا الشرع والله مش بألف .. وعليكم السلام

أغلق الخط ونظر للسماء وقال : يارب ..

وبعد مغادرة نور .. نظر رامى لحازم وقال بعد أن خرجا من المسجد : دا أسلوب تيجي تاخدني بيه؟؟

-أعمل إيه بقى .. كنا مستعجلين عشان إقامة المغرب مش بتتأخر

زفر رامى بضيق فوكزه حازم بكوعه وقال : بابااااي عليك إيه الغلاسة بتاعتك دي .. منا جاي أصلحك أهو

نظر له رامى وقال بتعجب : ليه ؟

-هو إيه اللي ليه ؟

-ليه جاي تصالحنى ؟

قال حازم باحراج : عشان أنا كنت وحش أووي معاك وكلمتك بأسلوب غلس .. وأنا آسف يا صاحبي

قال رامى : هو أنا صاحبك بجد ؟

نظر حازم لعينه يريد فهم ما يرمى إليه فأردف رامى بضيق : بيتهيألي لو صاحبت واحد زيي هيخسرك ويرجعك لورا !

ظل حازم ينظر إليه دون أن يعلق فأردف رامى بحزن : بس أنا نفسي أبقى حد كويس .. بس مش معقد برضه .. إنتوا

عندكوا كل حاجة حرام يا حازم !

قال حازم بدهشة : مين قالك كدا؟؟؟؟؟؟

هز كتفيه وقال بدون تفكير : هي كدا !.. إحنا كلنا عارفين إن الواحد لما ييبقى زيكم كدا ييبقى معقد

صمت حازم قليلاً ثم قال : بس أنا كنت زيك يارامى .. وبيتهيألي لو الموضوع كان تعقيد مكنتش أنا قدرت أصلاً

.. القرب من ربنا جميل أوي يارامى

-ماهو كلكم بتقولوا كدا .. بس مش قادر أصدقكم .. مش عارف إيه الجميل في إنني أسيب كل حاجة في الدنيا ؟

.. إيه المتعة في كدا.. أنا مش قادر أصدقكم يا حازم

صمت حازم قليلاً ثم قال : طب ماتجرب تقرب يارامي .. ولو إن ربنا مبيتجربش .. يعني إنت جرب تحبه وإدعيه ينقي قلبك وهو هيستجيب .. وهتجس براحة وطعم تاني للدنيا .. هتجس إنك مطمئن للي جاي لأنه جيا لك من عند ربنا .. ويوم ماتحصل مشكلة هتلاقيك حابها لأنها اختبار من الله .. هتلاقي لذة وإنت بتجاهد نفسك عشان تسبب المعصية .. هتجس بسعادة وإنت بتلاقي نفسك بتقول أنا هسبب كذا عشان بحب ربنا .. هتلاقي فرحة وإنت بتقول من ترك شيئاً لله عوضه الله خيراً منه .. هتبقي مطمئن إنك في الآخرة هتشوف ربنا راضي عنك .. لأنك عندك يقين بالله .. ويقين إن عنده مش بيضيع أجر حد .. المرة اللي دوست على نفسك فيها عشان تغض بصرك .. والمرة اللي كظمت غيظك فيها والمرة اللي ريحت أمك فيها على حسابك والمرة اللي مولعتش فيها سيجارة والمرة اللي مرمتش فيها الورقة على الأرض والمرة اللي تبسنت في وجه الناس .. شوف لو مشيت مبتسم هتقابل كام حد وهتؤجر عليه بإذن الله؟؟.. المرات اللي بتتنقن فيها عملك وبتذاكر كويس أو بتشرح كويس .. والمرات اللي هتنزل تصلي فيها ف المسجد والموضوع صعب عليك شوية في الأول .. صدق الله فعلا لما قال وإن تعدوا نعمة الله لا تحصوها .. شووووووووووووووووووووو مالايسيين الطرق تاخذ بيها حسنات وترضيه بيها .. ماهي دي من نعم ربنا علينا برضه .. من نعم ربنا إنه يقبل توبتنا واعتذراتنا ديماً .. وانه بيغفر علطول وييدينا فرصة تانية .. إنه عمره ما هيعاملك وحش لما ترجعله زي منا للأسف عاملتك .. أنا آسف والله حقك عليا .. إحنا المفروض نتخلق بأخلاق الرحمن .. يعني ربنا عنده تدرج في العذاب ومش بيعذب حد غير لما يُنذر مرة واتنين وألف طول حياته .. احنا نحاول قدر استطاعتنا نعمل كذا .. يعني إنت مثلا في الفصل متعاقبش الولاد من أول مرة .. متعاقبهمش وهما ميعرفوش قوائينك!.. ومش اللي يغلط غلط كبير زى اللي يغلط غلط صغير .. فاهمني يارامي؟؟

نظر له رامي بدهشة وقال : إنت عرفت كل دا لوحده؟؟

-لأ طبعاً .. مفييش حد بيعرف حاجة لوحده .. كلنا بنتعلم

-طب في جزء حلو من كلامك وجزء مش مقنع أصلاً .. الجزء بتاع إني أتلذذ وأنا بسبب حاجة بحبها عشان ربنا دا .. دا مش حقيقي أصلاً

قال حازم بسرعة : ما السلف ..

كلهم كانوا يحبوا الله جدا .. ويستمعوا بعبادته .. إنت عارف؟؟..كانوا يسافروا من بلد للثانية عشان يكتبوا الأحاديث صحيحة ويدونوها .. مكانش عندهم نت ولا الحياة سهلة زينا .. إنت لو فكرت تفتح يوتيوب أو سوند كلاود هتلاقي كمية برامج لكمية دعاااااا .. العدد رهيب ! .. ونرجع نقوووول أصل الفتن كثير .. أصل أيام الصحابة معرفش إيه .. والله يارامي إحنا اللي بنستعبط !! .. يعني تقدر تتعلم دينك وإنت قاعد في بيتك ! .. ومتقوليش مفيش وقت !! .. الأربع خمس ساعات بتوع الفيس دول ممكن تاخذ ساعه منهم تسمع فيهم حاجة مفيدة بدل قعدتك كدا بتلعب المزرعة السعيدة !..مقصدش إنت يارامي بس أقصد عامةً .. ولما نسمع قصة عن شدة التعلق بالله نقول لالا لا دا مش حقيقي .. الكلام دا نظري بس .. لما نعرف إن الرسول عليه الصلاة والسلام كان بيصلي حتى تتورم قدماه نقول إيه؟؟ .. دي " أساطير الأولين " .. لا يمكن تكون حقيقة .. لما نعرف إن سيدنا عروة ابن الزبير لما جم يقطعوا رجلوا قال إنه مش هيشرب خمرة ولما يسجد يقطعوها مش هيحس نقول لالا لا دي أساطير الاولين !!.. ولما واحد كان بيصلي والمسجد وقع جزء منه والناس جريت وبعدين لما رجعوا لاقوه لسه راعع !!! .. لسه راعع !!.. إستغرب إنهم جربوا وقالهم إنه محسش بحاجة أصلا ! .. لالا دي أساطير الأولين .. خرافات يعني .. مش كدا؟؟.. إحنا للأسف الشديد عندنا تصور خاطئ عن علاقة العبد بربه .. آه والله يارامي .. إنشغلنا بالدنيا أووووووووووووووووووووووووووووووو .. لدرجة خلطنا منتصورش إن دا ممكن يحصل أصلا ! .. إحنا اللي غلط يارامي .. إحنا اللي مش بنتق في الله .. إحنا اللي ديماً لما بنتوب بنذنب في ساعتها وبنسى الظن في الله ونقوووول .. " أصلنا هنرجع تانى ! .. أصلي جربت قبل كدا ومعرفتش إستحالة تنفع المرادي " .. فين أنا عند ظن عبدي بي !!.. فين بجد الإيمان والإسلام والتسليم لله .. يارررب بقی خلاص أنا رجعت ليك وخلاص .. تايب ! .. أنا تايب يارب وواثق فيك لأبعد لأبعد لأبعد حد .. واثق فيك يارب لما لانهاية ..

تهند وقال : والله يارامي .. أنا بحبك في الله

إبتسم رامي .. إبتسم حتى بدت نواجهه وقال : وأنا كمان بحبك أووي يا حازم .. متعرفش كلامك بيعمل إيه جوايا دلوقتي .. أنا .. أنا مش لاقى رد ..

قاطعه ببسمة : مش مستني منك رد .. أنا مستنيك عشان نروح سوا الجنة يارامي

قال رامي بحيرة : للدرجادي واثق في أعمالك وإنك بقيت حد كويس؟؟

هز رأسه نافياً وقال : للدرجادي واثق في ربنا .. ودي مش أساطير الأولين

قال رامى ببسمة : حلوة دي جبتها منين؟؟ .. مش قولتلي كل حاجة بنتعلمها

-بسمع لمحمد الغليظ .. بص .. هو مش ييططب عليك هو كلامه صريح بس بجد بجد بجد هو ماشاء الله عليه وغير فيا بفضل الله مفاهيم كثير أوى .. يعني بجد كلمة أساطير الأولين بقيت أقولها لنفسى كل ما أقول إني عمري ماهبقى زي الناس اللي حبت ربنا دول .. امال فين ثقتي في ربنا معلىش يعنى؟؟..وفين جهادي لنفسى وللفتن ؟ .. بجد لازم تيجي معايا يوم السبت ونحضرله سوا إن شاء الله ..

-ماشي .. أنا هروح بقى على بيتنا

-ماشي .. هتطلع تعمل إيه ؟

-مش عارف بصراحة .. بس عايز أفكر في كلامك تاني

-طب ماتكلم ربنا وتطلب مساعدته .. هو أصلاً اللي سخرلك الكلام دا أنا عمري ما اتكلمت كدا مع حد أصلاً .. فكلمه يارامى وقوله كل اللي بتفكر فيه ..

قال رامى : إن شاء الله بس إدعيلي

-حاضر .. بس عندي شرط يارامى .. قبل ماتصلي كلم نفسك دقيقتين وقولها إنها هي اللي فاهمة علاقة ربنا بينا غلط .. هي اللي فاكرة إن حب ربنا دا من أساطير الأولين .. وإدعي ربنا يرزقك لذة عبادته والتعلق بيها ويعينك على نفسك ديماً .. ووالله هتحس بمعنى تاني خالص وإن بتصلي ..

-من غير حلفان بس ياعم

-لأ هحلف .. عشان واثق في الله .. ولو محستش بمعنى تاني قولى وهصوم تلت أيام .. إتفقنا؟؟

قال رامى بجدية : شكلك واثق فعلاً

قال حازم براحة : واثق في الله وجداً

بتداري فيها بالصلاة " .. وغيرها من العبارات التي يضيق بها صدره ولكنه سيدوس على نفسه ويتحملها .. ذهب لغرفتها وطرق بابها بهدوء وقال بصوت رخيم : ماما عندك مصلية ؟

فتحت الباب وقالت وهي تتفحصه بعيناها : ليه هتصلي المغرب؟؟

-لأ صليته في الجامع .. عايز بس .. عايز يبقى عندي مصلية في أوضتي يعني عادي

رفعت حاجبها بتعجب ودخلت غرفتها وأحضرت مصلية من الدولاب وقالت : دي بتاعت أبوك الله يرحمه ..

تناولها منها وقال : شكراً ياماما ..

وجاء يرحل لغرفته ولكنها أوقفته قائلةً : إنت كنت فين الصبح؟..نزلت بعد ماجيت انبارح وش الفجر

-روحت أصلي الفجر ياماما مفيهاش مشكلة يعني .. وبعدها كلمت غيداء عشان كان عندها نبطشية والجو كان وحش فروحت وصلتها بيتها وحيت

عقدت ذراعيها أمام صدرها وقالت بضيق : غيداء!.. بنت ضررتي ؟

ابتسم وقال بسخرية : لأ ياماما إنتي اللي ضررتها مش هي اللي ضررتك

قالت بتبرم : لا والله ؟

-ماما إنتو مش ضراير أصلا بابا متجوزكوش على بعض

-المهم يعني عرفت إن الهانم أصلاً عندها نبطشية إزاي والحنية خدتك وروحت توصلها؟؟؟

-مش أختي .. أسيبها تمشي بدري في الجو والظروف دي لوحدها؟؟

-ياسلام؟؟..ما إنت سايب أختك اللي من أبوك وأمك نازلة من شوية ولا كلمتها ولا حاجة .. رغم إن الوقت متأخر ونفس الجو والظروف

قال بضيق : وإنتي سبتيها تنزل ليه متأخر كدا ؟

-مانت بتشوفها كل يوم وهي نازلة مبتقولهاش حاجة .. ولا بتكلمها على لبسها ولا اللي عملاه في خلقتها

قال رامي بضيق : كل واحد حر في نفسه ياماما

صاحت بغيرة واضحة : لا ياخويا مش كل واحد حر !.. طالما هتخاف على دي يبقى تخاف على دي كمان .. ولا دي أختك ودي بنت الشغالة مثلاً؟؟

فهم رامي ان والدته تغار من غيداء .. ابنة ضررتها التي غير موجودة في الدنيا من الأساس ! .. هنز رأسه وقال : طيب ياماما لما تيجي هكلمها في موضوع الخروج متأخر دا

وضعت يدها في خصرها وقالت : لأ متكلمهاش .. ابقى روح هاتها بليل بدل ما تتأخر برا .. زي ما بتعمل مع الست غيداء

زفر بضيق وقال بنفاذ صبر : طيب هكلمها وأقولها عايزة لو أوصلها وهي راجعة .. خلاص كدا عايزة حاجة تاني
؟؟؟؟؟؟؟؟

قالت ببرود : لأ

انصرف متجهاً نحو غرفته وأغلق الباب بضيق وقال لنفسه : فين براءة غيداء ولا حازم ؟.. حرام عليها بجد فصلتني من الجو اللي كنت عايش فيه !!.. هي ليه بتغير كدا .. ليه مش هاين عليها تشجعني لما حبيت أتغير !.. ليه محسساني إني غلظت لما عاملت غيداء كويس .. منا طول عمري بعاملها وحش جداً وهي علطول بتسأل عليا برضه ! .. أنا بجد حاسس بفراغ أو احتياج .. حاسس إني نفسي اترمي في حضن حد وأعيط .. مش هتبقى غيداء ولا حازم عشان شكلي قدامهم.. ولا ف حضن ماما أصلاً مش هتقدر .. أنا مش عارف اروح لميين في الدنيا دي يفهمني ..

نظر للمصلية بيده وقد تجمعت الدموع في عينه ..فرشها على الأرض وهو يتماسك كي لايبكي .. كبر تكبيرة الإحرام ولم يتأنى في قراءة الفاتحة أو السورة القصيرة .. أحس برغبته في التعجيل في السجود .. أراد أن تلامس جبهته الأرض .. اراد أن يكون أقرب ما يكون من الله .. أراد أن يسجد .. فحسب ! .. خر ساجداً وخرت دموعه

من مخادعها .. ظل يبكي وتتقطع انفاسه .. لا يدري ماذا يقول !! .. لا يعرف كيف يدعو الله .. أخذ يبكي وهو يشعر بخزي وخُذلان من نفسه .. يشعر أن نفسه المتسلطة خذلته .. نفسه التي أبعدهت عن الله باتباعها الشيطان .. لم تستطع أن تطب حرجه .. أحس بألم شديد لأنه كان بعييد .. أحس بالألم لأنه لا يدري كيف يدعو الله .. وماذا يقول في لحظة السجود تلك .. أحس بشوق لها ولكنه .. لكنه يشعر أنه أسير خطايا .. تقيد معاصيه لسانه أن ينطلق ويخبر الله بما يعانیه .. لا يعلم أن الله مطلع على خبايا القلوب ويعلم السر وأخفى .. لا يدري أن الحديث مع الله لا يحتاج إلى موعد .. ولا ترتيب كلمات ولا ترجمان .. الحديث مع الله لا يحتاج كلمات ! .. لا يحتاج سوى لروح .. روح تحتاج الله .. تشعر بفرها ومدلتها بدونه .. روح تشتاق لله .. تشتاق للقرب منه ..

جرت دموع رامي كالأنهار ولا أبالغ .. ألم تُدمع عينك أيها القارئ؟.. ألم تُحدثك روحك بالشوق فعلاً لله .. أألزمت تؤمن أن ذلك الشوق وذاك الحب وذاك الاحتياج من أساطير الأولين؟؟.. ألا تسمع ذاك الصوت بداخلك الذي يدعوك إلى السجود؟؟.. لا تكذبه .. هو موجود وليس خيال .. ألا تشتاق إلى سجدة تناجي فيها الله بروحك الآن .. لا وقت للتأخير .. فلقد تأخرت بالفعل كثيراً!.. إنتهز الفرصة إثبت لنفسك أن حب الله حيّ بقلبك .. وأن الشوق يشتعل بك .. الشوق لله .. إذهب إليه .. إبك بين يديه .. ناجيه بروحك .. هو من سخر لك تلك الكلمات والتي أقسم بالله أنها ماكانت في بالي حين بدأت أكتب منذ دقائق .. تلك الكلمات خصيصاً لك .. أرسلها الله إلي روحك بدون أي تدبير منك ولا مني .. هي لك .. فإغتنمها وإثبت لنفسك أنها ليست أساطير الأولين .. حين يكثر الكلام يقل المفعول .. لذا لا تتحدث .. قم وعد لله الآن .. قبل فوات الآوان .. قبل زوال مفعول رسالة الله لك .. واحذر مدخل الشيطان "التسويق" .. لا تقل سأقوم بعد لحظات .. بل قم الآن !

أنهى رامي ركعتين طويلتين لا يعلم كم مضى من الوقت وهو مع الله بروحه .. أحس أنه أفضى بدموعه ما كان يؤلمه .. تكلم لله عز وجل عن آلامه .. دعاه في النهاية أن يهديه .. يهديه فحسب !

وفى هذا المساء اتصل عمر بعليّ وأخبره على موافقته وطلب منه معرفة رأي منار التي وافقت هي الأخرى على الخطبة وأخبرت والدها قبل اتصال عمر بقليل بعد أن استخارت الله كثيراً كثيراً .. فمهما دبرنا للأمر يبقى تدير الله هو الأعلى .. وطلب عمر أن يحضر فى اليوم التالي مع أباه ليتفقوا على النفقات والتي لن يختلفوا عليها لأنهم عائلة واحدة تقريباً ..

مرت عدة أيام بدأ خلالها رامي يصحح مساره رغم ما لقي من سخرية أخته وتأنيب أمه الدائم لأنه على صلة بغيداء .. صار يضيق صدره بالحديث معها وصار لا يطيق الجلوس فى البيت .. وحين اشتكى لحازم طلب منه أن يصبر ويدعو لهما دائماً دون يأس .. فهما ليسا شخصين غريبين ليركهما .. هما أمه وأخته !

وافق كلاً من نور وهدير على بعضهما وطلب نور من خاله أن يذهب معه للحاج محمود فأبى متحججاً بانشغاله .. لا يعلم أن النبي صلّ الله عليه وسلم قد وصى على اليتيم خير وصاية ! .. ولكن نور لم يجزع ولم يحزن فقد طلب من عمه الحضور معه ووافق بكل سرور وفرحة لهذا الخبر السعيد وعاتبه عتاباً خفيفاً لأنه أخفى عنه من البداية وكان يود أن يذهب معه من أول مرة ولكن نور اعتذر بأدب منه فتقبل عمه وذهب معه للحاج محمود الذي وافق هو الآخر بإمكانات نور القليلة عاملاً بحديث رسول الله صلّ الله عليه وسلم ((إن جئكم من ترضون دينه وخلقه فزوجوه)) .. واتفقوا على أن يوفروا تكاليف الخطبة التي كانت على أهل العروس وسيشارك بها نور فى تجهيز بيته وكان هذا اقتراح هدير ولكن عمها لم يخبرهم بذلك

حضر عمر لمنزل منار وجلس مع والدها ليحدد موعد الخطبة .. حضرت بكامل حجابها وطلبت أن يبقى والدها لتحدث عمر فى أمر وتأخذ رأيه هو الآخر .. أخذت نفساً وقالت بتردد : هو ينفع ميقاش فى خطوبة؟؟

دُهِش الرجلان فقال والدها بتعجب : ليه يامنار مانتى كنتى موافقة قبل كدا ومقولتيش حاجة؟؟

نظرت ف الارض وقالت : بس يابابا أنا بقالي يومين بعمل استخارة وحاسة إنها هتبقى تكاليف ع الفاضي حتى لو
هنعملها ف البيت ماحنا برضه لازم نعمل زينة ونجيب دي جي حتى لو اسلامي وهنجيب اكل ويبيس دا غير
الكراسي .. ليه كل دا ؟؟

ضحك عليّ وقال بمرح : متخافيش يامنار الخطوبة ع العريس

ابتسم كليهما فقال عمر بنفس أسلوب عليّ : والفرح ع العروسة ماختلفناش ياعمي

ضحك الرجلان فقالت منار : والله مبهرش .. بتكلم جد .. يعني نعمل زى واحدة صاحبتى وفروا فلوس الخطوبة
وساهموا بيها مع العريس عشان فترة الخطوبة متطولش

نظر والدها باهتمام لعمر وقال : والله معنديش مشكلة لو إنتوا الاتنين وافقتم

صمت عمر قليلاً ثم قال : بس الناس هتعرف إزاي إننا مخطوبين ؟.. يعني انا هاجي عندكم بأى صفة لو محدش
عارف إنك اتخطبتى ؟.. وكمان كدا كدا الفرح إن شاء الله هيبقى فى الاجازة الكبيرة يعني لسه كام شهر .. بعون
الله هقدر خلالهم أخلص الشقة

ساد الصمت قليلاً فقالت منار : بس أنا مش عايزة نصرف فى حاجة ملهاش لازمة .. انا شايفة إن ممكن فلوسها
يتعمل بيها حاجة تانية أهم

صمت عمر مفكراً فقد شعر أنه مال لرأيها فقال والدها : ممكن تاخدوا فلوس الخطوبة وتخلوها بداية تحويش لعمرة
مثلاً أو حج .. إنتم وشطارركم بقى فى التحويش

قالت منار بحماس : صح كدا يابابا .. إيه رأيك ياعمر ؟

قال ببسمة ناظراً لوالدها : معنديش أي مشاكل دا أنا مرحب جداً بالموضوع .. بس إحنا كدا أعلننا الحرب فى العيلة
.. عميتى لو عرفت احتمال ..

قطع كلامه دخول والدة منار التى وضعت يدها فى خصرها وقالت بتذمر : أنا مش موافقة ..

نظر لها زوجها بتعجب فقالت باحراج : كنت جاية أجيبلكم العصير وسمعتك وانت بتقولهم يخلوا فلوس الخطوبة يطلعوا بيها عمرة !.. (ثم أردفت بعتاب) :مكنش العشم ياعليّ

قال عمر بسرعة محاولاً ألا يكذب أيضاً : لالا ياعمتو دا كان اقتراحنا احنا مش اقتراح عمو هو بس كان بيقلنا اقتراح نعمل إيه بفلوس الخطوبة مش أكثر

قالت سارة بنفاذ صبر :وانتو مش عايزين خطوبة ليه بقى إن شاء الله؟؟

قالت منار بحماس : عشان ياماما هتكون مصاريف ع الفاضي وكدا كدا الناس مش بيعجبها حاجة ولا بترضى .. فليه نتعب نفسنا ونعمل خطوبة وف الاخر متعجبش

قالت الأم بدهشة : هو احنا هنعزم مين يعنى؟؟ دول أخواتنا ! .. وبعدين أنا نفسي أفرح بيكي زي أي أم بتفرح ببنتها ولا عايزة بنتي أنا بقى اللي خطوبتها تبقى ف السر ولا عايزة الناس تقول على أبوكي بخيل مرضيش يعمل لبنته خطوبة !

ذُهلّت منار من أسلوب تفكير والدتها وقالت بتعجب : مايقولوا اللي يقولوه ياماما احنا مالنا بيهم !

صاحت الأم بانفعال : لأ طبعاً مينفعش نسيهم يقولوا اللي يقولوا !! .. إنتي مبيفرقش معاكي إنما أنا يهمني أوى شكل أبوكي قدام الناس !!

صمتت منار وكأنها قد ابتعلت لسانها فتدخل عليّ قائلاً بهدوء : أكيد منار متقصدهش كدا ياسارة ! .. هي عارفة إني مش ييفرق معايا كلام الناس

قالت سارة بحزن : بس أنا بيفرق معايا ! .. وعايزة أفرح ببنتي زي أي ست فى الدنيا .. حرام عليك ياعليّ دا هي بنت واحدة اللي عندى لو مفرحتش بيها أفرح بمين ! .. هو انا يعنى اللي حكمت مخلفش تاني !.. والله راضية وعمري مااعترضت .. فأرضوني إنتوا بقوا وسيبوني أفرح ببنتي (ثم نظرت لعمر قائلةً) : موافق ياعمر ؟

أحس عمر أنه في مأزق .. فهو دائماً مايميل لعتمه ولكنه قد يخسر منار حين يوافقها .. فهو لا يعلم ماذا سيكون رد فعلها .. تنهد وقال : اللي تشوفيه ياعمتو وتحبيه هنعملوا

جذبتة من يده واحتضنته وقالت : ربنا يخليك ليا يابني ياللى ديما مراضني .. ربنا عوضني بيك طول عمرك بترضيني
مش زي بنتي !!

اتسعت عينا منار ! .. وتجمعت الدموع في عينيها ولكنها حاولت التماسك كي لاتبكي أمامهم وقالت : خلاص
ياماما إعملوا اللي يريحكم ! .. بعد إذنكم

ثم خرجت مسرعة من الغرفة ودلفت غرفتها وأغلقت عليها بابها وارتمت على فراشها تبكي .. دفنت رأسها في
الوسادة وقالت لنفسها بحسرة : يعني بعد كل أطلع برضه مش بسمع كلامها ولا براضيها .. أنا عمرى ما رضيتك
ياماما !! .. إستغفر الله العظيم إستغفر الله العظيم إستغفر الله العظيم إستغفر الله العظيم إستغفر الله العظيم إستغفر
الله العظيم إستغفر الله العظيم إستغفر الله العظيم إستغفر الله العظيم .. والله ماعايزة أعترض ولا أقصد أقول عليها
حاجة .. إنت العالم يارب أنا بحبها قد إيه .. بس جرحتني أووي لما قالت إني مش براضيها ! .. طب عمر يقول
عليا إيه دلوقتي ؟؟ .. يعني حماته بتقول على خطيبته عمرها ما رضيتها أكيد هياخذ عنى فكرا وحشة .. وكمان يقول
.. بس !! هو أنا زعلانة عشان ماما ولا عشان عمر يقول عليا إيه !! .. لازم أكون زعلانة عشان ماما .. لازم
محطش موضوع عمر دا ف دماغى أصلا .. أنا زعلاناانة عشان ماما .. ماماويس .. ومكنش ينفع أسيبهم وأمشي
كدا زمانى زعلتها أكثر .. بس لو كنت وقتت كنت هعيط قدامهم وقدام عمر .. وأنا لما بيتدي أتكلم بعيط من غير
ما أحس بنفسى .. فكان لازم أمشي .. إستغفر الله العظيم إستغفر الله العظيم يارب مكنوش غلطت لما مشييت ..
ياررب سامحنى لو كنت زعلتها .. يارب إصلاحنا على بعض وأنا هعمل كل اللى هي عيزاه بس متبقاش زعلانة منى
وبعد قليل سمعت صوت غلق الباب خلف خروج عمر .. نهضت ومسحت دموعها ودخلت الحمام متلصصة كي
لايرها أحد وعليها اثر البكاء .. وغسلت وجهها جيداً ثم اتجهت نحو المطبخ حيث تقف والدتها وقالت باعتذار :
أنا آسفة ياماما .. إحنا هنعمل خطوبة زي ماتحبي .. آسفة والله لو كنت علطول بضايقك أو مش براضيكي ..

نظرت لها الأم وقالت : إعملي اللي يريحك يامنار أنا مش هجبرك على حاجة

-ماشي ياماما .. يبقى هنعمل خطوبة عشان اللي يرضيكي هو اللي يريحنى

نظرت لها الأم متفحصة وقالت : حسبتك هتيجي غضبانه وماسكة فى رأيك وتتناق ؟

ابتسمت منار وقالت : رأيي هو اللي يرضيكي ويريحك وتحبيه ..

صمتت الأم قليلاً ثم قالت وقد لانت ملامحها قليلاً : يعني إنتي نفسك في العمرة أوى ؟

قفزت منار من مكانها وقالت : أوووي أوووي أوووي ياماما .. نفسي نروح هناك أنا وإنتي وبابا .. الله بجد على بيت ربنا وجمال بيت ربنا والسكينة والهدوء والسلام والراحة اللي في بيت ربنا .. يارب يرزقنا أنا وإنتي وبابا عمرة قريبة

قالت الأم بمكر : طب وعمر ؟

قالت منار بخجل : عمر مش جوزي ياماما لسه غريب عني ..

ضحكت الأم ضحكة ماكرة لم تفهمها منار لكنها ابتسمت لأن والدتها ضحكت .. ثم قالت : بصي يامنار .. ممكن نقسم البلد نصين .. يعني تعملوا نص خطوبة كدا .. يعني مش لازم دي جي .. شغلي سماعات اللاب بتاعك وعمر كمان هيجيب اللاب بتاعه وواحد يشتغل ف الصالة والثاني في الاوضة اللي البنات هتقعد فيها

صاحت منار بفرحة : إيه دا بجد ؟؟.. كمان وافقتي إننا نفصل .. اللهم لك الحمد

-هعملكوا إيه يعني ماعمر كمان عايز كدا ..

أخذت منار تحمد الله في سرها فالآن لن تواجه أمها وحدها .. ثم قالت : تمام ياماما كدا هنوفر فلوس اللي جي واللي كان هيبقى ازعاج أصلاً للجيران فكدا أسلم بدل ماناخذ ذنوب .. بالنسبة بقى للاكل فكل واحد هياخذ حته جاتوه وكفاية عليه كدا وهنجيب جاتوه مضروب كمان

ضحكت الأم وقالت : يخرب عقلك يامنار .. بصي .. إما نعمل حاجة عدلة إما منعملش خالص .. احنا ياستي قولنا هنوفر في فلوس الزينة يعني مش لازم فروع كتير أوى

-طب مابلاش زينة أصلاً .. هنجيب فروع زي بتاعت رمضان كدا ونعلقهم في الصالة واللاوضة وهيبقى شكلهم حلو وشيك ومش أوفر يعني .. انما بقى نجيب لمض ونزل من البلكونة فدا اسراف وربنا هيحاسبنا عليه .. يعني كل النور دا لزمته إيه .. يعني افرضي حد من الجيران مش متيسر إنه يعمل لبنته خطوبة جامدة ويجييلها لمض وأنوار هيصة .. فدا احنا كدا هنجرحه .. فاحنا نزين بيتنا إحنا بس وزينة بالعقل كدا متعديش ال 100 جنية .. بالبالين

وكله .. وهجيب صحابي نقعد ننفخ ونعلق الزينة .. ومتقوليش الناس هتضحك علينا .. بالعكس دول هيقلدونا .. حد يلاقي توفير وميوفرش ؟.. ونبقى كسبنا ثواب ومأغضبناش ربنا ومأزعجناش حد وبدأنا نحوش عشان العمرة

صمتت سارة قليلاً ثم قالت : ماشي ياستي .. بس إنتوا وعمر هتقعدوا جنب بعض ولا كل واحد فى ركنه ؟

-إممم بصراحة فى الرويات اللى قريتها كانوا بيقعدوا جنب بعض سايبين مسافة طبعاً ومامتة بتلبسها الشبكة .. بس أنا مش حساها لطيفة يعني .. هو يقعد ف الصلاة مع الرجالة وأنا ف الاوضة معاكم .. عمر هيوافق إن شاء الله

-طب والأغانى ؟

-ياااه ياماما ما أكثرهم .. هنزل كل الأغانى الحلوة اللى ترضى ربنا بتاعت الأفراح وأعمل منها نسختين عشان لاب عمر .. وممكن أقول لحبيبة عشان كان معاها سيديهاية كدا كلها أناشيد حلوة أوى هختار منها الحلو

-وهتغزى صحابك ؟

-أكييد هدير وحبيبة لازم يجوا إن شاء الله .. بس الباقي خليهم ف الفرح ان شاء الله عشان نلاقى مكان لبنات العيلة

ضحكت الأم من أسلوبها المرح وقالت : ماشي .. هتبقى إمتة بقى ؟؟

-إممم مش عارفة

-مممكن ع الاسبوع اللى بعد الجاى نكون جهزنا

-لألاً لأ مش هينفع .. الاسبوع اللى بعده هبتدى امتحانات متهزرووش ياجدعان عايزة أطلع بامتياز مش بمادة

ضربتها الأم على كتفها وقالت : بعد الشرر ياشيخة !.. خلاص خليها الاسبوع الجاى وأمرنا لله

-طووويىب براحتك ياماما

قال نور بغرور مصطنع : بقيتي بيئة كدا ليه .. يااي هتبوظي شكلي قدام الراجل

قفزت إلى جواره وقالت بسرعة : مش وقت هزارك .. عرريس مين دا ؟؟

ضحك وقال : قال وبيقولوا البنات بتبقى مكسوفة .. يابنتي حرام عليكى قلبتى كل الموازين

قالت بجدية : يانووور متهزرش .. عريس مين ؟؟ .. حد تبع خالوا تانى ؟؟

قال ببسمة : لأ (ثم أردف):دا من طرفي أنا .. وهو السبب اللي قولته لخالوا وخلاه ميكلمناش تانى فى موضوع

سامى .. قولته إن فى واحد إتقدملك قبله وأنا مقولتللكيش عشان الدراسة وكدا

نظرت له باهتمام فأردف : أنا قولته يستنى لحد ما أشوف هعمل إيه ف موضوعى عشان متلخمش بكذا حاجة ..

بس الحمد لله أديني خطبت فكان لازم أقولك بقى .. بس هتقابليه وكدا ف الأجازة إن شاء الله عشان امتحاناتك ع

الابواب .. امتحاناتنا أقصد

-طب هو مين ؟؟

-حازم صاحبي

صاحت بدهشة : إيه !! .. حازم !

نظر بتعجب وسألها : ماله حازم وحش ؟؟

-والله مقصدش حاجة يانور بس اتفاجئت بس

-ماشي .. هاا بقى إيه رأيك فيه ؟

-هو أنا كنت أعرفه أصلا يعنى عشان أقول رأيي المفروض إنت اللي تقولي

-طيبيب ياستى .. حازم بني آدم متدين ماشاء الله وأحسبه على خير ولا أزكى أحد على الله .. عنده أخلاق ماشاء

الله .. كفاية إنك تقوليله دا ميرضيش ربنا وهو هيسيبه حالاً زى الموسيقى أول ماعرف إن فيها اختلاف بطل يسمعها

حتى فى بداية إلترامه اصلا .. ويصلي فى المسجد وبحسه عنده حساسية من البنات .. يعنى هو ماشاء الله عليه

بجد مش بيرفع عينه من الأرض ولو للحظة وعمره ما بيحتك بنات حتى الا فى الضرورة القصوى أووى .. وبحسه جدع أوى ماشاء الله عمرى ما انساله لما جابلي فى الثانوية مذكراته كلها متصورة وتسجيلات لدروس .. وحلف مياخدش فلوسهم رغم انهم اتكلفوا جامد.. ولا لما ماما الله يرحمها ماتت كان واقف معايا إزاي ولا لما الحج محمود مشاني من الشغل كان بيص ليوسف إزاي (قالها بمرح) .. هو ماشاء الله عليه بيتعلم ديما وديما بيدور ع المعلومات مش بيعلق نفسه فى رقبه شيخ .. وشايل مسئولية مامته وأخته من زمان .. وكمان دمه خفيف ومش معقد زي ناس كتير فاهمة الدين غلط

مطت حبيبة شفتها وقالت : بس عصبي جداً جداً يانور .. إنت متعرفش هو عمل إيه مع هدى يوم ما يوسف عمل الحادثة .. كان متعصب جداً ! .. وإنت عارف إني أكثر حاجة بخاف منها هي العصبية

تنهد نور وقال : هو طيب اوى يا حبيبة واليوم دا ربنا يعلم بيه كان عامل إزاي والخبر اللي سمعه

-بس حادثة يوسف وقلقه على اخته ميعصبوش أووى كدا

-والله مش موضوع يوسف بس .. الموضوع كان كبير اوى وتعبه جدا .. والحمد لله إنه اتحكم فى نفسه وخلص لحد كدا

نظرت للأرض بتفكير ثم قالت : طيب

-احكمي عليه بعد ماتقعدوا .. ماشي؟؟

-طب وهو هيجي امته ؟ ..

-أول ماتخلصوا امتحانات

-ربنا يسهل يانور هعمل استخارة قبل مانقعد ولو محستش براحة مش هقعد معاه .. ماشي؟؟

-ماشي

وفى اليوم التالى دخل حازم على أخته فوجدها ممسكة بهاتفها وتتطلع فيه باهتمام ولم تلحظ حتى دخوله رغم انه طرق الباب بخفة .. قطع على الشيطان مدخل الشك وقال ببسمة : إيه اللي واخذ عقلك ياعم ؟

فزعت حين سمعت صوته وقالت : حرام عليك فزعتني !!

ضحك وقال : خبطت على فكرة والباب كان مفتوح فدخلت .. بس انتى بقى اللي كنتى مركزة

هزت رأسها بسعادة وقالت : حبيبة بعتهلى شوية أغانى وبرامج فبرتبهم

-امممم زي إيه بقى؟؟

-يعني أغاني كدا أول مرة أسمع عنهم بس حلوين .. معرفش فين المزيكا بس تلاقيها مبتسمعش زيك بمزيكا .. وكام موسم لخواطر بتاعت أحمد الشقيري قالتلى حلويين وبرنامج أحبك ربي وخذعوك فقالوا وانسان جديد وبرامج تانية كثير كدا لمصطفى حسنى برضه .. معرفش بتحوشهم ولا إيه (قالتها بمرح)

جلس الى جوارها وقال بحماس : تعرفي إني أول مابدأت إتغير سمعت لمصطفى حسنى وشجعنى جدا جدا .. حسسني إن الدين حلو بجد بس بعده بدأت أسمع ناس أكثر وسبحاان الله كلهم حلويين جدا ! .. وكلهم كلامهم فوووق الوصف .. دا بجد أثبتلى قد إيه ديننا غني وجمييل أووى

تبسمت هدى وقالت بحماس : يعني أدوس مع مصطفى حسنى .. حلو يعني ؟

-ان شاء الله هيغير فيكي بأمر ربنا .. بس هما فيديوهات ولا صوت ؟

-لاياخويا صوت بس .. عشان غض البشر

-اسمه البصر ياأوختي .. يوم القيامة هتحمدي ربنا على إنك سمعتهم صوت بس .. عشان الواحد ميصمنش نفسه يبص بصة كدا مش مطبوطة وهو بيتفرج

ضحكت هدى من اسلوبه ثم تغيرت ملامحها وقالت بحزن : بس صحابي بيتريقوا عليا أوى .. رغم إني معملتش حاجه غير انى قولتلهم تعالوا نصلي الضهر قبل الدرس عشان ميفوتناش .. قعدوا يتريقوا ويقولولى ياست الشيخة ..

ربنا يتقبل يامولانا .. وقعدوا يتمسحوا فيا بتريقة كدا .. أنا قعدت أضحك ومشيت معاهم وصليت لما رجعت قبل العصر بدقايق !!

نظر لها بحزن وقال : يعني إنتى ضيعتى الصلاة حاضر وجماعه فى المسجد عشان صحابك اتريقوا شوية ؟؟ ..
ضيعتى 27 ضعف عشان هما اتريقوا

طأطأت رأسها وقالت : طب كنت أعمل إيه يعني !.. لو كنت دخلت صليت كانوا هيروحوا ويسيبوني

-طب أصلا السنتر جنب الجامع خالص فمكنتيش هتمشي كثير لوحدهك !.. وحتى لو هتمشي كثير فإنتي هتكوني فرحانة لأنك رضيتي ربنا وفضلتيه على صحابك .. اللي قصرنا فى فرض ! .. الصلاة ياهدى مفيهاش هزار .. لو اتساهلنا فيها عشان صحابنا وأخرناها هنفضل نتنازل لحد ما نضيعها بسببهم برضه

-طب يعني هما كلهم كدا .. هبقى أنا لوحدى اللي بقولهم يلا نصلي ! ..

-إنتى مرتاحة معاهم أصلا ياهدى ؟؟؟

-آه طبعا يا حازم دول صحابي اللي طالعة معاهم من ابتدائي وعشرة عمر

-طب من ساعة ما بدأتي تتغيري شوية وبطلتي ذنوب كنتى بتعملها وبدأتي تدوري على اللي يرضي ربنا هما شجعوكي عمرهم ؟؟

قالت بحزن ووجهها فى الأرض: بصراحة لأ .. ديماً بيحبطوني ويقولولي ياست الشيخة

-طب دا مريحك معاهم ؟؟

قالت بحزن كمن توشك على البكاء : لأ..بس أنا مقدرش أسببهم..كل الشلل دلوقتى مش هيقلوا واحدة زيادة تمشي معاهم .. ولو حاولت ألطف مع بنات هيغلسوا هما لأن محدش عايز صاحبة جديدة .. كلوا مكتفي بشلته

-إممم طب خلاص مش مشكلة حاولي توسطني معاهم بحيث متنحسريهمش وترضي ربنا برضه فى نفس الوقت

-محاول ولو إني لازم على حاجه فيهم على حساب الثانية

-طب تحبي تيجي على صحابك عشان ربنا ولا العكس؟

نظر لها فى عينيها فأكملت العبارة فى ذهنها "ولا أحب آجي على ربنا عشان صحابي" ! .. اتسعت عيناها وقالت وقد بدأت فى البكاء : طب انا المفروض أعمل إيه يا حازم !! .. المفروض أسبهم وأعيش لوحدي ! .. أروح وآجي لوحدي .. ومكلمهمش ! أخسر صحابي عشان أعرف أقرب من ربنا .. أنا عمري ماهعرف أعمل زيك لما بعدت عن رامى صاحبك و ..

قاطعها بسرعة : أنا مبعدهش عن رامى عشان أنا بدأت أتغير وهو لأ ! .. اتخانقنا خناقة جامدة وقاطعنا بعض لأنه عمل خطأ مقدرتش أسامحه عليه زمان .. وكان من حكمة ربنا إننا نبعد عن بعض لأنه كان هيكعلنى فى طريقي لربنا .. لو مكنوش صحابك دافع ليكي هيقوا حجر فى طريقك لربنا ! .. ودا بيكون أول اختبار بجد ياهدى لينا .. أنا هفضل ربنا ولا صحابي؟؟.. وأول ما بتختاري ربنا هو بيرزقك بصحبة صالحة إنتي مكنتيش متخيلة إنها هتبقى عندك أصلا ولا هتدفعك وتشجعك كدا ! ..

-يعني أنا المفروض أقاطعهم وأبعد عنهم؟؟.. دا حتى يبقى حرام !

-لأ طبعا ياهدى مقولتش كدا .. أنا عندي صحاب كتير جداً فى الكلية ووالله جدعين معايا وانا أديهم رقبتي لو محتاجين حاجة ! .. بس مين القريب مني؟؟؟؟.. مين اللى بتأثر بيه وبتعلم منه ومشكلته مشكلتى وهمه هو همي؟؟.. نور بس ياهدى .. أنا طول عمري أعرفه بس مقربتش منه غير لما بدأت أتغير بفضل ربنا وبجد ربنا رزقنى بيه لما قولت إنى هختار ربنا على صحابي .. هختار ربنا على قلبي وهوى نفسى .. والله ياهدى دلوقتى بقي هوى نفسى هو اللى يرضي ربنا فى بعض الأمور مقدرش أقول كلها .. بس حاجات عمري ماتخيلت إنى هبعد عنها وأبطلها .. دلوقتى بقي تبطلها والبعد عنها لأنها حرام هو اللى بيريح قلبي .. خليكى مع صحابك ياهدى بس وقت الصلاة قولى بجدية " أنا رايحة أصلي حد جاي معايا " .. مش تاخدي رأيهم وتقولي ماتيجوا نروح نصلي .. لأ إنشفي كدا وإعلنى الحرب على شيطانك وشياطينهم .. إنما هما لأ ! هما حبيهم وإديهم عينك لو احتاجوكي ومتقصرش مع واحدة فيهم طالما مش هتقصرى مع ربنا .. خليكى واحدة القرار إنك هتتغيرى وتقربى من ربنا .. جم معاكى أهلاً وسهلاً مجوووووووش بقى وفضلوا يتريقوا ويرجعوكي لورا يبقى إبعدي عنهم تدريجياً ودا هيكون أريحلك إن شاء الله

ضحكت وقالت : الخميس بتاع الاسبوع الجاي

-أنا جاية التلات .. مش فاضيه أنا الخميس معنديش أى حاجه

-هي الخميس إن كان عاجبك يعني .. وإلخصي خلصتى رصيدي .. خلىنى أعرف أكلم النسمة أقولها .. ياسلام على هدير وهدوء هدير .. مش إنتي !

-إقفلني يامنار بدل ما انا عمل حاجة لسه محددتهاش ..

-طووويب .. إنتوا هتيجوا من التلات بقى عشان نعلق الزينة ونظبط الكراسي والحاجات دي

-كنا شغالين عند سيادتك بالأجرة

-مش صحابي؟؟.. لازم أستغلكم

-حسبي الله ونعم الوكيل .. أنا مش عايزة أعرفكم أصلاً .. يلا يامنار إمشي هقول لولي الأمر وأبقى أقولك

-محسسنى إن حد بيعرف يقولك لأ .. يلاسلامات

-ثوانى بس بقولك إيه .. هو أنا ينفع أجيب حد معايا

-حد زي مين ؟

-أكيد مش أخويا يعنى .. أقصد هدى بيتهيا لي إنتي تعرفيها .. هي فى تانية ثانوي وإتقابلوا عندى فى الدار قبل كدا

.. إفتكرتها؟؟

-آآآه قصدك هدى أخت حازم .. طبعاً عرفها يابنتي أعرفها قبلك أصلاً ..

-لا بجد ؟

-آه بتكلم جد .. أنا أعرف حازم من أيام الحضانة وكنا بنلعب مع بعض فى ابتدائي فأكييد عارفة أخته

قالت حبيبة بفضول : وفضلتوا تلعبوا مع بعض لحد امته؟؟

-منا لسه سايبك من نص ساعه يابنتي

-معلش حاجة لسه عرفاها .. واحدة معرفة كلمتني وعزمتني على خطوبتها

وتمسكة جدا إني أحضر فانا عايزة أروح بقي

-مين هي ؟

-منار على .. كانت زميلتك زمان

اتسعت بسمة حازم وقال : بسم الله ماشاء الله ربنا يتمم لها بخير إن شاء الله ..

-يااااا عم الشيخ إخلص .. هروح ولا إيه ؟

-بس انتي متعرفيش حد هناك .. حتى مكنتيش بتقعدى معاها كثير أو هي صحبتك مثلا عشان أخليكي تروحي يعني

-طب إيه اللي خلاها تعزمنى ؟

-معرفش والله بس عادى فى عزومات بتبقى عشان دا الواجب يعنى

-بس هي قالتلى إنها معزمتش من صحابها غيري انا وبتنين كمان بس ومش عايزة أكثر من كدا يحضروا

أردفت بحماس : ماهو أنا مش هرووح لوحدي .. هي قالتلى آجى مع حبيبة وهنقعد سوا ونهيص شوية ونفرح بقي

-إممم .. طب هي خطوبة مختلطة ؟

-مش فاهمه !

-يعنى الستات مع الرجالة ولا منفصلين

-هتفرق يعني يا حازم ؟

-اه طبعاً هتفرق .. يعني لو مختلطة مش هسيبك تروحي ومنزعليش مني بس انتوا اصلاً مش هتعرفوا تهيصوا طالما هي مختلطة .. انما لو فاصلين الرجالة عن الستات يبقى هتقعدهوا براحتكم وتهيصوا براحتكم وانا هسيبك تروحي .. كلميها واعرفي

-هكلم حبيبة أسهل

قالتها وركضت للخارج ثم عادت بعد دقائق وقالت بسعادة : منفصلة ياسي حازم .. نياهاهاهاها مش هتلاقى حجة .. هرووووح يعني هرووووح

-إن شاء الله ياهدى هتروحي .. بس إنت امتحاناتك يوم السبت؟؟

-منا هخلص الخميس بقي ما إحنا بناخد إسبوع طحن ورا بعضه عشان احنا وسنة اولي بنمتحن ف نفس اليوم

-ربنا يعينك ويوفقك .. خلاص ماشي روعي

قفزت في مكانها وقالت بسعادة : الحمد لله

خرجت هدى وهي تحمد الله بسعادة لأن حازم وافق .. بينما رن هاتف حازم ورد بسعادة : السلام عليكم يرامي .. أنا تمام ياباشا إنت عامل إيه ؟ .. خير؟؟..تمام ماشي أنا فاضي بعد المغرب بس رايعين فين ؟.. خلاص ماشي نتقابل في المسجد .. ربنا يثبتنا.. سلام

أغلق معه وهو يفكر لم يريد رامي بعد المغرب وإلى أين سيصعبه .. لم يرهق باله بالتفكير فيما لن يتوصل إليه بل إنكب على كتبه يدرس فقد إقتربت الإمتحانات جداً ويود أن يتخرج بتقدير إمتياز لا جيد جداً .. فقد أخذ عهداً على نفسه بإتقان عمله وهو الدراسة .. وكلما مر بآية في القرآن الكريم تحث على الإتقان ذكرته بعهدته مع الله .. أنه سيكون من المحسنين والمتقين الذين يحبهم الله ويحب أعمالهم .. ظل يدرس إلى أن سمع آذان المغرب فتوضأ وانطلق للمسجد حيث قابل رامي ونور .. أدوا الصلاة سوياً وإستأذن نور ليذهب لعمله ثم نظر حازم لرامي وقال بسعادة : إيه أخبارك بقي ؟

-تمام والله يا حازم الحمد لله .. بدأت أسمع برامج ووجد بحس بأحاسيس غريبة وحلوة جداً .. وأينعم أنا مش بعمل كل اللي يقولوا عليه بس بحاول وأنا واثق إني هوصل بعون الله .. زي مامحمد الغليظ قال فى أحسن توبة

-ربنا يثبتك يارامي ويثبتنا .. المهم بقى ياباشا رايجين فين؟؟

نظر للأرض وقال بشئ من الاحراج : بصراحة حاولت أكلم رانيا أكثر من مرة على لبسها ومكايجها وهي صدتني جداً وقالتي ملكش دعوة وخليك فى نفسك وطبعاً بزعيق وصوت عالي .. أنا مبرضاش أتعصب عليها عشان متعيبش ماما بسبب خناقنا .. ماما برضه تعباني أووى وبتتريق عليا علطول ومعننش بستحمل وبزرق معاها كتير بس ساعات بعمل بكلامك وبكظم غيظي بس مبقدرش علطول .. فإدعيلي بقى .. المهم ياسيدي كنت عايز أجيب لرانيا فستان .. طويل وواسع بس شكله حلو برضه .. بحيث إن شكله يعجبها فترضى تلبسه لما يكون ع الموضة كمان .. والموضة السنادي فساتين فدا كويس الحمد لله

حك حازم لحيته وقال : إمامم مش فاهم برضه ؟..عايزيني آجي معاك يعني ؟

-لو مش هضايقتك

-لألاً طبعاً مش هتضايقتنى .. هاجي طبعاً معاك حد لاقى ثواب كدا بالساهل

-مش هعطلك عن المذاكرة يعني ؟

-لألاً طبعاً .. بس يلا بينا بقى عشان نخلص قبل العشا عشان بعد العشا عندي شغل

جذبه من يده وسارا سويا حتى دخلا محل وأخذوا يشاهدان ما به ولكن حازم لم يوافق على أى شئ لأن أى شئ منهم لا يعتبر حجاباً شرعياً ولا يمت له بصلة .. وبعد عدة محلات إستقرا عند محل يضع كثيراً من الفساتين .. أمسك رامي أحدهم وقال يا عجاب : حلو دا

نظر له حازم وقال : هو حلو فعلاً بس تداخل الألوان فظيعة أوى يارامي .. والمفروض الحجاب ميكونش زينة في نفسه

-يعني هجبلها فستان اسود يعني

-لا مقصدش كدا طبعاً .. هنجبلها ألوان بس مش فظيعة كدا ولا ملفتة زي اللي هناك دا .. جينز واللون اللي معاه
مش فظيع الحمد لله

-طب تمام هوحلو فعلاً بس هيجتاج بدني كارنيه تحته بقى

-لالالالا هنجيب بدني إسلامي .. بيبقى ماسك من عند الكتف بس بس بقيته واسع ومش مجسم الدراع .. أينعم دا
تحايل برضه بس أحسن من الباديهات الماسكة المنتشرة

-تمام

-بقولك إيه أنا هلف لفة كدا وهشوف لو حاجه عجبتني أجيبها لهدى بفكر أجبلها إسدال أو حاجه تنزل بيها
تصلي وعامل حسابي في فلوس .. هروح أتفرج ع الاسدالات وأرجعلك

وقف حازم أمام أحد الموديلات معجباً به وحين جذبه ليتفحصه قال ا إرادياً : حسبي الله ونعم الوكيل!

رمقه أحد الواقفين وقال باحتقان : مالك يا أخ إيه اللي مش عاجبك ؟

نظر له حازم بدهشة ثم قال بهدوء : يعنى اسدال كويس وزى الفل .. لازمته إيه الحزام اللمييع اللي ف النص دا !!
المفروض دا اسدال يعنى ستر ولا إيه ؟

-ماهو ستر وزى الفل أهو مش شايفه واسع قد إيه ؟؟

-هو واسع اه وجميل بس الحزام اللي ف النص دا مجسم !!

-وانت مالك إنت ماتسيب الناس تلبس براحتها !

-يعني أنا المفروض أغمض عيني وأمشي عادي ولاكأن دي كارثة !! .. إزاي أسيب أختي وأمي ومراتي يلبسوا حاجات
بالبشاعة دي .. وهما مضحوك عليهم وفاكرين إنهم كدا عداهم العيب عشان لايسين اسدال .. دا حتى الملحفة
مترحمتش !! .. الحزام دا بيجسم شكلهم وهما ماشيين !! .. يعني حرام !

-بلاش عقد بقى إنتم كدا ماسكين فى الخيابات دي والحاجات الصغيرة وسايين الحاجات الكبيرة والمشاكل الكبيرة

نظر له حازم بدهشة وهو لايعرف كيف يرد عليه ! أغيرته على نساء المسلمين أصبحت شيئاً صغيراً !! .. أكون ديوثاً ويرضى بأن ترتدي بنات المسلمين تلك الملابس التى تصفهن !! دون حتى أن تثور غيرته على بنات دينه ! ..
جاء حازم يتكلم لكن صوت فتاة قد سبقه : عندك حق ياشيخ .. ربنا يباركلك ..

ناولت الاسدال للبائع الذى كان يجادل حازم وقالت : الشيخ عنده حق .. مش هليس حاجة زي دي .. شكرا مش عيزاه هشوف موديل تانى يرضى ربنا

رقص قلب حازم فرحاً رغم أنه لم ينظر حتى للفتاة ولم يعلم هل هى صغيرة ام كبيرة.. كل ما اسعده أن إحدى بنات المسلمين لن تكون سلعة معروضة للرجال وهى مخدوعة بذلك الاسدال الخبيث ذو الحزام اللامع أسف الصدر مباشرةً والذى يفصل الجسد ويجسمه !

نظر للبائع الذى يرمقه بغضب وأحس أنه قد خسره بيعة .. فقال له : حلو الاسدال المتعلق هناك دا عايز منه واحد نبيتى غامق مقاس صغير

-صغير اطفال يعنى؟؟

-لا عروسة فى تايبة ثانوى بس مقاسها صغير

قال الرجل بتهكم : وإنت محرم عليها تنزل حتى تجيب لنفسها اللبس ؟

قال حازم ببسمة : لأ جايه ليها هدية عايز أفرحها

تعجب الرجل فأنتى لذلك الرجعي صاحب اللحية أن يشتري هدية لأخته ليسعدها .. وقال : طيب هجبهولك

سمع حازم صوتاً من خلفه : يعنى الاسدال دا مش ملفت ياشيخ ؟

كان صوت الفتاة التي أعطت للبائع الاسدال الاول ولم تشتريه بعد أن سمعت كلمات حازم .. ارتبك حازم فهو لا يحدث الفتيات أبداً وقال دون أن يلتفت لها : آه دا كويس ومش ملفت

-شكراً أوى هجيبه .. بس إنت بتعرف منين؟؟

كان بإمكانه أن يخبرها بوصف الحجاب الشرعي ولكنه اختار أن يرشدها دون أن يعطي للشيطان فرصة ليغلبه فقال : اكتبى على النت مواصفات الحجاب الشرعي وشوفي حلقة مصطفى حسنى بتاعت الحجاب هو بيشرح أحسن مني.. عن اذنك

قالها وابتعد مسرعاً نحو رامي الذي لم يحضر أى شئ من هذه المواقف وأخذ الفستان و"البادي الاسلامي" لرانيا وكذلك الاسدال لهدى وعلى وجه كل منهما بسمه واسعة لأن الله سخره لاسعاد مسلم

دخل رامي بيته وتعلو وجهه بسمه تفاؤل يخالطها القلق الذي يحاول طرده بثقته بالله .. طرق باب أخته التي قالت بتذمر : يوووو .. عايزة إيه ياماما !!

-انا رامي

-أووف .. عايز إيه برضه؟؟

-جايلك هدية

رفعت حاجبها بتعجب ثم قامت وفتحت له الباب وتفحصته بنظراتها وهو يضع يده خلف ظهره وقالت : جايلي إيه ؟

قال بسعادة : طب جوا طايب؟؟

أفسحت له فدخل وهو يخفى الكيس خلف ظهره أغلقت الباب فقال : غمضي عينك بقي

اغمضت عينها وهي تغغم : من امته ياخويا الرومانسية دى

لم يهتم بسخريتها وقال : فتحي كدا !

فتحت عينها وأخذت الكيس من يده بلهفة وفتحته ونظر للفتان بتمعن فقال بسعادة : أحلى فستان لقيته تحت
وع الموضة كمان عشان عارف إنك شيك ويتحبي تلبسي ع الموضة

لم تبتسم حتى وقالت : بس انا ملبسش فساتين

-بس هي اللي موضة السنادى ..

نظرت لعينيه وقالت : وإنت جايبهولى عشان موضة ولا عشان واسع ؟

قال باحراج : عشان الاتنين .. فى حاجات واسعة بس مش ع الموضة وشكلها مش حلو فجبتهك اللي واسع وع
الموضة وشكله حلو عشان عارف انك علطول شيك واستايل

-امم طيب .. عموماً شكرا بس مش هلبسه

-ليه؟؟

-محبش انا الحاجات دى وبعدين انت روحت لوحك ودخلت المحل عادى كدا ؟

-لأ حازم كان معايا .. هو اللي اختارك الفستان دا اصلا

قالت بتهكم : آآآه قووول كدا بقى ! .. صحابك المعقد بقى هو اللي شار عليك بالشورة الخايبه دي

-معقد إيه وشورة إيه !..أنا اللي قولتله عايز أجيبك فستان وهو جه معايا بس !

-طيب يلا يارامي اخرج بقى

خرج رامى وهو يشعر بياس من رد فعل أخته واتجه الى غرفته وفتح هاتفه وأخذ يقلب فيه الى أن وصل الى صور
تقى .. حددها بحزم ومسحها عاملاً بنصيحة احد الدعاة الذي قال له حين تصاب بحزن أو يأس أو هم عليك أن

تفعل حسنة أو توقف ذنباً وتتوب عنه ! .. مسح صورها وكل الصور الأخرى التي يجب أن يغض بصره عنها ومر بأصابعه على الأغاني ومسحها هي الأخرى في لحظة إعلان حرب على الشيطان

ارتمت رانيا على فراشها وقالت لنفسها وهي تتوعد لحازم : بقى كدا !! طب ياشيخ يامقعد اما وريتك !! .. طب اخويا وقدرت عليه مالك بيا انا !! عالم معقدة ومتخلفة !!

نادى حازم على أخته فور صعوده فحضرت لغرفته فقال لها بحماس : غمضي عينك

أغمضت عيناها فقال بمرح : تراراررا فتح ياباشا

فتحت عيناها وقفزت من مكانها وخطفت من يده الهدية المغلفة ونزعت عنها الغلاف بلهفة ثم صاحت بسعادة :
الله اسدال !! واللون اللي بحبه كمان

احتضنت الاسدال بسعادة فضحك حازم وقال : مفيش مرسى يا حزوومة؟؟

ضربته بخفة وقالت : لأ فييش .. بس في جزاك الله خيراً يا أخي

-وياكي يا أختي

ضحك كليهما وسمع حازم آذان العشاء فقال : أنا نازل بقى ياباشا وبعدها هطير ع الشغل .. سلامات

وبعد صلاة العشاء استأذن رامي وبقي نور برفقة حازم بالمسجد وقال له : عرفت إن يوسف طلع من المستشفى ؟

قال حازم بلامبالاة : طب كويس

-على فكرة يا حازم هو نفسه يجي يعتذرلك وعمال يقولى كل يوم أقولك تسامحه

رفع حازم حاجبه وقال : وهو عرف منين إنى عرفت؟؟؟

-أكيد مني يا حازم

نظر له حازم بغضب وقال : وإنت ليه تعرفه !! هو إنت مش بتقدر تسكت ليه يانور !!

قال نور بهدوء : هو سألني إنت عرفت ولا لأ .. أظنك متحبينش أبقي عند ربنا كداب؟؟

تنهد حازم وقال : مترعلش مني بس إنت عارف إن الموضوع دا بيضايقني

-طب وناوي تسامحه إمته يا حازم ؟

-أسامحه !! .. أسامح اللي كان بيضحك في وشي ويشتمني في ضهري ويكلم أختي ويخون صداقتنا !

-بس هو حلفلي إن هو مسح رسايل كتير إنت مقرتهاش .. كانوا إتفقوا على التغيير وعملوا لبعض بلوك خلاص ! ..
يعني كانوا أخذوا خطوة .. بص يا حازم هو أكيد غلط بس احنا ممكن نحتويه بحيث إنه يكون شخص أفضل إن شاء
الله .. ولما هيدخل الجامعة هيقابل أشكال وألوان فلازم يكون عنده صحبة ساند عليهم عشان ميمشيش مع أي حد
ويضيع .. فاهمني ؟

-في اييه يانور ! هو انا ليه ميعرفش أغلبك كدا أبدا !

ضحك نور وقال : عشان إنت قلبك طيب وميعرفش غير إنه يقتنع ويستجيب للحق

-ثبتي إنت كدا مثلا .. إما نشوف آخرتها معاك هتبقى إيه

ضحكا وخرجا من المسجد وإتجه نور لبيته وحازم لعمله

إقتربت من الصيدلية ونظرت لهيئتها قبل أن تدخل الصيدلية في زجاج أحد السيارات .. دخلتها فلم يلتفت لها حازم
وقام حسام فقد إتفقا على ان يقوم حسام إن كانت المشترية "فتاة" لأن حازم يرفض بيع مستحضرات التجميل .. قد

يسميه البعض متخلفاً ولكنه يفعل ما يراه صواباً ولا يهتم للومة لائم .. جلست الفتاة على كرسي وذهب حسام ليحضر لها ماطلبت .. فارتفع صوتها : إزيك يا حازم عامل إيه ؟؟

إلفتت عيناه إليها بلاإرادية وسرعان ماغض بصره عنها وقال : تمام

-ينفع تقيسلي الضغط عشان حاسة بهبوط أوي .. وحمدت ربنا إني لاقيتك هنا

نظر حازم لحسام الذي إنشغل فى تحضير التركيبة التى طلبتها .. وقام على مضض وخطا نحو الباترينه وأخذ جهاز الضغط .. جاءت تشمر الكم فقال بضيق : مش لازم تشمري

نظرت له بضيق وقالت : طيب

أمسك الجهاز وأخذ يلفه حول يدها بسرعة وعصبية واضحة كى ينتهي ويخرج بسرعة من هذا المأزق .. ربتت على كتفه وقالت بميوعة : مابراحة شوية على دراعي !.. الله !

عاد للخلف خطوة مندهشاً من جرأتها فضحكت وقالت بنفس أسلوبها : إيه يابني ماتقرب أنا هكلك !

خلع السماعات من أذنه وألقاها على الباترينه وقال بغضب وهو يخطو نحو المعمل : أنا مبقيسش ضغط !..

قالها ودخل المعمل بعصبية واخذ يستعيز بالله ويستغفر ! .. وبعد دقائق دخل حسام المعمل وقال : خلاص مشيت !.. فى حد يعمل اللى إنت عملته دا !! .. دي لو اشتكيتك للدكتورة وقالتلها إنك رميت السماعة فى وشها هتمشيك !!

خطر فى بال حازم شىء مختلف تماماً !! .. ماذا لو اخبرت رامى عكس ماحدث ! .. ماذا لو أخبرته أن حازم ضغط على ذراعها بطريقة سيئة مما جعلها تتفوه بتلك العبارات !..

استمر فى الاستغفار وحسام لايفهم مايحدث !! .. قال بتعجب : مالك يابني ؟؟؟

كان حازم مشغول البال حتى أنه لم يسمعه !! .. مرت عدة ثوانى بدون ان يجيبه فخرج حسام من المعمل وهو يظن ان حازم خائفاً من رد فعل صاحبة الصيدلية !

-قولت إبيه حضرتك بقى؟؟

-قولت لا إله إلا الله يا نور .. بص يا بنى أنا معنديش بنات فهي هدير بنتي اللي عمري ماهقصر معاها

-وأنا قولت لحضرتك قصر معاها !.. أنا بقول بس لو ينفع نكتب الكتاب أول ما الترم دا يخلص وكدا كدا الفرح إن شاء الله هيقى لما اخلص .. بس القصد إننا بنقى مرعوبين وإحنا قاعدين سوا لنقول حاجة تزعل ربنا وغصب عننا ممكن نغلط خصوصاً إن الخطوبة مدتها طويلة .. فلو ينفع نكتب الكتاب لما نخلص .. أنا بعمل استخراة من كام يوم وكل يوم أرتاح أكثر .. قولها برضه وإعملوا استخراة واللى فيه الخير ربنا يعمله

-ماشي يا بنى بس كنت عايز اقولك على حاجه .. هدير مصممة متجيش صيني جديد بتقولى بتاع أمها الله يرحمها موجود وسليم ومتشال فى الشقة اللي هي قاعدة فيها .. فلما قولتها إن دا من الاتفاقات ومينفعش يتغير قالتلى أشوفه بكام وأشارك معاك بتمنه فى الشقة هو والحاجات الثانية اللي هي ناوية توفر فيها إمتقع وجه نور فقال الشيخ مسرعاً : والله يا نور دا ميقلس منك حاجة أبداً .. هي بس نفسها متبدرش ..

-طب ماهى توفر براحتها بس تدبني الفلوس دى بأمارة إيه ! .. معلش يا حاج أنا مش موافق

-بس دي إتفاقات يا بنى مينفعش تتغير

-لأ طبعاً ينفع .. يعنى إحنا متفقين إنكم هتجيبوا مثلاً حاجات المطبخ فانتوا هتجهزوها بمعرفتكم ..يعني مش ملزمين تشتروها .. فاهمنى؟؟

-طايب يا بنى هقولها وربنا يسهل وتقتنع .. لحسن هي لما بتعانده بتعانده يعنى .. تصدق بتقول لأم يوسف إنها مش عايزة سفرى ! ..

قال نور مبتسماً : زى الرواية يعنى

-رواية إيه؟؟

-لالالا متاخذش فى بالك .. هو دا مش عند .. هي مش عايزة تكلفنى فوق طاقتى .. ودا المفروض أحترمه فيها ..
ربنا يباركلك فيها

ربت الحاج على كتفه وهو يقول : وباركلك فيها ياعم هي هتبقى مراتى ولا مراتك

وفى وقت الفجر وبعد ان فرغ نور وحازم من الصلاة التى لم يحضرها رامى .. إتصل به حازم وهما فى الطريق فرد
عليه بسرعة : والله عارف إنك هتشتمنى يا حازم .. صليت ف الجامع اللى تحت البيت .. معلىش بس رانيا تعبانة
أووي يادوب نزلت بسرعة وطلعت عشان مسبهاش هي وماما ! .. الله يسلمك يا حازم .. وعليكم السلام

أغلق حازم الخط ونظر لنور قائلاً : صلا تحت بيته عشان اخته تعبانة ومحيش يتأخر عليها ..

-طيب .. أنا عامل فيك حركة كدا معرفش هتسامحنى عليها ولا إيه؟؟

-ايه يانووور .. خير ؟

-بصراحة يوسف مستنيك تحت بيتك !

نظر له حازم ولم يعلق فقال نور : خلاص بقى قلبك أبيض !

-وانت متأكد إنه جاي تحت بيتي عشاني؟؟

نظر له نور بدهشة وقال : فين حسن الظن يا حازم !! حرااام عليك !!

-إستغفر الله العظيم والله ما أقصد أسئى الظن

-طيب يا حازم إسمعه بقى وصفوا كدا مع بعضيكم

أغلق رامى هاتفه وعاد إلى جوار أخته التي كانت تبكي بحرقة فمسح على رأسها وقال بعطف : برضه مش عايزة تقوليلى إيه اللى حصل مخليكي منهاررة كدا ؟؟.. إنتي مش سخنة ! .. بالله عليكى قوليلي في حد ضايقتك ؟؟..
والله هجبلك حقتك من نن عينه !!

قالت بصوت مرتجف وسط دموعها : هتجيبلي حقي يعنى ؟

قال بقوة : طبعا ! قوليلي بس إيه اللى حصل ومين اللى زعلك وأنا والله ماهسيبه !!

مسحت دموعها وقالت : خلاص يارامي أنا هقولك كل حاجة

إقترب منها وقبلها بين عينيها كما كان يفعل حبيينا صلّ الله عليه وسلم مع ابنته فاطمة .. وقال فى حنان : قوليلي ياستي كل حاجة

دخل حازم عمارته فوجد يوسف في انتظاره جالسا على السلم .. هب ومد يده لحازم وقال ببسمة : ازيك يا حازم ؟
صافحه حازم دون أن يرد وظل ينظر له عدة لحظات إنصهر خلالهم يوسف من فرط إحراجه من فعلته ! .. وبعد لحظات طويلة من الصمت قال حازم بحزم : إنت مجتث الصلاة ليه ؟؟.. مش بقيت قرد أهو وماشي عادى !

إبتلع يوسف ريقه بصعوبة وقال : صليت ف مسجد تاني

-وبقيت الفروض بتصليها فى المسجد برضه ؟

-على قد ماأقدر

نظر له حازم وأشفق على حاله وهو يتصبب عرقاً وينظر للأرض فى احراج وقال : أنا مش زعلان منك على فكرا
عشان تبقى منفعل أوي كدا

قال يوسف وقد تجمعت الدموع فى عينيه : بس أنا مكسوف منك أوي .. أنا خنت الأمانة يا صاحبي ! .. خنت
ثقتك ! .. متسامحنيش ! إفضل زعلان منى وقاطعنى العمر كله متكلمنيش !!

-ماشي .. عايز حاجة تاني؟؟

نظر له يوسف بدهشة فابتسم حازم وقال : خلاص ياعم وربنا قولتلك مازعلان ! ..

-بس أنا مكسوف !

-مني ولا من ربنا ؟ .. يعني مش قادر تبص فى عينى وتقف قدامى رغم إنك عايش فى أرض ربنا عادى !!

صمت يوسف فأدرف حازم : مش بقطمك على فكرا .. المهم تكون إتعلمت من غلطك

-أقسم بالله يا حازم إتعلمت ! .. إتعلمت أوى وانا بين الحيا والموت و ..

قاطعه حازم : مش لازم تقعد تفتكر الأحداث الحزينة كلها دلوقتى

نظر له يوسف أخيراً فجلس حازم على السلم وأجلسه إلى جواره قائلاً : أخبار المذاكرة إيه؟؟

-يعنى .. دعواتك بقى يا حازم

-هدعيلك علطول وعايز أشوفك فى المسجد بتاعنا بقى اللي اتعودت أشوفك فيه

-حاضر يا حازم .. يعنى انت سامحتنى خلاص صح؟؟

-ايوا صح ياسيدي .. بس يايوسف لو شوفتك غلطت غلطة زى دى تانى احتمال أقتلك ومش بهزر !! ..

-والله اتعلمت يا حازم

احتضنه حازم وهمس له : ربنا يحبك ويثبت قلبك يايوسف

وفي الصباح استيقظ حازم على صوت رنين هاتفه .. فتح عينيه بصعوبة ونظر للرقم المتصل واتسعت عيناه في دهشة

ورد بغير تصديق : السلام عليكم !

-وعليكم السلام .. ايه يابنى كل دا نووووم؟؟

ظل حازم ينصت في دهشة فضحك المتصل وقال : ايه طيب هتفضل مدهوول لحد ما رصيدي يخلص يعنى؟؟

ابتلع حازم ريقه وقال بفرحة : احمد أحمد؟؟؟؟

-ايوا ياسيدي أحمد أحمد مش حد تانى وربنا

ضحك حازم وقال : يااه وحشتني أووي

-معدرةً يا حازم بس أنا مرتبط .. علاقتنا مينفعش تستمر أكثر من كدا

ضحك حازم بشدة فأردف أحمد بخفة : لازم ننفصل

مسح حازم الدمعة التي تحركت في عينيه من شدة الفرح وقال : ننفصل نرتبط أى حاجة مش مهم .. المهم نفسي

أشوفك أوى !

-وأنا كمان .. مش أنا قولتلك ياتيبيت لما تعوز تشوفني تديني تليفون وأنا هجيلك

-دا على أساس إنه بيبقى مفتوح مثلاً

ضحك أحمد فأردف حازم : أو بترد عليا ع الفيس مثلاً

أكمل فى الضحك وقال : مثلاً يعنى

-شوفت بقى مين اللي تبيت ؟

-يا بن اللذين يا حازم .. دا إنت قلبك إسود أوي

-مش إسود ولا حاجة بس مبحش البكش .. وإنت عارف إني مبعزلك منك حتى لو مبرتش عليا وانا عارف إنه

مش بيبقى قصدك بتبقى ديماً مشغوول وإنك بتأجلني أنا لأنني مبعزلك بس لما بحتاجك بترد علطول .. المهم أخبار

الدار إييه؟؟

-ماهو دا تقريباً الموضوع اللي بكلمك عشانه

-خيراً؟؟

قال أحمد بهدوء : الدار إتقفلت من شهرين

قال حازم بصدمة : لاحول ولا قوة إلا بالله

قال أحمد ببسمة : وهنفتح دار تانية إن شاء الله بنفس الاسم ولو اتقفلت هنفتح تاني وتالت ومليون

-وهى اتقفلت ليه اصلاً؟؟

-اختبار من ربنا عشان يعرف هنقدر نكمل ولا لأ وهل احنا صادقين فعلاً فى نوايانا ولا لأ ..

-إنت إزاي كل حاجة بتفكر فيها كدا؟؟..إزاي بتقدر تصبر كدا؟؟..إنت الدار دي مكملتش سنة وصرفت عليها

كثير أوي وبعث عربيتك عشان تقدر تفتحها !

قال أحمد ببسمة : ودلوقتي نقلت فى بيت ايجار وبعث شقتى وقررت أفتحها تاني.. واحدة تانية أكبر إن شاء الله

واشمل كمان .. وبصراحة بفكر أفتحها فى المنطقة بتاعتكم عشان اكون قريب منك إنت نور وأستفيد بيكم برضه

معايها ويبقى عمل خير بيجمعنا كلنا إن شاء الله وإن شاء الله يجمعنا فى الجنة زى ماجمعنا فى الدنيا

أنصت حازم باهتمام أكبر فأردف أحمد : قولت إيه يا باشا ؟

قال حازم بسعادة : معاك طبعاً يا أحمد ياذن الله بس عايز أفهم أكثر

-وأنا أكيد مش هسيبك غير لما أفهمك أكثر .. بس شوف معاد تكون إنت ونور فاضيين فيه عشان أشرح مرة واحدة اللي هنعمله

-تمام .. هي هتبقى دار تحفيظ ودروس عادى صح؟؟

-لما نتقابل بقى ياعم .. كلم صاحبك وحددوا معاد أجيلكم فيه ياذن الله بس يكون على بكر بالكتير ..

-خليها إنهاردة .. ممكن تيجي بعد الظهر .. أنا ونور معندناش كلية وهو شغله بعد العصر وانا كدا كدا اجازة برضه من الشغل ففاضي في أي وقت غير كدا فاضيين بأمر الله

-ماشي يبقى هجيلكم ونصلي الضهر سوا إن شاء الله .. ومش هطول عشان مذاكرتكم

-ماشي .. نتقابل إن شاء الله في اول مكان عرفتك فيه

-ياواد يارومانسي إنت ..

-دا إنت فصيل ياشيخ

-إقفل يلا عشان رصيدي

-ماشي ياعم المدبر .. السلام عليكم

-وعليكم السلام ورحمة الله

وفي وقت صلاة الظهر آتى أحمد يوسف إلى المسجد الذي قابل به حازم لأول مرة منذ سنيين وكان سبباً في تغييره بفضل الله .. إحتضنه حازم بشوق وكذلك نور الذي لم يصدق حازم حين أخبره بأن أحمد سيقابلهم بالمسجد .. أقيمت الصلاة وصلا ثلاثهم سوياً .. كذلك الظهر الذي صلوههم سوياً منذ سنين في رمضان قبل درس أحمد "فهمت الدنيا" .. وبعدها أنهوا الصلاة أقبل أحمد على الإمام وسلم عليه وتحدث معه فقد كان يشناق إلى ذلك

الشاب الذي أحبه بشدة وأحبه لتعلقه بالله -تعالى- وحبه للخير لغيره والذي جعل كل همه أن يقرب الناس من الله

..

نظر حازم لنور قبل أن يعود احمد وقال له :انا صالحت يوسف على فكرة وقولته يرجع يصلي معانا متعرفش هو فين

؟

ابتسم نور وقال : هو كلمنى انبارح بعد مارجع من عندك وقالى وكان طائر من الفرحة أصلاً .. ربنا يفرحك يا حازم

زي ما فرحته

-طب هو مجاش ليه؟؟

-عنده درس وقالى هيطلع منه على الصلاة علطول فى المسجد اللي جنب السنتر ..

-طيب .. طب ورامي إيه نظامه برضه مجاش؟؟

-إنت ناسي إن رامي مدرس وهما بيطلعوا دلوقتى من المدرسة أكيد هيصلي فى المسجد اللي جنب المدرسة

-آآآه صح ! .. انا إزاي مخدتش بالي

إقترب أحمد وقال : بتكلموا في إيه يا آواريب

ضحك كليهما وقال نور : آواريب طيب ياعم أحمد .. أخبار عمرو ابن اختك إيه ؟

-زى الفل الحمد لله .. إتجوز بقى ياعم نور وهاتله بنوتة نجوزهم لبعض لما يكبروا إن شاء الله

قال حازم وبحزن مصطنع : بقيتوا نسايب خلاص ونسيتوني

-متزعلش ياعم حازم .. هات إنت بنت تانية ونجوزها له برضه .. مثنى وثلاث ورباع

-اللى يسمعك يقول متجوز أربعة

قال أحمد : الحمد لله على نعمة زوجتي بجد وربنا يرزقكم ويرزق كل شباب المسلمين زوجات صالحات ..
مأطنش إن عمرري في حياتي هفكر إنى أتجوز تاني .. هي دي اللي ربنا إختارها لي واللى اتعاهدنا سوا على الجنة

-ربنا يرزقكم الفردوس الأعلى سوا

-يارب يانور أنا وإنت وحازم وكل شباب المسلمين

نظر إليهما باهتمام وقال : انا بصراحة حاسس إنى بغلط لما بتكلم في بيت ربنا أو بضحك .. فينفع نروح نقعد في
أى حته؟؟

-تمام يا احمد بس هو حرام إننا نتكلم فى المسجد؟؟

-لأ طبعاً يا حازم بس إحنا بنضحك ونهزر وفي ناس جاية لربنا ويتصلي هنا وتقرأ قرآن دلوقتي نفسها قلوبها تخشع ..
واحنا بكلامنا بنشتتهم .. صح ولا اييه؟؟

-تمام .. تعالوا نطلع نقعد ع البحر .. مش هياخد ربع ساعه مشي ونتكلم وإحنا ماشيين .. قشطة؟

قالا سوياً : تمام يانور

خرجوا معاً من المسجد وساروا باتجاه البحر فقال حازم باهتمام : قولنا بقى موضوع الدار

قال نور باستفهام: دار إيه ؟

قال أحمد بمكر: مانت عارف إنى استغلالي أكيد مش جاي أشوفكم كدا من غير مصلحة ..

ضحك كليهما فأدرف أحمد : الدار بتاعه إتقفلت

قال نور بصدمة : لاحول ولا قوة إلا بالله .. ليه؟؟؟؟

-ربنا أراد كدا .. مش هدخل في تفاصيل عشان منجش سيرة حد .. المهم يعني عايزين نفتحها تاني بنفس الاسم
هنا في منطقتكم بس هتكون اكبر إن شاء الله وأشمّل وأعم .. هفسر من غير ماتسألوا .. اكبر يعنى هتكون مساحتها
كبيرة ورجال ونساء مش رجال بس .. طبعاً دول لوحدهم ودوول لوحدهم تماماً منفصلين فى المباني حتى مش ف

المواعيد .. الدار الأولانية كانت تحفيظ بتفسير وتجويد وشوية دروس فقه لما بنقدر .. دي إن شاء الله هتكون اسم على مسمى .. اسمها "خطوة" وهتكون فعلاً باذن الله باذن الله خطوة لربنا .. ((وأما بنعمة ربك فحدث)) واحنا الحمد لله ربنا أنعم علينا ولو فضلنا نحمده من هنا لحد ماموت مش هنوفي .. أبسط حاجة بقى نعملها إحنا إننا نحاول نشد الناس لربنا .. بأسلوبنا هنشدهم للدين .. اللي هو جميل أووى أووى بس الناس واخدة عنه فكرا إنه صعب وإنه بعد عن الحياة وإنه تعقيد .. احنا بقى هتكون مهمتنا إننا نكشف المعتقد الخاطيء دا ! .. ونزرع مفهوم جديد .. مش هنألفه من عندنا طبعاً ! بس هو جديد على الناس وهيبقى جديد علينا كمان .. هنزرع الدين جوانا وفي حياتنا .. عايز نعمل زى ماعمره خالد عمل فى برنامج الايمان والعصر .. يعني هنجدد .. وهنشرح القرآن بطريقة جديدة تشد الشباب أكثر وناخد منه آيات ونسقطها على حياتنا ونطلع منه الأهداف الانسانية اللي هي موجودة فعلاً ونطلع منه مبادئ نعيش بيها حياتنا إن شاء الله .. هنتكر فى ديننا إن شاء الله طرق تقرب الناس من ربنا .. هو الكلام سهل أووي .. بس برضه مفيش حاجة صعبة بعون الله .. يعني إحنا هندرس بجد وهنحضر كل الدروس الللى نقدر عليها ف الدار عشان نتعلم من بعض ونستفيد من بعض .. طبعاً الموضوع مش مقتصر علينا إحنا الثلاثة .. بس أنا بدور على ناس عندهم نفس أهدافنا وأحلامنا بالجنة .. يعني عمرنا مانزعل لو حاجة حصلت فى سبيل إننا نوصل لحلمنا .. معايا سبع شباب غيركم يعنى احنا كدا عشرة إن شاء الله .. خمسة منا دارسين فقه ويقدرنا يدوا دروس تمام إن شاء الله .. وكلنا خاتمين القرآن معادا اتنين فى السكة .. المهم عندي إننا نبقى بنفهم يعني .. وميقاش أسلوبنا صعب فى الدعوة .. ويبقى الدار دا بيتنا فعلاً واحنا أسرة مع بعضينا .. ويكون بجد حلمنا وهدفنا هو الجنة وبس ! .. آرائكم بقى ؟

لم يترك لهما فرصة للتفكير: على فكرة دا غصبٍ عنكم هتشاركوا معنا مش بمزاجكم يعني

قال حازم بغير تصديق: إنت بتتكلم جد يا أحمد؟؟..هنبقى معاك فعلاً فى الدار إن شاء الله؟؟

-هو أنا فاضي يابنى عشان آجي أهزر معاك

ضحك ثلاثتهم ثم قال نور : بس إنت يا أحمد شغال فى الدعوة من زمان .. وعندك علم إنما أنا وحازم لأ ! ..يعني

احنا اه حافظين القرآن بس مش كل من حفظ القرآن ينفع يشتغل فى الدعوة صح؟؟

حك أحمد لحيته بتفكير وقال : بص يانور .. إحنا كلنا معندناش علم يعني كل ماتتعلم هتأكد إنك ماتعلمتش أصلاً .. إحنا مش هنفتح مركز اعداد دعاة ولا هنعلم علم شرعي وندي شهادات ! .. إحنا عايزين ناخذ خطوة لربنا ونشد الناس أكثر لربنا وأي حد بيحضر مثلاً ونفسه بجد يشاركنا فى خطواتنا وياخذ خطوة فى الدعوة لربنا عشان ربنا مش عشان يبقى داعية هنديله فرصة إنه يدي درس أو محاضرة فى الدار عندنا .. هو هياألفهم مثلاً؟؟ .. طبعاً لأ .. الكتب عن ربنا كتير أووى والدروس والبرامج .. فى ناس أو الأغلب يعني بيكسل يقرأ أو يدور .. أهى المحاضرات دي هتبقى تسهيل ليهم .. يعنى إنت قرأت كذا كتاب أو سمعت كذا برنامج واستفدت منهم جداً ونفسك توصل الفائدة دي .. فانت هتكتب درس أو محاضرة بأسلوبك طبعاً عشان نتعلم نكون مستقلين وشخصيات بناءة وهتقدمها

قال حازم : طب افرض فى معلومات غلط اتقالت؟؟.. مش هناخذ وزر ؟

-طبعاً هناخذ لأننا قصرنا ! .. فعشان كذا احنا مثلاً هنعلن إن فى مسابقة "الداعية الصغير " واللى عنده درس أو محاضرة أو خاطرة حتى بس كويسة يقدر يقدمهم قدام الناس يجبهالنا فى خلال اسبوع .. والفريق كله هيطلع عليهم بالتفصيل لمدة اسبوع بعده كمان وكل واحد هيدي الدرس تقسيم من عشرة مثلاً .. وفى الاخر نشوف مين أفضل واحد وصاحبه يقدمه واللى اخذ المركز الثانى يقدم فى اليوم اللى بعده وهكذا .. احنا هناخذ أحسن خمسة .. واللى فيهم أخطاء هنقول لأصحابهم عليها طبعاً ولو حلوين نخليهم يصححوا الخطأ ويقدموهم .. وهنتأكد من صحة الأحاديث والايات .. بس دا هيبقى قدام شوية لما نفتح الدار ونمشي فيها فترة ونشوف هنمشي ازاي عشان منفتحش على نفسنا كذا حاجة فى نفس الوقت عشان منقصرش ..

نظراً لبعضهما ثم نظراً لأحمد وقال نور : طب وبتاعت النساء مين هيبقى مسئول عنها؟؟

-زوجتي ووالدتها أصلاً كان عندها دار وأختي واتنين من قرايبها واتنين من أصحابها عندهم نفس حلمنا .. وهيزيدوا إن شاء الله

قال حازم : أنا موافق ومبسوط جداً ومتفائل إن شاء الله .. بس هعمل استخارة الأول ويارب نكون قد المسئولية

-إن شاء الله يا حازم وإنت يانور ؟

-هي حاجة متترفضش أصلاً وخصوصاً إني نفسي أووي من زمان أشتغل في الدعوة بس معرفش عندي القدرة ولا لأ !

قال حازم مسرعاً : لو إنت عايز فعلاً توصل الناس لربنا هتلاقي القدرة موجودة .. وبعدين مش هتبقى أول مرة لييك يعني يانور .. مانت شغال داعية على الضيق

-طيب هعمل استخارة برضه وأقولك

-تمام يا شباب .. بس طبعاً أى حاجة هتبقى بعد شهر عشان تكونوا خلصتم الترم دا .. وتبدؤا معانا من الاجازة الصغيرة وتظبطوا نفسكم في الترم التاني هتشتغلوا معانا ان شاء الله بس هيكون يوم أو اتنين فى الاسبوع بالكثير أوى عشان دراستكم وشغلكم برضه

-طب يا أحمد المطلوب مننا إيه دلوقتي؟؟

-هتستخبروا وتبدؤا بنفسكم .. يعني هتبدؤا تطلعوا المبادئ اللي ممكن نعيش بيها من القرآن .. وتراجعوا التفسير ولو تعرفوا يبقى فيه ملخصات خفيفة تشرحوها .. وطبعاً إنتوا ممكن تبدؤا بجزء عم بس فى الأول وبعد كدا تبارك وهكذا .. يعني نبدأ من السهل والصغير الأول ..

قال نور بحماس : تمام يا أحمد .. وأنا خطيبي كانت قالتلي إنها عاملة ملخصات لتفسير الشعرواي كانت بتقرأ كل يوم تفسير آية أو اتنين وتلخصهم بأسلوبها

-تمام أووي .. وممكن تسألها لو عايزة تشتغل معانا في دار البنات مع زوجتي دا لو هي عايزة وإنت موافق يعني

-ماشي هقولها وأنا عمري ماهعترض وهي كانت بتقولى أصلاً إنها عايزة تبدأ تحفيظ قرآن .. وهقول لأختي برضه

-تمام وساعتها هتبقى إحتلنا رسمي يامستر نور

ضحك ثلاثهم فقال حازم بحماس : بجد يا أحمد حمستني أووي بدأت أحلم باليوم اللي هنفتح فيه الدار .. أنا

هبدأ تحويش من هذه اللحظة إن شاء الله

قال نور بحماس : وأنا كمان .. ومفيش آيس كريم بقى خلاص كنت ناوي أعزكم بس يلا وفرتم نحوشهم لحلمنا أحسن

أمسكه أحمد من كتفه وكأنه يترجاه وقال : لالا لا يانور حوش من بكرة .. إعزنا يانور .. إعزنا !

ضربه على كتفه وقال : مفيش يعني مفيش .. من دلوقتي هنرفع شعار التوفير باذن الله

تنهد الآخرا وقال : إن شاء الله

جذب رامى كرسي وجلس عليه ونظر لحسام باهتمام وقال له : قولي بقى إيه اللي حصل؟؟

قال حسام بعدم فهم : مفيش حاجة حصلت والله يارامى غير اللي قولتهولك .. إنت عارف بس إن حازم بيتحسس

زيادة من البنات وهو اتخرج بس لما قائلته يقسلها الضغط بس كدا !

-يعني هو مضيقهاش؟؟

قال حسام بدهشة : حازم يضايق بنت !! إظاهر فعلا إنك متعرفش حازم ! .. هو أنا مش بتفق معااه كتيير بس فى

الموضوع بالذات أشهد معااه وجداً يارامى .. هي أختك قائلتك إيه؟؟

-هااه؟؟..لأ مقالتش هي بس كانت تعبانة وقالتلى إن حازم كان يقسلها الضغط واتعصب فجأة .. فانا استغربت

بس مش أكثر يا حسام انت فهمت إيه يابنى دا حازم أخويا وحبيبي .. وثق فيه أكثر من نفسي أصلاً

-طب تمااام يا رامى ..

-هطير أنا بقى .. انبسطت إنى قابلتك هنا

-عايزين فى يوم ترجعوا تلعبوا هنا فى النادي تانى إنت وحازم

-بعبيدة شوية بس احتمال أرجع للرياضة تانى عشان تساعدني على البعد عن السجائر

-ربنا يقدرك يارامي

-سلام بقى يابااشا

مرت الأيام حتى جااء يوم الخميس المنتظر .. يوم خطبة عمر ومنار

فى الصالة حيث الرجال .. إقترب عمر من عليّ وقال له بسعادة : مبروك عليكوا أنا

ضحك عليّ وقال : بس ياعمر بدل ما أرجع فى كلامي

-ماشي ياعمى خلينا ساكتين لحد كتب الكتاب وبعد كدا مش هتعرف تهددني تاني

-ماشي ياسي عمر .. ربنا يتملككم بخير ..

-إدعيلنا بقى بجد الخطوبة دي تنقضي من غير مانغضب ربنا فى أي حاجة

-ياارب ياعمر .. اللي عايز حاجة بيعملها ..

-واحنا إختارنا الجنة وهنشغل عشانها إن شاء الله .. وبالمناسبة بجد حلوة أوووي فكرة اللابات دي بدل مانجيب

دي جي .. والانايد اللى شوية من غير موسيقي وشوية بموسيقي دي كمان روعه ماشاء الله .. عجبنى التفكير

ياعمى .. أنا شارى

ضحك على وهو يقول : وأنا مش بايع ..

-عايزك توصل لمنار حاجة

هزت رأسها بنفي فأدرفت حبيبة : ولا إنتي حتى ! وإنتي ياطنط ؟ .. طب إنتي ياطنط طاهاه؟؟..طب أم حمكوشه
؟؟..أي حد يمسك فيا طاهه متسسحونيش إني منبوذة أووي كدا .. دا نفسي إتقطع بقالي يومين واحنا بنعلق الزينة
الا ما مسيتوا علينا بكوباية حلبة حتى

جذبتها سارة نحوها وامسكتها بعنف وقالت : انتي جاية تسيحيلنا

ضحك كل الفتيات وأخذوا يتراقصن ويمرحن بدون أن يخرج صوتهن للصالة .. حتى نهاية الحفل

-كنت عايز أحكيلك عل حاجة يا حازم

قال حازم ببسمة : اتفضل يا حازم رامي

-من غير لف ودوران .. أنا بحب واحدة وعايز أتقدملها .. ممكن تكون هي أصلا اللي شجعنتي أتغير ومن غير
ماتفهم غلط إحنا متكلمناش اصلا ولا مرة بس انا اتشجعت اتغير من ساعة ما شوفتها ومش عارف بقى المفروض
أروح أتقدملها ولا استنى شوية ولا ايبه ؟

فكر حازم قليلاً ثم قال : وانت اتغيرت عشان ترضيها هي ولا عشان ترضي ربنا ؟

-بصراحة فى الاول كان عشانها بس بعد بدأت اسمع عن ربنا فكرتي اتغيرت تماماً وبقيت مش عايز غير رضا ربنا
.. والله كنت فاكرك الحكاية صعبة بس كلامك انت ونور وأختي شجعني أووي والبرامج اللي سمعتها شجعنتي فعلاً
ودماغى اتغيرت وتفكيري بدأ يتغير للاحسن الحمد لله فى فترة قصيرة جداً .. وبقي همي إني أرضي ربنا عشان كدا
بعدت عن السجاير ومش هرجعلها ابداً بعد ما غيداء جابلتى معرفش كام فتوى كدا نها حرام بس كانوا كتير اوووي
غير انى عرفت انها من الكبائر على رأي شيوخ .. وكمان انا هتحاسب على كل ذرة هوا دخلت نضيفة وطلعتها
ملوثة !! .. وكمان بقيت بصبر على أمي وأختي على قد ما أقدر عشان ارضي ربنا .. ويقالى شوية اهو منتظم على
الصلاة فى الجامع بس انت عارف انا نفسي فى إيه يا حازم؟؟

-ايه يارامي؟؟

-نفسى أحبها أوي .. وسعمت جملة للشيخ الحويني بيقول "صلي حتى لو انت مش حابب الصلاة ولا حاسس بيها .. صلي بس اوعى تقطع الصلة اللي بينك وبين ربنا وربنا هيرزقك حبها والتعلق بيها " .. فانا قررت انى هفضل اصلي لحد ما بجد احس بيها واحبها ..

-طب ماتسمع عنها يابنى وهتحبها جداً وتقرأ عنها وتتمعن كدهون

-طب ياعم اسمع إيه ولا أقرأ إيه؟؟

-بص ياسيدي ماكثر الدعاة اللي بيتكلموا عن الصلاة والشيوخ كمان .. اسمع احبك ربي مصطفى حسنى بتوع الصلاة واحسن صلاة لمحمد الغليظ دول اللي غيروا في صلاتى جامد .. وفى كتب كتيرة عن الصلاة اللي لا يقاوم بجد بجد "أول مرة أصلي " .. كل مرة هتقرأه هتحسن حاجة وتحس بحاجة مختلفة فى صلاتك .. وفى جنة الدنيا كتيب لمصطفى زايد وكيميا الصلاة معرفش لمين كدهون مش فاكرا اسمه وفى الخشوع فى الصلاة .. جوجل مليبيان والارصفة أملى فى شارع النبي دانيال

-خلاص هروح ادور على جوجل وابقى اخذك مرة ونزل النبي دانيال بس بعد ما اقبض بقى .. المهم مقولتليش اعمل إيه معاها؟

-هى بتدرس ولا خلصت؟

-لأ مخلصه هى زميلتى أصلا فى المدرسة

-اممم طب انتوا اكيد مشغولين دلوقتى عشان الامتحانات وكدا يعنى ممكن تستنى شوية .. حتى تكون انت ثبت رجلك فى الارض فتروح تتقدملها وانت الحمد لله بدأت يعنى تظبط نفسك

-ماهما البنات هيخلصوا خلاص الاسبوع الجاي فانا بفكر اتقدملها فى نص السنة يعنى الاسبوع اللي بعد الجاي

-اممم مش عارف والله يارامي .. ممكن تصلي استخارة ولو ارتحت تكلم والدها بس متكلمهاش هي طبعاً

-أنا اصلا عارف باباها قابلته مرة كدا هو واخوها ومعها رقم اخوها فمش هضطر اروح آخذ منها رقم باباها .. بس فى مشكلة مش عارف المفروض احكيها لك ولا ابيه؟؟

-خير يارامي ؟

-يعني هي كانت عارفة إني .. يعني مش كويس

قال بغير فهم : وهي كانت عارفة منين ؟

قال رامي بضيق : عادي ! زي ماكلكم كنتم عارفين إني مش كويس ! بدخن قدام الكل وساعات كنت بشد معاها قدام الطلبة ! لأنها كانت بتفضل فى الفصل وانا حصتى بعدها .. بس والله بقالي فترة مكلمتهاش خالص ولا بوريتها وشي أصلا وبقيت بغض بصري عنها والله

-بص يارامي مش انت اتغيرت ورجعت لرنا؟؟

-الحمد لله بحاول

-يقي خليبيك واثق ومتأكد ان ربنا مش هيضيعك ولا هسيبك تضل ابدأ عشان انت لجئتله وعمره ما هيتعبك ولا هيعملك حاجة تضرك .. ثق فى الله يارامي

-ونعم بالله يا حازم .. هعمل استخارة واشوف ربنا هيسرنى لايه

-ماشي يارامي ..ربنا يوفقك للى فيه الخير وافرح بيبك وبولادك قريب

-يارب يا حازم وانت كمان

قفزت هدى فى مكانها وقالت : كانت حته حفلة يا حازم وهيصنا بطريقة تحففة بجد كان يوم جميل اووى واحلى مافيه اننا ماأغضبناش ربنا ولا عملنا حاجة حرام

قال حازم بفرحة : عشان لما أقولك ممكن نفرح من غير مانعصي تبقى تصدقي .. بالعكس دا الواحد بيحس بلذة كدا وفرحة ملهاش حل .. ربنا بيرزقنا فرحة غرييبية لاننا اتقناه ومعملناش حاجة تغضبه

-هيسيح ماشي يا حازم .. امته افرح بيك بقى ؟

-يا بت ياسهنة إنتي

-أنا بستفهم ياعم انا قولت حاجه .. محسسنى إن غلطت يعنى

-استفهام تعجبي صح؟؟..اجررري يابت ولما نخلص نبقى نتكلم

-هااا يا حاج قولتم إيه؟؟

-عملنا استخارة ياسي نور .. دا انت زنان زن !

-وبعديين؟؟

ضحك الحاج محمود وقال : هدير قالت إنها مش معترضة تكتبوا الكتاب فى الأجازة بس من هنا لحد أجازتك بس

لو حسست إنها قفلت هتستنوا ماشي ؟

-تمام يا حاج وإن شاء الله متقفلش خالص

-ربنا يتمملككم بخير إن شاء الله

مرت الأيام وقضى أبطالنا إمتحاناتهم وخرجوا منها سالمين ..

وفي بيت نور

طرق باب أخته بخفة وقال : ينفع أدخل ؟

-بقولك إيه ؟ .. هو موضوع الدار دا هنبداً فيه امته ؟

-احنا لقينا الدارين والله يكرمه أحمد بصراحة كل يوم فيهم مع العمال بيوضبوهم وعامل تجهيزات جميلة أووى ماشاء الله بس مش مكلفة أوي برضه عشان مييقاش تبذير .. البساطة بتجمل أي حاجة ..

-ماشي ياعم الفنان .. هنبتدي الشغل امته برضه؟؟

-معرفش والله .. بيتهيا لي لسه قدامنا تلت أسابيع عشان التراخيص تطلع كمان

-طووويب .. أنا عايزة أقدم فى معهد اعداد دعاة .. آخذ هدير ومنار ونروح نقدم كلنا

-وأنا كمان عايز أقدم أنا وحازم .. هو سأل وقالولوا ينفع نقدم عادي بس مع بداية السنة الجديدة بتاعتهم ان شاء الله

-يووووه لسه هستنى ..

-مفيش حل تانى .. المهم منبقاش بنضيع وقتنا ونقول لما ندخل المعهد هنبقى نتعلم .. لو احنا المسلمين متعلمناش يبقى مين هيتعلم !!

-عندك حق يانور .. أنا شحتت شوية كتب من هدير انما ايبه عجب !

-طول عمرك شحاتة يا حبيبة

جلس عمر فى قبالة منار وقال وعينيه بالأرض : عاملة إيه ؟

-تمام الحمد لله

-النتيجة هتطلع امته ؟

-مش عارفة والله دعواتك

-ان شاء الله امتياز يادكتورة

-يارب يا عمر ..

-كنت جابيلك هدية معايا

ابتسمت بخفوت وقالت : خير ؟

قالت فى نفسها (ايه الغباء دا هو هيحكيلى حلم) تبسم وقال : اتفضلي

وناولها حقيبة هدايا .. أخذتها بلفهة ونظرت بداخلها واخرجت مافيها وقالت بفرحة هادئة : الله ! حلوووين أووي

-إقربهم وهجبلك غيرهم إن شاء الله

قالت بسعادة : ماشي يا عمر شكرا اووي

إقرب والدها وهو يقول : جبتلها إيه يا عمر؟؟

-تعالى يا عمي شووف هقولك لأ يعنى

ضحك عليّ وأمسك بالكتب وقال : "حتى لايموت الحب " .. تربية الأبناء فى الاسلام .. حكايات عمو محمود

للأطفال .. الزواج الاسلامي .. إيه دول يابني ؟

-كتب عن الزواج والتربية وكدا .. والحكايات دي هنبقى نحكيها لأولادنا بأمر الله

ابتسمت منار بخجل فقال والدها : كويس والله يا عمر بتفكر حلو.. مش انتي كنتي جبتى كتب برضه زي دي ؟

-لا يا بابا كنت بفكر أجيب بس عمر جابلي

-أنا جبت كذا واحد كمان .. انتي خلصي دول وأنا أخلص اللي معايا ونبدلهم ..

-تمام يا عمر

- كنت عاوز تشوف يوم فاضيين فيه ياعمو عشان تيجوا تشوفوا الشقة وكدا

-تمام ياعمر لو إنت فاضي بكرا نروح .. منار كدا كدا اجازة

-ماشي ياعمو .. قول لعمتو بقى

دخلت أم تقى غرفة ابنتها ووجدتها جالسة تقرأ القرآن .. قطعت تقى قرائتها ونظرت لوالدتها بحنان وقالت : عايزة حاجة ياماما ؟

-كملي يا حبيبتى قرايتك وبعدها نبقى نتكلم .. ابقى تعاليلي أوضتى ..

-تمام ياماما

سبقتها الأم وبعد دقائق أنهت تقى قرائتها ولحقت بأمها طرقت الباب ودلفت ببسمتها وجلست إلى جوار أمها وقالت : خلصت ياماما

-ابقى ادعيلنا معاكي بقى

-من غير ماتقولى ياماما والله هو انا ليا غيركم عشان أدعيلكم

-بس انتى مش هتفضليني معانا علطول ولا إيه ؟

قالت بمرح : انتى زهقتى مني ولا إيه ؟

ضحكت الام ووضعت يدها على كتف ابنتها وقالت بأسلوب الأمهات الذى نعرفه جميعاً : وانا عمري ازهق منك يا عيني .. دا انتى روحى .. انا بس نفسي أفرح بيكي وأشيل عيالك يا بنتى زى بقيت الخلق

-هو أنا اعترضت يعنى ياست الحبايب .. ايدك ياستي ع العريس وانا انطلق علطول

ضحكت الام وقالت : موجود والله بس انتي اللي وافقي

تبدلت ملامحها وقالت بجديّة : تاني ياماما ! منا مش عايزة أتجوز ابن خالتي ياماما مش نفس تفكيري ولا اى حاجه
ومش زى منا عايزة للاسف

-مقصدهش ابن خالتك .. كان صفحة واتقفلت يابنتى .. في واحد تاني

قالت باهتمام : مين ؟

-واحد جدع وراجل وشهم ومن نفس مستوى تعليمك .. وكلم أبوكي وأبوكي قالي أكلمك

قالت بحيرة : ميبين ياماما ؟؟

-رامي

-رامي مين ؟؟

شهقت فجأة وقالت : تقصدي رامي !!!

-أيوا رامي اللي ساعدك

قالت بجديّة : لأ طبعاً مش موافقة !

تعجبت الأم وقالت : ليه يابنتى دا جدع وابن حلال !!

تحيرت تقى ماذا تقول لأمها .. أتخبرها أنه كان يضايقها ؟..ولكن هذا كان فى مامضى ! لم يعد يتعرض لها منذ
فترة طويلة ! .. لكن هذا لا يعني أنها ستقبله !!

قالت بضيق : معرفش ياماما ! .. مش عيزاه وخلص !

-طب صلي استخارة طيب ؟؟

-لأ ياماما معلش ! الاستخارة دي لو انا بفكر أقابله اصلا.. انا مش موافقة خالص .. قولي لبابا يقوله اني مش موافقة !

-ابوكي مش هيوافق ..

-يعني هقبله بالعافيه ياماما ؟

-لأ ! بس برضه مترفضيهوش بدون سبب !!

-خلاص ياماما أنا هعمل اللي يريحكم .. عن اذنك هروح أوضتي

خرجت وذهبت لغرفتها واخرجت هاتفها وبعد دقائق قالت بحدة : وعليكم السلام ياغيداء ! .. أنا كويسة .. هو إنتي كنتي بتكلميني الفترة اللي فاتت دي عشان تنقلي أخباري لأخوكي !! .. قوليله إنني مش عيزاه ومش هقبله ولا عايزة حتى أقابله !!! .. سلام !

قالتها وأغلقت الخط بعنف .. ارتمت على الفراش وحدقت فى السقف لمدة ثم ضربت الفراش بقديمتها ولامت نفسها "يووه ! أنا كنت قاسية أووي عليها هي طيبة وعمرها ما عاملتني وحش ! .. بس أخوها كان بيضايقني ومش معنى انه ساعدني مرة يبقى خلاص اسامحه ! .. دا صورني على موبايله !! .. طب مش جايز ربنا هداه زي مادعتيلوا وبطل وتاب !! .. تاب متابش بقى ماليش دعوة مش معنى انه تاب يبقى اتجوزه ! أنا مش بطيق اسمه !! "

صُدمت غيداء من رد تقى ومن رد فعلها الحاد وشعرت أن رامي سينهار ويعود كالسابق ربما أسوأ ! .. لم تعرف كيف تخبره !! .. وضعت وجهها بين كفيها وأخذت تستغفر .. تستغفر كثيراً ! .. فلا حل الآن سوى الاستغفار

وبعد عدة أيام

هرولت حبيبة نحو غرفة نور وصاحت : إصحي يا نور !!

فزع نور من نومه وصاح بقلق : إيه فزعتيني !! عايزززة إيه !!

ضحكت وقالت : هنتأخر ع الفرح

فرك عينيه وقال وهو يتثائب : فررح إيه ؟

قالتك بفرحة : فرحك ياعم إنت نسييت

قفز من مكانه قائلاً : آه صحيح دا هو إنهاردة

-شوفت بقى كان لازم أخضك عشان منتأخرش العروسة هتخلل !

ضحك نور من أسلوبها ثم قال : مكنتش عاوز أصدملك يا حبيبة بس مفيش فرح انهاردة

اتسعت عيناها فأردف : كتب كتاب يا حبيبة إنتي فقدتي الذاكرة ولا إيه ؟

ضحكت مرة أخرى وقالت : نياهاهاها منا عارفة يا أبييه إنه كتب كتاب .. ماهو كتب كتاب وبعده فرح وبعده

كدا لولولولولولي عقبال عيالك يعنى

إنفجر نور ضاحكاً ثم اندفع نحوها ودفعها إلى الخارج قائلاً : إمشي يا حبيبة مش عايز أعرفك تاني

- كدا أنوور هتتبرى مني ياخويا يا حبيبي

- كلمة كمان وهطردك من البيت كله .. روعي خليني أجهز بقى

أخرجها وأغلق الباب خلفها ثم نظر للمرأة بسعادة وأخذ نفساً وقال بسعادة : اللهم لك الحمد حمداً كثيراً طيباً

مباركاً فيه

وبعد صلاة العشاء تم عقد قران نور وهدير بالمسجد .. التفت الفتيات حول هدير ونثرن عليها القبلات والتهاني والمباركات بالعقد السعيد .. والتف أصدقاء نور الكثر حوله وأخذ الشباب العازب يهنئه بينما من تزوجوا قالوا بمرح :
يعني ع الحلو لما تبدهله الأيام

-ايه اللي وقعك فى الحفرة دي يا بني إلحق إهرب بسرعة

-اجرري يامجددي !

دفعهم حازم عن نور بمرح وقال : إيه ياخويا العيال المحبطة دي .. يلا هنرش ميا

-هو انت اللي بتتجوز ولا هو .. سيينا نغلس عليه شوية .. اشمعنا غلسوا علينا

-هاهاها مش هتقدروا تغلسوا على نور ابدأ دا انا اقطعكم هنا

وضع أحمد يده على كتف حازم وقال بمرح : خلاص يااحازم انت الكبير برضه

ضحك الشباب بشدة بينما أخرج نور هاتفه وانفرد فى إحدى زوايا المسجد ومنع حازم الباقي من اللحاق به بمرح .. أخرج هاتفه واتصل برقم وبعد دقائق ردت هدير بخفوت : السلام عليكم .. مين ؟

-هنستعبط بقى على اساس انك مش عارفة إن مش انا اللي بتصل .. احم اقصد وعليكم السلام ورحمة الله وبركاته

ابتسمت وقالت بخجل : بصراحة مكنتش هرد بس حبيبة قالتلى ان دا رقمك .. جبت رقمي مينين ؟

-اكييد هيبقى هيبقى معايا رقم خطييتى حتى لو مش بنتكلم .. احم اقصد مراتي

ابتسمت بخجل فقال بمرح : ماشي ياعم المكسوف .. المهم بقى كنت عايزك فى مشوار كدا

قالت بفرحة : هنروح فين ؟

-فى طار بايت كدا هخلصه معاكي وأرجعك بيتكوا غلطول

ضحكت وقالت : طار بايت ازاي يعني؟؟

-انزلى وانا اقولك

-طب مش هتطلع تشوفنى الاول ؟

-وتوزعى الستات اللى عندك وانا اطلع السلم وانزل وبتاع .. هشوفك بعد كدا ياستي هروح منك فين يعني

-ايه يابنى الكسل دا

-مش كسل لا حاجة .. انزلي بقى عايزين نخرج !

-طاب ثوانى هقول لمرات عمو

-ماشي وأنا هقول لعمك .. ثوانى وهنزلك قدام السلم .. متتأخريش عليا

-ماشي .. سلام

وبعد دقائق نزلت هدير من المسجد بعد أن ودعت صديقاتها أو إخوتها بمعنى أصح وداعاً حاراً .. ووجدت نور

ينتظرها .. ابتسمت حين نظرت اليه وحمدت الله بشدة من داخلها وأحست أن قلبها ينتفض حين رأت عيناه مصوبة

إليها .. إقترب منها ووقف أمامها وقال لها بسعادة : مبروك يا هدير

قالت بخجل : الله يبارك فيك

-مش هنمشي بقى ولا هنفضل لحد الفجر ؟

-ماشي .. هنروح فين ؟

-تعالى نطلع ع البحر ..

-بليل كدا؟

-ايه مش معاكي راجل ولا إيه .. ولا لازم محرم ؟

ضحكت بخفوت فقال : يلا عشان قولى لعمك مش هنتأخر وهبقى أرجعك ع البيت يازوجتى المصونة

-حسناً يازوجي العزيز

ابتسم وانطلق سوياً وجلسا على إحدى الطاومات فى أحد الكافيهات على البحر .. تنفست الهواء المنعش وقالت

بسعادة : الله بقى .. بقالي كتير مقعدتش عالبحر بليل كدا .. الجو دا كان واحشني

-أي خدعة بقى ياعم .. إنت تقشر بس ياجميل

ابتسمت بخجل وظلت صامته فقال : اه صح عشان منساش كنت قايلك ليا عندك طار بايت

-آآه صح ! طار ايبه بقى اللي بايت هو انا اعرفك اصلاً!؟

قال بمكر : وكدا خارجة مع واحد غريب ! توتوتوتو مش أخلاق !

-طيب ياعم غريب .. طار ايبه بقى عايزة اعرف؟؟

-فاكررة من ست سنين كدا .. افتكرتى ولا لسه ؟

-ايه اللي حصل من ست سنين ؟

ثم تذكرت فجأة وقالت : آه افتكرت ! .. دا انت قلبك إسود أووي

ضحك نور وقال : معلىش ياأوختي إنتي ظلمتيني ولازمن آخذ بتاري

ضحكت ولكن بدون أن يعلو صوتها فأدرف : واتجوزتك عشان آخذ بتارى منك .. هعذبك لحد ما آخذ حقي

-إنت هتخوفني منك ليه يانور ..

-لازمن تخافي .. مش اتطردت بسببك من الشغل .. طبعاً لقيتني الواد حليوة قولتى اما اتبلى عليه

-حليوة؟؟.. فين الحليوة دا مش فاهمة ! .. يابنى أنا اتجوزتك شفقةً أصلاً عشان أحتك تبطل زن على وداني

-طيب مش هرد .. المهم بقى بجد أنا بحبك أووي ياهدير

قالت بعتاب : مش كنت عاوز تعذبني من شوية؟؟

-دا كلام بس ياستي إنما أنا طيب خالص لا بضرب ولا بزق ولا بعذب ولا بعمل حاجة خالص طالما إنتي تمام

وماشية زي الفل .. هتبدأي استعباط سيقابل باستعباطاً آخراً

ضحكت بهدوء فقال : بس بمناسبة الذكرى اللي فكرتك بيها دي .. كنتي حاسة بايه بقى وانتي بتطرديني ؟

تبسمت وقالت : بصراحة كنت فى الاول مضايقة جداً واشتكيك لعمو بس لما زعقلك ورفدك وانت كنت لسه قايله

ان اختك تعبانة زعلت جداً من نفسي لأنك مش انت اللي ضايقتنى واللى ضايقتنى محدش عمله حاجة .. بس بعد

كدهون نسيت عشان عمو كلمنى بعدها بفترة وقالى انه رجعت الشغل .. فنسيت بس كدهون

-سبحان الله فعلاً .. من ست سنين افتكرتيني بعاكسك وعمك كرهنى وانهاردة اتجوزتك .

-عشان تعذبني بقى

-اه صح .. المهم ياستي من ست سنين برضه انا وحازم اتصاحبنا اووى .. ومن فترة بدأ رامي يقربلنا واتصلح جامد

وبقى بيفكر بطريقة تانية بجد الحمد لله حتى يبلغ الحمد لله

-هو رامي دا اللي شغال فى المدرسة اللي بشتغل فيها ؟

-آه .. بتسألني عليه ليه ؟

-لا عادي بس هو اتقدم لزميلتى ورفضته بتقولى عشان مش ملتزم أووي وكدا فاستغريت لما قولتلى اتغير وكدا

-ماهو اتغير بقاله كام اسبوع بس .. بس المهم انه بدأ يعنى

-إنت عندك حق .. هقولها تعمل صلاة استخارة ولو فى خير هتقبله

-ان شاء الله

-لأ مفييش.. يلا إطلبلي حاجة بقى

-الواضح إنك منتقبة فمش هتعرفي تشرى ولا تاكلى فانا هجيب اتنين ايس كريم واكلهم قدامك .. أنا وإننى واحد

-لا ياعم هنجيب واحنا مروحين .. مش هتضحك عليا انا دا انا صايح قديم

-صايح؟؟.. وانا اللي كنت فاك حبيبة جريئة!.. إظاهر أنا اللي طلعت مؤدب

كانت تقى تدور حول نفسها فى غرفتها وضميرها يأنبها بشدة على حديثها مع غيداء .. سعادتها بزواج هدير لم تخدر ضميرها وبصمته ! .. أخذت تدور حول نفسها وهى تستغفر وتنظر للهاتف كل حين .. اتجهت نحوه وأمسكته وقررت أن تتصل بها ! فقد أخطأت فى حقها وحدثتها بقسوة ! .. وبعد ثوانى أجابت غيداء بتوتر : السلام عليكم

قالت تقى باحراج : وعليك السلام .. عاملة إيه ؟

قالت بقلق: تمام وانتى ؟

-الحمد لله

ظلتا صامتتين بضع ثوانٍ فقالت تقى وكادت توشك على البكاء : حقك عليا ياغيداء أنا آسفة أووي

ظلت غيداء صامته فأردفت تقى : مكنش ينفع أكلمك بالأسلوب دا أنا آسفة بجد

ابتسمت غيداء بطيبة وقالت : ولا يهملك ياتقى

قالت بدموع : بجد يعنى مش زعلانة منى ؟

-والله العظيم مش زعلانة كفاية إني سمعت صوتك عشان أنسى الزعل وأفرح أصلاً .. والله ياتقى مكنتش عارفة أنام
اليومين اللي فاتوا دول .. مش عارفة أقول لرامي إيه !! ولا عارفة أكلمك أصالحك وأقولك والله إني بحبك ونفسي
نفضل صحاب علطول حتى لو هنتجوزي رامي

-بجد أنا آسفة ياغيداء إني عملت فيكي كل دا بس والله اتعصبت فجأة و..

صمتت فأردفت غيداء : عارفة والله انتى ليه اتعصبتى وعارفة رامي كان إيه زمان بس والله العظيم هو اتغير خالص
ياتقى ومش بقول كدا عشان هو اخويا بس هو اتغير فعلا وبقي حد تاني خالص .. ومش بقولك كدا عشان تديله
فرصة ولا حاجة ! .. أنا كل اللي عيزاه منك متهديش إنسان بيحاول يتغير .. إعملى استخارة ولو مرتحتيش يبقى
خلاص .. ساعتها هقوله عملتى استخارة ومرتحتيش انما كدا هو ممكن يتعقد ويقول مهما اتغيرت الماضي الوحش
هيفضل محاصرني وعمر ما ربنا هيديني فرصة تانية ! .. اعملى استخارة بس ياتقى وردى فى اخر الاسبوع علينا
ماشي؟؟

-متضغطيش عليا ياغيداء

-مش بضغط عليكى والله .. بقولك بس اعملى استخارة .. واحنا بقى اللي هنختار بمزاجنا ياست المؤمنة ؟

-عندك حق الواحد يعمل استخارة عشان يكون مطمئن بالله.. وعشان تطلعى من دماغى (قالتها بمرح)

ضحكت غيداء وقالت : أنا سامبتيك يا حبيبي هعرف أطلع متخافيش

عاد نور إلى منزله بعد أن أوصل هدير لبيتها .. فتح الباب ونادى على حبيبة بسعادة .. خرجت إليه وهى تتمايل
بسعادة وقالت : العرريس .. العروسة .. وسمعى سلام

ضحك نور وقال : وأنا وانت ورقصني ياجدع

إنفجرا ضاحكين حتى أدمعت عيناهم .. إحتضنها نور وهمس في أذنها : معرفش هعيش إزاي من غيرك يا حنة منى

قالت وقد بكت هي الأخرى : ربنا يهنيك يانور ويفرحك ويفرحني بيك يارب

-ويارب أفرح بيكي إنتي كمان قريب يا حبيبة

دفعته حبيبة بمرح وقالت : بس مش هتخلص مني حتى بعد ماتتجوز .. أنا لازقة بابيه

-ربنا يخليكي ياست اللازمة .. وسعي بقى خلىنى أدخل أريح شوية عشان أقدر أقوم الفجر

-مش عايز تاكل .. أحضرك أكل؟؟

-لا أكلنا برا ..

قالت بتعجب : وهدير أكلت إزاي؟؟

ضحك نور وقال : أخذناهم تيك آوي .. بس أنا كلت فى السكة كنت جعان بصراحة وروحنا علطول عشان أكيد

هى كمان جاعت

ضحكت وقالت : من أولها كدا عملت فيها سي السيد أكلت وسييت البت جعانة

-بت مين؟؟ .. من هنا ورايح اسمها أبله هدير !

إنفجرت ضاحكة فقال لها : مش لاعب يا حبيبة إنتي وحشة وبتضحكى عليا .. سيبيني أنام بقى

إتجه إلى غرفته ثم توقف فجأة وقال : آه صحيح كنت هنسى !!

نظرت له باهتمام فأردف : حازم جاى يوم الخميس الجاي إن شاء الله

دخل حازم غرفة والدته بعد أن طرق بابها وقال ببسمة : ينفع أكلمك ؟

-تعالى يا حازم يا حبيبي

جلس الى جوارها على الفراش وقال : نور رد عليا وقالى أروحلهم يوم الخميس

اقتحمت هدى الغرفة وقالت : هيه أخيبيراً

ضحكا وقالت الأم : إنتي لحقتي تسمعي يا آروبة

-كنت جيبالك وسمعت .. مبروووك يا حازم

-الله يبارك فيكي بس لسه بدري أصلا لسه مروحتش ولا عملت اي حاجة يابنتي

-هيحصل ان شاء الله يا حازم وتتجوزوا

ابتسمت فقالت أمه : يعني يا حازم مش كنت تشوف واحدة تانية ؟

قال بتعجب : ومالها حبيبة ياماما مانتى معترضتيش عليها لما قولتلك من فترة ؟

-منا فكرت بعد ما قولتلي بصراحة وحسيت انك ممكن تختار حد أنسب يعني .. يعني يا حازم هي مقطوعة من شجرة

! وملهاش أم تعلمها وكدا

-يعني هو بايدها يعني ؟؟ ..

قالت الأم بسرعة : لا يا حبيبي والله مقصدش حاجة

ابتسم حازم وقال : عارف والله ياماما وعارف برضه إن نور أخويا وصاحبي وكفاية إنني هناسبه أصلاً ولو حصل نصيب

هيبقى خال ولادي ..

-ربنا يخليكم لبعض يابني

قبّل يدها وقال بحنان : ويخليكي لينا يأمي

وضعت هدى يدي في خصرها وقالت : وأنا بنت البطة السوداء يعني

دفعها حازم بمرح قائلاً : إمشي يابت معندناش بط هنا

ضحك ثلاثتهم وجذبتها الأم نحوها وقبلتها وقالت : إنتي بنتي حبيبي اللي بقت بتسمع كلامي وعمرها مابتزعلني

-ربنا يخليكي ليا يامامتي ويخليني للشعب مش عارف هتعملوا إيه من غيري

قال حازم وهو يضحك : أكبيد هنلاقي حاجات كتيرررة نعملها

-المهم يا حازم أنا هاجي معاك ولا إيه ؟

-لا ياماما غالباً أول مرة بروح لوحدي ولو حصل قبول ان شاء الله هاخذ العيلة معايا

قالت هدى مدافعة : وميحصلش قبول ليه ان شاء الله؟؟ دا انت وحببية عسل وتستاهاولوا كل خير

-يارب نكون كدا فعلاً يا هدى.. بس برضه مش أي اتنين احنا شايفينهم كويسين يمشوا على بعض

-ان شاء الله هتمشوا على بعض .. محسسنني إنك بتشتري هدووم .. المهم بقى كنت هنسى أقولك .. هي حببية

مندفعة شوية فى الكلام ومش بتتكلف يعني وبتتكلم ببساطة يعني

قال حازم بغير فهم : مش فاهم قصدك؟؟

-يعني ممكن تستغريها شوية ف الاول عشان اسلوبها بسيط مش بتتكلف زي البنات يعني

ابتسم حازم وقال : خلاص يا هدى احنا هنتكلم يوم الخميس ان شاء الله

مرت الأيام سريعاً حتى جاء يوم الخميس .. جلس حازم برفقة نور قليلاً ثم قام نور ودخل غرفة أخته وقال : يلا يا حبيبة ؟

-ماشي يانور أنا جاهزة .. خليك جنبنا!

-هقعد ع التراييزة جنبكم .. متخافيش

خرج وخرجت خلفه بنقابها وحتى البيشة التي تغطي عينيها لم تخلعها جلست بجوار أخيها على الكرسي المقابل لحازم .. تبسم حازم وقال : إزيك يا حبيبة ؟

أجابت بخجل : الحمد لله وإنت ؟

-تمام الحمد لله

قال نور ببسمة : بعد اذنك هقعد على بعد خطوتين .. برضه على قلبكم

ابتسمت حبيبة بخجل وضحك حازم بهدوء فقام نور وجلس على الطاولة في قبالتهم .. اعتدل حازم في جلسته وقال باهتمام : هدى بتحك أوي وبتحترمك جداً كمان

ابتسمت بخجل ولم تعقب فأردف : هي اللي شجعنتي بصراحة إني آجي أتقدملك

قالت بخفوت : ربنا يخليها لك وبياركلك فيها

-يارب .. المهم بقى تحبي تعرفي عني إيه ؟

قالت بخجل : كل حاجة لو مش هضايقك

أخذ نفساً وقال : طايب .. احنا نبتادل الادوار .. يعني مرة ومرة .. بسم الله الرحمن الرحيم .. أنا حازم آخر سنة في صيدلية .. زميل أخوكي من زمان أوى .. تقدرى تقولى لحد تالته ثانوى كنت عايش عادى خالص باستهتار ! ولا في دماغى أصلاً ربنا راضي ولا لأ .. يعني كنت ساعات كتير اوى بسبب الصلاة وسمع أغاني ويشوف افلام ومسلسلات عادى .. بس كان فيا حاجات الحمد لله برضه كويسة يعني أمى ربنا يحفظها معلمانا من زمان إن

مينفعش نغش ! الغش بيطلعك من أمة النبي علطول ! مفيهاش كلام "من غش أمتي فليس مني " .. وبعيداً عن الناس المتحالية اللي بتقول الحديث ملهوش دعوة بالغش فى الامتحانات .. اللي أعرفه ومتأكد منه مليون فى المية إن الغش حرام حرام ! مفيهوش هزار ولا حاجه اسمها مراجعة .. فدا كان كويس فيا وكمان يعني مكنتش بايظ أوى يعني عادى زى معظم الشباب فالتغير بالنسبالي كان خطوة قريبة وسهلة الحمد لله .. يعني فى رمضان فى بداية الثانوية العامة نور أخذنى معاه درس فى المسجد لشاب .. كان بقالي كتيررر اوى مدخلتش المسجد غير وقت صلاة الجمعة .. سمعته وبصراحة مقتنعش أووى بس اتكلمنا شوية بعد ما الدرس خلص وبدأت أحس بحاجة بتزقنى .. مسكت فيها وروحت دورت ع النت على فيديوهات عن الصلاة عشان أظبطها .. ويعني أهو بدأت ونور كان معايا علطول .. يعني بدأت أتعلم حاجات عن دينى ومن اللي اتعلمته انى لازم اعمل باللي اتعلمته ولا مش هيكون له لازمة ! واتعلمت برضه ان التخطيط مهم جداً والواحد المفروض ميهاجمش نفسه بس ياخذها براحة لحد ما تتعود وترجع لفطرتها السليمة .. بصراحة فى ثانوى مكنتش عندى حلم أووى للكلية .. بس لما مجموعى جاب صيدلية ودخلتها قررت أعمل حاجه مختلفة وأحب مجالى فعلاً وقررت أفيد فيه .. مكنتش عارف إزاي فى الاول !! بس بعدها علطول ربنا أرشدني وظهرت قدامى الأسر بتاعت الكلية بأعمالها الخيرية والمحاضرات اللي بيعملوها عشان يزرعوا جوانا الخير .. ومن الناس اللي أثرت فيا هو أحمد الشقيري بجد برامجه بتعلمك تكون انسان .. كان نفسي يكونوا من غير موسيقي بس هعمل إيه ! بس قرئت فتوى على دار الافتاء انها مختلف فيها يعنى .. بس برضه بحب ابقى فى السليم فبقيت اسمع الاغانى من غير موسيقي بس البرامج طالما مفيدة يبقى اسمعها بموسيقي عادى .. بس كنت بسمع أكثر لدعاة بدون موسيقي .. برتاح أكثر يعنى .. حازم شومان ومحمد الغليظ وكنت متابع الشيخ هانى حلمى برضه وبرنامج أحلى شباب لمحمد الشيخ .. يعنى ولازلت متابع لحد دلوقتى عشان أنا واخذ قول ابن حنبل شعارى "مع المحبرة إلى المقبرة " .. وطبعاً برنامج مصطفى حسنى بتاع كل رمضان دا اساسي يعنى هفضل اتعلم طول عمرى ان شاء الله .. بس كدا !

-طب إيه أكثر حاجة نفسك فيها بجد وبصراحة

-بجد وبصراحة نفسي فى حاجه غريبة شوية .. نفسي مدخلش الجنة عادى ! لأ عايز يوم القيامة إن شاء الله آلاقي ناس كتيرة أووى واقفة بتشفعلى عند ربنا .. الناس دول ربنا جعلنى سبب فى قربهم منهم ولو بكلمة قولتها .. نفسي

بجد أعرف الناس كلها على ربنا بجد كفاية شرح محمد النابلسي لأسماء الله الحسنی عشان تحب ربنا حب ميتوصفش بكلمات نفسي بجد أعمل حاجة لديني ويوم القيامة ربنا يبقى راضي عني لأن بلغت عن الرسول وعن دينه .. أكثر حاجه نفسي فيها بصراحة

-ربنا يحققلك حلمك .. بس لازم تاخذ بالاسباب

-ان شاء الله .. واول الاسباب دي اني اعلم نفسي وأدبها بأخلاق الدين .. مبقاش ملتحي وبصلي وعامل فيها شيخ وبدعى الناس لربنا وأنا بعمل عكس مابقول ! والأخلاق عندي فى الكلام بس ! .. الموضوع صعب وكبير بس ربنا أكبر من كل شئ وأنا هقدر برنا أحقق حلمي إن شاء الله .. بس مش معنى دا اني هقصر فى شغلى وهتأخر عن شغلى بسبب الصلاة واقعد فى المسجد أصلي السنن وأوقف مصالح الناس ! .. الدين مش بينفصل عن الحياة ! .. يعني مينفعش أقول أنا هشتغل فى الدعوة فأقعد فى وقت الشغل أدعو زميالي ونسيب الشغل يغرق ! .. انا كدا بحوش فى كيس مخرووم !

-صح عندك حق فعلاً

-طب وانتى بقى .. إيه أكثر حاجة نفسك فيها

قالت بخجل : لأ بصراحة نفسي فى حاجات كتير .. نفسي أدخل الجنة وأبقى مع الرسول عليه الصلاة والسلام فيها .. وأقعد مع زوجاته وأشوف الصحابة اللي بقالى كتير بقرأ عنهم وأقعد معاهم واحد واحد .. فى الجنة هنعمل اللي احنا عاوزينه ومش هنبقى زي ما حنا فهقعد معاهم عادي ومع النبي عليه الصلاة والسلام عادي بقى .. ونفسي أبقي عايشه بجد مبعملش ذنوب .. عارفة إننا بني آدمين بس نفسي أووى مكونش بغضب ربنا فى أى حاجه .. ونفسي أكون نافعة فى مجالي ودا مش كلام سهل يتحقق محتاج الواحد يغلب نفسه فربنا يعينى عليا .. وأكون معلمة أمينة وحتى فى الدار الجديدة بأمر الله نحجب الناس فى ربنا .. وأكون دكتورة متقفة ومجتهدة وأكون زوجة صالحة وأم صالحة .. ونفسي أصحابي ديماً يفرحوا ويميزعلوش أبداً .. ونفسي أخويا يبقى ديما بخير ويتكلم ويفضضلي مرة ف حياته .. نفسي فى حاجات كتير

ابتسم حازم وقال : ربنا يحققلك كل اللي انتى عيزاه ان شاء الله

نظر لنور ثم قال : رأيك في السياسة زي نور ولا لأ ؟

ضحك نور وقال : هيتقبض علينا يا جودعان

قال حازم ضاحكاً : وماله يا نور وبالمرّة أعترف إنك اللي بتمولنا

ضحك نور وقال : متخافش يا عم حازم دماغها شبهك في السياسة

-طب والله كويس الحمد لله إنكم متفاهمين رغم الاختلاف

-أختي يا حازم أكيد مش هخسر عشان السياسة .. زي مانت مقدرتش تخسر صاحبك عشانها

ابتسم حازم والتفت مجدداً لحبيبة وقال : عندك حق يا نور .. نكمل كلامنا بقي ..

كانت تقى بغرفتها حين سمعت جرس هاتفها يرن .. ردت ببسمة : السلام عليكم

-وعليكم السلام .. إحنا آخر الاسبوووع يا باشا

ابتسمت تقى فأدرفت غيداء : ها قولتي إيه ؟

-أنا بلغت بابا بقراري وهو هيقوله بكرا ان شاء الله

-اللى هو ايبيه بقي؟؟ .. وقوليلي وأوعدك انى هقوله علطوووول الراجل على اعصابه !

ضحكت تقى بخفوت وقالت : طيب

-طيب إيه ؟؟؟؟؟؟؟؟؟؟؟؟؟؟؟؟؟

-أنا قولت لبابا هقابله بس دي مش موافقة ماشي؟؟

-ماشى ياستى .. وشكراً بجد إنك هتديله فرصة

-هو مش انا اللي هديهاله أنا صليت استخارة كذا مرة وحسيت ان مفيهاش مشكلة إما أقابله طالما بتقولى اتغير وكدا ..

-تسلمي بجد ياتقى .. يلاسلامات بقى إما أقوله

-ماشي سلام

أغلقت غيداء الخط واتصلت بسرعة برامي وقالت بصوت هادئ : السلام عليكم

رد بتوتر : وعليكم السلام .. عاملة إيه ؟

-تمام الحمد لله .. انا كلمت تقى

قال بقلق : ها ؟

ردت بصوت حزين : بص هي قالتلى عملت استخارة كذا مرة بس برضه .. انت عارف بقى

صُدم رامي وقال بصوت مختنق : الحمد لله !

-لعله خير يارامي

قال وكمن يوشك على البكاء : الحمد لله على كل شئ

-متزعلش نفسك بس المهم

-والله أنا مش زعلان ! بس مش عارف المفروض أعمل إيه عشان ربنا يغفرلي اللي فات ويسامحني بجد ! .. انا

غلطت كتير أووووى وأستاهل إنها طبعاً متقبلينش بس نفسي أعرف أعمل إيه عشان يسامحني !!

-بالله عليك متزعلش عشان معيطش !

-متعيطيش انا مش زعلان انا استحق دا

قالت بثقة : بس ربنا مش بيعاملنا زي مانستحق ! ربنا الكريم ! ولا نسيت ؟

تعجب من تبدل لهجتها فأردفت : عموماً باباها هيكلمك بكرا

قال بتعجب : ليه ؟.. منا عرفت منك خلاص

-عشان تتفقوا هتروحلهم امته .. يابني اللي وسطته غيداء عمره ما يترفض !

قفز رامي من مكانه وصاح بفرحة : بجد ؟؟؟؟

-هو إنت صاحبي عشان أهزر معاك .. ايوا بجد طبعاً ..

-ربنا يخليك لي يا غيداء يا أحلى أخت في الدنيا كلها كلها كلها ! ويارب أشوفك عروسة قريب وأفرح بيكي إنتي وعماد بقي قررررررب

-نحن معشر الدكاترة كتبت علينا المستشفى .. انا وعماد طول النهار فيها .. شكلنا هنعمل الفرحة فيها بقي وخلاص أو نقضيها كتب كتاب كذا وخلاص

ضحك رامي وقال : هنبقى نشوف الموضوع دا .. المهم أخلص انا الاول

-يا طمنا اع .. يلا أخويا بقي أعمله إيه .. بحبك بقي

-وأنا بعشق أمك

ضحكت وقالت : دي كلمتي !!

-وانا خدتها حد ليه شوق في حاجه !!

وفي اليوم التالي وبعد صلاة الجمعة اتصل والد تقي برامي وطلب منه الحضور في نهاية الاسبوع

عاد نور لبيته فوجد هاتفه يرن معلناً اتصالاً من هدير رد بسعادة : السلام عليكم

-وعليكم السلام ورحمة الله وبركاته .. إزيك ؟

-زى الفل الحمد لله وانتي ؟

-الحمد لله .. فاضي؟؟

-اه فاضي لحد الساعة 6 عشان الشغل .. خيراً ؟

-كنت عيزاك فى مشوار

-قول ياباشا

-فاكر حسن ؟

قال بتعجب : حسن مين ؟

ثم تذكر فجأة : آاه حسن.. طبعاً فاكراه

-انت عارف انى بروحله كل جمعه وكنت عاوزاك تيجي معايا لو هتقدر

-هاجي طبعاً إن شاء الله .. أجيله معايا اييه ؟

-مش لازم يعني يانور تعالى انت بس وهو هيفرح

-لالالا طبعاً مينفعش .. هما كام ولد فى الدار ؟

-عشرة

-وسنهم يعني ؟

-كلهم عندهم تمن سنين

-طاااب تمام هعدي عليكى امته ؟

-صلي العصر وتعالى .. اديني رنة وانا هنزلك ياذن الله

-ماشي يانور .. عاوز منى حاجة بقى ؟

-عاوز سلامتك .. سلامات بقى يا حبيبي

أجابت بخجل : سلام

أغلق الخط واتصل بحازم الذي أجابه : ابيبيبيبيبي يابنى منا لسه سيباك !

-وعليكم السلام يا حازم .. بقولك إيه .. إنت صرفت صدقة الشهر دا ولا لسه ؟

-لا لسه مخلصتش تحويش اصلا .. وبعدين وانت مالك اصلا دا انت غتت اوووى

-اصلي رايح دار ايتام كمان ساعتين وشوية وكنت عاوز أجيلهم حاجات تفرحهم واللى محوشهم مش هيكملوا .. فقولت نشترك سوا فى الثواب

-تمام .. انا جايلك ننزل نجيب اللى انت عاوزه

-ماشي يا حازم ربنا يخليك ليا بس مش هتروح معايا الدار بقى عشان انا رايح مع هدير

-تمام يانور عشر دقائق وابقى عندك ان شاء الله

-وانا مستنيك يا برنس

وبعد دقائق كان حازم برفقة نور .. قال حازم بحماس : هتجيلهم ابيه بقى ؟

-مش عارف والله؟؟ إنت إيه رأيك ؟

-بيتهيا لى ولاد يعني كورة كفر وتيشرتات لاعبية ..

-هما عشر ولاد بس معرفش مقاستهم

-اممممم طب دي تتحل ازاي يانور .. حتى ممكن تجيب لحد تيشرت ميسي يطلع بيشجع ريال مدريد

-هما في إيه ولا في إيه يا حازم يعني !

-يابنى اكيد ليهم اهتمامتهم زيننا بالظبط واكبيد في حاجات بيحبوها وحاجات لأ ! .. يعني مينفعش نجيبهم اى حاجة وخلص ! عشان انت مش هتجيب لنفسك أي حاجة وخلص !

-طب إيه العمل احنا رايعين بعد العصر

-انت عارف الدار ؟

-ايوا

-طب تعالى نروح ونقابل المدير ونعرف منه مقاسات الولاد ونشوف هما عاوزين إيه ونشترينهم وانت تاخدهم وانت رايع الساعة 3 ان شاء الله

-تمام يلا بينا

وبعد ساعة الا قليل خرجا من الدار ويبد نور ورقة كتب فيها ماطلبه الأولاد وقال بحماس : يلا بينا بقى عشان نلحق نشترينهم بقى

كان حازم مشغول البال فسأله نور باهتمام : مالك يا حازم ؟

قال باهتمام : بفكر في حاجة كدا .. مدير الدار قالى انهم مش مشتركين للولاد في اى نشاط رياضي عشان المصاريف وكدا ! .. فكنت عايز نعدى ع النادي لى كنت بلعب فيه زمان وأقول للكابتن عليهم وكدا واشوف الولد هيبقى بكام بالشهر .. وهو اصلا ساحة خيرية تبع مسجد فاسعاره من زمان قليلة .. ولو مش غالى اووى ونقدر عليه نشتركلهم فيه وكأنهم ولادنا بالظبط .. ولو كتير عليا انا وانت نقول لاصحابنا وكدا وكل واحد يتحمل اشتراك طفل مش هيعدى التلاتين جنيه مثلا ف الشهر

-تمام أووى يا حازم .. يلا بقى بسرعة نروح نجيب التيشترات وبعد كدا نعدي ع النادي

وفي تمام الثالثة والنصف وجدت هدير هاتفها يرن .. نزلت فوجدت نور أمام عمارتها .. قال لها بسعادة : ازيك عامله إيه ؟؟

-تمام الحمد لله .. انت عامل إيه؟

-تمام الحمد لله .. فرحان أووى

-إيه اللي معاك دا ؟

-تيشترات .. برشالونة على ريال على مناشستر يعنى زى ما طلبوا

قالت بسعادة : إيه دا بجد !! .. الله بقى

-وكمان روحنا انا وحازم للنادى اللي كان يلعب فيه زمان واتفقنا مع الكابتن ان الولاد هيروحوا للنادى هنقول للمدير ان شاء الله دلوقتي لما نروح

-بسم الله ماشاء الله .. حلوووو أووى يانور .. بس تكاليف الاشتراك وكدا إيه نظامها ؟

-هو المفروض بتلاتين بس قالنا عشان ظروفهم وكدا هيبقى بعشرين للولد .. فانا وحازم هنتكفل بيهم ان شاء الله

قالت بسعادة : ينفع اشارك معاكم ؟ .. منا بشتغل برضه وبقبض وكدا

-امممم ممكن تعملى حاجة تانية بس دا خلاص انا وحازم هنعمله ان شاء الله

-دخلنى معاك بقى مالييش دعوووة .. بلييييييييييز

ضحك نور من اسلوب الحاحها وقال : شوفى انتى حاجة ياستى ودخلىنى معاكى فيها

-ماشي ياعم الحاج .. بس مترجعش تشتكى من المصاريف بقى .. انت اللى قولت ادخلك معايا

ضحك وقال : ومتخافيش .. جوزك تقييل أووى .. جيب السبع ميخلاشي

ضحكت بهدوء وقالت : ديما عامر ياسبع .. تصدق انت غسل يانور

ضحك وقال : انا وغسل؟! .. ميركبوش على بعض

قالت وهما فى الطريق : بعيداً عن عينك الزرقا والشعر الاشقر يعني .. وشك برئ شوية يعنى مش أووى .. بس

بحسك طيب كدا وغلبان مش بتعرف تلف ولا تدور

قال ضاحكاً : كويس والله

-هو إيه اللى كويس .. ينفع بقى تبطل تضحك عليا ياغلس إنت ؟

-وكمان بقييت غلس ! .. من شوية كنت غسل

ابتسمت بخجل فأردف : عايزة أقولك كلام كتيرر أووى .. ممكن نقعد من هنا لبكرا ومخلصش

-ممكن بعد مشوارنا تقولى كل اللى انت عاوزه

-ممم مش هينفع عشان الشغل وانا مباحبش اتأخر .. ممكن أكلمك بليل لما أروح ؟

ابتسمت وقالت بمرح : يجوز يا حج نور أنا زي مراتك برضه

ضحك نور وقال : مقصدش ياعبقرية .. مايمكن بتنامي بدري يعنى

-لا ياكابتن هسهرك مخصص

-تمام .. يلا نشد بقى ف المشي عشان نروح ونقعد معاهم أطول فترة ممكنة

-ربنا يجعله فى ميزان حسناتك يانور إنت وصاحبك

أشار إليها بسبابته وقال : والدال على الخير كفاعله ياهدير .. والرسول عليه الصلاة والسلام لا ينطق عن الهوى ..
ربنا يتقبل منك ومنا

-ياااa

كان رامى جالساً في بيته حين رن هاتفه .. تلقى اتصال من والد تقى الذي أخبره بأن يأتي لمقابلتها يوم الخميس المقبل وأنهى معه المحادثة .. أنهى رامى المكالمة واحتضن هاتفه بسعادة ثم ذهب لغرفة أمه وطرق بابها بسعادة ودلف الغرفة وقال : ماما ينفع أقولك حاجة ؟

قالت بهدوء : تعالى عايز إيه ؟

دخل وجلس إلى جوارها وقال : هو إنتي منفسكيش تفرحي بيا ؟

نظرت له باهتمام فأردف : في واحدة زميلتي في المدرسة عايز أتقدملها

قالت : لا ياخويا وانت الصادق انت كلمتهم ولما وافقوا يقابلوك افتكرت ان ليك اهل تقولهم

قال بسرعة : والله ماكان قصدي ياماما بس انا توقعت انهم هيرفضوني فمرضتش اقولك ع الفاضى

-ويرفضوك ليه بقى ان شاء الله هو انت قليل ؟

-مش حكاية قليل .. بس تقى كانت بتشوفنى في المدرسة وانا بدخن وكنت بتكلم عادى مع زميلاتي وبهزر يعني

كانت عارفه اخلاقي بتاعت زمان ومكنتش تعرف انى اتغيرت الحمد لله

-طب وهى قبلتك على اي اساس يعنى وهى عارفه ان اخلاقك وحشة؟؟

قال بتردد : ماهو .. أصل .. ماهى غيداء تعرفها وهى قالتلها انى اتغيرت وتديني فرصة وتقابلنى وكدا يعنى اكبييد
قبلت تشوفنى عشان كدا

-لا والله ! هنتحاييل كمان عليها !

قال مدافعاً : والله ياماما مش القصد كدا بس ..

قاطعته بحدة : بلا القصد بلا بتاع ! لو مش عيزاك أحسن برضه هجيبلك ست ستها ! أنا ابني برضه مش قليل

حاول أن بيتسم وأمسك يديها بحنان وقبلها كي يراضيهها وقال : مش قليل عشان تربية ايدك ياماما ربنا يخليكي ليا
يارب .. وبعدين محدش قال عليها حاجة .. انا بفترض ان غيداء قالتلها كدا بس مش شرط يكون دا اللي حصل !
.. المهم يعني ان هي دي اللي قلبي اختارها وهحافظ عليها حتى من نفسي فمش عايز غير تشجيع منك ياماما
ودعواتك

قالت : ربنا ينورك طريقك يابني

قبّل يدها مجدداً وقال : أنا رايحلهم يوم الخميس ان شاء الله

-ربنا يوفقك يابني .. انا هاجي معاك ؟

-تاني مرة ان شاء الله ياماما

-على راحتك

قال بحنان : المهم تبقى راضيه عنى؟

-ارضيني انت بس وانا ارضى عنك

-وانتي عايزة منى إيه وانا هعمله ان شاء الله ؟

-عايزاك تسيبك من غيداء دي شوية وتركز مع اختك !

-والله ياماما بحاول ديما اقرب من رانيا وحتى هي معدتش بتتأخر وبقت بتخف المكياج خالص وبتلبس الفستائين اللى جبتها لها .. خطوة خطوة هتبقى زى الفل

-وطب ابعده شوية عن غيداء عشان تركز معاها اكثر

-ملهاش علاقة ياماما .. أنا هعاملهم هما الاتنين كويس .. هما الاتنين اخواتى ومالهمش غيرنا

-طيب يابني روح شووف حالك

قام متجها الى غرفته وأخذ يتسائل لم تكره أمه غيداء هكذا وأخذ يدعو أن يشرح الله صدرها ويجعلها تحبها وترضى عنها ..

فتح مصحفه على سورة العنكبوت فقرأ قول الله تعالى

أَحْسِبِ النَّاسُ أَنْ يُتْرَكُوا أَنْ يَقُولُوا آمَنَّا وَهُمْ لَا يُفْتَنُونَ

تنهد بعمق أحس أنها موجهة إليه خصيصاً له .. أكمل قراءة السورة حتى وصل إلى قول الله تعالى فى نهايتها

((وَالَّذِينَ جَاهَدُوا فِينَا لَنَهْدِيَنَّهُمْ سُبُلَنَا وَإِنَّ اللَّهَ لَمَعَ الْمُحْسِنِينَ))

أحس أن صدره ينتفض على أثر تلك الايات وقال لنفسه بحزم : هجاهد نفسي وربنا هيهديني ! ربنا بيهدي من يشاء بس الاية دى هى الشرط يعنى لازم اجاهد نفسي عشان اوصل لربنا ويرضى عنى .. هقرأ القرآن جملة واحدة زي عمرو خالد ماقال .. مش هقول ربنا لو عايز يهديني هيهديني !! انا اللى هجاهد نفسي وربنا هيهديني ان شاء الله وهوصل للفردوس الاعلى .. كل حاجة مستصعبها هوصلها بعون الله

وفى اليوم التالى دخلت حبيبة غرفة أخيها بعد ان طرقت الباب وقالت باهتمام : ينفع أحكيك على حاجه؟؟

قال ببسمة : تعالي يا حبيبة

جلست الى جواره وقالت : انت عارف ان كان عندنا عمل خيري تبع الكلية انهاردة .. واحنا مروحين كنا ست بنات .. ركبنا تمناية وانا قعدت فى الكنبة اللي ورا السواق على طول جنب الشباك يعنى وراه علطول وجني صاحبه ليا قاعد فالنص .. المهم فى عربية كسرت عليه فراح السواق سب الدين ولعنه ! والراجل كان شيخ ملتحي راح نازله لما سب الدين وكانوا هيضربوا بعض لولا الناس فصلت بينهم والسواق عمال برضه يسب فى الدين !! .. المهم راح راجع وراكب ومشى خطوتين بطئ شوية وقعد يهزر مع صاحبه ويضحك وكان يبسوق عربية جنبه برضه .. المهم صحبتي بصتلى باستغراب وانا برضه كنت مستغربة جدا من اللي حصل دا !!

فهى مش منتقبة فهو خد باله فراح باصصلها فى المراية وضاحك وهو يقول : سبحان من عصبك وضحكك

صاحبتي مبصتلوش بس اتعصبت وراحت قيلاله : المفروض متسبش الدين مهما حصل ! .. حتى لو مين عصبك !

راحق قايلها وهو سبحان الله هادى : يعنى العربية تتخبط ولا اتعصب ؟

قالت وهى برضه مبصتلوش : يعنى العربية لو اتخبطت يبقى قضاء من ربنا ! بس تسب الدين دا حرااااا بتخسر دينك !!

المهم راح قايلها معلدش وبعدين وقف فجأة فى نص الطريق وراح نازل من العربية من غير مايقول حاجة .. احنا طبعاً اتخفقنا عشان نزل كدا واحنا مش عايزين نتأخر .. المهم راح طالع بعدها بشوية صغيرين وباصص لصاحبتي وقالها : رضيته اهو

هى مفهمتش اصلا هو بيقول إيه ولا بصتله ولا سألته اصلا .. راح باصص للست العجوزة اللي راكبة جنبه وقالها : كنت متعصب وكسرنا على بعض فسبيت الدين بس نزلته دلوقتي ورضيته وقولته حقك عليا ..

طبعاً احنا اندهشنا !! راح مكملها : ولما روحته خرجلى من العربية وقالى انه اتعصب بس ونزلى اول مرة لما سبيت الدين انما هو شكله راجل ذوق ومحترم يعنى

وراح مكمل طريقه واحنا نازلين راح قايلنا ادعولى يابنات

ولما مشى صحبتي بصلتنا بانتصار وقاللنا : انا واحد وانتو صفر

ضحك نور فقالت حبيبة : عارفة انها دماغ وربنا بس اللي هي عملته دا صح وخصوصا انه كان شاب يعني مش راجل كبير بس هي اصلاً مش عارفه هي كدا صح ولا غلط ! بس الموقف عصبها اووى فاتكلمت .. وكلامها جاب نتيجة ايجابية

-بس في اغلب الاوقات هيجيب نتيجة سلبية لانك مش عارفة الشخص اللي قدامك دا غير انك بنت يعني ساعات في ناس بتستعبط وتقعده تتكلم عشان تردوا عليهم .. بس الراجل دا كان كويس الحمد لله وكويس جدا انه نزل صالح الراجل التاني .. هي المرة دى ربنا ستر والراجل تقبل الكلام انما في اغلب المرات بيردوا وساعات كتير بيقلوا أدبهم وولا ييفرق معاهم ..

هزت رأسها وقالت : تمام يانور .. يعني الافضل في الموقف دا منتكلمش

-للاسف اه ! لانك لو اتكلمتى ممكن حد يرد عليكى باسلوب مش كويس .. بس برضه لو حسيتى ان اللي قدامك هيتقبل ممكن تتكلمى بس لو حد كبير انما لو شاب يبقى لأ بلاش عشان غالباً زي ماقولتلك بيقدوا يتكلموا مع البنات وكدا

-تمام يانور .. هبقى أقولها بقى تاخذ بالها بعد كدا ان شاء الله

ابتسم وقال : تمام .. صليتي استخارة ولا لسه ؟.

-بصلي من أول انبارح

-و .. ؟

ابتسمت وقالت : مش لسه هترد عليه اخر الاسبوع ابقى؟؟

-اه طبعاً انا مش بضغط عليكى ولا حاجه

ضحكت من سخريته ثم قالت باحراج : مينفعش نتكلم تانى؟؟

-ينفع طبعاً .. بس لو مفيش قبول يبقى هتقدوا تانى ليه

-لا انا حاسة براحة وعايزة نقعد تاني بس برضه خيلنا لآخر الاسبوع زي ماتفقنا .. وشوف هو برضه هيقول إيه

-ماشي ياستي ربنا يبسرلكم اللي فيه الخير يابيبه

-حبوووش بيبة دا

دفعها مازحاً وقال : الحق عليا إني فكرت أدلعك عييال عايزة الضرب

كان حازم يتصفح موقع القيس البوك حين وردته رسالة من رامي

"حياة "

ضحك حازم وقال : مين دي ؟

-دا اسم حملة شوفتها واحد غلبان ناشرها فقولت اتبناها معااه ونشرها

-كلي أذان صاغية وممكن أتبرعلك وأنشرها معاك

-هو بصراحة عيني مش عليك .. أنا عايز صاحبك الداعية دا اللي اسمه أحمد عشان عنده فولورز كتير فيبقي مفيد

عنك

-الملافظ سعد يأم سعد قووول وربنا هيعبنا ونشرها

بص أنا هبعثلك البوست وانت هتنشره زي ماهو كدا بالظبط

-ابعت ياباشا

-بسم الله الرحمن الرحيم .. ازيكم كلكم ؟ .. اقولك رقم صاددم !! .. انت عارف ان خلال كل دقيقة في عشرة

بيموتوا بسبب مشاكل المية من نقصها وتلوثها ! .. عارف يعني إيه عشره في الدقيقة ! .. يعني انت و كل الناس

عشان نبقي زيهم كدا .. وعلى فكرنا دول فى وطننا العربي مش غرب عشان منتحججش ! الموضوع مش متعب ..
هو جردل وكوز بيوز .. مش شرط البوز المهم حاجة تجمع فيها

المشروع اسمه "حياة" بدأنا أهو رمضان 2015 وانا واثق فى الله ان المشروع هيكمل سنين حتى بعد موتنا .. تخيل
لما تنشره وتطبقه انت وصحابك هتوفروا ميا قد إيه ؟؟ وكل نقطة هتبقى فى ميزانك انت وهما ان شاء الله وربنا
بيضاعف ربنا استخلفنا فى الارض لنعمرها

#حياة مش مهلفك تنشرها لأنك آمنت بالفكرة وهتنشرها من غير ما أقولك

ربنا يجمعنا كلنا فى الجنة

-اييه رأيك بقي يا حازم ؟

اتسعت عينا حازم وكتب بسعادة : معاك طبعا دي فكرة جامدة جداً وهنشرها بإذن الله ونطبقها كلنا انا هنشرها
لكل اللي عندى باذن الله وهبعثها لاحمد كمان

-اييه دا بجد عجبتك ؟؟

-انت مش متخيل رامي دي روعه

-يعني هتساعدني فى نشرها ؟؟

-طبعا

-ماشي يا حازم .. نور رد عليك ؟

-لا لسه فى اخر الاسبوع ان شاء الله ..

-طب ينفع اسألك سؤال ؟

-اسأل ؟

-مش انت كنت بتحب منار زمان ليه اتقدمت لحبيبة؟.. اسف لو مش عايز تجاوب براحتك

كتب حازم بسرعة : لالا لالا هجاوب عادى .. موضوع منار دا كان قديم وانا نسيتته من زمان .. زى ماتقول كدا ربنا اختارلي اللي فيه الخير ليا ان شاء الله .. حتى لو محصلش نصيب المرادى فرينا هيبيقي شايلي الخير اللي انا مش عارف هو فين

-انا اسف يا حازم بس هو اللي بيحب بيعرف ينسى؟؟؟.. يعنى لو تقى مقبلتنيش هعرف انسها عادى وافكر اتجوز غيرها ؟

-هو انا مقتنع يارامي بصراحة إن مفيش حب غير بعد الجواز .. الحب دا بيجي من التعامل والعشرة واننا نعامل بعض بما يرضي الله ونفرح بعض ونفاجئ بعض ونستحمل بعض ونشارك بعض الفرح والحزن هو دا الحب بيتهيألي بقى اللي غير كدا بيبقى اعجاب بالشخصيات او رغبة فى الحب فهتقدر تنسى عادى خالص

-ربنا يكرمك يا حازم بحب كلامك اووى

-ايه ياض الرومانسية دي عيب كدا نتفهم غلط

o!! هو انت بتهزر كدا زينا عادى بالتريقة دى؟؟

-هههههههه لا مش علطول ومش هقولها تانى ياعم الواحد مش عايز يقول حاجه غلط

-ههههههه ماشي ياعمنا

-هنخلع انا بقى يارامي

-ماشي يا حازم

-اه صح بقولك ايه يارامي ؟

-لحقت او حشك؟؟

-اسمع يلا .. ماتقعد تنزل شوية فيديوهات برامج كدا وانت قاعد سلي وقتك يعنى

-انا بنزل فعلاً فى حاجه كدا بس معرفش انا كدا صح ولا غلط .. بنزل اسماء الله الحسنى لمحمد راتب النابلسي

..

-ياالله تصدق ان الحلقات كلها معايا وبلخصهم دلوقتى باسلوبى عشان قلت لاحمد انى هدى دروس فى الدار عن اسماء ربنا بجد شرحه اصلاً ملهوووش حل ماشاء الله عليه .. انا بحضر منه اللى هقوله اصلاً هو وكام حد بس كلامه الاصل يعنى وهقول المصدر طبعاً قبل مااتكلم لو عايزيهم هجيبهملك من غير ماتقعد تحملهم

-لا انا عايز احملهم .. بحب اسمع اللى بحمله بحس انى تعبان فيهم فبحترمهم

-خلاص ماشي زى ماتحب

وبعدها بأيام

اتصل نور بحازم وقال : بيفكر انهاردة بايه يا حزووم ؟

ضحك حازم وقال : بيفكرنى ان انهاردة صيام واحتمال آجى اضربك لو مبطلتث ثالثة

ضحك نور وقال : بتشتم حماك ! برا بيتي !

صح حازم : حمايا !! اييه دا بجد وافقت ؟؟

-هو انت كنت فاكرها هترفض اصلاً وانا موجود ؟

قال بغرور مصطنع : لا طبعاً ياعم هو انا اترفض

ضحك نور وقال : طيب ياعم المغرور .. اما اقولها بقى تزود كلمة مغرور جنب عصبي

قال حازم بصدمة : هي فكراني عصبي ؟؟

-لاياحيبي هي متأكدة.. بس انا حلفتها انك فى الطبيعى مش بتتعصب وان كان فى ظروف جامدة عصبتك وهى عملت استخارة واستريحت هتيجي تانى امته ؟

-ليه؟؟؟

قال فى نفسه "انت هتعمل زيبها" .. : عشان تشوفها يا أخ حازم ولا مش عايز ؟

-ااه صح ! .. طب هتبقوا فاضيين امته ياعمي ؟

ضحك نور وقال : ممكن انهارده بعد المغرب بحيث منعلطش شغلك وانا انهارده اجازة من الشغل

-تمام يانور .. أشوفك بعد المغرب

-لا ياخويا هتشوفنى فى الضهر والعصر ان شاء الله .. ابقى هات معاك طنط بقى تقعد مع حبيبة .. ممكن تجيبها قبل المغرب لو عايز عشان يقعدوا مع بعض شوية

-ااه صح تصدق برضه كنت هنسى

انفجر نور ضاحكاً وقال : منا بفكرك أهوو

قبل المغرب صحب حازم والدته لبيت نور و جلست مع حبيبة بغرفتها وأخذتا تتجذبان أطراف الحديث وأعجبت جداً بطريقتها المرححة والذى جذبها أكثر جمال خلقتها وإن لم يكن لها يد فيه ..

وبعد أداء صلاة المغرب أوصل حازم والدته لبيتها ثم ذهب ليرى حبيبة وقد بشرته والدتها بما لايفرق معه كثيراً وهو الشكل الحسن

وفى بيت نور

-نووررر أنا مكسوفة اووى ازای هقلع النقاب!؟

-معلش ياحبببة هو دا الصح .. يعني هيتجوز واحدة ميعرفش شكلها

-بس انت عارف انا بقالى قد إيه مقلعتش النقاب قدام راجل؟؟..لالالا صعبة أووى يانور أطلع بالخمار حاف كدا

فكر قليلاً ثم قال : طب انتى ممكن تخرجى بالنقاب وهو لما يقولك ارفعيه ترفعيه ماشي ؟

-ماشي كدا ارحم ع الاقل هرفعه شوية وانزله تانى

-حبببة أختى بتتكسف ياريتك جيت من زمان يا حازم عشان أشوفها مكسوفة

-الكسوف حاجة والدين حاجة تانية ياعم الشيخ

قهقه قائلاً : أعلم أعلم ياعزيزتي ها ها ها

ضحكت من شكل أخيها ثم سمعا طرق حازم على الباب .. خرج له نور وبعد أن جلسا قال له : بصراحة يا حازم

حبببة مكسوفة تطلع من غير النقاب

نظر له حازم باهتمام فأردف : فهي هتطلع بيه وتتكلموا عادى وفى النص قولها ارفعيه انا قولتها كدا وقالتلى ماشي

كدا اهون

هز رأسها وقال : تمام يانور

دخل نور وخرج وخلفه أخته التى جلست فى قبالة حازم ونور جلس قريباً منهما .. اعتدل حازم فى جلسته وقال :

ازيك عامله إيه ؟

-تمام الحمد لله وانت ؟

-تمام .. المهم بقى كنت عايز أقولك حاجة مهمة جداً عشان عارف إن نور فى فشل فى النقطة دي

أنصت باهتمام فأردف : هو انا يوم ما اتعصبت على هدى كان أكثر يوم اتعصبت فيه فى حياتى والله وبحلف عليها ! انا ساعات بتعصب اه انما عصبية انى ازعق ف الشارع والعصبية تعميني للدرجادى فوالله محصلتش غير فى اليوم دا ..وانا عاهدت ربنا وحلفت على نفسي انها مش هتتكرر تانى مهما حصل وانا والله هحاول على قدر استطاعتى متعصبش على اى حاجه خالص حتى العصبية البسيطة مش الجامدة يعنى

هزت رأسها فقال : دي حاجة .. الحاجة الثانية هى ممكن تكون غلسة شوية بس معلى استحمليني فيها .. هو نور عارفنى أكثر منى اصلاً ومعرفش قالك ولا إيه .. هو انا بصراحة موضوع شغل البنات دا بيضايقني بس مش بفكر بعقلية متخلفة الحمد لله .. بس اللى اقصدته لما تتخرجى ان شاء الله مش لازم تشتغلى فى الصيدلية .. لو عايزة تشتغلى فخليكي فى شغل الحكومة وهما أكثر ناس محتاجين ناس كويسة تشتغل وتعامل المرضى كويس وتصرفلهم الدوا ببسمة ونعاملهم كأنهم اهلينا .. انما فى الصيدلية مش حسسها هتنفع اصلاً يعنى هتشتغلى الصبح وبليل ! دا غير الدار اللى انتى فيها ودار خطوة ان شاء الله .. هيبقى كثير صح؟؟

تتحنحت بحرج وقالت : هو انا مكنتش ناوية اكمل فى الصيدلية اصلاً يعنى هخلص الشهر دا وهسيبها لانى بستحرم أبيع مكياج وكدا ودا حرام فعلاً لانى بحثت عنها .. فمش ببقى عارفة اتصرف لما واحدة بتقولى عايزة مكياج .. بحاول اكلمها كدا واقولها ان مش صح فى ناس بتتقبل وناس كتبير لأ .. بس طبعاً بيعه لو سألتها هتخرجى بيها وقالتلى لأ ..بيحصلي مشاكل كثير بسبب الحكاية دي فهسيب الشغل لأنه أثر على مذاكرتى الترم دا -أنا بصراحة لو دخلت بنت الصيدلية مش انا اللى يقوم زميلي هو اللى يقوم ولو راجل انا اللى يقوم .. انا عارف انى كدا مش صح بس انا حاولت أعمل اللى اقدر عليه لحد ماتخرج واشتغل تبع الحكومة ان شاء الله -ان شاء الله

أخذنا يتجذبا أطراف الحديث ونسيا نهائياً أمر النقاب .. ومع صوت آذان العشاء استأذن حازم وخرج بصحبة نور الذي قال له بمجرد خروجهما : انت نسيت تقولها ترفع النقاب ولا إيه ؟؟؟؟؟

قال بسعادة : بصراحة لأ ! .. بس هى كانت مكسوفة فانا مرضيتش اكسفها وبعدين انا فاكر شكلها شوية من زمان يعنى فمش لازم اشوفها مش شرط يعنى .. خليها مفاجأة بقى لما نكتب الكتاب

ضحك نور وقال : وربنا انت دماغ يا حازم

-دماغ دماغ ياعم .. انا بحب المفاجئات بس

وبعد صلاة العشاء

ذهب رامي لبيت تقى وجلس مع والدها وأخيها وبعد قليل دخل أخيها لينادي لها طرق بابها ودخل بابتسامة وقال :

يلا يا جميل رامي مستني برا

وضعت يدها على قلبها وقالت : أنا مرعوبة

-ايه يا بنتي هو هياكلك! وبعدين إيه القمر دا ؟

نظرت للمرأة بدهشة وقالت : مش عارفة بس انا والله مبحطش حاجة وانت عارف

ضحك محمد وقال : قرفته حلوة

قالت أمهما : إنتو هتقعدهوا ترغوا .. خد أختك يلا وإخرجوا

نظر لها محمد بحنان وخرج وهي خلفه تمشي باستحياء وعيناها بالأرض وقلبيها يكاد يخترق صدرها .. عبرت الصالة

خلف أخيها حتى وصلت الى كرسي في قبائه .. أشار لها أخيها بالجلوس فجلست وهي لم ترفع عيناها بعد إليه

لم يكن أقل قلقاً منها .. رفع بصره من الأرض وابتسم حين رآها ثم نظر لوالدها الذي قال : تقى بنتي هي وأخوها

أغلى حاجة عندي ..

قال رامي ببسمة : ربنا يخليهملك وبياركلك فيهم

-أسيبكم بقي تتكلموا مع بعض

نهض والدها وجلس على بعد خطوات منهما

رفعت عيناها ونظرت له وبسرعة خفضت بصرها حين تلاقت أعينهما وكذلك هو .. وقال باحراج : ازيك ياميس تقى ؟

-تمام الحمد لله وحضرتك ؟

-كويس الحمد لله

ظلا صامتين للحظات وهو يعتصره الاحراج من تصرفاته السابقة لا يدري كيف يتحدث معها !! .. ابتلع ريقه بصعوبة وقال : انتى محضرة أسئلة ولا إيه ؟

قالت باحراج : يعني

-طايب .. اسئلي ؟

حاولت أن تدع الاحراج جانباً وقالت : لو ينفع أعرف حضرتك ؟ مين ؟ وعائش إزاي وليه وكدا ؟

ابتسم وأخذ نفساً طويلاً وسمى الله سرأً وقال : اولاً كدا انا خريج تربية .. وبشغل بقالى ترم واحد .. يعني هو للاسف انا دخلت تربية مضطر كنت هموت وادخل هندسة وطول عمرى بكره الكلية وكنت واخدها باستهتار اهي الحاجة اللى مجموعى جابها ! ومبقولش انى اتظلمت انا قريب بس عرفت انى كنت استاهل كل دا .. المهم يعني كنت واخذ المهنة كلها باستهتار بس بدأت أفكر فى اخر الترم دا ان مهتنا هى صناعة بشر .. يعني ربنا اختارلنا المكان دا وهو اهم مكان واهم شغلة اصلا .. يعني بنربي أجيال ونطلع شباب يتحملوا المسؤولية .. بدأت أفكر بطريقة مختلفة من ناحية الوظيفة .. انها مش مجرد وظيفة عادية هقبض عليها وبس .. أنا قررت أبقي حد فعّال فى مكانى اللى ربنا اختارهولى

تنهد وقال : عارف انى ملغبط شوية بس عشان الافكار نفسها متلغبطة لسه فى دماغى وكدا .. المهم انا قبل كدا مكنتش فى دماغى موضوع ربنا أووى .. يعني مكنتش بفكر خالص ربنا راضى عنى ولا لأ وهو انا كدا صح ولا غلط .. بعييداً عن الماضي انا قررت أبقي حد مختلف .. بصراحة أنا بدأت .. عارف إنى فى الاول خالص بس انا بدأت بقالى كام اسبوع اتظبط بجد ومش هتنازل أبداً ومش هقبل بأني أرجع لورا أبداً إن شاء الله

ابتسمت دون أن تنظر له وقالت : ربنا يعينك

-ياارب .. قوليلي بقى إيه حلمك اللي عايشة عشانه؟؟

قالت بثقة : انا عايشة وانا مؤمنة بآية .. ((إني جاعلٌ في الأرض خليفة)) .. خليفة يعمر الأرض .. هو التعمير دا نطاق واسع أووي .. وأنا إخترت تعمير النفس .. يعني أنا مختارة التربية عن حب .. أنا كنت علمى علوم وجبت مجموع يدخلنى صيدلة بس أنا اللي اخترت تربية عشان بحبها وحاسة إنى هقدر أقدم فيها بعون الله .. يعني أنا من زمان بقرأ فى التنمية البشرية .. فى التربية ومراحل المراهقة وازاى نتعامل مع اللي قدامنا كويس وبنبي الشخصيات ونقويها .. واحلى ما فى الموضوع انى كنت بقرأ فى نطاق ديني .. يعني الناس اللي بتفصل التنمية البشرية عن الدين بينقصها حاجات كتيري أووي .. مش هقدر أقول عنهم غير انهم مجربوش بس لو جربوا عمرهم ماهيختاروا يفصلوا الحياة عن الدين .. فدا كله فادنى لما بدأت اشتغل واتصاحت جدا مع البنات وضيعتهم عندي الفيس وقررت منهم وبحاول أزرع فيهم حجة حلوة واديتهم من وقتى ودا اللي اغلب المدرسين بيكلسوا يعملوه وبيخسرهم قلوووب الطلبة .. انهم بيكلسوا يسمعوهم او يبصوا فى مشاكلهم .. وديماً يبسفها من رأيهم ويقولوا انهم ديماً غلط وصغيرين وملهمش رأي فدا اللي بيزرع الكره فى قلب الطلبة ناحية المدرسين .. فانا عايشة عشانهم .. بس كدا

دخل نور منزله هرولت حبيبة نحوه وقالت بتعجب : إيه اللي حصل دا يا نور؟؟

ضحك وقال : إيه ياستي اللي حصل؟؟

-يعني .. أقصد ازاي مقاليش ارفع النقاب؟؟

-هو قالى انه فاكّر شكلك من زمان يعني

-بس انا شكلى اتغير من زمان

-اعمله إيه بقى ماهو اتكسف لما لقاكي مكسوفة فمرضيش يكسفك أكثر

-طيب مش كدا غلط؟؟

قال بحيرة : معرفش والله يا حبيبة

قالت باحراج : طب هو مينفعش يعني يشوف صورة ليا ؟

-ينفع بس انا مينفعش أقوله كدا .. طالما هو مش عايز يشوفك يبقى خلاص براحتة بقى

قالت بحيرة : طيب

دخل حازم منزله فاندفعت نحوه هدى وقالت باهتمام : عملتواا اييه يا حازم ؟

قال ضاحكاً : كل خير ان شاء الله

اقتربت والدته وقالت باهتمام : عجبك يا حازم ؟

قالت هدى بانفعال : عجبته اييه؟؟ دى قمرر قولي بس يارب هو اللى يكون عجبها

ضربتها على كتفها وقالت : بس يابت متقوليش على أخوكى كدا دا قمر .. قولى يانور عيني شكلها عجبك ولا إيه ؟

ابتسم حازم وقال : ماشاء الله عليها ياماما

قالت الام بفرحة : يعنى هفرح بيك أخيراً يا بني ؟

قال باسمًا : قولي يارب لو في خير

قالت والدته : ان شاء الله قريب أووى ..

-بعد اذنك بقى ياماما يادوب امدد شوية واغير وانزل الشغل

دخل غرفته فلحقته هدى وقالت : هو انت معدش ينفع تشوفها تانى صح ؟

قال باهتمام : طالما رضيت ان ملامحها تكون ملامح زوجتى يبقى خلاص مينفعش ابصلها ودي حاجة بينى وبين ربنا بقى وهو اللي عارف نيتى وهيحاسبني

-طيب .. يعني انت مش هتعوز تشوفها تانى صح ؟ .. أقصد بقى عشان تخلصوا وتتخطبوا بقى ؟

قال بسخرية : مش لما أشوفها أولاني

قالت بدهشة : نعم !!! هو انت مشوفتهاش !!

قال باحراج : بصراحة هي اتكسفت تخرج بالنقاب وانا اتكسفت أقولها ترفعه

قالت غير مصدقة : ازاي يعني اتكسفت؟؟

هز كتفيه وقال : يعنى اتكسفت .. مانتى مجريتش احساس ان بقالك خمس سنين ماختلطيش بينت الا للضرورة القصوى ويتحاولى تدريبي نفسك اووى على غض البصر ويجي حد يقولك قولي لواحد ترفع نقابها ! اتخرجت طبعاً وبعدين الحياء مش عيب

-الحياء حلو بس دا حقك ودى هتبقى مراتك لازم تشوفها

قال كالأطفال : معرفش بقى ياهدى اتكسفت وبعدين انتوا بتقولوا انها حلوة فخلاص يعنى مع انى والله مش فارق معايا جو العين الملونة وكدا وان اللى يفرق معايا الدين و الاخلاق والدماغ بس كدا

-طب هو انت مينفعش تشوف صورة ليها ؟

-بيتهيالى ينفع لو وليها عارف يعنى بس هجيب الصورة دى مينين؟؟

قالت هدى : احنا متصورين سيلفي كثير فى الدار يعنى وهى بوشها وفاكة النقاب خالص بس خلتنى أوعدها انى همسحهم من الفون وهحطهم على فولدر ع اللاب بياسورد .. كلم نور وشوفهم

هز رأسه وقال : لالا طبعا مينفعش ! ميصحش !

-بقولك إيه .. انت المفروض متدين يعنى ميصحش ومينفعش متاكلش معاك بتعريفة .. شوف رأي الدين .. هروح أشوف فتوى على اسلام ويب او دار الافتاء ينفع ولا مينفعش على ماتغير هدوك

-تمام

ذهبت لغرفتها وبعد دقائق لحقها ودلف غرفتها وهو يقول : ربنا يسامحك ياهدى كان زمانى نايملى النصاية دى

-ابقى نام لما تيجي .. تعالى بص ع الفتوى .. ينفع تشوف صورة أهوو على فكرة

-وريني كدا .. آه صح دا ينفع فعلاً بس في شروط .. نفس شروط الرؤية فى المقابلة يعنى الصورة مينش فيها غير وجهها وكفيها وأبص لحد ما ارضي بملامحها مش اكرر

-أطلعك صور بقى؟؟

-تمام .. أنا هروح أكلم نور وانتى طلعيلى صورة تكون فيها عاقلة وطبيعيه .. انتى عارفة صحبتك بقى وبلاش الصور اللى بتتجننوا فيها دى

-طووويب يا ابيه

خرج وحدث نور وبعد دقائق عاد للغرفة وقال قبل أن يدخل : خلاص ؟

-خلاويص يا ابيه اتفضل

ضحك من اسلوبها وقال : بسم الله الرحمن الرحيم

أرته هدى بضع صور قليلة لحبيبة إكتفى بها هو وارتضى ملامحها ملامح لزوجته ثم خرج متجهاً لعمله بعد أن حدث نور مجدداً وأخبره أنه رآها واعتذر له بشدة ولكن نور لم يأبه لاعتذاره لأن هذا هو حقه الذي شرعه الاسلام له

“هل يجب أن أخبر خطيبتى بما سبق لى من معاصي فى الماضى ”

كتبها رامى فى عدة مواقع دعوية وصفحات شيوخ على الask وكان كلما رأى رداً ارتاح أكثر .. ويشعر أكثر بأنه مقصر تجاه الله الذى هو أقرب إليه من حبل الوريد وأنه سيقبله وسيغفر له ولو طالت ذنوبه عنان السماء .. سيغفر الله له ويعفو عما سلف ولكن بشرط التوبة النصوح والرجوع لله وانت واثق أنه لن يخذلك ولن يتركك أبداً ..

وبعد الفجر عاد حازم من الصلاة فوجد هدى جالسة بغرفتها والمصباح مضاء.. فتح الباب بهدوء فوجدها جالسة شاردة على الفراش .. اقترب من وجلس الى جوارها وقال : سرحان فى إيه يا جميل؟؟

نظرت له ببسمة هادئة وقالت : بفكر

-فيا طبعا

-بصراحة آه .. بتخيلك لما تتجوز وتسيبنا .. هقععد لوحدى مع ماما .. يعنى انت دلوقتى ع الاقل بتسلينى شوية

ضحك وقال : طب الحمد لله طلع ليا فائدة أهوو

-مبهرش يا حازم ..

-طب انتى ليه شايلة الهم من دلوقتى؟؟..لسه قدامى انا وحبيبية بتاع سنة ونص على ماهى تخلص ونتجوز بأمر الله فانا لسه على قلبك يعنى

قالت بحزن : مش عارفه يا حازم .. أنا حاسة بفراغ يعنى انا ماشية دلوقتى تمام أهوو عشان فى الاجازة .. خايفة لما أدخل الدراسة أكسل وأراجع وأبطل أنزل البرامج واقرا الكتب

-طب ليه ياستى بتقدرى البلا قبل وقوعه؟؟

قالت بضيق : عشان انا عارفه نفسي .. يعنى فى الدراسه بفتح نت فى الخميس بس .. هكسل أقعد انزل برامج وهفتح الفيس بس

-طب مانى فاضيه دلوقتى .. ماتجهزي مكتبة صوتية عندك من دلوقتى هتتفعلك فى الدراسة ان شاء الله كل يوم تنزلى حلقتين ثلاثة على حسب الوقت اللي انتى قعداه .. ولما تيجي الدراسة اسمعهم فى المواصلات او قبل ماتنامى .. هستفادى جدا .. وكمان نزلى شوية كتب pdf اقريهم ع الموبيل بس يكونوا باذن الناشر مش المسروقين

-طيب هو انا ينفع ابقى احضر دروس فى الدار بتاعت اشيوخ احمد صاحبك لما تفتحوها؟..حبيبة قالتلى هيبقى فيها تنمية بشرية

-طبعا ينفع ان شاء الله

قالت بسعادة : ماشي

-وممكن تشوفي لو عايزة تنزلى فى فريق تطوعى او حاجه كدا يعنى تشغلى وقتك برضه

قفزت من مكانها وقالت بسعادة : يعنى انت بجد هتوافق؟؟

غمز لها بعينه وقال : وعمك الحاج الفيس هو اللي قالى .. طب بدل ماتقولى للعيال ادعولى تعالى قولى لاخوكى علطول .. مبعضش وربنا

نظرت للارض باحراج فقال : انا موافق تنزلى بس ميكونش فريق مختلط .. هى مش غلاسه بس دا الصح يعنى

-ماشي يا حازم هكلم حبيبة واشوفها هى اكبيد عارفه

وفى اليوم التالى

-هو احنا هنعمل الفرح امته بقى ياعمو؟؟

قال على : لما منار تخلص ياعمر ومتضغطش عليا

-ماخير البر عاجله يااحاج .. نكتب الكتاب حتى؟؟ .. بليبيز

-مش اتفقنا هيبقى قبل الفرح باسبوع كدا؟؟

-منا عايز نتكلم براحتنا بس مش عارف يعني تعاطف معنا يااحاج على .. لسه هستنى تيرم

-ياااض بطل زن بقى

-بليبيز بليبيز بليبيز ..

-يووووه بقى ياعمر هبقى أقول لمنار ونعمل استخارة .. بطل انت زن بس

-طيب ياعمو مرسىي كثير

-ابن مين انت فى البلد يابنى؟؟ الواحد معدش هيعرف يتكلم معاك يعد كدا يابو مرسىي كثير

كان حازم عائداً برفقة رامى من الصلاة الذى تنهد وقال بسعادة : معرفش بقى يا حازم هتوافق ولا ابيه بس حاسس
انى مبسوط جداً

-ربنا يفرحك ياسيدي وان شاء الله توافق لو فيه خير

-عايزك أقولك حاجة بصراحة كدا يا حازم

-قووول

-عمري ماكنت أتخيل إن الفرحة دي موجودة أصلاً .. يعني بجد الموضوع جميل أووى .. إنك تروح تتقدم لواحدة متعرفهاش وتعرفها ف بيت اهلها وتتعرف عليها هناك دا فى حد ذاته شئ جميل .. يعني بجد عمرك ماتعرف انسان غير لما تقابله فى بيته اكثر مكان بياخذ راحته فيه ..

ابتسم حازم وقال : فعلاً والله عندك حق

-وعجبني أووى بوست أحمد صاحبك بتاع لو خرجت مع واحدة خمس سنين عمرك ماتعرفها قد ماتقابلها مرة واحدة فى بيتها .. اولاً ربنا مش هيبارك فى الحرام .. ثانياً هى ديما هتتصنع عشان تبان قدامك كويسة براا .. بس بمجرد ما يتقفل عليكوا باب واحد هتلاقيها بتعطس فى الجو كدا عادى واحتمال فى وشك (قالها بمرح) وانت متبقاش مصدق وتقووول دى كانت بتتقرف من البتيخ عشان كله بذر ..انما لما تروحلها فى بيتها هتشوفها قاعده فى بيتها ازاي وبيتها مترتب ازاي وهل تحت الكنبه وفوق النيش فى تراب ولا لأ ..انت اه مش داخل تناظر على بيوت الناس بس بتاخذ فكرة عن بيتك المستقبلي هيبقى شكله عامل ازى .. بصراحة عجبني اوى البوست دا لاننا غالباً مش بناخذ بالناس من حاجات صغيرة كدا مش بتبان غير ف البيوت بس

-ماهو دا من فوايد بجد اننا ندخل البيوت من ابوابها

تنهد رامي وقال : ربنا يسامحنى على اللي فات .. عمري ماتخيلت انى ممكن اندم على حاجه عملتها .. أنا مش بندم بس دا أنا بكره الفترة دى ويحمد ربنا مليون مرة انى بعدنى عن اللي كنت فيه

قال حازم مبتسماً : من علامات التوبة إنك تندم أشد الندم ويبقى الذنب اللي توبت من أكره حاجه عندك .. فإنت كدا تفرح عشان كرهك للذنب دا من شروط التوبة اصلاً .. بس مش معنى كدا انك تقعد تتحسر على اللي فات فتضيع اللي جاي .. فاهم قصدي ؟

-ايوا فاهمك .. على فكر يا حازم انت تنفع داعية

ضحك حازم رغماً عنه وقال : قوول يارب

-يارررب أشوفك داعية لربنا كدا وأتفشخرك إنك صاحبي

-يارب أنا وانت يارامي ومن غير فشخرة ولا حاجه

-لا يا حازم كفاية انت انا مينفعش ابقى داعية اصلا ..

قال بتعجب : ليه يارامي؟؟

قالت رامي بضيق : مانت عارف ليه يا حازم ! كبيرة عليا اووى

-بس انت بدأت تتغير يارامي الحمد لله وبسرعة كمان .. يعني تعالى شوف نفسك كمان كام شهر لو فضلت بالمعدل دا .. مش هتعرفك اصلاً

-ياااه لسه كام شهر

-مانت بقالك شهر وشوية أهوو وماشاء الله اتحسنت اووى .. عمرك كنت تتخيل انك هتتبط نفسك كدا ؟

-بصراحة لا .. طب مينفعش ابقى داعية ومش حافظ القران ولا فاهمه .. عايزة احفظ قران اووى يا حازم .. انتو هتفتحوا الدار امته؟؟

-الاسبوع الجاي ان شاء الله

-ان شاء الله .. انا اول طالب عندكوا بقى

-وعندكوا ليه ياعم منا هحضر معاكوا مش هسيبكوا يعنى

وفي المساء صلت تقى استخارة ودعت الله وهي تعلم أنه سييسر لها الخير حيثما كان ..

جلست تفكر على فراشها

“هو انا حسيت انه بقى كويس وكلامه كويس وقال انه بطل سجائر وبقي بيصلي فى المسجد وبقي كل همه رضى ربنا .. بس هو في حد بيتغير اووى كدا بسرعة كدا ؟؟ .. مش يمكن يقول كدا قدامى بس عشان اقبله ! .. لالا لالا لا استغفر الله العظيم ايه اللى انا بقوله دا !! دا سوء ظن حرام عليا ! مفيش حاجة كبيرة على ربنا .. ربنا بيهدي من يشاء وبيرزق من يشاء بغير حساب والهداية دي رزق .. بس انا خايفة .. يعني المفروض اخد واحد اعلى منى مش اقل منى .. عشان يشدني وياخد بايدي للجنة .. انا ..

قطع تفكيرها صوت رنين هاتفها .. ارتاحت حين رأت اسم هدير وردت : السلام عليكم ورحمة الله

-وعليكم السلام ورحمة الله وبركاته .. العروسة عامله ايه ؟

قالت بحيرة : محتارة ع الاخر ياهدير

-هيهيهي منا عارفه فقولت اكلمك .. انا برضه كنت محتارة اووى كدا بس ربنا فى الاخر ييسرلي الخير .. ودا اللى هيحصل معاكى باذن الله

-يارب ياهدير .. المهم ياستي انتى اتصلتى وانا بسأل نفسي سؤال فاتفضلي بقى جاوبيني عقاباً عشان قطعنى تفكيرى وشوشرتى عليا

-اينشتين بي فكر يعنى .. قول ياباشا سؤالك

-مين اينشتين دا يكونشي شيكولاتة ؟؟

ضحكت هدير وقالت : دا انتى فايقة ورايقه وعامله دماغ نسيك الفزيا اللى خدتها ف ثانوى .. سييك منه وقوليلي السؤال

-طيب ياست هدير .. ف الاول كدا انا مش حاجة كويسة ولا عدلة يعنى

-متقولش على نفسك كدا ياتوتو انت جميل

-يابت اسمعى .. المختصر مش المفروض الزفت بيبقى اعلى من الزفتة فى الدين عشان يشدها للجنة وياخد بايدها ويشجعها وكدا؟؟

-زفت .. زفته ! جنة؟؟ .. انت جاي تبع مين ياخ؟؟ .. يابنتى انتى المفروض مدرسة لغة عربية يعنى قدوة .. وخليفة الله فى الارض وكلام كدا جميل ولا نسيته خلاص؟؟

-خلاص سوري ياابلة هدير .. مش هتكرر تانى بس انا فعلا محتارة اووى وانتي عارفه لما بحتار بعمل ايه

-اه بتعضينا ! .. المهم ياستى مرعاه لانك حيرانة يعنى .. هو الافضل ان الراجل يكون اعلى من الست بس الصح انه يكون عنده حماس وعلطول بيطور من نفسه .. يعنى اخد واحد ونفضل نعلى سوى .. ولا واحد تانى عالى ومقتنع انه كدا خلاص بقى زى الفل فاوصل لمستواه وأقف؟؟ .. أكبيد طبعاً اللي عنده حماس وبدأ يشتغل افضل .. بس ميقاش عنده استعداد ومش بياخد خطوات .. يعنى مستني اما يتحوز واحدة متدينة عشان تشجعه ! لا دا يتحط جنب الحيطه لانه لو كان جاد وصادق كان اخذ كام خطوة لحد ما ربنا يرزقه بالزوجة الصالحة اللي هيعينوا بعض ويرتقوا اكثر باذن الله

انصتت تقى باهتمام كبير فأردفت هدير: اللي عرفته من مصادرى اللي هي نور .. انه بطل سجائر الحمد لله وبقي يكرها كره العمى .. وبقاله مدة ملتزم بالصلاة فى المسجد يعنى مش محتاجة تبعنى اخوكى مرشد استكشاف المصدر موثوق منه الحمد لله .. وبقي يسمع برامج كثير .. بدأ زينا كلنا فى الاول وربنا يعينه .. عملت استجابوب لزوجى الحبيب عشان آجى أطمئك

تنهد تقى وقالت : ربنا يريحك قلبك يا هدير زي ماريحيتيني دلوقتي

-بس كلامى دا ميغيش عن الاستخارة برضه

-طبعاً .. انا كل يوم بعمل وهعمل ان شاء الله لحد اخر يوم .. دا جواز برضه مش لعب عيال

ضحكت هدير وقالت : ربنا يصلحك حالك ياتقى

وبعد عدة ايام دخل نور غرفة أخته بعد أن طرق الباب وقال : بدون مقدمات .. موافقة ولا لآ؟؟

ضحكت من أسلوبه الذى يشبه الانسان الالى وقالت : طب اقعد اشرب شاي طاه ؟

ضحك رغماً عنه وجلس الى جوارها وقال : هنخليه شربات بس قولى موافقة ولا إيه؟؟

-حسنتين كنافه بقى جنب الشربات عشان محبوبوش .. هو انت هتحدى على حسي لوحدهك يعنى

انفجر ضاحكاً ثم قال : يالماضه اخلصي !

-موافقة يانور خلاص استريحت ؟

دفعها بمرح بيده وقال : منا عارف انك موافقة بس قال عاملة مكسوفة

-كداا عيبب يانور .. افكر ان مراتك صحبتي وممكن اوقع واخدم يعنى

-توشكر يا عرب .. مش محتاجين خدماتك .. اما اروح اقول لحازم بقى ..

قالت بخجل : ماشي

-هو قالى حاجه وكنت عايز اقولها لك

-خيراً ؟

-كان بيقولى عايز تكتبوا الكتاب زيننا كدا

-بس فى فرق يانور انت فرحك ان شاء الله هيبقى فى الاجازة الجاية انما انا لسه فرحي لو ربنا شاء هيبقى لما

اخلص يعنى لسه كثير

-ماهو بيقول مش عايز الخطوبة تتطول يعنى .. تكتبوا الكتاب وتبقى براحتكم

-مش عارفه يانور .. بس انا مقعدتش معااه غير مرتين بس اكييد قعداننا فى الخطوبة هتفرق صح .. وعادي ان

اتنين مخطوبين يفسخوا الخطوبة صح ؟

-اه عادي يعني مش اخر الدنيا بس ان شاء الله مش هيحصل

-ليبيه يعني ؟

-عشان انا بحبكم ومش هظمن عليكى مع حد اكر من حازم اخويا حبيبي

-ربنا يقدم اللي فيه الخير يانور ان شاء الله .. بس بلاش كتب الكتاب دا بدري لسه عليه .. خليه حتى لما هو يخلص .. وبعدين لسه فى تشاورات وحاجات وامورات واستخارات وكدا يعني

ضحك نور وقال : هو انا مينفعش اكلمك من غير ماتهزري

-مبقاش حبيبة يانور

وبعدها بأيام جاء اليوم المرتقب بعد كثير من الترتيبات والعمل المتواصل .. اجتمع احمد ونور وحازم ورامي ويوسف وبعض الشباب من المنطقة وبعض الشباب المتابعين لأحمد وبعض الشيوخ الشباب والكبار الذين كانوا يعملون معه فى الدار القديمة .. وبعض الشباب الذين كانوا يحضرون فى الدار السابقة منهم من سبق له دخول دار ومنهم من كانت تلك تجربته الاولى .. كانوا حوالي خمسون رجلاً .. كان الافتتاح رائعاً .. بدأ بتلاوة حازم ذو الصوت العذب لآية من كتاب الله -تعالى -

وَلْتَكُنْ مِنْكُمْ أُمَّةٌ يَدْعُونَ إِلَى الْخَيْرِ وَيَأْمُرُونَ بِالْمَعْرُوفِ وَيَنْهَوْنَ عَنِ الْمُنْكَرِ ۗ وَأُولَٰئِكَ هُمُ الْمُفْلِحُونَ

كان صوت حازم رائعاً لمس قلوب المستمعين .. وكلّ منهم يتخيل أنه سيكون من المفلحين الذين يدعون إلى الخير ويأمرون بالمعروف وينهون عن المنكر ..

أنهى حازم قرائته وتحرك من مكانه ووقف مكانه أحمد الذي قال مبتسم المحيا .. : السلام عليكم ورحمة الله وبركاته .. هنبداً بمقدمة الدار اللي فاتت اللي هي اصلا نفس الدار دي .. أخوكم في الله أحمد .. لأ أخوكم إيه انا بقيت أبوكم خلاص ..

ليت الشباب يعود يوماً لأخبره ما فعل المشيب بي أو فيه مش فآكر أصراحه .. دى ان شاء الله هنقولها واحنا بنفتح الدار التاسعة مثلا او العاشرة لسه مش محدد بصراحة .. انما دلوقتي اللي هنقوله

صمت قليلاً ثم أردف : أنا سعيد

خرج صوت أحد الشباب الجدد : سعيد ولا أحمد متلغبطناش ياعم

نظر له البعض بضيق فضحك أحمد وقال : ومحمود كمان لو عايز .. احنا هنا اسرة مع بعضينا .. مش معنى اني اكبر شوية يبقى منهزرش سوا .. لا بالعكس دا اللي هيبقى مكشر كدا وكثيب هنطرده براا .. وعشان مشايخنا ميضربونيش وانتوا متطلعوش تقولوا اني ضحكت عليكم وجاى اهزر .. فاحنا هنا هناخذ الخطوة ان شاء الله .. اسم على مسمى .. باختصار خطوة هتبقى حياتك .. مش مجرد دار هتحفظ قرآن فيها وتمشي .. احنا هنعد احسن عدة ياذن الله لآخرتنا .. هنعلم سوا ديننا الجميل اووى .. هنعيش صح باذن الله .. ومش كلام بنقوله وخلاص ! .. هو انا مصدقتش لما نور كلمنى وقالى ان العدد دا موجود بسم الله ماشاء الله يارب بارك وانفعنا جميعاً ببعض .. بعيداً عن الرغى الكثير فانهاردة باختصار هنبتدى شغل احنا مش جاين نلعب او نضيع وقت .. هنقعد ساعه سوا ان شاء الله نتكلم شوية عن حياتنا وعن اول درس ادبته فى حياتي واسمه فهتمت الدنيا .. الناس اللي قلبها ضعيف تركز على جنب .. وبعدها هنوزع عليكم ورق فيه جدولنا وهنمشي ازاى وكدا .. وهنوزع عليكم تذاكر .. وهنتقابل فى المسجد فى الصلاة وهنتجمع بعدها فى الملعب عندنا ماتش كورة

شهق الحضور فنظر لهم بثقة وقال : ودى المفاجأة اللي محدش عارفها غيري ! .. خطوة هتبقى حياتك ان شاء الله .. اللي مش هيحي الفجر هنوقفه جوون ونشووط فيه انا بقولكم من اولها أهوو :3 ! .. فعايزة كدا اشوف كدا مش موجود ف الفجر .. الجدول ان شاء الله من اول بكره هيتطبق بالمواعيد .. اللي عنده اخت وعايز يتغيروا سوا يجيبها خطوة .. دار البنات هيفتح بكره ان شاء الله ودا لحكمة ان اللي هيعجبوا الجو انهاردة بيعت اختو بكره او

بنتوا او مراته مش هنختلف يعنى .. بكرا بعد العصر .. بيتهيا لي المكان معروف فين .. وبما ان العدد طلع فوق ماتوقعت وفوق ماعملنا حسابنا فانا هقعده ع الارض ومنتازل عن كرسييا ..

جلس على الارض وربع قدميه وحوله بعض الشباب والاكبر سننا على الكراسي .. قال أحمد ببسمة وأمله بالله كبير: نبدأ بسم الله الرحمن الرحيم

وقبل الفجر بساعة طرق حازم باب أخته وقال : انتى صاحيه ؟

-ايون تعالى

دلف غرفتها وهو يقول : لقيت النور مولع فقولت اكيد صاحيه .. هتروحي بكرا الدار باذن الله ؟

-اه ان شاء الله .. حبيبة قالت هتقتلى لو مروحتش

ضحك حازم وقال : طب كويس ان بقى حد قادر عليكي

قالت هدى بغرور مصطع : دا بس فى الاول يا حبيبي عشان متطفش بس اول ماتبقى مراتك هتشوف منى العجب

-طيب ياعم الساحر .. اسيبك بقى واروح اجهز للفجر

عاد لغرفته وصلى قيام ليل ودعى الله خاشعاً أن يوفقه للصواب وأن ينفع به وأن يرزقه الاخلاص فى عمله .. ودعى

لاحمد صاحب الفكرة ومؤسسها

انهى صلاته واتجه للمسجد الذي وجد فيه الكثير من الوجوه التى راها بالدار وسعد بشدة لهذا الامر وصلوا جميعاً

ومعهم احمد وبعد أن أنهوا الصلاة خرجوا من المسجد متجهين نحو الساحة القريبة كما اتفقوا مع احمد .. ولكن

حازم قال : هو انا لازم آجى ؟؟

قال أحمد بتعجب : طبعاً لازم يا حازم مينفعش متجيش .. انت مش عايز تلعب معنا ولا إيه؟؟

-لا طبعاً عايز بس بقالى كثير ملعبتش

قال بمرح : عشان كدا تخنت وصحتك فى النازل .. أنا اعلم منك يا بني الرياضة حلوة

-بس يعني بحسها مضيعة للوقت .. مش كنا ممكن نقعد نذكر ربنا لحد الشروق ونصلي الضحى وناخد ثواب حجة وعمرة؟؟

قال أحمد : اول مرة بعد الفجر .. تانى مرة ان شاء الله هنلعب ونصلي الفجر ونفضل قاعدين فى المسجد نذكر ربنا لحد الشروق .. بس خد بالك ان مش كل اللي معنا نعود على كدا .. فاحنا نعودهم بطريقة غير مباشرة .. خصوصاً ان اول درس دعوى بكره هيبقى عن فضل الذكر فى اوقات معينة زي السحر مثلاً وزى بعد الفجر .. فبليل بأمر الله هيبقى تطبيق عملى ان شاء الله

-انت دماغ برضه يا احمد ... طب اللعب دا هيبقى كل يوم؟؟

-انا هقدر اجى مرة كل اسبوع ان شاء الله .. انما انت قريب من هنا تعالى مرتين او ثلاثة وجمع معاك شباب خلصوا لعب وخذوا دش وروحوا صلوا الفجر .. الرياضة مش حرام ولا مضيعه للوقت .. طالما مش بتعطلك عن فرض ولا بتلهيك عن عبادة .. بالعكس دا الاحسن الشباب يطلعوا طاقتهم فى الرياضة

عاد حازم لبيته ودخل غرفته فى هدوء كي لا يوقظهم ولكن هدى كانت مستيقظة ولحقت به وقالت بعد ان دلفت غرفته : ابيه حازم ينفع اقولك حاجه ؟

ضحك وقال : طالما فيه ابيه يبقي فى حاجه .. عايزة إيه يا هدى ؟

-عايزة سلامتك يا حبيبي .. وعايزة اخرج برضه مع اصحابي

قال بنفس السجع : ورايحين فيين يا هدى ؟

-المعمورة يا ابيه .. وقبل ماتعرض وتقولى مفيش بنات بيروحوا ملاهى متأخر لوحدهم مش هنروح الملاهى اصلا لانها بتفتح بعد خمسه

-امال هتروحوا تعمل إيه ؟

-هنقعد سوا ع الكورنيش ونلعب كوتشينه ولعب تانيه ونقعد ع الزرع الاخضر ونستنشق الهواء و ...

نظر لها كأنما توقع ماترمى ليه وقال : وايه؟؟

نظرت باحراج للارض وقالت : هما عايزين يركبوا عجل .. بص هو انا كان بقالى فترة بلبس جيبات وهنخرج معاهم بالجيبه برضه فلما هركب عجل مش هيبقى فيها مشكله ان شاء الله صح؟؟

نظر لها واحتواها بنظرته وقال : مابلاش يا هدى

قالت بعناد : مش هيحصل حاجه يا حازم صدقنى عادى يعنى لما اركبها بالجيبه

-طيب .. بس من امته يعنى وانتي بتحبي العجل اووى كدا دا انتى عمرك ما عملتيتها؟؟

-ماهما صحابي فاكرين ان اللي بيلتزموا معقدين ومش بيغرفشوا وكدا .. فانا بقى هخرج معاهم ونبسط ووقت الصلاة اخدهم ونروح نصلي ونرجع نفرش تانى وكدا وانا اهو لابسة جيبه ومش معقدة ولا حاجه

كاد حازم ان يضحك من طريقة اخته الطفولية ولكنه أمسك عن الضحك وقال : احنا ممكن نشتلهم اننا مش معقدين من غير مانعمل حاجه غلط

قال بانفعال : وهو العجل غلط ولا حرام؟؟

تنهد حازم باستسلام وقال : مقولتش كدا بس مظنش وانتمو راكبين عجل ان هيبقى شكلكم كويس وخصوصاً إن بقى يهملك دلوقتى ربنا راضي عن شكلى وحجابي ولا لأ ..

صمتت قليلاً ثم قالت : بس دا هي ساعه يا حازم ومش هنركب فى حتته فيها ولاد .. متخافش يعنى .. وافق بقى

-طيب ياهدى روحى ويارب تنبسطوا .. ويارب فعلاً تعرفى تثبتيلهم ان الملتزمين مش معقدين مع انى مش مقتنع ان العجل هو اللى هيقنعهم

-شكرا اووى يا حازم

-المهم بقى ياستى هتعوذى كام فى الرحلة دى

ضحكت وقالت : بتفهمنى انت

-طبعاً مش جىالى لحد الاوضة اكيد الموضوع فيه بنكنوت .. مونى يعنى

ضحكت مجددا ثم قالت : انت وتقديرك بقى

-طيب ياستى 50 جنيه كفاية

-هتنازل واوقبل بيها على اعتبار انك داخل على جواز وجهاز وكدا

-حنينة اووى ماشاء الله

عاد أحمد لبيته .. فتح الباب ودلف فى هدوء يتفقد المكان بحثاً عن زوجته ..دخل على أطراف أصابعه كي لا يحدث صوتاً .. تقدم نحو غرفتهما وفتح الباب برفق فوجدها جالسه على الفراش ممسكة بكتاب تقرأه تنحنح ببسمة فرفعت بصرها إليه ببسمة حانية وقالت:ازيك يا احمد؟

ابتسم وقال : الحمد لله

دلف وجلس الى جوارها وقال بحماس: بتقري إيه انهاردة؟؟

قالت بحماس : the sceret

-للمرة الثالثة؟؟

-الخامسة يا أحمد .. معنتش بتعد كويس باين كدا

ضحك أحمد فقالت : عملتوا إيه بعد الفجر ؟

قال بسعادة : روحنا لعبنا لحد ما اتقطع نفسنا

قالت بسعادة : طاب كويس الحمد لله

ظل ينظر إليها فقالت : إيه يا أحمد بتبصلي كدا ليه؟؟

-معرفش يا اميرة بس مبسوط وانا ببصلك كدا .. بحمد ربنا من قلبي عشان قدرنا وفتحنا الدار الثاني وانتي شريكتي
برضه فى الحلم

-الحمد لله يا أحمد حتى يبلغ الحمد منتهاه

ظل ينظر إليها فقالت : ياعم الحاج إنت كدا هتقلقني في إيه يا أحمد ؟

صمت قليلاً ثم قال : بدعي ربنا من قلبي يرزقني بابن منك

قالت بحنان : قول يارب يا أحمد .. وبعدين ربنا بياخرلنا الاجابة عشان تيجي فى الوقت اللي هيبقى فيها خير اكثر

غمز لها وقال : بقيتي استاذة يا اميرة

ضحكت وقالت : بنتعلم منك يا باشا

مد يده وتحسس جرح في خدها قد سببه لها فيما مضى وقال بحزن : أنا اسف

امسكت يده التى على خدها وقالت : حكااية قديمة أووي يا أحمد ونسيناها خلاص

-مش عارف ازاي سامحتيني واتجوزتيني

ضحكت وقالت : مانت كنت حلو بقى زمان فاتجوزتك

-كنت ؟؟..وبقيت إيه ياهانم دلوقتي

-بقيت وحش عشان مش عايز تنسي

صمت قليلاً فأخذت كفه بين يديها وقالت : أنا بحبك ياأحمد

ابتسم وقال : وأنا كمان بحبك أووى .. وهعيش عشان نتجمع سوا فى الجنة ان شاء الله

-طايب ليه مش عايز تنسى ياأحمد

-بصي ياأميرة .. انا كل ما هبصلك واشوف العلامة اللى ف وشك دي هفتكر كل اللى حصل .. ودا ساعات

بيبقى مفيد عشان الشيطان ميخدعنيش وارجع اغلط

-بس انت عمرك ماهترجع لاختاء زمان

-محدث كبير ع الفتنة ياأميرة .. يعني مينفعش عشان بقيت نوعاً ما كويس يبقى اعجب بنفسى وأمن شر الفتنة ..

اللى بيامن شر الفتنة دا مفتون أصلاً ولازم يراجع نفسه

نظرت له باهتمام فأردف : بس مش معنى كذا انى اقعد اقول انا وحش ! انا عملت كذا وكذا !! .. واقعد اندم

واسيب الاحساس بالذنب يسيطر عليا لدرجة انى مقدرتش اتقدم فى حياتى..لازم يكون فى توازن .. الدين علمنا

كدا

ربت على كفها فنظرت له بحنان فقال : أنا كنت عايز أقول حاجه بس خايف لمتكونش وقتها

قالت بقلق : خير ؟

قال : أنا جعان بصراحة

ضحكت فأردف : فى فطار بقى ولا هناك الكتاب

-لا ياباشا في فطار طبعاً ثواني هيبقى جاهز ان شاء الله

وبعد أيام

قالت هدى بسعادة : يلا بقي يابنات الظهر أذن نروح ونرجع نركب عجل

قالت إحدى صديقاتها : طيب بصي نروح نسأل الراجل التاجير بكام وكدا ونروح علطول

قالت هدى : طيب بس منتأخرش عشان نلحق الجماعه

قالت أخرى : هنبقى نصلي جماعه مع نفسنا احنا مش هتفرق جماعه عن جماعه يعنى

قالت بحيرة : طيب يلا روحوا اسألوه

-لالالا ياهدى انتى اللى بتعرفى تتكلمى وتفاصلي وكدا

-طيب هاجى معاكم وأمرى لله

عاد حازم لبيته فوجد أمه تقرأ القرآن في الصلاة فسألها عن هدى فعلم أنها بغرفتها

طرق بابها ودلف الغرفة وقال بسعادة : عملتى إيه فى الخروجه يابااشا ؟

وجدتها ممددة على فراشها وتدفن وجهها فى الوسادة فأغلق الباب وإقترب منها وقال باهتمام : مالك ياهدى ؟

كانت تدفن وجهها فى الوسادة فاقترب منها ووضع يده على كتفها فرفعت رأسها واتعدلت فى جلستها فقال لها
بقلق : مالك شكلك زعلان ياهدى ؟

قالت بضيق : ماليش انا كويسه

-لالالا شكلك مخنوق جدا .. عملتى إيه فى الخروجه ؟؟

قالت بضيق : كانت زفت !

قال بدهشة : ليهه ؟؟ مركبتيش عجل ولا إيه (حاول أن يقولها بمرح)

لكنها كانت لاتحتمل مزاحه فقال بضيق : لا ركبت !

-امال فى إيه ؟؟

قالت بحزن : حصلت كام حاجه كدا بوظوا الفسحة

-خير ياهدى قلقتينى ؟؟

-بص .. انا هحكيلك بس يارب تصدقنى .. صحابى قالولى هنروح نسأل الراجل على العجل ونروح نصلي ونيجي نركب فانا وافقت وقالولى اننا الللى بعرف افاصل وكدا ومتحدثة عنهم فخلونى انا الللى اتكلم مع الراجل .. انا والله كنت بتكلم عادى بس هو قعد يستظرف ويهزر معانا وانا كنت مكشرة بس صحبتي كانت بتبتسم كدا فهو افكرنا بنهزر معاه فقعد يستظرف !

اتسعت عيننا حازم وبدأ الشرر يتطاير منهما فبدا الخوف على وجه هدى فقال حازم بضيق : إيه الللى عمله !

هزت كتفيها وقالت بخوف : معملش حاجه قعد يهزر بس شوية لحد ما مشينا

زفر حازم بضيق وقال وهو يحاول أن يكظم غيظه : طب ليه مشيتوش وسيبتوه !! لازم زفت عجل منه يعنى

بدأت هدى تبكي وقالت وهى ترتجف : والله يا حازم معرفناش نتصرف انا اسفة والله

قال بصيق : منا عشان كدا مبحبكيش تخرجي لوحداك عشان متعاكسوش !

-خلاص يا حازم بقي انا اسفه

زفر وقال : حصل خير .. ربنا يهدي الشباب .. إيه تاني حصل؟؟

وضعت وجهها فى كفها وقالت وهى تبكي : اتخنقت من اصحابي وقعدوا يقولوا انى معقدة عشان اتضايقت اووى
انا اخرنا الظهر وقولتلهم ان كل المشاكل دى عشان اخرنااه ! .. دا احنا يادوب صلينااه قبل العصر بربع ساعه
! .. ومتزعقليش بقي يا حازم ربنا يعلم باللى فى !!

مسح حازم على رأسها وقال لها : استغفري يا هدى وهتروقي

قالها وأخذ يستغفر وهو يمسح على رأس اخته بحنان .. ولكن بكائها كان يزداد

توقف بعد برهة عن الاستغفار وسألها : إيه اللى حصل تاني

نهضت فجأة واتجهت نحو الدولاب وأحضرت جيبتها وأرتها لحازم وقالت وهى تبكي : اهو دا بقى اللى زاد وغطى
!

نظر حازم للجيبه المليئة بالشحم وقال بتعجب : إيه دا؟؟

قالت وهى تبكي : الجيبه شبكت فى العجلة من ورا ولفت عليها جامد وكانت هتقع من وسطى فوقفت فجأة عشان
الحقها فاتقلبت بالعجلة خالص !..وفى ناس قعدوا يضحكوا على شكلى وشوية من صحابى وقفوا يضحكوا وواحدة
صورتنى وانا واقعه وقاتلتى هتبقى ضحكة الشهر كله !..وفى واحدة جت تساعدنى وفضلنا كتير اووى بنفكها من
العجلة وكنا هنمزقها عشان نخلص بس الحمد لله فكت من فى الاخر .. الجيبه دى كانت جديدة ! شوفت باظت
ازاى وعمرها ما هتتنصف دا غير الموقف الزبالة اللى حصلى

شعر حازم بمعاناة اخته ولكنه اراد أن يخفف عنها فقال بمرح : أحسن برضه عشان متلبيسهاش تاني مكنتش
عجبانى اصلا عشان لونها فاتح اووى .. لو كانت غامقة مكنتش دا حصلها

حدث ما لم يتوقعه حازم فقد أَلقت هدى الجيبة بعنف وصاحت بغضب وهي تبكي : حرام عليك بقى يا حازم !! هي كل حاجة تقولى انا قولتلك بلاش تعملى كدا بلاش تتزفتى !! .. حرام عليك يا أخى راعيني حتى وأنا بشتكيلك نظر لها حازم بذهول فجذبتته من يده وأخرجته من الغرفة وهي تصيح : مش عايزاك تكلمنى تانى طول عمرى ولا ترجع تقول انك اخويا او بتحس بيا !!

أخرجته وأغلقت الباب خلفه بعنف

نظرت له أمه بتعجب من تصرف هدى وجاءت تتكلم ولكنه أشار لها أن تهدأ وأن تترك هدى حتى تهدأ قليلاً وتلين

فتحت منار حاسبها وفتحت حسابها على الفيس بوك ودخلت على لائحة الحظر .. وضغطت على اسم عمر وضغطت الغاء الحظر ودخلت عنده وأرسلت له : براءة !

اتسعت بسمة عمر وأرسل إليها بسرعة : دا احنا عبرنا أسهل من كدا يا شيخة !.. أخبيرنا إيجوزنا

قرأت رسالته وابتسمت فأرسل لها : مبروك يا حلالى

-الله يبارك فيك يا حبيبي

كتب بسرعة : يا إيه؟؟

قالت فى نفسها هنستعبط بقى ثم أرسلتها اليه

ضحك رغماً ثم كتب : كنت فاكرا ان بقى فى حياء وخجل وحاجات كدا ؟

-طيب

-اتكسفتي ولا إيه؟؟

-ملكش دعوة

-ايه حكاية الكشكول الاحمر دا اللي ادتهولى انهاردة؟؟

-انت عارف ان الكشكول دا بكتبه ليك بقالى ست سنين .. والله العظيم مش ليك كعمر .. كنت بكتبه لزوجي

المستقبلي اللي عارفه ان ربنا هيرزقني بيه ان شاء الله

-اممم حلوة الفكرة دى .. وكنتي بتكتيله إيه بقى؟؟ ..

-حاجات كتير .. المهم كل ماكنت بكتب فيه كنت برتاح .. وكل ماكنت بشوفه كنت بحضنه عشان بحبه

-الكشكول؟؟

-اه امال مين يعني

-مقولناش حاجه ياباشا .. انا برضه كنت بعمل حاجة زى دى .. بس كانت جوابات بقى برقمها .. كنت بكتبها لك

انتى يامنار .. وبعد كدا حسيت انى غلط .. يعني المفروض معلقش قلبي بيكي كدا .. يعني افرضي ربنا مكنش

وفقنا لبعض كنت كدا علققت قلبي بيكي ع الفاضي

ابتسمت منار بشدة حين قرأت رسالته وأخذت تحمد الله بشدة على نعمة "الحلال" .. تأخرت فى الرد فكتب :

اييه أغمى عليكى ولا اييه؟؟

كتبت : ينفع أطلب منك طلب ؟

-طبعاً ينفع

-ينفع تمسح كل محادثاتنا زمان .. أنا مسحتهم كلهم من قبل ما ادخل الكلية اصلا فينفع انت كمان تمسحهم ..

يعنى عشان نبقى بادئين سوا على بياض يعنى

-انا مسحتهم من زمان برضه يامنار

اتسعت ابتسامها فأدرف : مكش ينفع أبقي بتعافى من التدخين وأحط علبة السجائر قدامى .. صح ؟

-ربنا يكرمك يا عمر أنا بجد بحبك أووى

-وانا بحبك من زمان جدا

-لا .. أنا بحبك دلوقتي أكثر من زمان .. انا بحب عمر جوزى بتاع دلوقتي مش عمر بتاع زمان

-وانا بحب منار مراتى بتاعت دلوقتي وبتاعت زمان

أحس حازم بضيق بسبب ماحدث بينه وبين أخته فقرر أن يحضر لها شكولاتة ويحدثها بهدوء بعد أن يعود من الصلاة .. نزل حازم من بيته واتجه للمسجد قبل موعد الصلاة بساعة ودخل المسجد وجلس به يستغفر الله ويدعوه أن يصلح بينه وبين أخته

وبينما هو جالس دلف رامى المسجد وابتهج حين رأى حازم .. اقترب منه وجلس الى جواره وقال : ازيك يا حازم ؟

-تمام يارامى وانت ؟

-الحمد لله تمام .. ينفع نتكلم شوية اوشويات يعني ؟

ابتسم حازم وقال : ينفع طبعاً

-بص يا حازم عايز اسألك ف كذا حاجه .. انا نفسي اتعلم ديني صح بس خايف أووى .. خايف اتعلم غلط ! ..
او حد يضللني

-هو انت معندكش عقل يعني يارامى عشان حد يضللك ؟

-طب افرض اتعلمت حاجه وطلعت غلط

-مانت اكييد هتروح لحد موثوق

-والدار بتاعتكم دى موثوقة؟؟

-ان شاء الله .. بس هي مش معهد اعداد دعاة

-دعاة لا ياعم انا عايز اتعلم ديني بس

-ماهو انت ف معهد اعداد الدعاة بتتعلم كل حاجه ليها علاقة بالدين ان شاء الله والمفروض انت كمسلم تكون عارفها .. من قران وسيرة وفقه وكذا يعني.. بس انا كنت قولتلك قبل كذا على موضوع الدعوة .. يعني كل واحد بيدعى على قدره .. يعني على قد علمك .. وبالمعلومات اللي انت واثق فيها وعارفها

-طب انا واحد معلوماتي بسيطة جدا اكييد اللي هدهيهم هيقوا عارفينها

-ماهي البسيطة دى مش هتفضل بسيطة علطول.. انما العلم بالتعلم .. يعني لو عايز يبقى عندك علم يبقى لازم تتعلم ..وبعدين انت اكييد تعرف معلومات انا معرفهاش والعكس صحيح .. وانت يارامي مثلا في المجتمع اللي حواليك ع الفيس او ف الفصل ممكن تبقى داعية لان في ناس كتiiiiiiiiiiiiiiiiiiiiير اووى معندهمش حتى المعلومات البسيطة دى مش عندهم ..صح؟

-صح .. بس افرض الدار الموثوق دا علمنى غلط برضه

-لا طبعا مينفعش ! .. وبعدين مانت اى معلومة هتشك فيها هتأكد منها من اى مصدر تانى .. المشكلة اللي بجد يارامي اننا نفضل خايفين لنتعلم غلط فمنتعلمش خالص !

-اممم طيب هو لازم معهد اعداد دعاة يعني؟

-لا طبعا بس هو افضل

-طب وانت روحته قبل كذا؟

-هروح ان شاء الله انا ونور من اول الدفعة الجديدة هنقدم ف شهر ستة وتقريبا السنة بتبدأ من شهر تسعه .. بس لازم يكون معاك خمس اجزاء قران

-منا عايز احفظ قران برضه

-طب دار خطوة هتبدأ حلقات جديدة للتحفيظ من اول عم .. تبدأ معاهم وتاخذ التجويد لحد ما تيجي تقدم ف المعهد تكون خلصت الخمس اجزاء ان شاء الله

-ان شاء الله .. كنت عاوز اسألك فى حاجه كمان

نظر له حازم باهتمام فقال : هو انا قولت لتقى انى بطلت اختلط .. بس انبارح كنت فاتح الفيس ففكرت انى كدا مش اميين معاها عشان انا بتكلم ساعات مع قرابىي البنات ع الفيس .. بس الفيس عادى صح مش كدا ؟

ابتسم حازم وقال : لو كان عادى مكنتش سألتنى .. يعنى الحاجه اللي بتحس انها غلط لاالزم تسأل عنها لانها غالبا بتبقى غلط فعلاً ..

-يعني حرام ؟

-انا سألت فيها يارامى وعرفت انها حرام .. عشان زيها زى الاختلاط العادى بالظبط بالكلام والهزار وكل دا ! .. فايه الفرق بينه وبين الكلام اللى وجهاً لوجه ؟

صمت رامى فأردف حازم : الاختلاط بين الولد والبنيت بيكون فى الضرورة يعنى زى الدراسة مثلا بتضطر يبقى معاك بنات ف المحاضرات والسكاشن بس انت مالك بيهم مانت قاعد فحالك .. انما فى حاجات تانية مش ضرورية فمينفعش فيها اختلاط

-فهتمت يا حازم .. يعنى المفروض احذفهم؟؟

-المفروض

-خلاص اول ماهروح ان شاء الله هشييلهم

-بيعجني فيك يارامي انك بترجع للحق لما بتعرفه

-الحمد لله يا حازم.. بس انت مالك؟.. حاسك مش كويس

تنهد حازم وقال : ادعيلي يارامي

-ربنا يفرج كربك بس لو ينفع تحكي لي مالك جازي اقدر اساعدك

نظر له حازم فأردف رامي : أكبيد هساعدك .. وإن مقدرتش أضحكك يا صديق فأنا هبكي معاك

ضحك حازم وقال : لا ان شاء الله مفيش عياط .. هقولك ياسيدي إيه اللي حصل ويارب تقدر تساعدني

ثم قص له مادار بينه وبين هدى قبل أن تخرج ومع حدث معها فى خروجتها ولكن بدون ذكر تفاصيل كثيرة فقد منعه حياؤه فقد اكتفى بذكر ان حدث معهم بعض المشاكل وان جيبتها قد افسدها الشحم تماما .. واخبره برده عليها وانفعالها المفاجئ

ظل رامي يستمع ثم قال له : اقولك بصراحة يا حازم بس متزعلش مني

استمع باهتمام فأردف : لما يبقى اللي قدامك زعلان او مخنوق المفروض متكلمووش او تحاول تهزر وخاصة لو كان الهزار دا تريقة على اللي حصلهم .. هما كدا هيشوفوك مش حاسس بيهم ! ودا اللي حصل مع اختك هي حسنت انك مش حاسس بيها وكل اللي همك انك قولت لها بلاش كدا ولما عملته وطلعت غلط طلعت انت اللي صح وبتفهمم .. انا بقولك حاجه بفهمم فيها .. بلاش تتريق تانى لما هي تبقى مضايقة او مخنوقة هي او اى حد يعنى

صمت للحظة ثم أردف : روح صالحها واقعد كلمها وقولها كنت عايز أفك عنك فكنت بهزر بس انا اسف اني محسنتش بيكي انك متضايقة بس والله كان قصدى افك عنك .. وهاتلها حاجه بتحبها

قال بحماس : هصالحها بشكولاتة

-يا أبخل خلق الله هاتلها حاجة احلى .. الشكولاتة دي من زماااا اووى ايام ما كنا فى ثانوى مجددتش من ساعتها

-بدل ماتتريق قولى اجيبب إيه

-ورد مثلاً

جاء يعبر عن اعجابه بالفكرة ولكن رامى قال بحماس : كلم مامتك وقولها انك هتخبط ع الباب بس بلاش هي اللي تفتحلك خليها متقومش لحد ما اختك هي اللي تقوم ..وانت هتسيبلها الورد ع الباب فتفتح تتفاجئ بيه .. واكتبها كارت عليه بحبك او انا اسف اى حازه من قلبك

اتسعت ابتسامه حازم وقال : الله ! فكرة رائعة يارامى

-فكرة اييه من غير ياراءاجل منك له

تدخل نور قائلاً تلك العبارة فضحك حازم ورامى وقال رامى مدافعاً : دا سر حربي بيني وبين صاحبي مالك انت ياغلس

هز نور كتفيه وقال : اه صح منا اغلس واحد فى المنطقة بقى صحيح

ضحك رامى بينما قال حازم بدهشة : مين اللي قالك كدا ؟؟ ..

هز نور كتفيه وقال : **thrower**

نظر رامى وحازم بتعجب لهم فقال ضاحكاً : دى الترجمة الحرفية لكلمة رامى

ضحك ثلاثتهم بدون أن يعلوا صوتهم لانهم ف المسجد

قال نور : ماعلينا من اللي فات .. عشان منساش يا حازم .. النتيجة ظهرت

هب حازم من جلسته فقال له نور : انت امتياز يادحيح وانا جيد جداً مرتفع

هوى حازم ساجداً شكر لله وعندما نهض من سجده قال بفرحة : اللهم لك الحمد حمداً كثيراً طيباً مباركاً فيه

قال رامى بفرحة : مبروووك ليكم انتوا الاتنين

-الله يبارك فيك

-الله يبارك فيك يارامي .. المهم يا احازم .. فى خير تاني .. أبشر يا حازم

ضحك حازم وقال : إيه لاقتلي عروسة ولا إيه ؟

رفع نور حاجبه ثم قال : طيب أنا معنديش اخوات للجواز

-طب قول الخبر الحلو ببقى يانور متبقاش غلس كدا اييه مينفعش اهزر معاك

ابتسم نور وقال : طيب ياسيدي .. اختى وافقت عليك الحمد لله بعد ما قعدت اضغط عليها طبعاً مجاملةً ليك
عشان صاحبي

سجد حازم مرة أخرى وحين نهض قال له نور : انت استحليتها ولا اييه؟؟ ..

قال حازم بسعادة : مش مصدق بجد انا فرحان جدا اللهم لك الحمد حمداً كثيراً طيباً مباركاً فيه .. المهم بقى
المفروض اعمل إيه الخطوة الجاية

-يعنى بيبقى فيه اتفاقات يا حازم وبعدها خطوبة .. بس متقلقش من الاتفاقات دى خالص انت اخويا يعني

سمعت هدى طرفاً ع الباب ولم تنهض الا حين زاد الطرق ولم تجب والدتها .. اقتربت من الباب وقالت : مين؟؟

سمعت صوت حركة سريعة بالخارج فنظرت من العين السحرية فلم تجد أحداً .. فذهبت وارتدت اسدالها وفتحت
الباب ثم صرخت بسعادة صرخة طفولية وقالت : الله !!

تناولت بوكيه الورد الكبير وقرأت الكارت المكتوب عليه "بحبك يا هدى ومقدرش أزعلك أبداً .. وإن كان ع الجيبة
هجيلك غيرها .. أخوكى حازم .. الملتحي المجنون "

ادمعت عيناها من الفرحة واحتضنت بوكيه الورد ودخلت لغرفتها وبعد ساعه سمعت طرقات الباب فنهضت بسرعة وهي تتقافز من الفرحة وحين فتحت لحازم ارتمت بين ذراعيه وقالت : انا بحبك أوووووى يا حازم ربنا يديمك نعمة ف حياتي

احضنتها ودخلا غرفتها وأخذا يتحدثان بهدوء وأخبرها أنه لم يقصد مضايقتها البتة .. وتكلما عما حدث قليلاً ثم قالت : طب اعمل اييه مع صحابي يا حازم !.. مينفعش اسبيهم وابقى لوحدي ! صح ؟

-صح يا هدي .. هما ليهم حق عليكي انك تدعيهم وتغيريهم معاكى طالما مش مآثرين عليكي .. بس فى الاول لازم تبعدى عنهم عشان تعرفى تتغيري وتشتي أساسك .. يعنى طول مانتى مع ناس بتهد فيكي عمرك ما هتتغيري .. سبيهم لحظات .. فترة قصيرة .. ثبتي أساسك وبعد كدا انطلقى وادعيهم برراحتك وغيريهم معاكى بس تكونى واقفة على ارض صلبة ! صوح ؟؟

مرت عدة اشهر وانهى طلابنا الترم الثانى وتمت خلاله خطبة رامى وتقى وكانت خطوبة اسلامية جميلة جداً ..

-اسمع الكلالام بقى يا نور متبقاش غلس !

-مش اتفقنا يا حازم انكم هتكتبوا الكتاب بعد فرحى ان شاء الله .. دلوقتى من كمان شهر مفرقتش

-طب مانكتب الكتاب من دلوقتى هتخسر اييه يعنى ؟

-مش هتخسر حاجه ياسيدي بس احنا اتفقنا على كدا يا حازم

-مانتفق تانى يانور هيصصل اييه؟؟ .. عشان تبقى تتجوز وانت مطمئن على اختك .. يعني مين هيوصلها يوم فرحك بليل يعني؟؟

-خالى .. عمى .. عمتى .. عندنا اهل برضه وربنا يا حازم

-يانور بقى

-الله يسامحك ياأخى دا انت زنان .. هقولها حاضر خلااص؟؟

-بس انا عندى اقتراح كمان

-قول ياسيدي

-انت عارف انا شوفنا شقة ايجار قريبة من هنا صح ؟

-ايوا يا حازم وربنا كنت معاكم

-وكانت الفلوس مقصرة شوية ف العفش فكنت هجيبه على مدار السنة اللى هى هتخلص فيها صح ؟

-صح يا حازم لخص هات من الاخر

ضحك حازم ثم قال : ماما من كام يوم اقترحت عليا اقتراح كدا .. احنا عندنا حتة ارض صغيرة اوى بس لو بعناها هتسد ف موضوع العفش دا وهنخلص علطول يعني ان شاء الله .. فلو ينفع نقرب الفرح يعني

-والله كنت عارف انك عايز تقول كدا

-هتوافق يعني يانور؟؟

-انا معنديش مشكلة بس المشكلة فى اختى هى مش هتوافق غير لماتخلص ان شاء الله

-لو انت وافقت هتقعنها

-طاب يا زنان هتقربه لامته يعنى ؟

- كمان شهر كدا يااييه نور ..

شهق نور من المفاجأة فقال حازم : نفسي نتجوز ف يوم واحد يانور بقي

-صعبه اووى يا حازم .. كمان شهر !! استحالة توافق

-انت جرب تكلمها جايز تقتنع

-اقنعها بايه ولا بايه

-نكتب الكتاب الخميس .. ونلحق نخلص الشقة ان شاء الله بتمن الارض ع معاد الفرح

-بس هتلتحقوا تبيعوها يابنى

-لايانور ماهى ماما طلعت مخابرات وانا معرفش دى طلعت باعت الارض اصلا من كام اسبوع وفاتحتنى انهاردة

ف الموضوع

-طب لازم اقول لحيبىة ونعمل استخارة

-ماشي

كانت تقى جالسة على حسابها على الفيس بوك حين وصلتها رسالة : انسة تقى ازيك ؟

ردت على هذا الحساب الذى ليس فى اصدقائها ولكنها فتاة : تمام الحمد لله .. انتى مين ؟

-معقولة مش عرفاناى ؟؟؟!!

-طالبة عندى ؟؟..بس انا معنديش طالبة اسمها سمية ..مين حضرتك ؟؟

-تؤ تؤ تؤ يا حبيتي اوعى تخافى منى او تفتكرينى غريبة وتقولى حضرتك .. انا بحبك اووى وبكلمك لمصلحتك

-خير؟؟

-بلاش تتجوزى رامى !

اتسعت عينا تقى فكتبت لها بقلق : ليه؟؟

-انا ورامى كنا ف كلية واحدة وكان بيحبنى وبنخرج سوا من ثانوى .. على وعد انه هيتجوزنى ! .. بس خلا بيا ف الاخر .. بس قبل مايسيبنى قلى انه هيرروح للنضيفة اللى صدته عنها ! اللى هى انتى ! .. ولما قولتله انه زبالة وعمر ماواحدة كويسة هتقبله قالى انه هيمثل انه كويس ! .. لحد مايتجوزها وياخد كل اللى هو عايزة منه وهيطلقها ويرميها زى الكلبة ! عشان تحرم تصده وتعمل فيها جدعه !

جاءت سمية تكمل قصتها الخرافية ولكنها تفاجئت ب "لايمكنك الرد على هذه المحادثة "

اتسعت عينا سمية وصاحت بغضب : يل*** ابو برودك ياخشية وتحتك ! عمليلى بلوك !! والله لاخرب بيتكم ومخلكمش تتهنوا ببعض !انا يسيبنى عشانك !!

ظلت تقى مدهوشة للحظات تحدق بالشاشة وقد أصابها الجمود .. ابتعلت ريقها بصعوبة وأخذت تقرأ عبارات سمية مرة أخرى .. بدأت تتجمع الدموع في عينيها .. حاولت أن تتماسك وحذفت المحادثة قائلةً لنفسها " أنا عارفة إنه كان في حياته أخطاء زمان ..بس هو بعد عنها !..هو قالى إنه بطل كل الحاجات الغلط بتاعت زمان ! .. بس هو مقاليش إنه كان بيمشي مع بنات قبل كدا ! .. أنا مش فاهمة يعني إيه ((بس خلا بيا ف الاخر .. بس قبل مايسيبنى قلى انه هيرروح للنضيفة اللى صدته عنها ! اللى هى انتى ! .. ولما قولتله انه زبالة وعمر ماواحدة كويسة هتقبله قالى انه هيمثل انه كويس ! .. لحد مايتجوزها وياخد كل اللى هو عايزة منه وهيطلقها ويرميها زى الكلبة ! عشان تحرم تصده وتعمل فيها جدعه !)) .. الكلام دا مش معناه انهم كانوا متصاحبين بس ! كان فى حاجه اكثر من الصحوية ! .. الكلام واضح اهو !..بس هو مالقيش كدا ! .. انا حتى مرضتش اسأله عن أى حاجه فى ماضيه

عشان مكسوفوش قدام بابا هو بس قالى انه كان وحش اووى واتغير .. بس كان وحش لأنهى درجة!!!!..ياالربى أنا هتجن !!

وضعت وجهها بين كفيها وأخذت تستغفر كثيراً .. وبعدها مدة رفعت رأسها وقالت محاولةً اقناع نفسها : أنا عملت استخارة واستريحت واتخطبنا بقالنا مدة ! لو مكنش كويس مكناش اتخطبنا ! هى يمكن عايزة تبعدني عنه .. اكبيد هى عايزة تعمل كدا ! .. أنا واثقة ان ربنا اختارلي الخير

أخذت تردد هذه العبارات فى ذهنها كى تقنع نفسها بها .. فكلنا نعلم المعلومات النظرية ولكن المهم هو من يشبتها عملياً ويتماسك فعلياً عند المحنة

دلف نور غرفة أختها فوجدها تصلي فانتظر بالخارج الى ان انتهت وحين نادته سألها بتعجب : بتصلي إيه دلوقتي ؟

-ايه السؤال دا ؟ .. بصلي استخارة ياسيدي .. عشان موضوع كتب الكتاب دا

حك نور لحيته ثم قال : بس دا لسه بعد فرحى

قالت : منا هعمل استخارة من هنا لحد فرحك

-طيب وحاسة بايه؟؟

-حاسة عادي يعنى مفيش حاجة توقف الموضوع وبعدين دا كان الاتفاق من الاول اننا نكتب الكتاب بعد فرحك ان شاء الله

قال نور فى نفسه "الله يسامحك يا حازم لازم يعنى تنط فى دماغك .. هفاتحها ازاي انا دوقتي " قال نور بحيرة : بقولك يا حبيبة .. حازم كان عايز يقدم كتب الكتاب شوية .. قبل فرحى يعنى .. بصراحة كان عايز يبقى على اخر

الاسبوع

قالت بسعادة : اللهم لك الحمد فرح منار الجمعة والحنة يوم الخميس ومينفعش مروحش دى حبيبتى يانور ومراتك
هتزعل منى بقى كما اان وبتاع

هزر رأسه قائلاً : انتى صح .. عندك حق لازم تروحي .. خلااص بقى انتى مسبتليش فرصه تانية

نزرت له باهتمام فقال : كتب الكتاب يوم التلات اللى هو كمان تلاثة دايز دا

شهقت حبيبة وجئت تتكلم فقطاعها بسرعه : اقعدى اعترضى واتدلعي لحد ماتضييى الوقت .. هما 3 دايز ..
جهزى نفسك بقى فيهم

-يانورر استحالة ! والفستان والحاجات اللى بتتجهز دى

-بس يانصابة .. انتى مجهزة الفستان من فترة طويلة وخلي هدير تيجي معاكى وجهزوا الشقة .. رغم انها زالفل أهى
..دى متجدده جديد

ضحكت حبيبة وقالت : والله مراتك دى أطيب خلق الله يانور معرفش ازاي وافقت تتجوز هنا ومعرضتش اننا
قاعدين فى البيت وكدا

-تعترض مين يا حبيبة انتى عبيتة يابنتى .. هدير طيبة وتعرف ربنا كويس الحمد لله ربنا يديمها نعمة فى حياتى
ويقدرنى على اسعادها

-طايب صح .. هو مش انا المفروض ادفع ايجار لهدير عشان هقعده فى شقتها؟؟

-متقلبيش عليا المواجه يا حبيبة .. انا كلمت هدير فى الموضوع دا كتير اووى وحلفت عليها وخلتني اصوم تلت
ايام .. وزعلت منى عشان حلفت عليها ونشفت دماغها جداً وقالتلى ان انتى اختها ودا مينفعش ! وانها هتقاطعك لو
كلمتها فى الموضوع دا تانى وهتعتبرك خلاص بقيتي غريبة عنها

شهقت حبيبة وقالت : وتقاطعنى انا ليه انا مالي ياخويا .. هى الخسرانة

ضحك نور وقال : انا فى ف دماغى فكرة كدا

دفعه يوسف وقال : دا انت سئيل أووى ! بقولك خدت افررراج

احتضنه حازم وقال : مبرروك يايوسف عقبال النتيجة

دفعه مجدداً : هو انت جاى تحرق دمي .. عايزنى انسي ازاي وانت كل دقيقة تقعد تفكرنى كدا !

ضحك حازم وقال : خلاص مش هفكرك تانى ياسيدي .. المهم رفعت راسنا فى الامتحان ولا إيه

جاء نور من خلفهما وقال : رفع راسنا إيه يا حازم الملافظ سعد !!

احتضن يوسف وقال : مبروك يايوسف .. عقبال النتيجة

دفعه قائلاً : يا جدهان براحة على نفسكم شوية مش كدا !! هتموتونى مشلول

ضحك ثلاثتهم واقبل الحاج محمود من محله مهرولاً نحو ابنه واحضنته بعيون دامعة : مبروك يابني

نظر حازم ونور لبعضهما وقالوا فى نفس واحد : عقبال النتيجة

ترك الحاج ولده وقال : نتيجة إيه بلا هم ! خلو الواد ياخذ نفسه الأول

ضحكوا جميعاً وعاد نور والحاج محمود للعمل بينما سار حازم مع يوسف عائداً الى بيوتهما .. قال حازم بفرحة :

مش انا كتب كتابي التلات ان شاء الله ؟

قال يوسف بفرحة : بجد ! الف مبروك ربنا يتمملك بخير يا حازم بجد فرحتك جدا

-عقبالك يايوسف

شرد يوسف للحظات ولاحظ حازم ذلك فانتشله من شروده قائلاً : انت عايز كلية إيه بقى يايوسف ؟

قال بحماس : حقوق

رفع حازم حاجبها وقال : انت علمى علوم يابني

-عارف وربنا كنت بمتحن كيميا .. بس بجد نفسي اطلع محامي

-اشمعنه بقى يا حدق

-اولا ياسيدي انا نفسي اعمل اختلاف فى مكان وحاسس بجد ان المهنة دى محتاجه حد بيعبها وبيحب ربنا اكثر منها ومن الفلوس طبعاً .. حد يقدر ينصر الغلابة ويبقى محامى كبير ومع ذلك مش بيقبل القضايا اللي مش تمام .. بيقف مع الحق بس .. وهيساعدنى انى اشتغل عمى عشان عنده مكتب محاماة فهشتغل معاه من سنة اولى وهتدرب كويس اووى واكسب خبرة ان شاء الله .. وهعمل دراسات عليا وافتح مكتب لوحدى وهيبقى شبه خيرى .. يعنى مش هاخذ اتعاب كتير ومع ذلك هشتغل بضميبيير جداً ان شاء الله

-بجد حلمك جميل يا يوسف ربنا يعينك وتحققه بأمر الله

-يااارب يا حازم .. انا عارف ان الظلم والفساد كتير اووى فى البلد .. بس لما يطلع محامى واحد بس يحاول يغير اكييد هياثر ان شاء الله

-ربنا مش بيضيع اجر من احسن عملاً

-المشكلة بس فى بابا كل ما اقله حقوق يفكرنى بهرب عشان مجموعها قليل يعنى .. وماما تقولى مين اللي هتقبل بحتة محامى ! .. البنات بيدورا على دكتور او مهندس .. انا مبحبش التفكير الطبقي دا !!

-الكلام دا مش بياكل عيش يا يوسف .. المهم ان الواحد يقبى ناجح فى المكان اللي هو فيه ويبقى فعلاً بيتقى ربنا عشان يكون خليفة الله فى الارض ويعمرها

هز يوسف رأسه باقتناع ثم قال : بس تفتكر ماما عندها حق فى موضوع ان البنات بيوافقوا ع الدكاترة والمهندسين بس ؟

ضحك حازم وفقد فهم مايرمى له يوسف : البنت اللي ترفض واحد عشان عايزة دكتور او مهندس دى متنفعش معانا يا يوسف ..

استجمع يوسف شجاعته وقال : وانت يا حازم بصراحة كدا تقبل ان محامى يتقدم لأختك ؟

صمت حازم عدة لحظات ثم نظر ليوسف نظرة ذات معنى وقال : لسه بدري اوى ع الكلام دا يا يوسف انت لسه مدخلتش الكلية اصلا وهى لسه فى ثانوية عامة

اعتذر يوسف باحراج : معلىش يا حازم انا اسف .. مكنش ينفع اكلملك فى الموضوع انا اسف والله معرفش جيت وش ازاي

-لما تكلمنى انا احسن ماتتكلم من ورايا

فهمها يوسف بعكس ماقصدها حازم تماماً فقال وقد ادمعت عيناه : اقسم بالله يا احازم انا بعدت عنها ومفكرتش اوصلها بأى طريقة ولا عمري هفكر !!

نظر له حازم بتعجب وقال : انت فهمتني غلط ! كنت اقصد لما تيجي تكلمنى انا احسن ماتروح تكلم واحد صاحبك كدا اسمه نور .. صح ؟

هزر رأسه وقال : صح يا حازم .. وانا والله مش هخبي عنك حاجه بعد كدا ..

-اوعدنى وعد تاني يا يوسف

نظر له يوسف باهتمام فأردف حازم بلهجة جادة يخالطها حنان: إوعدني إنك هتكون قادر تاخذ بايد هدى للفردوس الأعلى وانك هتشتغل على نفسك علطول .. احب اللى جاي يتقدم لاختي يكون فعلاً يستحقها

ابتسم يوسف وقال : اوعدك يا حازم انى هتشتغل على نفسي علطول وهفضل اجاهد نفسي عشان احسنها وارضي ربنا ..

ابتسم حازم وقال : وصدقني ياخويا انا اوعدك انى عمري ماهسيب اختي غير لما تكون فعلاً تستحق اخويا

انفجرت اسارير وجه يوسف فأشار حازم بسببائه قائلاً : بس كل حاجه فى وقتها يا يوسف .. ماشي ؟

-ماشي يا حازم

وماكاد أن ينهى جملته حتى اندفع الى بين ذراعيه واحضنته قائلاً : بحبك اووى يا حازم

-بردون يا يوسف انا مرتبط وكتب كتابي كمان يومين !

صاحت هدير بدهشة : أخوكي دا اتجنن يا حبيبة !!

قالت حبيبة : أنا عارفة ياختي بقى شكلي هبعته ع مششفي المجانيين ..

-المششفي؟؟..وياختي؟؟.. والله انتي حلال فيكي اللي عمله .. اولاً جوزي حبيبي اخر مرة تقولي عليه مجنون والا هيبقي فيها ضررب !

صاحت حبيبه : مش انتي اللي قول....

قاطعتها :اسكتي خالص ولا كلمة ! .. ثانياً مش قولتلك خفي عسلك شوية وشرباتك يعني .. وخفي ياختي وياخويا وجو البيبة دا.. انتي داخلة على جواز

قالت بتذمر طفولي : حااضر ياطنط

-عايزة نور يقول اني معرفتش اربي !

صاحت حبيبة : لااوالله !! .. دا ع اساس انك ولية أمرى .. ياختي !

دفعتها بعيداً عنها وهي تتماسك بأعجوبة كي لاتضحك وقالت : خلاص انا ولا اعرفك وابقى وريني مين اللي هيظبطك ويخليكي حلوة يوم الثلاث

جذبتها حبيبة وقالت بتحايل : خلاص يا بله هدير حقك عليا .. سماح المرادى

-طيب سماح .. اترزعي بقى فى حتة خلىنى اعملك ماسك يشيل التشوهات اللي فى وشك دى !

صاحت حبيبة : تشوهات اييه حرام عليكى دا انا قمر

-من تواضع لله رفعه

-لالالالا والله ما اقصد بس انا مش حاسة ان فى تشوهات ولا حاجة !

-يا بنتى لازم تعملى مسكات طبيعيه علطول وتحطى خيار على عينك .. كل دى هالات سودا !!

-من كتر الدح بقى ياهدير ..

ضحكت هدير وقالت وهى تفرد الماسك على وجهها : اه منا عارفه انتى هتقوليلي ؟.. المهم يعنى عشان مش هفضل قاعدة عندك للصبح اكييد عايزة انام شوية فى بيتنا .. خلى المسك دا على وشك تلت ساعه واغسله وابقى شيلي الخيار كمان متنسيهووش

-لا دمك خفيف اووى ! هبقى اشيله حاضر ! .. خلصي بقى انتى عميتيني

-خلصت اهوو ياستى .. أنا مروحة بقى عايزة حاجه

-اه ابقى طفى النور وانتى طالعه واضبطيلي المنبه كمان تلت ساعه عشان مش شايفه حاجه .. وخدى بقى الباب فى ايدك

ضحكت هدير وقالت : مش هتوصليني حتى للباب ..

-لا ياهدير هو انتى غريبة ! .. وبعدين هوصلك ازاى بالتكتيفة دى انا لو قومت الخيار هيقع .. الباب براا فى الصالة

-ماشي يا حبيبة هنردھاالك عن قريب ان شاء الله ..

-مع السلامة ياهدير

خرجت هدير من غرفتها فنادت حبيبة مؤكده : الباب فى ايديك وانتى خارجة

-هتفرق معاكى إيه يعنى يا حبيبة

-عشان لو دخل الحرامى ابقى عامله نفسى نايمة وميتخضش وانا بالمنظر دا

انفجرت هدير ضاحكة وقالت : طيب يا حبيبة يالمضة ..

اغلقت الباب وهى تقول : بقى جوزى حبيبي بقى حرامى .. الله يسامحك يا شيخه

تحركت نحو باب الشقة لكنها توقفت فجأة ولم تفتحها كأنها تذكرت شيئاً .. عادت أدراجها وهى تمشي على أطراف أصابعها ولكن هذه المرة إلى غرفة نور .. فتحت الباب برفق ودلفتها وأخذت تتطلع إليها من خلال الضوء المتسرب من الصالة .. ابتسمت واقتربت من مكتبه الصغير وأخرجت ظرفاً من حقيبتها يدها ووضعته عليها وهى تبتسم للظرف بخجل كأنها تبتسم لصاحبه وقالت : كنت هنسالك يابن الايه

تنهدت والتفت لتخرج لتنطلق منها صرخة وضعت يدها بسرعة على فمها لتكتمها وظل صدرها يعلو ويهبط من المفاجأة

ابتسم نور وقال : كنتى هتسيني ازاى؟؟

كانت تشعر بالاحراج الشديد من تصرفها هذا .. زحزت يدها عن فمها قليلاً لتخرج منه الكلمات بصوت مبسوح : مكنتش بكلمك

قال ضاحكاً : أمال كنتى بتحضري عفاريت ولا إيه .؟؟..بتعمليلى عمل كدا من أولها

ابتسمت رغم كل محاولاتها لمنعها فقال : كنتى بتكلمى مين ؟

اشارت على المكتب وقالت باحراج : الظرف

أضاء النور ليرى ماتشير إليه وحين أبصره ابتسم وقال : رسايل بقى وحب وبتاع

احمرت وجنتاها وهى تنظر للارض بخجل ولكنها حمدت الله بشدة لأن النقاب يغطيها

خطى نحوها ووقف امامها مباشرة ومد يده وتناول الظرف قائلاً : طالما مش هتردي واتكسفتي يبقى لازم اشوف بنفسى

قالت : لا خليه لما أمشي

رفع حاجبه قائلاً : ليه بقي ان شاء الله ؟

قالت بخجل : هتكسف يانور

قال بدهشة مصطنعة : إيه دا الظرف فيه حاجه تكسف ؟؟

-يانوور بقي خلاص

ضحك وقال : خلاص بقي يانور .. على فكرا كنت عايز بس افكر ان فرحنا كمان شهر ان شاء الله ..

رفعت نظرها اخيراً اليه واستجمعت قواها وقالت : عارفة .. ينفع امشي ؟

قال ببلاهة مصطنعة : ليه ؟

-عشان أروح قبل ما الدنيا تضلم

-بصراحة سبب مقنع اووى .. راجل انا معاكى ولا إيه ؟

ضحكت من اسلوبه وقال هامساً : البت حبيبة نايمه ؟

قالت بسرعة : لااا صاحية طبعاً .. عديني بقي لو سمحت

-هو انا ماسكك ؟..

عبرت من جانبه وخرجت للصاله وانفاسها تتلاحق بشدة .. اوقفها قبل ان تصل للباب قائلاً : بقولك إيه

نظرت له فقال ببسمة: بحبك على فكرة

ابتسمت فقال : وبحب فيكي اووى انك بتكسفي

نظرت للارض بخجل فأردف ضاحكاً : ياخوفى تطلعى مقلب زي حبيبة أختى حازم واخذ عنها فكرة إنها هادية خالص وبتتكسف بقى والحركات القرعة بتاعكم دي

ضحكت هدير فقال نور : هو انتى جاية انهاردة سيلنت ولا إيه ؟

-لا بس بحب اسمعك .. ينفع امشي بقى ؟

-امشي ياستي اما ادخل اشوف كتبنا إيه

خرجت بسرعة من الباب واغلقت خلفها برفق ووضعت يدها على صدرها وقالت فى نفسها : انا غيبية !! إيه اللي خالنى اكتبه الكلام دا ! يااربي على الكسوف اللي انا فيه

دخل نور غرفته وأغلق عليه بابه وفتح الظرف بسرعة ولهفة وأمسك بالرسالة وقرأ مافيه

“نور .. بس هو انا قولتلك بحبك كتير بس دي مختلفة بجد كفاية إنها خلتنى أعمل الحركة دى واكتبك الجواب دا وربنا يستر شكلى هتكسف اديهولك اصلا ..

من ساعه ماعرفت ان حبيبة خلاص هيتكتب كتابها وانا هطير من الفرحة والله .. والله فرحانة اكثر من يوم كتب كتابي .. رغم انى اعرفها من مدة قصيرة بس بجد والله يانور بحسها بنتى .. بجد مشوفتهاش انبارح وهى عمالة تنطط وهى بتكلمنى وتقولى هعمل إيه فى التلت ايام دوول .. انا كنت هموت واضحك بس خوفت لتضربنى اختك مفترية وانت عارف ..

كل اللي عايزة اقولهولك بجد انى فرحانة اووى بيها عقبال بناتك وهى اولهم طبعاً فكرة الكتابة غشيتها من واحدة صحبتى بس بجد اول مره اعرف انها حلوة اووى كدا

بحبك .. عهدنا الجنة .. هدير أشرف "

دون أسفل كلماتها .. " صدقتى لما قولتى إنها أول بناتى .. بس بجد ياهدير أنا كل يوم بحمد ربنا عليكى أكثر ..
**إنتى بنت قلبى ياهدير ومراتى أكيد .. عهدنا الجنة .. العهد كبير اووى عليا بس انا واثق ان ربنا هيقدرنى "

وفى مكان آخر

((تصدق إنى بقيت بحب الكشكول دا عشان إنت فيه .. كل ما بزعل بفتح الصفحة وآجى اشتكىك واقولك إيه
اللى مزعلنى واتفق معاك ع الحل اللى هطبقه ان شاء الله .. بتفق معاك وانت مش موجود .. بكلم نفسى .. ماهو
انت أكيد كنت هتقولى كدا .. ماهو انا انت .. عارف انى بقيت لما آجى اشتكى هنا اقول أكيد هتبقى راجع تعبان
من الشغل وبلاش انكد عليك .. ومعتش بفوت مناسبة تفرح الا واكتبهالك هنا عشان افرحك فيها فى المستقبل
لما تقراها .. بجد الحمد لله على نعمة الحب الحلال .. بحبك من غير ما عرفك يخربيت الجنان طالما حلال يبقى
هدووس براحتى .. واحلى حاجه اننا معرفكش فهكتب بمزاج من غير كسوف بقى .. بحبك اووى بقى وزاد الشوق
ليك .. بس انا واثقة فى ربنا انه هيرزقنى بواحد ياخذ بايدي للجنة .. "من ترك شيئاً لله عوضه خيراً منه " .

بحبك فى الله هيسبيح بقى ماتيجى بقى .. سوري سوري عيبب انا لسه فى الكلية مينفعشى كدا .. خلى بالك
من نفسك وادعيلي وانا واثقة فى الله انه هيجليك تدعيلي زى منا بدعى ديماً واقول يارب احفظ نصي التانى اينما
كان وثبته وقويبه على نفسه .. اى مرة كنت هتضعف وثبت بقى اعرف انها دعوتى .. سلام "

اغلق عمر الكشكول بعد انا القى نظرة على التاريخ الذى منذ ثلاث سنوات .. احضت الكشكول وقال : الحمد لله
على نعمة الحلال .. الحمد لله على نعمة الاسلام وكفى بها نعمة ..

أخرج هاتفه ليحادثها لكن تحول عن هذه الفكرة ونهض وتوضأ وصلا قيام ليل وكان قد عاهد نفسه على يحافظ عليه كحفاظه على الفروض .. وكان أشد مايلمسه قول أحد السلف الصالح أنه أصلح نفسه بالقيام سنة كاملة !..سنة كاملة لم يتوانى ولم يتكاسل لأنه يثق تمام الثقة أنه سيصل إلى مبتغاه .. يثق في الله ، أخذ عمر يهمس في أذن الأرض بكلمات تصل لرب السماء .. وسهام الليل لاتخطئ فهي حتماً تصيب .. أخذ يدعو الله أن ييسر له ولزوجته الخير وان يرزقهما لذة الحياة في طاعته ..

انتهى من صلاته وكفف دموعه التي صارت تنهمر أسهل مما سبق على أثر كثرة السجود في الليل والاعتراف بالخطاء والتذلل بالدعاء .. ارتمى على فراشه وأمسك هاتفه واخذ يكتب حروفاً يعتمرها الشوق ..

“عارف إن زمانك نائمة .. حبيبتك تصحى على حاجة منى .. بحبك “

وقبل أن يرسلها توقف ومسحها فجأة وضغط عدة ازار ووضع الهاتف على أذنه منتظراً ردها وبعد عدة ثواني جائه صوتها الناعس : ايوا يا عمر

قال بجدية وقد اقتضب جبينه : السلام عليكم .. انتى كنتى نائمة ؟

تثأبت وقالت : وعليكم السلام .. اه كنت نائمة وسيادتك صحيتني .. ربنا يسامحك يا شيخ

تردد في قولها ولكن لسانه قد أفصح عما يجول بصدرة : مش قولتيلي انك مواظبة على القيام

قالت بتلقائية : هو انا لازم اقيم دلوقتى ما الليل طويل

أحس بالاحراج من ردها ولكنه قال : اصل الفجر باقى عليه حاجه بسيطة اوى والثالث الاخير جميل وكدا

ضحكت من لفظة "جميل " وقالت : عارفة إنه جميل وربنا بيتنزل فيه وكدا

قال بعتاب : أمال مصحيتيش ليه بقى وكدا ؟

قالت باحراج : ماهو برضه مش لازم دلوقتى يا عمر وكدا

-يعنى انتى صليتي انهاردة قيام قبل ماتنامى ؟

قالت : بصراحة مصليتش بس قومت الليل بطريقة تانية

قال بعدم فهم : مش فاهم؟؟

-يعني فتحت مصحف الموبيل وقعدت أقرأ شوية وقرت فى التفسير .. بس كدا !

-هو ينفع اصلا اللى انتى بتقوليه دا ؟

-هو انا قربتها فى رواية بس متأكدتش منها .. بس لما معرفشي أصلي هنام من غير قيام يعنى ؟..كدا الشيطان

بيكسلنى !..فانا بقيم الليل بطريقة تنفع .. وقرت كمان فى الرواية ان ممكن قيام بالتسيح والاستغفار والقران وحتى

لو دراسة علم شرعى .. كل دا قيام ليل

ابتسم وقال : فهمت .. متزعليش منى ماليش حق اسالك اصلاً

-نعم؟؟..ملكش حق .. عمر انت دلوقتى جوزى اللى وعدنى انه هيشدني معاه للجنة يعنى انا المفروض افرح انك

بتكلمنى كدا وبتسأل انا صليت قيام ولا لأ .. الاسئلة دى تفرح اصلا

قال بغرور مصطع : يلا اهو الواحد يفرد عضلاته برضه عليكى طالما طيبة ومطيعه كدا

ضحكت بخفوت فأردف : ويدبحك القطة من أول يوم كمان بقى

ابتسمت بخجل فقال هامسا : هو الفرح امته؟؟

قالت بخجل : الجمعة

قال بشوق : ياخسارة لسه الجمعة !!.. يلا ادينا صابرين اهوو .. هو بس يجي الجمعة وانا هوريكي

قالت بتحدى : هتوريني ازاى يعنى .. لا يا حبيبي انا بعض وانيابي حاادة !

ضحك ولكنه قال بحماس : هوريكي النجوم فى عز الظهر .. انتى بس ادخلى الباب برجلك وانتي مش هتطلعي منه

صاحت بدهشة : اييبه يعنى هتقتلنى !

ضحك وقال: هبقى اشوف ساعتها .. المهم اقفلي بقى ومعنتيش تردى عليا بليل كدا تانى

قالت بدهشة : مش انت اللى اتصلت؟؟

-ماهو انتى كنتى وحشانى بصراحة وعرفت اننا كمان واحشك من كام سنة كدا وانتى متيمه بحبى وبتكتيلى ف الكشكول

قالت بسرعة : كنت بكتب لزوجى مش ليك يا عمر

-وانا ايه سيادتك دلوقتى؟؟.. كيس جوافه

ضحكت بخفوت فقال : ومعنتيش تضحكى معايا بليل كمان ..

ابتسمت دون ان تضحك فأردف : ولا عنى تكتيلى فى الكشكول بليل .. مش عيب تبقى قاعده بتكلمى راجل غريب بليل كدا

وهنا لم تستطع فانفجرت ضاحكة فأردف بأسلوبها فى الكشكول : طاباب ايه؟؟

انقطعت فى لحظة ضحكتها واشتعلت وجنتها خجلاً فقال وكأنه قد شعر بها : اتضايقتى منى ؟

ظلت واجمة فأردف : على فكرة مكنش قصدي اضايك

قالت : انا مضايقتش بس اتضايقت من الكلام اللى كنت بكتبه .. كنت ببقى على طبيعتى اوى وبهزر بنفس اسلوب هزارى مع البنات مخدتش بالى ان المفروض دا مينفعش ! ..يعني انت لسه متعرفنيش .. ولما واحده تبقى كاتبة فى كشكولها بحبك وواحشنى ونفسي اعيط وانت تحضنى وتطمنى اكيد هتفهم انها وحشة او انها متعودة كدا وبتقول الكلام دا عادى جداً .. بس والله العظيم كنت بكتيلك وانا محتاجاك جنبى فعلاً .. يعنى الكشكول دا كان بيوقف جنبى وانا تعبانه جداً ولوحدى تماماً فكنت ببقى فيه على طبيعتى اللى ساعات مكنتش بتطلع فى حياتى اصلاً

أحس أنها توشك على البكاء فقال : انا زعلان منك يا منار

تركت العنان لدموعها فانهمرت فقال بحزن : كنت فاكر إن انا إنتي فعلاً زي مانتي بكتيلي .. كنت فاكر انك بتكتبي كل كلمة وانتي واثقة فيها انها عمرها ما هتتفهم غلط لأن نفسك هي اللي بتقراها .. عارفة لما كنتي بتكتبي انك تعبانة او مخنوقة ومحتاجة دعوتي كنت بتفكر ان زمان كان بيجيلي وقت اقعد ادعيلك فيه من غير سبب يامنار .. بدعيلك بالاسم .. ربنا يشتك ويفك كربك ويريحك .. طب عارفة لما بقرأ انك بقيتي كويسة وبتشكريني لانى دعيتلك ببقى كأني شايف عيونك بتبتسم قدامى .. معرفش والله يامنار انا اول مرة أحس الكلام بيعجز معايا .. بصي كل اللي عايزك تعرفيه انى بحبك دى كلمة قليلة اووى على اللي بينا .. اللي بينا أكبر بكتيررررر من الدنيا .. اللي بينا لازم يستمر للجنة

ابتسمت وسط دموعها التي تحولت فى لحظات لدموع الفرحه من أثر كلماتها قال لها بحب : شاورى على قلبك واوعديني

ابتسمت فقال بجديية : يلا شاورى على قلبك .. شاورى يلا !

-اوعدك يا عمر ان الجنة هتبقى الحاجه اللي هنتعاهد عليها ونوصلها سوا

مرت الأيام تباعاً وجاء الثلاثاء الموعد المرتقب

وقفوا كيوم كتب كتاب نور فى المسجد وبعد لحظات كان المأذون يقول "بارك لكما وبارك عليكما "

أخرج حازم هاتفه وضغط على زر واحد وأرسل لها الرسالة التي أعدها منذ أمس وتوقفت على زر الارسال فقط .. أرسلها ودسه فى جيبه ونظر لنور بسعادة الذى احتضنه وقال هامساً : نسيتنا ياندل .. طب سلم الاول وبعد كدا كلم حبيبة القلب

ابعدده عنده وقال متوعداً باصطناع : اخر مرة تقول عليها كدا فاهم؟؟

ضحك نور وقال : هتعمل علينا بلطجي بقى .. لاااا بقولك إيه اصحى طالما لسه فى بيتى يبقى انا راجلها

ابتسم حازم بمكر وقال : يلا اهي كلها شهر ان شاء الله

ضحك نور وقال بتحدي : ابقى قابلنى لو وافقت

قال بثقة : هتوافق وانا هقولك ازاي .. المهم بقى عايز أطلعها

جذبه أحمد من ذراعه قائلاً : ياتيبيبيب سلم علينا الاول .. مستعجل على إيه .. بكرا تندم يا جميل

-يوه يا أحمد منا لسه مسلم عليكموا اول ماشوفتكم هو فرااغ يعنى.. وبعدين اللي يسمعك دلوقتي ميسمعكش وانت

بتخلع مننا فى النادى عشان تروح لبيتك

ضحك ثلاثتهم بينما اقترب منهم رامي وهو يقول : مبرووك ياوحش

قال ضاحكاً : عقبالك ياكابتن رامي

-ادعيلي .. فى محاولات لاقتناع حمايا العزيز بكتب الكتاب

وفى الأعلى انزوت فى أحد اركان المسجد فتحت رسالته وتوردت وجنتها حين قرأت

(مرة زمان كدا بصيت عليكي غصب عنى وانتي ماشية بالنقاب والمحلفة .. شكلك عجبنى اووى ففضلت مبحلوق

فيكي شوية وانتي ماشية .. وانا اصلا كنت بغض بصري ! خليتيني اخذ ذنب شوفتي؟؟.. عشان كدا اتجوزتك

وصلحت غلطتى)

أرسلت له بدون تردد : (بس يلا بدل ما أخلى أخويا يزعلك)

كان ينتظر صوت هاتفه بفارغ الصبر اتسعت عيناه حين قرأها ونظر لنور الذى لاحظ الدهشة على وجه حازم وقال له

ببسمه : تعيش وتاخذ غيرها يا حازم

نظر له حازم بغير فهم فنظر لهاتفه وكتب : هو إنتى مقلب ولا إيه ؟

ضحكت وقد فهمت أن نور قام باللازم للأسفل وكتبت : أكبر مقلب أخذته في حياتك

أرسل لها بدون تفكير : استنى ياعم المأذون .. عيزك في مصلحة !

-كدا يا حازم ؟..طيب أنا زعلانة منك .. ومش هتصالح غير لما تفسحني بقي

-طيب ياستى هدوس ع نفسي وافسحك .. هتروحي فين؟؟

-الملاهي

وجدت هاتفها يرن بعد ثواني معلناً اتصاله أجابت بخفوت : السلام عليكم

-وعليكم السلام (ثم اكمل بمرح) : منا عرفت الحقيقة خلاص يا حبيبة يعني اتكلمى براحتك .. حد يقول لجوزة يلا
...؟؟ عيب حتى

قالت باحراج : أنا اسفة

-خلاص ياستى بس عشان اقبل اسفك عايز نخرج سوا .. نروح فين بقي عشان شكلي بقيت بقرا غلط ؟

-منا قولتللك نفسي اروح الملاهي

قال بتعجب : فى منتقبه تروح الملاهي ؟

-اه عادى طالما هيبقى معاها الوحش الكاسر زوجها العزيز

جاء يعترض على الفكرة لكنها قالت بالحاح طفولي : عشان خطوووررى يا حازم مش بركب والله غير اللعب الهادية
اللى مفيهاش مشاكل ولا بتعلى ولا بتعمل مشاكل .. يعنى بركب العرييات وقطر الرعب .. كدا يعنى

صمت قليلاً مفكراً فقالت : لو عايز نروح حنة تانية معنديش مشاكل انا كنت بقترح بس

قال بحماس : بصراحة عندي فكرة تجنن

قالت بحماس : اييه ؟

-هاخذك ع الملاهي وهجيبلك غزل بنات كمان بس بشرط

توقعت أن يطلب اصطحاب اخته فقالت : هقول لهدى تيجي معانا حاجه تاني؟

-هدى مبين ! لا انتي تنسيها خالص دلوقتي هي واخوكي نور انتي بقيتي مراتي حبيبتى

-طايب إيه الشرط؟؟

نظر حوله ثم قال : مش هينفع اقول هنا .. ينفع لما نخرج ؟.. ومتخافيش هو مش شرط ولا حاجه هو موضوع كدا
هناقشك فيه واخذ رأيك

-طيب يازمزم

-اهربي بقي من الستات دول وانزلى

وبعد ساعتين كانت تجلس في قبالته على أحد الطاولات في مدينة الملاهي وهي تضحك دون أن يرتفع صوتها
وتقول : يخرب بيت جنانك يا حازم ..

ضحك وقال وهو يغمز بعينيه : هو انتي لسه شوفتي جنان .. اصبري بس اما تبقي مراتي

قالت بدهشة : امال انا إيه؟؟

-تبقي مراتي بجد بقي .. وبصراحة هو دا اللي كنت عايز اكلمك فيه

نظرت له باهتمام فقال باسمًا : عايز أتلم بقي يا حبيبة

ابتسمت رغماً عنها فأردف : أنا قدمت على شغل في الحكومة انا ونور وربنا يسهل ونشتغل .. وهسيب الشغل في
الصيدليه عشان انا مش راضي عن موضوع المكياج دا وكلمت الدكتورة مرة بس هي مقتنعتش فانا هشوف سبيلي ..
وشوفت محل بيع عفش بالتقسيط كدا ومن غير فوايد .. صاحبه شيخ اصلا فالحمد لله يعني .. فمش ناقص غير
انى اتلم واتجوز بقي

نظرت له فأردف : انا عارف ان اتفارقنا لما تخلصي بس بجد يا حبيبة مش قادر اصبر كل دا .. هيبقى صعب عليا
اووى

ظلت صامته لاتدرى بما تجيبه فقال بلهجة طفولية لا يتقنها البتة : انا بشتغل وبسوف ثنات كثير اووى وبغض بشري
علطول بث مقدرش أأمن شر الفتنة يانثة حبيبة .. فرققاً بيا بقى

ابتسمت من أسلوبه الفاشل فقال : عايز اتم بقى يا حبيبة

-انت علققت يابنى

-متتهربيش لو سمحتى ! موافقة تلمينى ولا هتسيبينى للفتنة ؟

ضحكت بخفوت وقالت : لا هسيبك للفتنة

رفع حاجبيه متعجباً فأردفت بتحدى : أنا أعند خلق الله يا حازم

ابتسم وقال : خلاص يبقى لازم استعين بالحونين

-نور مش هيقنعنى وهتشوف

-هنشوف مين اللى هيكسب يا حبيبة

تغيرت لهجتها من المرح وقالت : بس يا حازم من غير هزار .. مش احنا اتفقنا قبل الخطوبة حتى ؟

هز رأسه بالايجاب بضيق لانه يعلم ذلك فقالت : خلاص يبقى الحق ميزعلش وبعدين انا هتشتغل جامد اووى ومش
هركز فالدرسة خصوصاً لو خلفت .. متزعلش منى يا حازم

ابتسم وقال : لا خلاص مش زعلان ادينا صابرين

-طيب ينفع متقولش حاجه للحونين؟

-ليه ؟

-عشان هو داخل على جواز فمتشغلوش بيا وياقناعى وكدا عشان يعرف يصرف اموره ويخلص بيته

استشف مدى حبها له واهتمامها بمصلحته وجاءت بباله فكرة عبقرية فابتسم وقال بسعادة : خلاص يا حبيبة مفيش مشاكل ومش هقوله يقتعنك حاضر

عاد حازم لمنزله واتجه نحو غرفة والدته ودلفها بعد ان طرق الباب وقال بمرح : العررريس وصل .. اهو جيه يا اولاد
أهو جيه يا اولاد

ضحكت والدته واطلقت زغرودة ليست عالية وقالت بفرحة : بسم الله ماشاء الله عليكم يا بنى ربنا يكفيكم شر العين
والحسد

ابتسم بحنان واقترب منها وقبل يدها فقالت : مبروك يا حبيبي عقبال ما افرح بيكم يوم الفرح

قال بلهفة : يا ارب ياماما يا ارب

-كلمتها فى موضوع التقديم دا؟؟

-هى مش موافقة خالص بس انا رسمت خطة كدا هقعد مع نور وننفذها ان شاء الله

-ليه يا بنى كل دا هى مش بتحبك برضه ؟

-اه اكيد بتحبنى بس حقها برضه تكمل تعليمها براحتها من غير ضغط .. عن اذنك بقى ياماما

خرج من غرفتها وهو يبتسم ويقول لنفسه بصوت هامس "وانا من حقى أتلم برضه .. هنشوف مين اللى هيكسب
يا حبيبة والبادي أظلم "

وفى اليوم التالى بعد صلاة الظهر

قال نور بتعجب : حرام عليك يا حازم انت عايزنى اشتغل اختى !

-لالا لا تشتغلها إيه بس انت بتشوف مصلحتها .. انت هتقولها هننزل نشوف العفش دلوقتى عشان ميكونش غلى على السنة الجاية ونتفق فعلاً مع الراجل وهيفضل عنده لحد مانقوله عايزينه فهيفضل برونقه .. لو وافقت واتجوزنا معاك يبقى الحمد لله لو موافقتش يبقى الحمد لله برضه عشان السنة الجاية هيكون اغلى من دلوقتى بكتير واكون خلصت اقساطه كمان

-طيب يا حازم وهى اصلا ممكن توافق ازاي ؟

نظر له حازم قليلاً بابتسامة مأكرة وقال : هتستخدم الحونين بقى

رفع نور حاجبه فأردف حازم : هى هتقعدي في شقة زوجتك لوحدها صح ؟..بس برضه هتفضل مسئولة منك مصاريف وكدا عشان سابت الشغل ..

قاطعته نور بضيق قائلاً : هو انا مش هعرف اصرف على اختى يا حازم

قال حازم : فتح دماغك معايا يلا ! .. دا اللي انت هتبينه قدامها عشان تقنع بتقديم الجوازة .. وكمان هتقولها ان مصاريف الفرحة كبيرة عليك اوى ودى حقيقة مش كذبة .. دا انت داخل على سلفة ياعم الحج متخلنيش اسيلك يعنى .. فهتقولها انك هتفكر تستلف منى وبعدين فى وسط الكلام كدا تقترح عليها توافق نعمل الفرحة سوا ساعتها كل واحد فينا هيشيل نص الفرحة بس .. فاهم ؟؟

صمت نور قليلاً فأردف حازم بجدية : بقولك إيه يا نور متقوليش انك هتقفش منى عشان بكلمك فى حكاية الفلوس دي والله كل القصد انى اقنع اختك بس مش اكثر .. وبعدين انت اللي هتوفرلى

أطرق قليلاً ثم قال وقد بدأ يتقبل الفكرة : طب القاعه هتسيل معازيم فرحين ؟؟

-ماهما نفس اللي هيجولك هما اللي هيجوا لحبيبة .. وانا اصلا مقطوع من شجرة وقرابيننا يتعدوا ع الصواب ونفس الكلام اهل زوجتك .. يعنى القاعه هتفيض كمان ان شاء الله .. وافق بقى الله يكرمك؟؟

تنهد وفكر قليلاً ثم قال : هقول لحبيبة الاول

-قولها بطريقة غير مباشرة .. مش حازم عرض عليا كذا وكذا ! ساعتها انا قولت فُرجت بس لما انتى موافقتيش رجعت افكر تانى هتصرف ف باقى الفلوس ازاي

-انا هعمل استخارة الاول وبعدها هكلمها

-ماشي بس اخرك يومين عشان نلحق بس نخلص يعنى

-يارب يامسهل .. انا مش عارف انا بسمع كلامك ليه .. عيل مجنون !!

-محسسى انك مديني ملكة جمال العقلان يعنى .. ماهى مجنونة هى كمان اهي .. دى بعنتلى اول مرة بعد كتب الكتاب بتقولى يلا !! .. البت دي مش شيهك ليه يانور !!

ضحك نور بشدة وقال : وهى هتشبهنى انا ليه ! هى هتشبه جوزها ياحبيبي ..الطيبون للطيبات .. كل اللي فيك هتلاقيه فيها

قال بتأثر مصطنع : يااعيني عليك يا حازم !

-ياريت حضرتك توافق بقى بجهد نفسي اخد راحتى معاها ونعرف نتكلم براحتنا .. انا بخاف ديما اقول حاجه لحسن اغضب ربنا ..

صمت والد تقى قليلاً ثم قال : بس انا كنت قولتلك من الاول انى رافض فكرة كتب الكتاب دى الا قبل الفرح باسبوع بالكثير

-احنا بقالنا كام شهر مخطوبين اهو .. وخلاص هانت ان شاء الله الفرحة هيبقى كمان شهرين يعنى قبل ماندخل فى الدراسة بعون الله على مالشقه تخلص .. لو عليا هعمل الفرحة انهاردة قبل بكرنا بس اعمل ايه هى ظروفى كدا

صمت والدها قليلاً ثم قال : انت عارف أنا بحبك وبحترمك يارامى من زمان حتى ..

نظر له بأمل فقال : معنديش مشكلة يبقى كتب الكتاب كمان شهر

قال بدهشة : شهر !

-معلش يارامى بس برضه دي بنتي

-وانا والله هحطها فى عينى وعمرى ماهزعلها .. بس قربها شوية بالله عليك .. خليها كمان اسبوعين حتى؟؟

-طيب يارامى بس مش هقربها اكثر من كدا

قال رامى بفرحة : بجد يعنى موافق؟؟ الحمد لله بجد الحمد لله

ضحك والد تقى ونهض من مكانه قائلاً : هقوم اندهلك خطيتك بقى عشان تقولها

تحرك نحو غرفة تقى وبعد دقائق خرجت خلف والدها وجلست فى قبالة رامى على استحياء فقال لها : ازيك ياتقى

؟

اجابت ببرود : تمام الحمد لله وانت ؟

احس ان لهجتها جافية قليلاً فقال : الحمد لله .. انتى كويسة؟؟

-كويسة اه .. كنت عايزني فى ايه ؟

اعتدل فى جلسته وقال ناظراً للارض : كنت اتفقت مع عمى على تقديم كتب الكتاب وكنت حابب اعرفك بس

مش اكثر

هزت رأسها بالايجاب وقالت : هيبقى امته ؟

-كمان اسبوعين ان شاء الله

-ماشي ربنا يسهل

ظلا صامتين للحظات فقال لها : متأكدة انك كويسة؟؟

-اه كويسة الحمد لله بس عشان منمش كويس فصوتى متغير

-ماشي ياتقى .. كنتى عايزة منى حاجه ؟

-لا شكراً

نهض وصافح والدها ورحل .. نظر لها والدها فوجدها واجمة فقال بتعجب : مالك ياتقى؟؟

قالت : ماليش يابابا .. محتاجة بس أصلي استخارة على موضوع كتب الكتاب دا معرفش ليه قلقنى !!

وفى اليوم التالى

-ياحببى اطلعى ياحببى هو انا هاكلك ..

قالتها هدى وهى تحاول ان تقنع حببى لتصعد معها لشقتها

قالت حببى باندفاع : لا طبعا مينفعش مش بتقولى اخوكى فوق؟؟وكمان مامتك مش موجودة .. مينفعش طبعا

-اخويا دا جوزك يابنتى وبعدين هو تلاقيه نايم فى اوضته .. انا هغير بسرعة واطلع معاكى على حنة منار .. عيزانى

اروح باللبس دا يعنى؟؟

قالت مداعبةً اياها: لا طبعا ميصحش لازم تغيرى وتطلعى عينى معاكى .. يلا قدامى على فوق اما نشوف اخرتها

معاكى إيه

صعدت هدى وتعلو شفيتها ابتسامة انتصار وخلفها حبيبة بتوتر .. دلفت هدى شقتهم وخلفها حبيبة وعبرت خلفها الرواق وولكن هدى استدرات فجأة وأوقفنها قائلةً بسرعة : هغير فى دقفة واطلعلك اوعى تتحركى من هنا

ضحكت حبيبة وقالت : ههرب يعنى ؟

دلفت هدى غرفتها وهى تضحك بمكر فقالت حبيبة : طب ينفع اروح اقعد طاه ؟؟

لم تلاحظ حبيبة أن هدى أوقفنها امام باب احدى الغرف .. وحين لم تعطها هدى اى اجابة همت بالتحرك نحو الصالة لتجلس بها ولكن فوجئت بيد تجذبها لداخل الغرفة

دفعها حازم برفق للداخل وأغلق الباب بهدوء فصاحت فرعة : حرام عليك فرعتنى !

اقترب منها واحاطها بذراعيه قائلاً بتهكم : يا حرام ! ماليش حق

حاولت التملص منه وهى تقول بدهشة : إيه اللى انت بتعمله دا انت اتجننت !

احكم يده عليها وقال بجدية : اه اتجننت بسببك !

حاولت دفعه عنها وحين عجزت قالت بضيق : على فكرة كدا مينفعش !

-الحمد لله انه مينفعش بس مش حرام

قالت بسرعة كأنها وجدت حل لهذا المأزق : لأ طبعا حرام عشان نور مش عارف

قال بتهكم : مش عارف إيه بالظبط ؟؟..دا هو اللى موفق راسين فى الحلال .. ويعدين انا سألت وعرفت حدودى كويس اووى كعاقد يعنى

ابتعلت ريقها بصعوبة فقال : وحشتينى على فكرا

احس بأوصالها ترتجف بين يديه فأردف ويده تمتد لنقابها : مش ناوية تخليينى أشوفك بقى ؟

دفعت يده بعدوانية وقالت بصرامة : ابعده عنى أحسنلك !

اطلق ضحكات رنانة جعلت قلبها ينتفض ثم نظر لها بتحدى وقال : هتعملي إيه يعنى !

رفعت حاجبها الذى لم يراه وقالت : هأجل الجواز سنة تانية

صاح بها : انتى هتدلىني

عقدت يديها امام صدرها وقالت : اذا كان عاجبك يعنى

جذبها اليه بقوة أكبر وهذه المرة احتضنها فعلياً ولم يبالي بتلك الضربات المشاكسة التى تسددها لصدره ليتركها ..

همس فى أذنها قائلاً : متستفزيش يا حبيبة بدل ما اتجوزك دلوقتى !

شهقت برعب وصاحت : الحقيني ياهدى !

هرولت هدى نحو غرفة أخيها وقبل أن تفتح الباب طرقتة قائلةً : فى حاجه يا حبيبة ؟؟

قال حازم بضيق : روحى على أوضتك ياهدى !

قالت برجاء وصوتها يوشك على البكاء : لا ياهدى متسبنيش أخوكى اتجنن !

نظر لها بغضب وقال : اتجنتت عشان عايز اتجوز مراتى !!

ازدرت ريقها بصعوبة وهمست له برجاء : متخليش هدى تسمع الكلام دا بالله عليك

نفذ رغبتها قائلاً : روحى على أوضتك ياهدى

تبعته حبيبة بصوت يحاول أن يكون مرحاً : كنا بنخضك بس ياهدى

ضحكت هدى من خلف الباب وقالت : منا عارفة طبعاً هو يقدر يزعلك أصلاً دا بيموت فيكي يا بنتى

ثم تحركت نحو غرفتها تاركةً اياهم .. دفعته حبيبة بعيداً واتجهت نحو الباب لكنه سد الطريق عليها قائلاً بجدية :

على فكرة أنا كنت بهزر مكنتش عارف انك هتتخضي كدا

قالت بضيق يشوبه العتاب : لا ماهو واضح !

قال ببسمة : يا بنتى انا مينفعش اقربلك اصلا ..لا يجوز (قالها بمرح) ثم أردف : قولتلك انا سألت وعرفت حدودى كويس .. أخرى شوية تصبيرات يعنى

هزت رأسها يمنةً ويسرةً وهى تقول : مكنش يبان أبداً إنك كدا !! كنت فكراك مؤدب وخجول

هز رأسه وقال شارحاً : مؤدب وخجول دا برا بس انما انتى مراتى .. وبعدين مانتى مرضيتش تقدمى الفرح وسيبتينى للفتنة

جلست على طرف فراشه ووضعت يدها على قلبها وهى تقول غير مصدقة : حرام عليك تعمل فى كدا ! كنت هموت فيها

جلس إلى جوارها وقال بجدية : طيب ينفع بقى أقولك حاجة بس تفهمينى صح ومتفهميش إنى بضغط عليكى

نظرت له باهتمام وقالت : قول

قال بمرح : طب ماتنزلى النقاب الاول

عقدت يدها امام صدرها وقالت : لأ ياعم انا مثبتاه بدبابيس ياما عشان الهوا بيرفعه مش هقعد افكهم واربطه وارجع افكهم تانى ف بيت منار ! .. صح ولا ايه؟؟

-طيب

-قول بقى اللى عندك

وضع كفها بين راحتيه وخلع الجوانتى وألقاه بعيداً وهو بيتسم ثم قال : بصي يا حبيبة .. انتى اه هتعيشي لوحداك بس هتبقى محتاجة مصاريف .. الكلية ومصروفك ومصاريف البيت والنور والميا والمواصلات وكدا .. ونور دلوقتي هيبقى بيصرف على بيتين ان شاء الله .. وشغل الحكومة مرتبه مش هيبقى على فى الاول .. مقصدش اهانة والله ولا اى حاجه بس دا صاحبي وانا شايل همه برضه .. دا غير انه خلص اخر فلوس كانت معاه فى الشقة والعفش وكدا ومصاريف الفرح لسه مكملهاش وكان ناوى يستلف وعمك مرضيش يسلفه انا سمعته والله غصباً عنى وهو بيكلمه ..

انا كنت عارف انه هيستلف بس مقاليش انه مرضيش يسلفه طبعاً انتى عارفه اخوكى موضوع الفلوس دا بيضايقه قد
إيه !

ظلت عيونها معلقة به فابتلع ريقه وقال : دا والله اول سبب عايزنى اقدم الجواز .. لما هتبقى مراتى انا اللى هصرف
عليكى وكمان انا هشيل نص الفرحة لاننا هنعمله فى نفس اليوم ان شاء الله .. موافقة بقى ولا إيه؟؟

ظلت صامتة قليلاً فقال ببسمة حانية : والله مكنتش عايز أقولك عشان متفتكرنيش بضغط عليكى .. انا اصلاً مفهم
نور انه يروح يشتغلك ويقولك تقدمى الجواز عشان محتاج فلوس وكدا بس هو مش هيشغلك ولا حاجه لان دى
الحقيقة

سكت عدة ثواني ثم وقال : قولتى إيه بقى ياست العرايس

نظرت لعينيه المصوبتان نحوها وقالت : يعنى انت هتقدم فرحك عشان صاحبك ؟

قالت بجدية : صدقيني يا حبيبة رغم حبي ليكى بس مكنتش احب اسيب اختى وهى داخله ثانوية عامة لوحدها ..
بس برضه مقدرش اقولك ان ملكيش تأثير فى الموضوع انا اكبيد نفسى نتجوز انهاردة قبل بكره

ابتسمت وقالت : انت طيب اووى يا حازم

قال : مش اطيب منك .. مش انتى وافقتى دلوقتى ؟

قالت بخجل : هعمل استخارة

قال بفرحة : بس تقبلتى الفكرة اهوو ع الاقل .. وطالما قبلتها يبقى انتى طيبة فعلاً واطيب منى بكتييير اووى

سحبت يدها من بين يديه وقالت بخجل : انا هروح اشوف هدى بقى عشان إتأخرت عليها أووى !

-طيب ياستى فكري وقوليلي

قالت شاردة : هو انت سيبتلى فرصة .. اكبيد هوافق عشان اخويا

قالت بحزن مصطنع : طب مش هتوافقى عشان اليتيم جوزك ؟

نظرت له فقال مبتسماً : والله العظيم ابويا ميت

قالت بحزن : ربنا يرحمه ويرحم بابا وماما واموات المسلمين جميعاً ..

-اللهم امين يا حبيبة .. انا جت فى بالى فكرة دلوقتى

نظرت له باهتمام فقال محاولاً إخفاء الحزن : مش لازم نقدم الفرح على فكرا .. انا هضغط على نور وهنتصرف سوا

فى موضوع الفلوس دا مش هيبقى مشكلة اصلا

قالت مستفهمة : هتضغط عليه ازاي؟؟

-ملكيش دعوة بقى يا حبيبة دا بينى انا وصاحبى

هزت رأسها وقالت بحماس : تمام وانا هنزل اشتغل تانى فى الصيدليه وامرى لله عشان اخف من عليه مصارفى

قال بدهشة : دا كان ضربنا بالنار يا حبيبة ! .. وبعدين انتى سيبتى الصيدليه عشان متبعيش مكياج وتشيلى وزر ..

فانتى سيباه عشان ترضى ربنا .. فمش عشان محتاجة فلوس ترجعى لحاجه حرام

ثم اشار لصدره وقال بغرور مصطنع : وبعدين انتى بقيتى مرات حازم بيه يعنى يوم ماتحتاجى فلوس لازم تقوليله

ضحكت فقال لها بحنان : مش عايز اسمع سيرة الشغل دى لحد ماتخلصى ماشي يا حبيبتى ؟

ضحكت وقالت : ماشي يا حبيبي .. بقولك ايه ؟

-قولى ؟

-انا خارجة سلاموا عليكموا

امسكها من معصمها قائلاً : استنى بس راحة فين !

سحبت يدها وقالت باحراج : بصراحة مش عجبانى قعدتنا كدا .. يعنى انا معاك لوحدنا والباب مقفول مينفعش !

-قولتلك مش حرام

-مش حرام بس مينفعش .. يعنى يرضيك هدى تفتكرنا بنعمل حاجه غلط والقذوة بتاعتها صورتها تشوه فى عينها ..؟ انت اخوها يا حازم الكبير وهى بتقولى انها بقت بتاخذك قذوة ومثل اعلى .. تخيل بقى هى دلوقتى فكراك بنعمل ايه؟؟..وخصوصاً انك رفضت تخليها تدخل الاوضه

قالت بدهشة : يعنى مقعدش مع مراتى؟؟

-لا تقعد بس براا فى الصالة او هنا بس الباب مفتوح يعنى متحسسهاش اننا بنعمل غلط

قال بدهشة اكبر : هو احنا بنعمل غلط !!

قالت بعتاب : امال قافلين الباب لبييه؟؟ .. انا هفتحه يا حازم وبعد كدا مينفعش يتقفل !

اتجهت نحوه وفتحته وخرجت للصالة ولحقها حازم وجلس الى جوارها قائلاً : على فكرة متفقناش هنعمل ايه

اطرقت بخجل وقالت : هعمل استخارة واقولك

قال بأمل : يعنى موافقة يتقدم ؟

قالت بمرح : موافقة مبدئية

ثم دفعته من جوارها قائلةً : قوم بقى هاتلى الجوانتى بتاعى اللى رميته جوا

نهض قائلاً وهو يضحك : هستحمل شهر بس يا حبيبة ع الدلع دا .. انما بعد الفرح مفيشش الدلع بتاع بيت اخوكى

دا

وقفت هدى امام المرأة تعدل هيئتها الاخيرة قبل أن تخرج لحبيبة وحازم .. نظرت لعينها بالمرآة بحزن حين تذكرت اول أمس فى عقد أخيها .. تذكرت حين كانت تسير بجواره ورفعت عيناها لترتطم بيوسف الذى ابتسم ونظر للارض سريعاً ولم ينظر لها فى الدقائق القليلة التى جمعتهما !.. ظنته يشاق لها وسيضمها بعينه وبطير فرحاً حين يراها .. رغم أنها قد أقلعت عن الذنب إلا أن بقاياها كامنة فى ثنايا قلبها .. لم تكن تعلم أن قلبها سينهار امام ابتسامته التى

لم توجه لها ونظرت له للارض .. تمنى خلال تلك الدقائق ان ينظر لها ولكن هذا لم يحدث فاضطرت اسففاً الى تحويل نظرها عنه كى لا يلاحظها حازم او غيره .. تلاشت الفرحه تدريجياً من وجهها وكادت أن تبكي ولكنها تمسكت كى لا يسألها حازم أو حبيبة عما بها ..

خرجت من غرفتها واتجهت لغرفة حازم فوجدتها خالية تعجبت حين سمعت صوتهما قادمًا من الصالة .. اقتربت منها فوجدتهما يجالسان فى قبالة بعضهما البعض ويتحدثان وحبيبة لم ترفع النقاب حتى ! .. تعجبت من أمرها كثيراً ومن صبر أخيها أكثر وأكثر !

دنت منهما وقالت ببسمة تخفى حزنها الكامن : انتوا هنا ؟

ضحكت حبيبة قائلةً بمرح : لأ هناك

نهض حازم قائلاً : انا رايح اوضتى بقى واسيبكم مع بعضيكم

قالت هدى باحراج حين رحل : افكرتكم جوا فى الاوضة فاتأخرت براحتى

-جوا إيه يابنتى احنا قاعدين هنا .. وبعدين انا زعلت منك جداً فى الحركة دى يا هدى

نظرت لها هدى بغير فهم وقالت : ليه بقى؟؟

قالت حبيبة بصوت منخفض : عشان مينفعش تتفقى مع اخوكى تطلعينى لحد هنا وهو يشدنى فى اوضته والباب مقفول ! مينفعش !

قالت بتفكير : بس هو قالى مش حرام تقعدوا لوحكم والباب مقفول؟

قالت موضحة : بس العرف بتاعنا إيه؟؟ .. انا وهو مكتوب كتابنا بس لسه مفيش الشهار بالجواز .. يعنى مينفعش نقعد سوا لوحدا والباب مقفول

هزت رأسها قائلةً : تمام فهمت قصدك .. بس دا مش حرام ؟

-مقولتش حرام .. بس احنا برضه لازم نراعى العرف بتاعنا صح؟؟

-تمام يا حبيبة .. مش هنروح بقى؟؟

وفى اليوم التالى تزينت منار بفستانها الابيض الجذاب وحجابها القصير .. كادت والدتها أن تتشاجر معها لأنها رفضت ان تضع مساحيق فى هذا اليوم ! .. كانت الاجابة حاسمة ! ((أنا مش طالعة بمكياج فى الشارع أبداً !!)) وان كانت القاعة مفصولة فهى ستمر بشارع وطريق وبشر ! .. هذا ليس تعقيداً وانما عفة ~ .. صففت لها خبيرة التجميل شعرها وأخبرتها كيف تتزين حين تذهب لبيتها وكيف تضع الاشياء بحرفية ودقة ..

ارتدت منار ملحفة بيضاء فوق فستانها واصطحبها زوجها الى القاعة وهو ينظر لها باعجاب شديد مما فعلته ..

مر بها فى القاعة حتى وصل الى قاعه النساء .. ودعها ببسمة رقيقة منه وضغطة على يدها وهمس فى أذنها قائلاً :
كلها ساعتين تلاتة ان شاء الله وهتبقى بتاعتى رسمي

ثم تركها ذاهباً لقاعة الرجال واشتعلت وجنتها خجلاً .. اقتربت منها حبيبة وجذبتها من يدها وهولت حتى وصلا الى منتصف القاعة بدلاً من الجلوس على اريكة العروس .. أشارت حبيبة لفتاة الادي جي فأخفضت الصوت قليلاً فقالت حبيبة بمرح : بصي ياطنط منك ليها ليها ليها .. منار صاحبتى جايانا نفرش شوية مع بعض .. يعنى جايين نهيص ومروحين بيوتنا تانى .. قواعد الاحتفال .. الموبيل اللى هيطلع هيتصدر رسمي .. عايزين نهيص من غير فضايح ها؟؟..هى دى كل القواعد .. العروسة الهادية دى بقى تتفضل تاخذلها جنب .. عشان احنا هنولعها

امتألت القاعة بالضحك من أسلوب حبيبة المرح ومنهن من أعجبن بمرحها وفصاحتها وأخريات شعرن بالضيق ووصفنها بالتكلف وأخريات لم يصدقن أعينهن .. هل الأشباح تمرح؟؟ .. ألم يمنعهن ذلك النقاب عن المرح !!

وفى القاعة الاخرى التف أصدقاء عمر حوله وكثير منهم أعجب بفكرة الفصل وآخرون حمدوا الله لأنهم تخلصوا من زوجاتهم للحظات وانفردوا بأصدقائهم دون رقابة عليهم .. وآخرون رأوا أن عمر فعل ذلك لأجل زوجته فحسب لأنها رغبتها !.. ولكن السعادة كانت تملأ قلبه وتفيض إلى من حوله .. لن يترك فرحته من أجل الاهتمام بما يقولون .. !!

وبعد سويغات قلائل ..أغلق باب قصره على أميرته .. التفت إليها ببسمة فوجدها واقفة على بعد خطوات منه تنظر للأرض بخجل .. دنا منها وتأمل للحظات وجهها المكتسي بحمرة الخجل ابتسم بشدة وظلا صامتة برهة يتأملها غير مدرك بأنها تعتصر خجلاً من نظراته المتفحصة المتأمللة لملامحها .. وبعد برهة أخيراً نطق قائلاً بمرح : أخيراً مشيوا !..دا أنا خوفت أمى تقولى هبات معاكوا

رفعت بصرها إليها مبتسمة قائلةً : ابنها الوحيد بقى

قالتها ونظرت للأرض مجدداً .. وضع يده على كتفها قائلاً بتهكم : كنت قولتلك فكربنى بكام حاجه كدا اول ماندخل البيت صح ؟

قالت بخجل : اول حاجه انت افكرتها لوحك لما قولتلى برا اقول دعاء الدخول

قال مسرعاً : وادى تانى حاجه افكرتها لوحدى

وضع يده على جبتها وردد أحد الأدعية ثم قال بتهكم : هتفكرينى بايه تانى ؟

-ركعتين سنة

أمسك بيدها وجذبها الى الحمام قائلاً : يلا اتوضي

قالت بدهشة : طب اقلع الفستان طيب

قال بمكر : ماتقلعيه انا ماسكك

سددت ضربة خفيفة بقبضتها الى ذراعه قائلةً : بس يا عمر .. انا هروح الاوضة ألبس الاسدال

-بتضربينى فى اول يوم كمان؟؟ امال بعد شهر العسل هيتعمل فيك إيه يا عمر ! ..

أمسكت الهاتف وقالت بمرح : يخربيت العسل ..

قال بغرور : انا طبعاً ؟

-انت ميبين !! انا بتكلم على الستارة .. عاملة خلفية تحفة فى الصورة

ضحك كليهما ثم أردفت وهى تنهض : تعالى نتصور جنب الفازة

جذبها من ذراعها وأجلسها مرة أخرى قائلاً : احنا هنقضيها صور ولا ايبه؟؟

تخلصت من قبضته الممسكة بيدها وقالت ببراءة مصطنعة : لوجعان هعملك تاكل

ابتسم قائلاً : هو انا جعان فعلاً بس مش جعان اكل

توترت ملامحها وهى تنظر له فأردف ببسمة هدأتها قليلاً : مش مصدق خلاااص إنك بقيتي الحمد لله مراتي وبتاعتى

.. لقد هرمتنا من أجل هذه اللحظة

ضحكت بخجل فقال : هو أنا هرمت لوحدى ولا إيه ؟

هزت كتفيها قائلةً : آه هرمت لوحدك ياعم .. إنت عارف كان متقدملى صف وأنا رأفت بيك إنت عشان ابن خالى

بقى وبتاع

ضحك عمر وقال : اه منا عارف .. صف شمعات

ضربته على كتفه قائلةً : بس ياعم !

أمسك بكفها قائلاً : بسين تلاتة اربعه مش بس واحده بس

ابتسمت بخجل فقال : على فكر الكشكول بتاعك دا عسل أووى .. دا انا قربت اخلصه .. وعجبتنى اووى فكرته

.. فكرة انك ربطتى نفسك بحد وقعدتى تكتبيله من غير ماتعرفيه .. وخلص كأنك بقيتى مسئولة منه بتاخدى رأيه

وتشاوريه وتردى على نفسك .. وعجبتنى اووى انك حطتيله مواصفات وقولتى انك هتعرفيه بيها

قالت بخجل : بس إنت أحلى من المواصفات دى .. كل المواصفات اللي كنت بكتبها كانت عن الدين والخلق
والمعاملة .. وكنت ساعات بقلق من انى هتعامل مع واحد غريب عنى تماماً .. بس انت مش غريب .. انا كنت
متعودة عليك زماان وقلبك أبيض وكنت طيب كدا بتدينى لعبك زماان .. وبتحب الأطفال زيي وفيك شهامة جميلة
كدا الدين أظهرها أكثر

قال بتأثر مصطنع : ياااه كل دا فيا أنا

ضحكت وهى تقول بمرح : الحب ولع فى الدرة

هب فجأة من جلسته وهو يجذبها قائلاً : آآآه صح كنتى هتسيني !

قالت بتعجب : هنسيك إيه ؟

قال وهو يجذبها لداخل المطبخ : كنتى هتسيني الدرة اللي جبتها !!

كانت تقف فى شرفتها وتحقق فى السماء هائمة قبل الفجر بقليل .. تتذكر أحداث فرح منار وتتحيل هل سيحدث
لها يوماً مثلها ويجمعها الله بيوسف؟؟ .. ظلت تراقب الطريق بلا هدف .. رآته قادماً من بعيداً يهرول نحو محل أبيه
.. وقف امامه صائحاً بفرح : أنا نجحت يانورررر !!! جبت 97 % !!

صائح نور فرحاً : الله أكبر ! الله أكبر

هرول نحو يوسف وإحتضنه بسعادة وهو يبارك له بفرحة تكاد تجعله يطير .. قال بسعادة بالغة : الحمد لله يا يوسف
ربنا مش بيضيع تعب حد أبداً وإن شاء الله تلحق أسنان أو صيدليه .. الحمد لله.. الحمد لله

دفعه يوسف قائلاً بمرح : لاياعم أنا هدخل حقوق

قال نور بدهشة : حقوق !!

هز رأسه قائلاً بسعادة : أيوا .. حازم شجعني لما قولته عليها من فترة .. فاضل بس الاستخارة وهدوووس ان شاء الله

هز نور رأسه متفهماً قائلاً: ربنا يوفقك للخير يا يوسف .. عرفت حازم إنك نجحت؟؟

-لا لسه .. رنيت عليه مردش قولت تلاقيه نايم هبقي ا قوله فى الفجر وخلاص

-طيب ياباشا اطلع بيتك بقى ربح لحد معاد الصلاة

-لا انا رايح اقعد فى المسجد شوية

-ماشي وانا شوية وهحصلك .. سلام

تركة نور ودخل المحل بينما أكمل يوسف طريقه الى المسجد وارتفعت عيناه نحو شرفتها بتلقائية فرآها واقفة تنظر إليه وهى شاردة تماماً في ملامحه !

إرتبكت وعادت خطوة للخلف وعيناها لازلت تنظر إليه .. توقعت أن يفعل كما حدث منذ أيام وينظر للأرض ولكنه لم يفعل وظل ينظر لها وأبطأ خطواته كى ينظر لها أطول فترة ممكنة .. لقد غلبته فرحة النجاح ونشوة الشوق .. لا لقد غلبه مكر الشيطان الذى يكيد للانسان دائماً ! .. الذى لا يترك فرصة ضعف أمام الانسان الا ويحاول إسقاطه فيها ! ..

ظلت عيناه محدقة بها وابتسامته لاتفارق شفثيه .. كانت ملامحها سعيدة جداً وهى تنظر إليه .. توقع أن تكون سمعت مادار بينه وبين نور .. ظل مبتسماً ولكن بسمته تلاشت فجأة حين رأى يديها تمتد إلى عينيها لتمسح دموعها التى انهمرت فجأة كالسيل !! .. اندفعت لداخل غرفتها وأغلقت الشرفة بقوة ! ..

كان قد وصل لباب المسجد .. ألقى نظرة أخيرة إلى شرفتها المغلقة والحيرة تملؤه من تصرفها .. أعاد وجهه لباب المسجد واتسعت عيناه فجأة حين وقع بصره على

(..وبكل خطوة تخطوها إلى الصلاة صدقة)

اهتزت أوصاله بشدة وصاحت فيه نفسه بعنف : حرام عليك !! بدل ما انت ماشي تاخذ حسنات ماشي تزني بعينك !! انت مش عارف ان فى زنى بالعين !! ... لالا زنى إيه هو انا كنت شايف منها حاجه اصلا ! ماهى كانت بحجابها ! .. بس انت كنت بتخون صاحبك !! بتخونه للمرة الثانية وانت بتبص لأخته وتتعلق قلبها ببيك تانى ! .. اتق الله فيها بقى !! يا شيخ حرام عليك دا انت ربنا لسه كارمك بمجموع متحلّمش بيه !! تقوم تغضبه !! وتنقض عهدك معاه ! مش وعدته انك هتتعاظ عليها !! .. حرام عليك !! اتق الله !

خلع حذاؤه وجسده ينتفض من ذلك الصوت الذي يصرخ بداخله .. دخل المسجد وتوضأ وانزوى فى أحد أركان المسجد .. وما إن كبر للصلاة حتى انفجر باكياً !!

كان صدرها يعلو ويهبط وهى تتنفس باضطراب .. وضعت يدها على صدرها كى تهدأ قليلاً .. كانت دموعها تنهمر على وجنتيها .. تشعر أن كل شئ ضاع ب...نظرة!

شعرت أنها هى من أوقعته وأعادته إلى الحرام مجدداً ! .. هى من استأثت حين غض بصره وهى من وقفت ونظرت له حتى خفق قلبه وعجز عن منع نفسه من النظر إليها ! .. هى السبب ! .. هى من خانت حازم مرةً أخرى بعد أن سترها الله فى الأولى ! .. هى من خانت عهدها مع الله ..

اخذ جسدها يرتجف من شدة بكائها ! .. تمنّت لو تموت الآن وتنتهى حياتها ! .. لكن كيف ستقابل الله إن ماتت الآن ! .. عدلت عن تلك الأمنية وتمنت لو أن أحداً بجوارها الآن يرشدها إلى ماتفعل .. تمنّت لو أن يأتى لها حازم ويضمها إليه ويربت على كتفها فى حنان ويخبرها بأنها ليست سيئة لتلك الدرجة .. يمكنها أن تعود نقية كما كانت .. تمنّت لو يخبرها بأنه لازال يحبها ويتق بها

استجمعت قواها ومسحت دموعها وخرجت من غرفتها متجهة نحو غرفته .. طرقت الباب بخفوت وحين لم يجيبها فتحتة برفق ودلفت لغرفته .. وجدته مستلقي على السرير وهو فى سبات عميق .. والمصلية مفروشة على الأرض

فأدركت أنه كان يقيم الليل منذ قليل ابتسمت حين رأيته وهو يشبه الأطفال كثيراً .. إقتربت منه ومدت يدها لتمسك بكفه .. دنت بوجهها من كفه وقبلته قائلة بخفوت : سامحني يا حازم

ثم بدأت تمسح دموعها بأطراف أصابعه .. تمنيت أن يستيقظ ويجذبها بين ذراعيه لتبكي وتطمأن به ولا يسألها عن سبب بكائها .. يا الله كم تشعر أنها تحبه بصدق ! .. كم تشعر أنها خذلته !!!!

فتح عينيه بصعوبة وابتسم حين رأى كفه على وجهها تمسح به دموعها .. تركته ونهضت في خوف وعادت للخلف .. اعتدل حازم في جلسته والتعجب باد على وجهه من تصرفها .. قالت بخجل : اسفة عشان صحتك

هز رأسه قائلاً : انا كنت هصحي ان شاء الله عشان الفجر .. (تأمل وجهها الباكي ثم سألها) : مالك ؟؟

قالت بحزن : مضايقة شوية

قال باهتمام : انا ضايقتك ؟؟

هزت رأسها بالنفي وقالت وعيناها بالارض : مضايقة من نفسي

أجلسها إلى جواره وقال باهتمام : ليه ؟

قالت باحراج : في ذنب كنت بعمله وبطلته ورجعت أعمله تاني .. بس غضب عني والله مكنتش قصدي ومن ساعتها وانا بعيط

اقتضب حازم وقد عرف أنها تتحدث عن أمر يوسف .. تنهد بحزن قائلاً : طيب رجعتيله ليه ؟

قالت وقد انفلتت الدموع من عينيها : كان غضب عني والله يا حازم ..

مسح على رأسها بحنان وقال : اقولك حاجه وتسمعيني للاخر ؟

هزت رأسها باهتمام فأخذ نفساً عميقاً وقال : وانا في سنك يمكن من وانا اصغر كمان كنت بحب بنت .. هي زميلتي من زمان وانتى عارفه انى زمان كنت يعنى .. بالنسبالي عادى انى احب بنت مش حلال ليا واروح اكلمها وكدا .. انا فعلا كنت بخليها قبل الدرس تشرحلي معادلة او حاجه كانى مش فاهمها .. وكنت هموت وأقولها انى

بحبها من زمان .. بس كنت بتكسف .. اخاف لتكسفى او تضحك عليا او تطلع بتحب غيري .. المهم الموضوع دا تعبنى جداً لدرجة انى بقيت مخنوق من كل حاجه حواليا .. وكنت فعلاً بغرق .. ساعتها هي جت من عند ربنا واتحدفلى طوق نجاة .. مكنتش ماسك فيه فى الاول بس لما عرفت ان نجاتى بيه مسكت فيه بايدى وسنانى .. بس فضلت هي مش عارف هعمل فيها إيه ، انا كنت بحبها وبرضه بقيت مش عايز اغضب ربنا ، ساعتها فكرت شوية ولقيت انى لازم ابعدها ، مينفعش اقول انى هبطل سجاير وافضل حاططها قدامى ، سيبت كل المجموعات اللى كنا فيها سوا ومكنتش بكلمها خالص ولا من بعيد ولا من قريب ، وعدت السنين .. عارفه إيه اللى حصل بعدها ؟؟

قالت بهدوء : عارفه هتقولى إيه .. ربنا رزقك بيها فى الحلال واديك اتجوزتها

قال بمرح : دا على اساس ان حبيبة قدى مثلاً ؟؟

انتبهت فجأة لهذا الامر وقالت باهتمام أكبر : إيه اللى حصل ؟؟ اوعى تقولى اتجوزت حبيبة وانت مش بتحبها !

قال بهدوء : ربنا شالها من قلبي ياهدى .. أقسم بالله معنتش حتى بفتكرها بيني وبين نفسي .. ويوم مافكرت أتقدم اتقدمت لحبيبة رغم انى كان ممكن اطلبها هي

قالت : أكيد عشان حبيبة ملتزمة ومنتقبة اتقدمتلها ومعدش ينفع تتقدم للبت دى عشان مبقتش شبهها صح ؟؟

-لا طبعاً مش صح .. بقولك ربنا شالها من قلبي ! .. هي اصلاً ماشاء الله عليها لبست خمار فجأة وشوفتها بيه اخر مرة شوفتها فعلاً .. يعنى لو كنت بفكر فى حنة ملتزمة وكدا كنت روحتلها برضه .. ربنا شالها من قلبي لما قررت فعلاً انى اتغير عشان بحب ربنا .. انتى عارفه إيه اللى ساعدنى انساها ؟؟

قالت باهتمام كبير ولهفة لسماع الحل : إيه ؟؟

-انى غضيت بصري عنها ومكنتش بتسمع اخبارها ولا اعرف راحت فين ولا دخلت إيه ولا عملت إيه ! وغيرت كل المجموعات اللى كنا بنتقابل فيها .. بعدتها عنى وعن تفكيري فربنا بعدها عن قلبي

هزت رأسها باهتمام وقالت بوجوم : طب معلش انا إيه علاقتى بالكلام دا ؟

- ابعدي الذنب دا عنك وربنا هيبعده عن قلبك وينزع حبه من قلبك

هزت رأسها بالايجاب وقالت : هتدعيلي ؟

لف كتفيها بذراعه قائلاً بحنان : هو انا ليا غيرك عشان ادعيله ؟

قالت بدلال : طب وحبية ؟

-حبيبة مراتي

-وماما ؟

قال بمرح : الست دي أمي .. مينفعش مدعيلهاش بس انتي برضه حاجه تانية

نظرت له بعينين حائرتين فقال : انتي بنتي

صمتت قليلاً بعد أن لمست كلمته قلبها وقالت بوهن : بحبك يابابا

قبل رأسها فاردفت : وهسمع كلامك وهبعد عن الذنب عشان ربنا يبعده عن قلبي

قال بمرح : احلفي على نفسك انك مش هتخليكي تفكري فيه ؟

قالت بدون تفكير : والله العظيم مش هفكر فيه وكل ماهاجي افكر فيه هطرد التفكير من دماغى

ثم نظرت لعينيه وقالت : بس برضه ادعيلي أقدر

قال بحنان : ديماً ديماً ياهدى ادعي وقولي اللهم أعني على نفسي وعلى شيطاني

قال بمرح: لا أنا ناييم فى السرير

انطلق صوت المنبه من هاتفه .. ضحك عمر و اشار اليه قائلاً : شوفتى انتى ظالمنى ازاي ! طلعت ظابطه أهو مش ناييم فى العسل ولا حاجه

اتجهت للخارج الغرفة وهى تقول : دا عايز عيلة السامسونج كلها تيجي عشان تصحيك !

نهض من الفراش بسرعة وخطى خلفها للخارج وقال : لما هاجى من برا هنعوض اللى حصل انبارح

ضحكت فقال بمرح : هجيب درة تانى وانا جاى ويانا ياهوا بقى اما نشوف مين راجل البيت دا .. بس بالله عليكى سيبنى انا اللى أسخنها المرادي بدل ماتولعي فينا

وبعد صلاة الفجر اقترب نور من حازم وقال بمرح وهو يجذب يوسف بيده : شوفت الواد الدحيح دا نجح وجاب %97

ابتسم حازم واحتضن يوسف بشدة وقال بفرحة : مبروك يا يوسف عقبال الشهادة الكبيرة ياارب الحمد لله والله انت تستاهل كل خير

انتفض يوسف بين يدي حازم وابتعد عنه فجأة .. كان يرى نفسه أحقر من أن يحبه حازم ذاك الحب .. أحس نور أن بيوسف شيئاً غريباً ولم يكن احساسه يختلف عن حازم الذى قال باهتمام : مالك يا يوسف ؟

ظل يوسف صامتاً وعيناه بالأرض وقد تقرحتا من شدة البكاء فقال نور مجدداً : مالك يا بنى فيه إيه ؟؟ دا انت كدا كويس وطاير من الفرحة من شوية

تمنى يوسف لو يصيح بقهر ويقول لهما توفقا عن حبي فأنا حقير لا أستحق !!

كان على وشك البكاء من نظراتهما له لولا اقتراب رامى الذي أنقذه قائلاً : متجمعين عند النبي ان شاء الله

صلوا عليه جميعاً فقال رامى بفرحة : اخوكم بقى عررريس بقى ويتاع

ابتسم حازم ونور بطيبة وهنئااه بعد أن أخبرهما بميعاد العقد .. استأذن يوسف وغادر بسرعة فانطلق حازم خلفه بعد

ان قال بسرعة : معلش ياجماعه اما ارواح اشوف الواد دا ماله

انطلق خلفه وهو يحث الخطى كي يلحقه .. نادى بصوت مرتفع شعر يوسف أنه اخترق ظهره : ييوسف

توقف عن السير فجأة ونظر للخلف بتردد .. اقترب منه حازم وقال : مالك ؟

مسح يوسف دموعه وهو يقول : ماليش

ظل حازم ينظر لعينيه بينما شعر يوسف بالخزي ولم يستطع أن يرفع عينيه له فقال حازم بصوت جاد : بصلي وقولى

مالك

قال مجدداً دون أن يرفع عينيه له : ماليش !

أمسكه حازم من عنق قميصه وقال بصوت أجش : كلمتها ازاي ؟

انفجر يوسف باكياً وقال بحسرة : والله العظيم لسانى ماخاطب لسانها ! انا بس شوفتها ! .. والله مكنش قصدي ..

اقسم بالله غصب عني ! .. كنت رايح المسجد ولمحتها فى البلكونة كانت واقفة ففضلت باصصلها وانا ماشي والله

مكنش قصدي الشيطان غلبنى .. مقدرتش اغض بصري عنها .. كنت حاسس انى متخدر وموفقتش غير على باب

المسجد وفضلت اصلي وادعى ربنا وانا بيعيط عشان يسامحنى ! .. والله مش هرفع عيني ليها تانى ولو رفعتهم ليها

ابقى اقلعهم من مكانهم .. ابوس ايدك سامحنى يا حازم

تركه حازم وعاد خطوة للخلف وأخذ يستغفر الله كي يهدأ قليلاً ليستطيع حل الموقف ! أخذ يستغفر وهو لا يدري

ماذا عليه أن يفعل ! أيشاجره ويطرحه أرضاً و .. ولكنه يحبه ! ولن يستطيع .. يتمنى له الخير .. ولن يعاقبه من أجل

زلة بسبب شيطان ماكر ! ..

زفر بقوة ونظر ليوسف الذى يبكي وقال بجمود : وهى ؟

وأخيراً رفع عينيه لحازم وقال باحراج : هي دخلت جوا اول ماشافتني !

نظر له حازم بحدّة وقد علم أنه يكذب ! ماكانت هدى لتبكي هذا البكاء المرير لو كانت بالفعل تحركت فور رؤيته

..

لم يكذب يوسف الا لخوفه عليها .. أحس أن حازم قد يبطش بها في لحظة غضب ! .. جز حازم على أسنانه وقال بحدّة : اول ماشافتك ؟

أخذ يوسف نفساً عميقاً وقال وعينيه بالارض : اه يا حازم !

احترق قلب حازم بسبب كذب يوسف ! لم لاتصارحني يا يوسف ! أنا لو أوذيك لا أنت ولا هي ! أنت تعلم كم أحبك !!

زفر بضيق فقال يوسف بحزن : بصراحة يا حازم انا شوفتها كام دقيقة كدا .. فضلت باصصلها وانا ماشي .. بس هي فجأة بدأت تعيط ودخلت وقفلت البلكونة !

تنهد حازم بحزن فقال يوسف بأسي : أنا آسف يا حازم !

قال حازم بقهر : تاني يا يوسف ؟؟ آسف تاني وانا اسامحك تاني وبعدين ؟؟ ترجع تغلط تاني صح ؟

أطرق يوسف باحراج للحظات ثم رفع رأسه ونظر ناحية حازم قائلاً : لأ مش صح ! .. أنا مش هغلط تاني باذن الله

نظر له حازم باهتمام فأردف : أنا هلع على بابا وننقل من المنطقة كلها ! .. بحجة اننا نقرب من الكلية بتاعتى .. احنا كدا كدا عندنا شقة هناك

نظر له حازم بتعجب فأردف يوسف بجديّة : أنا غلطت مرة زمان ! بس توبت ورجعت لربنا .. والشيطان بيحاول معايا عشان أغلط تاني .. بس أنا هسد عليه الطريق وهنقل بعيد حتى لو بابا مرضيش عشان شغله فانا هروح اقعد هناك لوحدي

قال حازم وقد أشفق على حال يوسف : طب وصحابك اللي هنا ؟..وانا ونور ؟..ومحل باباك ؟..والمسجد اللي
بنصلي فيه سوا ؟..ودار خطوة اللي بدأت تحفظ فيها وبتحضر فيها دروس ؟ .. هتعمل إيه فى كل دا

مسح بيده على شعره بقوة وقال بحيرة : مش عارف يا حازم ! والله مش عارف !!

لمح نظرة حانية فى عيني حازم فأردف بجدية : بس كل اللي أعرفه إني مش عايز أغضب ربنا .. وعايز كمان أثبتلك
إني أستحق أكون صاحبك بجد !

صمت حازم قليلاً ثم قال : طب والحاج محمود هيوافق اصلا ؟

قال بحيرة : معرفش والله .. لسه معرفش اصلا هقنعه ازاى بموضوع حقوق دا !

-طب ماتعمل استخارة على الكلية الاول ولما تقدم تبقى تقوله انك هتنقل عشان تقرب من الكلية وكدا

هز رأسه بالايجاب وقال : ماشي يا حازم ..بالله عليكم سامحني

تنهد وقال : مسامحك يا يوسف بس عايزك احسن من كدا بكتير

-اوعدك يا حازم اني هبعد ومش هكرر غلطى دا تانى ابدأ لحد ما اتخرج واتقدم لها .. بس انت ادعيلي

-ربنا يعينك .. بس انت لازم تاخذ بالاسباب ..

نظر له باهتمام فأردف حازم : هقولك على حاجه حصلت معايا زمان وان شاء الله هتساعدك

دخل نور غرفة أخته بعد عودته وقال ببسمة : انتى لسه نايمة ياكسولة

لم تسمعه من الاساس فاقترب من فراشها وهزها برفق حتى فتحت عيناها بصعوبة فقال باسماً : الفجر أذن يامدام

ابتسمت واعتدلت في جلستها قائلةً : يااه دا انا مسمعتش المنبه خاالص ! .. جسمي متدغدغ من اللي عملنااه في فرح منار

ابتسم نور وهو يقول : عقبالك ياستي انتي وهدير

ابتسمت فأردف بمكر : في يوم واحد يااارب

هزت رأسها بالايجاب قائلةً : يارب يانور

قال بدهشة : إيه دا انتي وافقتي ???

قالت بكسل : ايون وقولت لصاحبك كمان اول مارجعت من الفرّح

قال بعتاب مصطنع : وانا اخر من يعلم يعني ؟؟

-دا على اساس انك متفتتتش معاه تعملوا عليا خطة شريرة عشان اوافق وقولتله هتعملل استخارة الاول قبل ماتنفذها

فتح فمه بدهشة وقال : هو قالك كل دا ؟

-ايون وانا عملت استخارة وحاسة اني مرتاحة لتقديم الفرّح دا .. مع اننا هنضطر ننزل الفترة اللي فاضلة دي كثير

اووى عشان نلحق نفرش الشقة

هز رأسه بالايجاب وقال : متشليش هم ياستي ربنا يبسر الخير .. يلا بقى قومي عشان متأخريش الفجر

أمسكها من يدها وجذبها إلى أن نهضت من الفراش وتوضأت وصلت الفجر

مرت الأيام سريعاً وكانت حبيبة وهدير ينزلان يومياً برفقة والدة حازم وزوجة الحاج محمود لينتهيان من فرش بيتهما ..
ونزل حازم برفقة نور وحبيبة وذهبا لأحد محال بيع العفش بالتقسيط واتفقا مع البائع على التقسيط واشترى مايلزم
لتجهيز بيتهما

جاء اليوم المنشود .. يوم عقد رامي وتقى .. وقف رامي أمام مرآته يهنئ نفسه وهو يكاد يطير فرحاً .. إقتربت منه
والدته وقالت بسممة : مبروك يا بني .. عقبال الفرحة

قال بحماس : ياارب ياماما يااارب

ثم قبّل يدها قائلاً : أهم حاجة تكوني راضية !

قالت بحنان : رينا يسعدك يا بني .. يلا بقى عشان منتأخرش

وبعد أداء الصلاة كتب المأذون كتاب رامي وتقى التي زوجها والدتها ..

التف أصدقاءه حوله وأخذوا يهنئونه ويباركون له .. ومنهم حازم ونور ..

إلتفت صديقات تقى حولها وأخذن يباركن لها وينثرن حولها القبلات والمباركات وهي تكاد تطير فرحاً

سمعت رنين هاتفها فنظرت له بسعادة وتنهت حين قرأت اسم رامي فغمزت لها احد صديقاتها وقالت بلؤم : إيه
الهوا رماه ولا إيه؟؟

اشتعلت وجنتا تقى فدفعتها هدير الى أحد اركان المسجد وهي تقول بمرح : روحى ردى على جوزك يا بنتى بدل
القرررر اللي هيتشغل دا

ضحكت بخفوت وردت بعد أن أولتهم ظهرها : السلام عليكم

قال بشوق : وعليكم السلام ورحمة الله وبركاته .. دا انا هسجلها لك وهصحى عليها كل يوم

ابتسمت بخجل فأردف : مبروك يا حبيبتى

قالت بخفوت : الله يبارك فيك يارامي

-أخيراً ياتقى .. بجد بجد بجد هطير من الفرحة

قالت بخجل :ربنا يفرحك علطول يرامي

ابتسم قائلاً : المهم هتوزعى اللي عندك وأطلعك ولا هنتقابل إزاي فى الزحمة دى .. انا عارف مين اللي عزم البشر
دول؟؟

ضحكت وقالت : مش هعرف أوزعهم دووول كتير اووووى .. انا هروح مع ماما ع البيت وهستناك هناك

-زي الفل .. هسلم ع الناس وابقى عندك هناك .. يلا سلام

عادت مع والدتها الى بيتها وبمجرد أن وصلت الى الطابق الذى به شقتهم فوجئت بعلبة هدايا أمام الباب وعليها
كارت من الاعلى مكتوب عليه ((الى الحبيبة الغالية تقى))

ابتسمت والدتها وقالت : دا طلع رومانسي اووى

دخلنا المنزل وتقى لازلت تنظر للصندوق بسعادة بالغة .. قالت والدتها : طيب ادخلي استنيه بقى فى أوضة
الضيوف وافتحها تغير هواها على مايوصل وبالمره افتحى الهدية (قالتها وهى تغمز ثم أردفت) : وابقى قوليلي بقى
جابلك إيه .. الرجالة دوول .. يابااي عليهم !

ابتسمت تقى من أسلوب والدتها ودخلت الغرفة وفتحت شرفتها وخلعت حجابها وجلست على كرسي الصالون
وفتحت العلبة ..!

وبعد دقائق طرقت والدتها الباب وهى تقول بسعادة : رامي براا أهوو ياتقى داخلك دلوقتى

فتح رامي الباب ونظر لها بابتسامة وكانت توليه ظهرها وتنظر باتجاه الشرفة .. ترك الباب مفتوحاً قليلاً بعد أن تركته
والدتها واقترت منها وهو يقول : أخيراً بقيتى مراتى .. دا الواحد اتنفخ !!

لم تحرك ساكناً فاقترت منها أكثر حتى صار خلفها تماماً ولف يديه حول خصرها قائلاً بهمس : الجميل غضبان
علينا ولا إيه !

أحست به قريباً جداً منها.. أحست به يطبع قبلة على خدها .. ضمت يدها التي كانت تمسك بشيئاً الى صدرها وأخذت نفساً واندفعت مبتعدة عنه بخطوات ! ..نظر لها بغير فهم فرآها تبكي .. تبكي بحرقه كيوم خطفها بسيارته ..! قالت بصوت مختنق من البكاء : طلقني يارامي !!

قالتها وألقت ماكان بيدها على الأرض فتهاوت تلك الصور أمام ناظره .. تهاوت مثلما هوى قلبه معها حين سمعها تردد بقوة أكبر وهي تضغط على الحروف: بقولك طلقني !!

ارتجفت أوصاله وتجمعت الدموع في عينيه وقال بصوت مرتجف :سامحيني ياتقى !

هزت رأسها نافية وهي تقول بحدة : طلقني ! مش عايزة اعرفك ولا أشوفك تاني ابدأ أنا بكرهك .. بكرهك !!

قال بحسرة : بس انتي كنتي عارفه اني كنت وحش بس اتغيرت اقسام بالله اتغيرت

قالت بصوت مبسوح : بس متصورتش انها توصل للسفالة دي !! .. لو كنت عرفت كان عمري ماقلتك !! .. طلقني يارامي

قال لها برجاء : بالله عليكى اسمعيني أنا ...

قاطعته بحدة : متحلفش بالله !! متكلمنيش اصلا !! طلقني يارامي أنا بكرهك !!

زم شفتيه بضيق فقالت بحسرة : وانا اللي مصدقتهاش لما بعنتلي ع الفيس وقولت اني بثق فيك ! اتاريك طلعت أوحش مما قالت !! .. كل دا عشان رفضت أجاريك وامشي معاك !! .. ابعده عني بقى وطلقني !! .. عمرك في حياتك ماتهطول مني حاجه ولا هتمس مني شعرة !! .. اطلع بررااا حياتي !!

أغضبته كلماتها بشدة .. أغضبته لدرجة فقد فيها وعيه بما يقول .. قال بحنق : مش انتي عيزاني أطلقك؟؟ .. أنا هطلقك ! انتي متستحقيش تنجوزي واحد زبالة شبيهي !

ثم استدار وخرج من الباب وصفعه خلفه بقوة ! وخرج من بيتهم وهو يجز على أسنانه بغضب .. سمع صوت هاتفه معلناً رسالة .. حركه قلبه نحو تقى ولربما ندمت على ما قالت !! ولو كان هذا أبعد من المستحيل .. فتحتها بغضب وقرأ

لم يكن بحالة تسمح له بالتجاوب مع مرح حازم ، هز رأسه وجاء يكمل طريقه ولكن حازم جذبته مجدداً قائلاً بجديّة
: انت مش سامع الاذان ولا إيه؟؟

قال رامى بحنق : سيبنى يا حازم !!

قال بتعجب : انت رايح على فين كدا؟؟..وبعدين مش سايبك يا عم غير بعد ماتصلي معانا

صاح بضيق : بقولك سيبنى انت مبتفهمش !

قال حازم بضيق : آه يارامى مبتفهمش وبرضه مش هسيبك تمشي من غير ماتصلي معانا !!

ثم أردف باهتمام : طنط او اختك تعبانين ولا حاجه لا قدر الله !

قال بضيق : لا كلهم كويسين ! محدش تعبان غيري ولا مقهور ومذلول غيري !! .. انا هوري الزفتة دى بس لما
راوحلها البيت هى الحيوانة اللى اسمها سمية لما اشوفهم !!

حاول أن يفلت يده من يد حازم فأمسكه حازم بقوة أكبر وقد فهم تقريباً ما حدث حين سمع اسم سمية قائلاً بجديّة
: استعيذ بالله من الشيطان الرجيم واهدى بس خلينا نعرف نتكلم

دفعه رامى(وكان أقوى منه فى بنية الجسد) بقوة كادت تسقطه قائلاً بحدة : مش هنتكلم ومش ههدى ! أنا بيتي
أتخرب من قبل حتى ما أفتحه !!! .. هو دا اللى بيتوب ربنا بيسامحه على اللى فات ويبدأ بداية جديدة !! هو دا
اللى ..

ارتفع صوت الاقامة والتفت رامى بحدة لذلك الذى كمنه بيده من خلفه قائلاً بجديّة : مينفعش الصلاة تقام
والمسلمين براا بيتخانقوا !! .. جوا منك له !

اتسعت عينا حازم حين رأى أحمد يتفوه بتلك الكلمات وهو ممسك برامى الذى هدأ بين يديه وكأنه امتص طاقة
الغضب منه ! .. دخلوا جميعاً المسجد وصلوا به بعد أن لحقهما نور ويوسف وبعد أداء الصلاة خرج ثلاثتهم وبقي
حازم برفقة رامى الذى قال شارداً : معلش يا حازم عشان زقيتك

جلس فى قبالتة وربع قدميه قائلاً باهتمام وهو يقطب جبينه : إيه اللى حصل يارامى بينك وبين مراتك مخليك تغلى
كدا؟؟..واهدى كدا عشان نحل المشكلة

زفر رامى بضيق وقال : تقى طلبت الطلاق .. أول كلمة قالتهاالى لما قعدت معاها ! .. ورمتلى صور بتاعتى انا
والزفتة سمية ! صور قديمة ! .. وانا حاضنها وشايلها والقرف اللى كنت بعمله ايام الكلية ! ..سمية بعتهم لها ع
البيت وعارف جابت عنوانها ازاي؟؟

قال بتعجب : ازاي؟؟

قال بحسرة : من أختى !.. رانيا اللى بقالى كام شهر بدلع فيها وبعاملها احسن من نفسى اصلا وطالع نازل اجيلها
لبس واسع عشان تغير الضيق المقرف اللى بتلبسه دا !! .. والله العظيم انا حسرتى الكبيرة على اختى اللى بحبها !
مكنتش اتخيل انها بتكرهنى كدا ! بتكرهنى لدرجة إنها تخرب عليا ! .. انا مش مسامحها ليوم الدين !! ولما
هروحها هعرفها ازاي تعمل معايا كدا !

قال بسرعة : استهدى بس كدا بالله انت ممكن تكون فاهم غلط ..مين اللى قالك اصلا على موضوع رانيا دا ؟

-سمية بعتهلى رسالة بتقولى تعيش وتاخذ غيرها واقول لرانيا مرسي كثير ! .. شوفت البجاجة وقلة الادب !

-من غير بس شتيمه يارامى .. مش يمكن هى عملت كدا عشان تضرب عصفورين بحجر واحد ! يعنى تبوظ عليك
من جوا ومن برا وتهد نفسك ! ..

زفر رامى بضيق وقال : يمكن ! .. كل اللى اعرفه ان حلم تقى دا انساه خلاص .. انت مشوفتهاش وهى بتقولى
"كل دا عشان مرضتش امشي معاك واجاريك ! .. " وقالتلى انها مش هتسيبنى اقرب منها ولا امس منها شعرة !! ..
تقى فاهمة انى اتجوزتها عشان اتمعت عليا فقولت هى سكتها الجواز ! بس الكلام دا لو انا غنى بقى اقولك ماشي
، انما انا واحد هتجوز مرة واحدة بالعافية وطلعان عيني عشان الشقه تخلص !! .. وبعدين منا لو عايزها فعلاً كدا
ماكنت خطفتها اسهل ! احسن بقى ما بطل سجاير وانتظم ع الصلاة واغير حياتى !! .. معرفش هي فكرت فيا
كدا ازاي !!

ربت على كنفه قائلاً : معلى يارامى اعذرنا برضه هى مكنتش متوقعة

قال بحزن : بس هى عارفة انى كنت وحش واتغيرت !! المفروض انها قبلت بيا كدا .. مش مع اول خناقة تعايرنى بالماضى بتاعى !!

قال حازم بسرعة : لالا لالا لالا اعوذ بالله من الشيطان الرجيم.. انت الشيطان عمال يقولك كدا عشان يخرب بينكم بس .. انت برضه متعرفش سمية قالتها إيه ولا كتبتلها إيه مع الصور ! مايمكن فهمتها ان الموضوع اكبر من كدا

نظر له رامى باهتمام فأردف حازم : لازم تكلمها يارامى

هز رأسه وقال بحزن : انت مشوفتهاش وهى بتقولى اطلقها وعماله تقطم فىا !! عمرها ماكانت هتسمعى ولا هتسمعى !! وبصراحة لما فضلت تقولى طلقنى انا اتعصبت اووى بقى وروحت

قطع حديثه صوت هاتفه معلناً عن قدوم رسالة .. نظر له بوهن ثم قال بدهشة : دي تقى !!

جاء يفتحه ولكن حازم وضع يده على الشاشة قائلاً : انت طلقته؟؟..

تعجب رامى من تصرفه وقال وهو يحاول دفع يده : مش مهم سيبنى اشوف بعنالى إيه

ظل متمسكاً بالهاتف وقال له بجديفة : لو طلقته مينفعش يارامى ! معدتش تحلللك عشان تكلمها !!

قال بضيق : حتى لو طلقته فانا ممكن اردنا قبل العدة فعادى !

-لأ طبعاً الكلام دا لو دختلتم .. انما طالما عقدتم بس واتطلقوا قبل الدخول يبقى مينفعش تردنا الا بعقد جديد !

نظر له رامى بدهشة وقال : بس انا كنت فاكر انى ممكن اردنا عادى !!

ابتلع حازم ريقه بصعوبة وقال : هو انت طلقته؟؟

انتفض رامى من جلسته وقام وهوى ساجداً سجدة شكر لله لأنه أمسك لسانه ولم يطلقها !! ماكان سيستطيع ردها الا بعقد جديد !! ..

وحين رفع رأسه ابتسم حازم مستبشراً وقال : أفهم من كذا إنك مطلقتهاش ؟

قال بفرحة : الحمد لله لأ .. الحمد لله لأ ..

قالها وفتح هاتفه وقرأ الرسالة

“رامي أنا بجد آسفة أووى انى اتعصبت وبوظت الدنيا ! انا عارفة ان اسفي ملهوش لازمة دلوقتي ! .. خلاص كل حاجة باظت وانت طلقتنى !“

قرأها عدة مرات بعينه ثم قرأها بصوت مسموع ثم قال لحازم : المفروض اعمل إيه ؟؟

تنهد حازم وقال : لازم تتكلموا يارامي .. اخرجوا سوا واتكلموا .. مش هينفع فى بيتها عشان اهلها ميسمعوش حاجة .. وطالما هى اعتذرتلك يبقى هى حست انها غلطت او ان الشيطان هو اللى خلاها تتعصب كذا

هز رأسه بالايجاب وقال : خلاص هخرج معاها ونتكلم .. بس انا مش فاهم اووى معنى رسالتها .. يعنى هى بتقولى ان اسفها معدش ينفع عشان انا طلقتها .. انا قولتلها فعلا انى هطلقها طالما هى عايزة كذا بس مقولتلهاش انتى طالق ..

-طيب ليه الغلب دا يابنى ماتكلمها وانت تعرف كان قصدها إيه من الرسالة

-طيب انا هبعتلها حاجة دلوقتي ولما اروح هكلمها على رواقه تكون حتى هديت شوية

أمسك هاتفه وبعث لها ((خلاص ياتقى))

ثم دسه فى جيبيه وقال ببسمة : أنا رايح بقى على بيتنا عايز حاجة ؟؟

-عايزك تهدى كذا شوية وتبطل عصبية .. وكمان متحكمش على أختك غير لما تسمعها وتعرف فعلا سمية صادقة ولا بتكذب !

قرأت رسالته عدة مرات وهى لاتصدق ماتراه بعينيهها ، فقد أنهى كل شئ ! .. انهمرت الدموع فوق خديها وقالت بحزن : كدا يارامي !! خلاص يعني !! انا عارفه انى غلطت بس انا برضه اتصدمت !! انت ليه مراعتنيش !! يعنى لو كان حد جابلك صورى مع راجل تانى كنت هتعيديها بسهولة كدا !! .. انا عارفه انى غلطت بس برضه انت مدتنيش فرصة اصلح غلطي !! .. خلاص يعني كل حاجه خلصت !! طب هقول لاهلى إيه !! .. يااارب ساعدنى يااارب فانى لا أحسن التدبير .. يارب هون على قلبي وخفف عليه يااارب
أمسكت بهاتفها وألقت نظرة أخيرة على تلك الرسالة الخاوية من أى مشاعر أو مراعاة .. وأغلقت هاتفها وضمت الوسادة بين ذراعيها وأخذت تبكي إلى ان راحت فى ثبات عميق

صاحت هدى : حرام عليكى يا حبيبة مش قادرة آخذ نفسي
قالتها وارتمت على أقرب مقعد وجدته قالت حبيبة وهى تجذبها لتنهض : اعمل فيكى إيه طيب مش عارفه تتعلمى ترقصيهها !! .. امال مين اللى هيعملها معايا انا ومنار !!
قالت بدهشة : عمرى ماشوفت عروسة بترقص فى فرحها !! مشوفتيش هدير عاقلة اززااى مش زيك !!
وضعت يدها فى خصرها وقالت : ومالهم المجانين يا حبيبتى !! بت قومى ارقصي معايا لحسن أجيلك حازم يقومك بالعافية
قالت بأريحيه : الحمد لله إنه فى الشغل معرفش كنا هنعمل الجنان دا قدااامه اززاى !!
قالت حبيبة بمكر : أمال هتعمليهها اززاى فى القاعه قدااام ستات القاعه كلهم ؟؟ .. مش يمكن أم تعجب بيكى وتيجي تخطبك لابنها

ضحكت هدى بقوة وهي تقول : أيوا زى الست اللي جت تسألني عليك في فرح منار وآخر سؤال خالص بتقولي هو انتي اختها؟؟ .. قولتلها لا هي مرات أخويا بس

انفجرتا ضاحكتين فقالت هدى وهي تلتقط أنفاسها بأعجوبة : كانت حاطة أمل وأنا حطمته !!

وكزتها حبيبة قائلةً : بس بس بلاش تريقة ! اتزفتي قومي خلينا نتدرب على الرقصة

-في حد بيرقص بطريق في فرحه؟؟

قالت ضاحكةً : ايون هيبقى فرح اسلامي مفرفش .. وهنجدد نيتنا اننا عايزين نقدم فرح مرح وحلال عشان غيرنا يقلدنا وننشر الفكرة ..

غمزت لها وهي تقول : وطبعا أخويا ظبطك وسجلك الهمهمة بصوته عشان ترقصوا عليها من غير موسيقي .. عالم معقدة .. على فكرة سألت في موقع دار الافتا وقالولي مختلف عليها ..

-الحمد لله ياستي اننا معقدين .. وبعدين يا هدى افرضي ياستي طلعت حرام؟؟..انا واحده قادرة مسمعش موسيقي خالص فاسمعها ليها بقى واتعب قلبي .. وبعدين أنا بتجنب الشبهات

قالت بغير اقتناع : وجهات نظر بقى

قالت حبيبة في نفسها : مسيرك هتبطلها عاجلاً ام اجلاً

ثم جذبتها قائلةً : يلا ياكسولة عشان نخلص تدريننا بقى

-لالالالالا ماليش فيه هناك الاول .. انا هموت من الجوع

أحست والدتها أنها لم تخرج ممن غرفتها منذ دخلتها حين رحل رامي .. طرقت باب أخيها وقالت ببسمة : فاضلي شوية ياحمادة؟؟

ابتسم قائلاً : أيوا خير ياماما؟؟

-ماتروح تشوف أختك كدا انت اقرب واحد ليها .. رامي لما كان هنا مشي بسرعة ومن ساعتها وهي مخرجتش من أوضتها !!

قال بحيرة : طيب هما متخانقوش ولا حاجه يعنى؟؟

-لايابنى مسمعتهمش اتخانقوا وهي قالتلى لما سألتها حصلت ظروف خلته يمشي علطول

-طيب روي ارتاحي انتى وانا هشوف مالها

رحلت والدته وبعد عدة دقائق ذهب لغرفة أخته وطرق بابها وحين لم تجبه عاد لغرفته وأخرج هاتفه واتصل برامي وبعد لحظات أتاه صوت رامي القلق : السلام عليكم

-وعليكم السلام اااااا .. إيه يعريس فينك؟؟ فى حد يسيب مراته كدا يوم كتب كتابهم

ابتلع ريقه بصعوبة وقال بتردد : لا ماهو أصل .. !

قاطع قائلاً : انا عارف ان حصلت ظروف خيلتك تمشي بسرعة تقى قالت كدا لماما .. بس هي فى اوضتها من ساعه ما مشيت مخرجتش ! .. وانا قلقان عليها بصراحة

قال بخوف : يعنى إيه؟؟ يعنى حاسبة نفسها!!!!!!

ضحك قائلاً : لا مش للدرجادي ياعم ! هي بس لما بتزعل بتقفل على نفسها وبتبقى فى حالها .. وانا استغربت انها زعلت مع ان المفروض انهاردة يكون اسعد يوم فى حياتها .. بس برضه ممكن تكون زعلت عشان ملحقتوش تقعدوا مع بعض بس برضه انا عارف ان اختى عاقلة ومبتزعلش خصوصاً ان حصلتلك ظروف

مسح على شعره بقوة قائلاً : انت هتحريري ليه معاك يامحمد ..متقلقيش عليها بدل مانط في هدومي واجيلكم
حالا

قالت بمكر : على فكرة البنات بتحب الجنان .. وانت خلاص جوزها يعني يبقى حلال حلال حلال

ضحك من أسلوبه ثم قال : بس أحتك مدرسة ياعم يعني ممكن تعتبرى طالب وتشوطني لو الجنان معجبهاش

-وانت ياعم مانت مدرس وتقدر تمسكلها العصاية وانا اشدكم انتوا الاتنين على القسم

ضحك رامي بشدة من أسلوب محمد وقال له بتلقائية : أضحك الله سنك يامحمد والله ضحكنتى وأنا ماليش نفس

قال : حلوة دى ياعم الشيخ

قال باحراج : والله طلعت بتلقائية عشان بسمعها من صحابي كتير يعني فقولتها غصب عنى

-وهى وحشة يعني؟؟..دي سنة اصلا وبعدين دعوة جميلة حد لاقى..المهم قولت هتعمل إيه فى موضوع تقى

-انت حاول بكراتخدها فى اى حته وانا هجيلكم على هناك وانت هتخلع وتسيينا نتكلم مااشي؟؟

-ماشي ياعم ..ربنا يصلح مايبينكم يااارب يارامي

قال بلهفة : اللهم امين يامحمد اللهم امين

قال بصوت خفيض : انا كدا عرفت إيه الظروف .. على فكرة دى عين وصابتكم اكييد محدش طبعي بيتخانق من

اول يوم كدا

قال باحراج : معلش بقى يامحمد يمكن عشان انا اللي باخد الكلام بحمقة .. دعواتك بقى ومنتسحيش ونفذ الخطة

وانت ساكت تمام ؟

قال بمرح: طيب ياابيه رامي المهم الواحد يعرف يطلع من وراكم بمصلحة

ضحك رامي وقال : ياعم هديك عششيين جنيبه انت بس سلك الدنيا

أغلق هاتفه واتجه نحو غرفة أخته .. طرق بابها وبعد لحظات فتحت له بابتسامة قلقة وقالت : ازيك يارامي ؟

هز رأسه قائلاً : كويس .. ينفع نتكلم ؟

أفسحت له المجال ليدخل غرفتها .. دخل وجلس على فراشها ونظر إليها باسمًا وقال : تفتكرى عايز أكلمك فى إيه ؟

جلست على كرسي المكتب فى قبائه وقالت بتردد : معرفش

قال بوجه خالى من المشاعر : عرفتى انى كنت هطلق تقى ؟

اتسعت عينها وقالت : ليه ؟؟

قال : حسك متخضتيش يعنى !

قالت بدهشة : متخضتش مين يابنى فى حد بيطلق فى نفس يوم جوازه !! .. إيه اللى خلاك تفكر تطلقها ؟

قال بجديّة : مش انا اللى هطلقها هى اللى طلبته منى

ابتعلت ريقها بصعوبة فقال بحدة : هى سمية كلمتك ؟؟

أحست بخوف سرى فى أوصالها وعادت بظهرها للخلف فأعاد جملة : بقولك هى كلمتك ؟

قالت بصوت مخنق : آه .. من فترة كدا كلمتنى

قال بضيق : وادتيها عنوان تقى ؟؟

قالت بسرعة : والله العظيم أبداً اديتها الاكونت بس .. أخذته من غيداء واديتهاؤها !!

قال بصيق : طب وتديهولها ليه !! انتى مش عارفه انها اكييد مش هتباركلها وانها ناوية تخرب عليا !!

قالت وهى توشك على البكاء : والله العظيم يارامى هى فضلت تقولى يعنى اخوكى ماشي معايا ست سنين وفى الاخر ميتجوزنيش !! وتقولى دا ظلم ولا لآ ! وقعدت تقولى كدا لحد ماقولتها انا مالى !! فقالتلى ان ربنا مش هيسامحنى ابدأ وهيخلينى اتجوز واحد بتاع بنات عشان داريت على أخويا ومقلتش لخطيبتة انه كان بيعرف بنات ! فقولتها استحالة اوقع بين اخويا وخطيبتة قالتلى اديها الاكونت بس هي مش عايز منى غير كدا !! .. وهى هتكلمها وهتقولها انك كنت مصاحبها وقالتلى لو هى وافقت يبقى خلاص احنا كدا ريحنا ضميرنا !

صاح بغضب : وانتي صدقتيها !! إيه السذاجة اللي بتتكلمى بيها دى !!

بدأت تبكي وقالت : والله العظيم انا خوفت لربنا يخلينى اتجوز واحد بيصاحب عشان داريت عليك ! فعشان كدا اديتها الاكونت بتاع تقى بعد ما أخذته من غيداء..

قال بحدة : وهى جابت عنوان بيتها مينين؟؟

-معرفش والله .. يمكن سألتها أو سألت أى واحدة من صحباتها

-محدث بيدي عنوان البيت لحد

-لأ ممكن لو قالتلها انها صحبتها وعازيزة تعملها مفاجأة !! .. عادى يعنى يارامى

زفر بقوة ومسح وجهه عدة مرات كي يهدأ فقالت له وهى تشفق على حاله : وانت قولتلها إيه لما طلبت منك الطلاق؟؟

-مشيت وسيبتها .. وبعدها بساعه بعتهلى رسالة انها اسفه عشان انفعلت بس كل حاجه خلاص باظت..لما جيت حاولت اكلمها بس هى قافلة موبيلها واخوها قالى انها فى أوضتها مرخجتها منها من ساعه مامشيت

قالت رانيا بحزن : انا اسفه والله يارامى .. مكنتش عارفه انها هتوقع بينكم

هز رأسه بضيق وقال : حصل خير يارانيا .. بس عايز أعرفك حاجه .. انا سألت شيوخ وقالولى لو كنت اعرف بنات وتوبت يبقى الاولى الستر هنا يعنى مقولش لزوجتى حاجه عنهم طالما توبت وندمت ورجعت لربنا

قالت بحزن : خلاص والله انا اسفه يارامي

تنهد قائلاً : ادعيلنا بقى يارانيا .. وبلاش تجيبى سيرة لماما

هزت رأسها قائلةً : ربنا يصلح بينكم يارامي .. ويهدي سرکم

قال ببسمة : ويهدينا جميعاً يارانيا

قالت بحزن : ليه ديماً شايفنى وحشة ومحتاجة الهداية؟؟

-والله يارانيا كلنا محتاجين الهداية مش الى بيغلط بس عشان كلنا بنى ادم وكلنا بنغلط .. صح ولا إيه؟؟

دخل غرفتها قبيل الفجر بقليل وهزها بخفة قائلاً : يلا ياكسلانة الفجر قرب

فتحت عينيها بصعوبة وقالت بوهن : خلاص انا هقوم ماشي

قالت بحزن : مال عينيك؟؟..ومالك حابسة نفسك هنا فى الاوضة كدا ليه؟؟ دا انتى حتى مخرجتيش وقت

الصلاة عشان تتوضي

قالت وهى تفتح عينيها المتورمتين بصعوبة : كنت متوضية وصليت المغرب والعشا بنفس الوضوء ..

قال بحزن : طيب بتعيطي ليه؟؟

قالت بوهن : عادى يامحمد انا كدا علطول تلاقيني بيعط لوحدى

-بس المفروض انهارده متعيطيش خالص يعنى .. حد يعيط يوم كتب كتابه؟؟

تعثرت الكلمات فى فهمها ولم تجد ماتقوله فقال بسرعة : على فكرة رامى كلمنى وقالى انكم اتخانقتوا .. وانه عايز
يصالحك ولقى موبايلك مقفول لما كلمك

شردت قليلاً فقال لها بحنان : إفتحى موبايلك وإسمعيه أو ..

نظرت له باهتمام وقالت : او إيه ؟

ابتسم وقال بمرح : أو طلعى عينه عشان يحرم يزعلك تانى

ابتسمت من أسلوب أخيها الذي أردف : إنتى مشوفتيهوش وهو بيكلمنى إنهاردة .. كان هيموت عليكى .. احنا
بقى نستغل دا ونطلع عينه

ابتسمت ولكنها قالت : حرام عليك يا محمد .. وبعدين انا اللي انفعلت زيادة مش هوا !

قال بدهشة : يعنى هتسيبه كدا !! لا طبعاً يابنتى لازم تنشفى دماغك وتطلعى عينه على ما يصالحك عشان يفكر
مليون مرة قبل ما يزعلك تانى

قالت : بس دا لو احنا مش واخدين بعض عشان الدين .. الكلام دا لو الدنيا تهمننا او ووى والجو بتاع مين اللي
يعتذر والكلام دا ! المهم ان المشكلة تخلص مش مشكلة انهى طرف اللي يخلصها ! .. وبعدين ان شاء الله مفيش
زعل تانى .. اصلا دى بتبقى لحظة شيطان ومش عايزين نكررها !

-اييبييه العقل دا !! كان فين دا وانتوا بتتخاقنوا !

ابتسمت وقالت : قولتلك كانت لحظة شيطان

-طيب وقفلتى موبايلك ليه طالما انتى ممكن تسمعيه وتتصالحوا؟؟

هزت كتفيها وقالت : معرفش ! كل اللي اعرفه انى حسيت انى تعبانه او وى ومحتاجه افصل شوية من كل حاجة ..

-امممم طيب يا اوختى .. اكلمه بقى ولا إيه؟؟

قالت وهى تحاول أن تكون مرحة : انت شايف إيه؟؟

قال بمرح : شايف ان خطة شريرة مش هتعمل مشااكل

ابتسمت وصممت للحظات ثم قالت : قالك إيه لما كلمك؟؟

-شووف انا بقول إيه وهى بتقول إيه !!.. قالى ياستى الست اختك قافلة موبايلها ليه وكان عايز يكلمك .. فانا

قولتله انى هاخحك ونروح اى حنة وهو هيقابلنا هناك وتعدوا تتكلموا وتصفوا اللي بينكم

هزت رأسها بالايجاب فقال بمرح : بصي ممكن نتقل عليه يومين ثلاثة كدا كنوع من أنواع الخطط الشريرة يعنى

فكرت قليلاً فقال : ها قولتى إيه؟؟

-حرام يامحمد .. بلاش نتعبه

-يووووه مالك يابت طالعه طيبة كدا لمين؟

ضحكت فقال بفرحة : الحمد لله أخيراً ضحكى .. قومى يلا يهانم مش ناقصة كسل الفجر قرررب خاالص ..

واانا هبقى اتصرف فى موضوع جوزك دا انتى متكلميهووش ولا تفتحى موبايلك موشي؟؟

قالت ضاحكة وهى تهز رأسها : شكلك هتضيعنى !! ربنا يستر

وبعد صلاة الفجر اتصل محمد برامى وقال بمرح : السلام عليكم ياعم الشيخ

-وعليكم السلام .. اتطمنت على تقى؟؟

-أيوا هى كويسة الحمد لله

قال بلهفة : طب قالتلك حاجه عليا؟؟

-يعنى .. بصراحة أنا اللي قولتلها انك كلمتنى

-طاييب وبعدين؟؟

-وبصراحة كدا يا أخ رامي أنا اتفقت معاها اننا هنعمل عليك خطة شريرة وهنقاطعك شوية

قال بتعجب : انت بتتكلم جد؟؟

-آه والله ..

قال بابتسامة واسعة : ووافقت تعملوا عليا خطة شريرة؟؟؟؟؟؟؟؟

-اه ياعم .. مش عارف ليه حسك فرحانان؟؟

-طبعا ياعم دا انا هطير من الفرحة .. اللهم لك الحمد

-مسألتهش يعنى ع الخطة الشريرة؟؟

استمع رامي باهتمام فأردف محمد قائلاً بجدية يشوبها المرح : اسمع يا أخ إنت .. إنت معيط أختى فى أول يوم
جوازز أمان بعد الأربعين هتعمل فيها إيه؟؟

ضحك رامي قائلاً : اربعين ميبين يابنى انت .. متخلنيش اغلط ع الصبح كدا

-طيب اصلا بعيداً عن الاربعين اللي هي من العاهات والتقاليع الغلط اصلا اللي ملهاش اصل .. كنت بقولك اسمع
يا أخ .. عشان أضمن انك مش هتزعها وتعطيها فأنا قررت أذكك على ما أصاحكم

-تدلني؟؟

-أينعم ! بكل ماتحمله الكلمة من معنى

-وأختك موافقة؟؟

-هى مكنتش موافقة وقعدت تتمسكن وتقولى حرام وبتاع وانت غلبان وكدا يعنى البت شكلها عبيط وبتحبك يعنى
.. بس أنا مصمم بقى

-أولاً متقولش على مراتى عبيطة تانى يا أخ إنت فاهم ولا آجى أفهمك؟؟

ضحك قائلاً: إنتوا الاتنين عُبط وشكلكوا بتحبوا فى قصة حب .. انا مالى اصلا اشبعوا ببعض انتوا الاتنين الحق
عليا انى كنت عايز أعمل شوية جنان فى النص

قال بدهشة : يعنى مراتى تقاطعنى وتقولى جنان؟؟ .. والله مافى مجنون غيرك

-بنهزر يارامى إيه ياأخى مبتهزرش؟؟ يعنى هى هتقاطعك بجد؟؟

فكر رامى للحظات ثم قال : بقولك إيه يامحمد أنا عندى فكرة كدا بس مش هعوزك تفتن عليا

-قووول ياباشا سرى فى بير مخروم

مرت الأيام سريعاً واقترب موعد فرح نور وهدير وحازم وحببية .. وفى خلال تلك الأيام لم يحدث رامى تقى الا
قليلاً ولم يحدثها حتى عن المشاجرة التى دارت بينهما ولم تفتح هى الموضوع بدورها .. كانت مكالمتهم قليلة
وتنتهى بكلمات قليلة وكانت تزداد قلقاً بعد كل مكالمة .. تشعر أنه ينفر منها ويتعد عنها! .. ولكنها ماكانت تقدر
لتقول له هذا .. وفى المرة الوحيدة التى تشجعت فيها وطلبت رؤيته .. اعتذر متعللاً بانشغاله .. فأكد لها هذا
الشعور ! وماكانت تعلم انه يذوب شوقاً..يتمنى أن يطير إليها اليوم قبل الغد ! .. ولكنه يريد لها أيضاً ان تشتاق

جاء اليوم المرتقب .. يوم عرس الابطال .. من صبروا من أجل متعة الحلال ولذته .. من أحبوا الله فتركوا الحرام
لأجله .. من تركوه وهم موقنين أن من ترك شيئاً لله عوضه خيراً منه .. تزينت حببية بفسطانها الأبيض ذو الأكمام
الشفافة والمطرزة بالكريستالات وتحتة ((بدى)) بالطبع وصففت شعرها وأسدلته على كتفيها ووضعت فوقه خمراً

قصيراً من القماش الذي يشبه الحرير .. وفوقه تاج ورد صنعته لها منار بيديها .. ولبست ملحفة بيضاء ناصعة وعليها نقابها الطبيعي .. لا يفرق أى شئ سوى أنه باللون الأبيض

وارتدت هدير فستاناً مشابه له تماماً وكأنهما أردا أن يكونا كالتوأم .. ولكن هدير كانت تبدو أكثر هدوءاً ووقاراً من حبيبة .. وارتدت هدير ملحفتها السوداء .. كانت حاجة فى نفسها فقضتها .. شعرت أن الأبيض ملتغاً للنظر .. فغطته بالأسود

ارتدت منار وهدى وتقى نفس فستان العروسين .. لقد صنعوا جميعاً نفس الفستان بمقاسات وألوان مختلفة .. ارتده هدى وردياً وتقى لبنياً بينما قالت منار بمرح عند الخياطة ((الكحلي يليق بي)) وصنعتة كحلياً لأنها تحب هذا اللون وزوجها أيضاً يعشقه

بدأ الحفل وبدأت الفتيات يغنين ويرقصن بالدف ويتجاذبن ويمرحن .. كانت من أسعد الليالى التى مرت عليهن جميعاً .. خاصة منار.. فأحبابها اليوم سعداء .. وما أجمل أن ترى من تحب سعيداً بل طائراً من الفرحة

هدأ الرقص قليلاً وجلسن للاستراحة وبعد دقائق قامت منار ووقفت على المنصة وأمسكت الميك ولكنها خجلت أن تتحدث فأشارت لحبيبة التى قامت من على كنية العروس بجوار هدير واتجهت لها وأمسكته عنه قائلة بمرح : اللى صاحبتى كانت عايزة تقوله واتكسفت يعنى .. إنا محضرين عرض كدا هنعمله .. وأنا هشترك معاهم مع إنى عروسة برضه .. بس الفرحة جيه فجأة بقى وكنا خلاص اتفقنا .. المهم مين فى البنات الحلوة اللى قدامى هتقوم ترقص معنا رقصة البطريق

اتسعت عيون الفتيات فأردفت حبيبة ببسمة واسعة : آه وربنا هنرقصها وهنرقصها رقصة حلال حلال حلال .. هاا مين معنا؟؟

نهضت هدى وتقى ووقفا على المنصة وتبعتهن بعض الفتيات فقالت حبيبة بمرح : على ما اللى قاعدين ياخدوا أنفسهم نكون إحنا لفينا القاعة بقى كدا كلها

وبالفعل بدأت فى الرقص على النغمة التى سجلها حازم بصوته بدلاً من الموسيقى رغم الاختلاف على تحريمها ،، وكون قطار يتزايد كلمها قفز مرة للامام .. شاركت أغلب الفتيات فى القاعة والتى شعرن بفرحة عظيمة

وفى القاعة الأخرى وقف الشباب يتدافعوا ويمرحوا بطرقهم.. وأحسوا بفرحة كبيرة وتعجب فى آن واحد .. هل يمكن أن يكون الفرح إسلامياً وكذلك ممتع ؟ .. هل يمكن ان نفرح فرحة حلال !!

ركب حازم فى المقدمة وإلى جواره زوجته وفى الخلف ركب نور بجوار هدير التى كان الخجل يكسوها وإنطلقوا إلى بيوتهم

وقفت تبحث بعينيها عن أخيها الذى وعدنا باصطحابها من الفرح لأنها بالطبع لن تعود متأخرا هكذا وحدها.. أخرجت هاتفها واتصلت به وبعد لحظات جائها الصوت من خلفها : مش هيجي

نظرت تقى بفرع إلى مصدر الصوت ووضعت يدها على صدرها ولكنها سرعان ما هدأت حين رأت رامى الذى اتجه نحوها ووقف امامها قائلاً بجدية : فى بنت تقف لوحدها كدا بليل ؟

أشاحت وجهها عنه قائلة بجدية هى الأخرى : مستنية محمد قال هياخذنى

-دى مش إجابة على سؤالي على فكرة

-طيب أنا أعمل إيه المفروض كنت أطلع ألاقه بس هو لسه مجاش

قال بمكر : ومش هيجي !

قالت بتعجب : ليه؟؟

-انا قولتله إنى هوصلك

عقدت ذراعيها أمام صدرها وأشاحت وجهها عنه فقال : طيب هتركي ولا هنبات فى الشارع؟؟

قالتا وإتجه نحو سيارته وسارت هي خلفه وهي تشعر بضيق شديد من طريقة حديثه معاها

انطلق بسيارته ولكنه لم يسلك طريق العودة لبيتها .. نظرت له وقال : دى مش سكة البيت ؟؟

-منا عارف .. أأ صحيح إنتي ليه مقولتليش إنك هتحضري الفرح ؟..مش المفروض تاخدي إذن جوزك ؟

قالت بجديية وهي تنظر أمامها : على فكرة طول منا فى بيت بابا يبقى هو اللى آخذ إذنه .. وبعدين إنت المفروض كنت تسألنى من باب حتى إنك تظمن على مراتك !! وإنت عارف إن هدير وحببية صحابي يبقى أكيد هحضر فرحهم

كان ينظر إليها وهو يقود ولم يعقب على كلماتها ولاحظت هي أنه يحرق بها فقالت : ينفع تبص للطريق عشان منخبطش فى حاجه ؟؟

ضحك وقال بفرور : على فكرة أنا ممكن أسوق وأنا مغمض أصلاً يابنتي

زفرت بضيق وقالت : إيه الفرور بتاع الرجالة دا .. مابراحة على نفسكم شوية !!

قال ساخراً : دا انتى متعقدة بقى !

نظرت له بحدة فائلاً : ربنا يسامحك ! مش هرد عليك .. واتفضل بقى روحنى البيت

-والله دي عربيتى وأروح بيها الحنة اللى تعجبني

زفرت بضيق وبعد عدة ثوانى قالت : طيب احنا رايجين على فين

-ليا مزاج أقعد شوية ع البحر .. عندك مانع ؟

-طيب روحنى واطلع اقعد براحتك

-لأ .. ماهو انا ليا مزاج أقعد معاكى شوية ع البحر

قالت كمحاولة أخيرة : بس كدا هيقلقوا عليا فى البيت ؟

-أخوكى عارف إنى هفسحك .. وقولت لباباكي كمان ميقلقش عليكى عشان انتى معايا

تنهدت باستسلام قائلةً : طيب

عادت بظهرها للخلف واستندت بظهرها على الكرسي وقالت بتعب : يعني مكنش ينفع نخرج قبل كدا ! لازم اليوم اللى حيلي مهدود فيه

قال ببسمة مأكرة : على فكرة انا قاصد .. عارف إن حيلك هيتهد فى الفرح فهتبقى تعبانة وتسمعى الكلام من غير مقاوحة

انتفضت من كرسيها ونظرت له بخوف فضحك بشدة قائلاً : وربنا فهمتى غلط !! قصدك تسمعى اللى هقوله ومش هيبقى فيكي حيل تجادليني

عادت بظهرها للخلف وقد اكتسى وجهها بحمرة الخجل والاحراج .. ابتسم قائلاً : خلاص هاانت قربنا نوصل

وبعد عدة لحظات توقف بسيارته على الكورنيش ونظر لها مبتسماً فقالت : خلاص كدا وصلنا ؟

-أيوا .. افتحلك الشباك؟؟

-لا أنا اصلا سقعانه من الهوا اللى جاى من بتاعك

قال بمرح : انسى ياماما انى اديكي جاكيت البدلة .. دى مكوية

قالت بمرح واهن : مكوية ولا من عند المكوجى .. تفرق !

ضحك مستبشراً ببداية جديدة معها .. نظر لعينيها وقال : أنا آسف ياتقى

ابتسمت قائلةً : مفيش حاجه تخليك تتأسف عادى يعنى إن جوزى يخطفنى ويطلعنى ع البحر .. أحلى خطفة فى الدنيا اصلاً

أمسك كفيها وطبع عليه قبلة قائلاً : بجد ياتقى إنت حد جميل أووى .. أنا آسف بجد إنى ..

قاطعته وقد عادت بظهرها للخلف وقالت بنعاس : ياعم إنت كل مانسى تفكرنى لبيبييه .. وبعدين ياخويا انا مش

حد انا سبت .. حتى اسأل ماما هتقولك انى مولودة يوم السبت

ضحك من كلماتها وأسلوبها الناعس وقال : يعنى مسماااa

-إمممم استنى أفكر

-لا مفيش تفكير إنتى سامحتينى خلاص وانا اصلا بعمل منظر كدا بس مش أكثر

ضحكت فنظر لها بجدية قائلاً : هاا بقى؟؟

فتحت عيونها الناعسة ونظرت له قائلة : مسمحاك بس فى حاجه عايزة اعرفها عشان أسد على الشيطان أى باب

مممكن يدخلى منه بس اوعدنى انك مش هتزعل من سؤالى !

قال بلهفة : أوعدك .. إيه السؤال؟؟

-انت وسمية كنتوا متصاحبين بس ولا فى أكثر من كدا؟؟

قال بسرعة : والله العظيم كنا صحاب بس .. وعارف ان دى مش حاجه عدلة اصلا وان حرام عليا برضه حتى لو

مكنش فيه حاجه تانية بس .. بس انا تويت وربنا يسامحنى ويقبل تويتى

قالت مبتسمة : ان شاء الله يارامى

ثم أردفت بمرح : هى الخروجة دى اورديحي ولا إيه ؟

ضحك من تحولها وقال : مبتعملوش حاجه لله أبداً ! .. كلتى فى الفرح ولا نروح نتعشى؟؟

-لا ياخويا أنا عايزة درة مااليش فيه

-درة فييين هنا ياتقى؟؟

هز كتفيه قائلاً : المفروض اصلاً اشوفك قبل ما ألبس بس إنتي كنتي مكسوفة يعني وأنا محبتش أخرجك .. وبعد كتب الكتاب إنتي شوفتي الوضع .. كنا بننزل كل يوم تقريباً عشان نخلص الشقة .. ومكنش فيه وقت أجيلك البيت حتى .. واليوم الوحيد اللي اصطدتك فيه قولتلي " مشتااه بدبايس " (ختمها وقد جعل صوته رفيعاً)

ابتسمت من أسلوبه فأدرف : هترفعيه بقى ولا إيه ..؟..ايه الذل دا كل دا عشان اشوفك ! امال هتعملي فيا إيه عشان اقولك تعالى اسبح على ايدك

ابتسمت وهي تستر بنقابها الذي يحمي ضحكاتهما ويصون خجلها مرفوع الرأس .. كانت مستمتعة باحاديثه الكثيرة .. قال بنفاذ صبر : طب أشده يعني ..؟..وتطلى مشتااه بدبايس فتتعورى .. وتروحي لاخوكي تشتكيله وتقوليله الراجل ضربني من اول يوم و...

صاحت : ايبيبه !! انت بلعت راديو !

ضحك بشدة وهو يمسح حبيبات العرق عن جبينه فابتسمت وقالت : وأكبيد برضه مش هروح أشتكى لأخويا كدا من أول يوم

قال بمرح : هو هيبقى فاكر اصلاً إن عنده اخت .. اديله اسبوع على مايفتكرك

ضحكت بخفوت فقال : ايبيه يا حبيبة بقى مش كدا يا شيخة دا احنا عبرنا أسهل من كدا

ضحكت من أسلوبه وقالت بخفوت : طيب غمض عينك

اغلق عينيه بسرعة وقال : يلا بقى

ولته ظهرها وفكت دبائيس النقاب وخلعته هو والملحفة ووضعتهم على الكرسي وقالت بخفوت : خلصت

فتح عينيه ورأى وجهها الذي يزينه الخجل ناظراً للأرض أخذ للحظات يتأمله ثم أمسك خمارها القصير بيده قائلاً : طب وشعرك ملهوش نفس يتهوى

اضطربت نبضاتها من نزعها لخماتها .. ازدادت ابتسامته وهو ينظر لها .. أخذ يحدق بها متجاهلاً وجهها الذي تزداد حمرة بمرور الثواني ومتجاهلاً الخجل الذي يعتصرها .. لم تعد أن ينظر لها أحد هكذا أو يحدق بها بتلك الطريقة .. ابتعلت ريقها بصعوبة واستجمعت قواها وقالت بخفوت : خلاص يا حازم مش حكاية

وضع يده على ناصية رأسها وقال وهو ينظر إليها مبتسماً : (اللهم إني أسألك خيرها وخير ما جُبلت عليه وأعوذ بك من شرها وشر ما جُبلت عليه) .. الحمد لله على نعمة الحلال بجد إنتي ..

نظر إليه أخيراً وأزاحت يده برفق مقاطعةً إياه وعادت خطوة للخلف قائلةً : مش هتصلي بيا بقى ولا هتقضيها تسبيل ؟؟

ضحك قائلاً : تسبيل ..؟؟ يانهار ألوان دا انتي فصلتيني !!

هزت كتفها قائلةً : عاادي مانت برضه صدمتني وكل ما بتكلم معاك بتصدم أكثر فيك .. فين الخجل اللي كان فيك ؟؟

-اللي هنعیده هنزيده يا حبيبة ؟؟

ابتسمت وقالت : لا مش هنزيده .. بس انا بحب فيك اوووي حاجه كدا لازم أقولها لك عشان تجدد نيتك بقى وانت بتعملها

نظر لها باهتمام فأردفت : بسمعك بتقول لنور لما بتضطر تجيب سيرة هدير بتقوله زوجتك مش بتقوله حتى مراتك ولا هي باسمها ولا حتى مدام كذا .. وكنت بفرح أووي ايام الخطوبة لما كنت تقوله أختك برضه مش تقوله حبيبة .. ومكنتش بتقولني باسمي الا فين وفين يعني واحنا بتكلم ونور ويانا

ابتسمت وأردفت بسعادة : بحسك بتتكسف كدا يا حازم بجد حاجة حلوووة أووي

هز كتفيه قائلاً : عمري ما أخذت بالي منها بس بصراحة معرفش أقول غير كدا

تنهدت وقالت : ماشي يازمزم

أمسك يدها قائلاً : يلا ياباشا على الحمام بقى عشان نتوضي

-السلام عليكم ورحمة الله .. السلام عليكم ورحمة الله ..

انتظر الى أن سلمت ثم مد يده وأمسك يدها وأخذ يسبح على يدها قليلاً وهو ينظر لكفها المرتعش بين أصابعه
ببسمه .. رفع راسه ونظر لها باسمياً وقال : مبروك يا هدير

قالت بخجل : الله يبارك فيك

ربع قدميه وقال بمرح : خلاص بقيتي في بيتي وهاخذ بطاري خلاص منك

قالت بمرح : يا عم انت كل ماتشوفني تسمعي الكلمتين دول .. جدد بقى احنا في عصر التغيير

ضحك وقال وهو يضغط على يدها برفق : طيب ماتجدي انتي وتقولي حاجه جديدة زي اللي كتبيها في الورقه
نهضت وهي تقول باحراج : حبيبة وحشتني اوووي

نهض في قبالتها قائلاً : هنكذب من أولها؟؟.. كنتي لسه معاها من شوية صغيرين لحقت توحشك

هزت كتفيها قائلةً : قولتلك إني بحسها بنتي يانور ومش ببالح والله

قال ببسمه : طيب يا أم حبيبة

ضحكت بخفوت فقال بمرح : أنا جعان ياستي هدير .. العيال خلصوا الأكل في الفرح ومحدث عزم عليا بحاجه ..

اعمليل آكل واكسي فيا الثواب بقى عشان أعرف أحكيك كل الحواديت اللي بتتحكي

ضحكت بخفوت وقالت : حواديت إيه؟؟

لف كنفها بذراعه واتجه بها نحو المطبخ وهو يقول : الثلعب النكار مثلا والتكاتيك الصغيرين

دفعت يده عنها قائلةً بمرح : لاااا دانت العربي بتاعم عايزله عمره

قال بمرح : أmaal أنا متجاوزها بتاعت عربي ليه ؟؟ .. اعملى عمره ياستي زى مايعجبك .. بس اعمليلي اكل الاول ..

ان شاء الله ساندوتش حلاوة بالجبنه ؟؟

قالت بتعجب : حلاوة بالجبنه !!؟

لف كنفها مجدداً ودخل المطبخ وهو يقول : هعلمك بتعمليه إزاي عشان مبحبش آكل غيره

فتح الخبز ووضع بدخله قطعه جبن وعليها قطعه حلاوة صغيرة وقال بسعادة : تلالالا لا! بالهنا والشفا

-حرااام عليك انت عايز توجعلى بطنى !

ضحك قائلاً : على فكرة حلو .. انتى بس جربيه

-لا يااعم شكراً .. أنا هاكل جبنه لوحدها وحلاوة لوحدها .. متشكرين لاختراعاتك

وبعد عدة أيام

-السلام علييكم يا حبيبة عامله إيه وحشاني ؟

ردت فى الهاتف : وعليكم السلام يا دودى انتى اللى وحشاانى أكثر والله .. ماتشدي الرحال وتنطيلنا كدا

-مانتى عارفه انى بدأت دروس بقى عشان داخله ع المعركة

ضحكت حبيبة وقالت : معركة إيه يا بنتى !! متقعديش تقولى كدا عشان متخوفيش نفسك ع الفاضي .. أنا دخلت

صيدلية بأقل مجهود يُذكر الحمد لله

-كنتي بتدحي ارززاي بقى يا حبيبة هانم؟؟

ضحكت مرة أخرى وقالت : أوح...؟؟ بصي ياهدى انا طول عمري الحمد لله بيريح نفسي .. فى مواد نزلت فيها دروس ومواد لأ .. المواد اللي نزلت فيها تابعت مع المدرسين جداً وكنت بذاكر الدرس فى يومه بالواجب ب كله وبعدها بيومين اراجع عليه بسرعه واحل من كتاب خارجى .. كنا بناخذ مادة ادبيه فى العلمى زى الجولوجيا عندهم كذا ذاكرتها لوحدى والانجليزى صورت مذكرات مدرس بعد ما صحبتى استأذنته واشتغلت منها لوحدى .. المهم يعنى بما انك هتاخذى فى كل المواد فانتى تخلى كل مادة فى يوم ، الوحيدين اللي ممكن يتجمعوا اللغه الثانية والعربى .. بسس ! ويبقوا ورا بعض يعنى متطلعيش البيت وترجعى تنزلى تانى .. ويومك بيبدأ من بعد الفجر .. طبعاً انتى متعوده ع السهر حالياً.. تبدأى تبقى تنامى وتصحى بدري شويه كل يومين تقدمى نص ساعه لحد ماتوصلى لوقت الفجر وتبتي عليه .. بتصلى الفجر وتقرى قران او تقرى حاجه روحانيه او تقعدى فى البلكونة بالاسدال طبعاً تستغفرى او تقرى فيها وتشمى الهوا المنعش .. وتعملى شاي مثلاً وتشكفي لحد الشروق .. تمسكي بقى المذاكرة لحد قبل الظهر بساعه تصلى الضحى وتعملى اى حاجه فري كذا بس حلال يا اوختى لحد الظهر تصليه وتنامى ساعتين .. لما تصحى هيبقى كأنك لسه صاحيه فى يوم جديد.. انتى بقى تظبطى مواعيد دروسك بحيث انها متضيعلكيش فرض فى النص .. وبرضه متقسملكيش اليوم .. يعنى لو فى معادين اختارى البدرى احسنلك عشان كمان يبقى قبل الحر .. وممكن تنزلى متوضيه وتصلى فى السنتر بس فى مكان فاضى يعنى مينفعش تصلي قدام الرجاله .. سيك من جو انك تذاكرى من خمستاشر مذكرة دا .. روحى عند مدرس كويس وذاكرى اللي بتاخذيه عنده بضمير وحلى من اول يوم فى كتب خارجيه لو حسيتى ان فى حاجات كثير مش بيقولها وبتقف قصادك .. لا دا يتغير .. وتروحي عند اللي بيشد ع الواجب وامتحانات عالية كل حصه .. مش اى امتحان يعنى .. ظبطى مذاكرتك من اول يوم هتتظبط لآخر يوم ان شاء الله

أخذت نفساً ثم قالت : انتى نمتى ولا إيه؟؟

-لالا بس بسجل اللي قولتى عليه

-طيب يا اوختى .. هاهah

تركت السماعه وهرولت نحو المطبخ وعادت بعد اللحظات وأمسكت السماعه وقالت بخيبة أمل : لزق !

ضحك هدى وقالت : تعيشوا وتاكلوا غيروا معلش يا حبيبة

-اللى غايظني بجد انى بقالى سنين بعملى الاكل انا واخويا وزى الفل .. من ساعه ما اتجوزت اخوكى وانا بأكله أصنااف عجيبة الشكل واللون والتطبيق .. انبارح الكنتفة فكت من بعضها روحت عملتها بالبيض والفيجتار وحمرتها زى البانيه والمكرونه لزقت وعجنت فروحت أنقذت مايمكن انقاذه وحتيت عليها مسطرده وقولته دى اكله جديدة .. اختراع يعنى .. ومكنتش بكذب مش انا اللى اخترعتها فى المطبخ؟؟..طبعاً هو بقى ياكل ويبتسملى ياكل ويبتسملى وباخد الميا ويبلع وفى الاخر قالى تسلم ايديك يا حيايتى

انفجرت هدى ضاحكة وقالت : طيب وهتعلمى إيه ف الرز اللى لزق دا ؟

قالت بمرح : هناكل الخضار بالعيش هنعمل إيه يعنى .. ومش هرمي الرز هطلع السليم واسويه واشيله فى التلاجه وابقى اعمل بيه كشك يوم مانبقى نعمل كوكو .. أهم حاجه مفيش حاجه تترمى عشان حرام .. واللى يفيض دا ان فاض يعنى يُعاد استخدامه بطريقه كويسه

-طيب يا حبيبة هنبقى نستفيد من خبراتك بس فى المستقبل ان شاء الله .. دلوقتى انا كنت عايزة اسألك على حاجه بس مكسوفة شوية

قالت بمرح: تتكسفي منى انا .. دا انا حبيبة يعنى حدّث ولا حرج

قالت باحراج : هو انتى اخدتى معاكى حاجاتك من بيتك ولا سيبتها هناك؟؟

لم تفهم حبيبة قصدها ولكنها قالت : لا مسبتش حاجه فى البيت هسيبهم فين يعنى ونور وهدير هناك

قالت باحراج : كنتى عرضتى عليا من فترة جيبتين كنتى لقيتهم فى حجراتك وانتى بتتبطيهم موجودين من ايام ماكنتى بتلبسي جيبات وكانوا مستخبيين فمطلعتيهمش فافكرة؟؟

قالت بتدراك: آه طبعاً فافكرة .. بس لما انتى مأخذتيهمش أنا إديتهم لصاحبه النصيب فيهم معلش والله ياهدى مكنتش عارفه انك ممكن تحتاجهم

-للالالالا انا مش قصدي عليهم هما .. فى نفس اليوم دا قولتيلي انك عندك طرح طويلة ..

قطعت كلامها فأدرفت حبيبة ببسمة : آه قولتلك عندى طرح طويلة شوية وخمارات مرضيتش أطلعهم مع الباقي
عشان شيلاهملك .. وساعتها اتريقتى وقولتيلي انا إيه اللي هيلبسني الهلاهيل دي

ضحكت باحراج فأدرفت حبيبة بمكر وهى ترفع حاجيها : إيه اللي هيلبسك الهلاهيل ياشابة

ضحكت بخفوت وقالت : مسمهاش هلاهيل اسمه حجاب صح يرضي ربنا .. وبعدين بقى مش دا كلامك

ضحكت حبيبة وقالت : أينعم

-خلااص يبقى تجيهملي وانتى ساكنة .. عالم غريبة وربنا .. بس انا خايفة مكونش قدهم بصراحة

-قدهم ايبسيبيبييه هو بالمقاس .. يابنتى طالما ربنا فتح قلبك للحجاب الشرعى يبقى اتكلى على الله وعمرك
ماهترجى لورا لان هدفك رضا ربنا ويس .. ويجد ياهدى البسي الخمار يريبكي .. زي ربيها تربيك على اللحية ...
الخمار والنقاب بيربوا بجد .. هتلاقى نفسك بتقولى مينفعش ابقى لابسه خمار واعمل كدا !! انا كدا هسوء صورته
او هنفر الناس منه .. فواحدة واحدة أخطااء كثير فى حياتك هتستظبط بعون الله .. ويجد ياهدى فرحتيني
اووووووووووى ربنا يثبتك ويرزقك عفة وتبقى هدى اسم على مسمى ويرزقك النقاب وفرحة النقاب وعفة النقاب
وتبقى مسلمة جميلة فعالة كدهون وزى العسل

قالت بتلحين : على قلبي هواه

-مين دا؟؟

-أغنيه كدهون بتقول زى العسل على قلبي هواه

شهقت قالت : مين دا ياااابت !! عايزة أخوكى يسمعنى ويقول بيوظ أخلاق البت .. مش قولتيلي بطلتى؟؟

-اه بس فى حاجات فكرررها وبدننها غصب عنى بقى مش عارفه انساها

-هتتسيها ياختى لما تبطلى تدندنيها .. اقللى بقى خليني ارووح اشوف ورايا ايبسيه

بعد أربعة سنوات

جذب يده بقوة من يد صديقه الذى يجذبه بقوة وقال به بحدة : ينفع بقى تبطل تسحبنى وتقولى انت واخذني كدا على فين !!

توقف الشاب ونظر للمتحدث وقال بنفاذ صبر : كل شوية هقولك ؟؟.. مش احنا اتبيلنا انهاردة وأخييرا خلصنا الكلية ؟؟.. وانا وعدتك بخروجة حلوة !

-مااشي دى فاهمها.. احنا إيه اللي جايبنا عند كلية اسنان ؟؟

قال بمكر : خليك فهييم كدا ياعم يوسف ..

نظر له وقال : مش فاهم !

-مش قولتلك خروجة حلوة ؟؟..يبقى لازم يكون فيها حاجه حلوة !

اتسعت عينا يوسف وقد بدأ يفهم فقال صديقه بمرح : متبرقليش كدا ياعم انت عارف انى بخاف .. (ثم ضحك مع نفسه وأردف) : اتكسفت تخرج معايا لوحدها وجابت صحبتها فانا لازم ابقى ناصح وأجيب صحبي .. ولا ابيه ؟؟

عاد يوسف خطوة للخلف وقال باستنكار: وانت ازاي تجيبنى معاك !! انت مفكر انى هوافق اصلا على المهزلة دى

-مهزلة مين ياعم انت جاااى من ايام البشوات ولا إيه !! ... هو انا قولتلك هناكلهم .. هنقعدها سوا ع البحر بس فى اى كافيته ومش هنتأخر

تصاعدت الحمم فى عيني يوسف وقال لصاحبه وهو يكظم غيظه بأعجوبة :بص !! عشان منحسركش !! انا ماشي ومتحاولش تمنعنى !!

قالها وانصرف وهو يدب الارض بغضب ولم يلاحظ تلك التى كانت خلفه تماماً تمر هى وصديقتها ويحملان بعض الاجسام المركبة التى أطاحها أرضاً هى ومن تمسك بهم !!

تسمر فى مكانه وهو يحرق بها وقد أسقطها ولا يدري مايفعل بينما تسلل صاحبه وانصرف بعيداً من المشكلة .. وضعت صديقتها ماكانت تحمله أرضاً وساعدتها على النهوض وهى تتوجع بصوت خفيض لا يكاد يصل إليه .. عاد خطوة للخلف وقال بسرعة : أنا آسف جداً والله مكنتش شايفك خالص !!

كانت صاحبته تجمع بقايا المجسم الذي تهشم على الأرض وهى تقول بغضب: تعمل إيه هى بأسفك يعنى !!.. انت بوظلتها شغل شهور وكانت طالعة تمتحن عليه دلوقتى !! حسبي الله ونعم الوكيل مش تفتح

-والله العظيم آسف وبجد مكنتش شايفها و..

قاطعته بحدّة : هتعمل إيه بأسفك برضه هتطلع تمتحن عليه !!

جذبتها من يدها وقالت بخفوت : بطلى خناق وامشي من هنا !!

قالتها وجذبتها من يده ليغادرا ويوسف تتبعهما بعينيه للحظات آسفاً على ما حدث ولكن سرعان ما غض بصره وسار فى طريقه وقال وهو يحدث نفسه بحزن : لاحول ولا قوة الا بالله .. ربنا يسهلها فى امتحانها يارب

نظرت لصديقتها وقالت بألم : دراعى واجعنى أووى .. معكيش اى مسكن على ما أروح ؟؟

-لا والله ممعيش .. طيب هتمتحنى ازاي بالمجسم اللى اتكسر دا ودراعك اللى واجعك دا !!

قالت وهى تكاد تبكي : والله معرفش ! .. أنا حاسة إن إيدي واقفة أصلاً مش قادرة أحركها

قالت بانفعال : كنتي سييتينى أهزقه كان ع الاقل هيفتح بعد كدا !!

-هو مكنتش شايفنى اصلا هو لف بخطوة سريعة فطيرنى !!

قالت بامتنان : انا متشكرة اوووى لحضرتك.. بجد مش عارفه اقولك إيه

-متقوليش حاجه انتوا كلكم بناتي

-بس بجد مفيش حد بيعمل اللي حضرتك بتعمله معانا دا ربنا يباركلك بجد ويجعله فى ميزان حسناتك .. بجد حضرتك أثبتيلي ان الانسان ممكن ينفع غيره من أى مكان هو فيه .. الكلام دا نفسي اقولوا لحضرتك من اول يوم دخلتيلنا بس مجتش فرصة بقى غير دلوقتى .. بجد ربنا يباركلك

ابتسمت وقالت : ربنا يباركلك انتى كمان وتكونى قدى المسؤولية اللى انتى فيها .. انتى مسلمة وهتبقى طيبة ومنتقبة كمان .. لازم تكونى قد المسؤولية دى

قالت بحماس : ربنا يعينى بجد وابقى قدها .. أنا متشكرة اووى لحضرتك .. عن اذنك

كان ممدأ على الأرض ويضع ساقاً فوق الأخرى بحيث يستند بمؤخرة كعبه على ركبته .. وفارداً ذراعيه كأنه سيطير بهمها .. وينام على كل ذراع طفلين يضع كل منهما ساقاً على الأخرى كوالده .. ثلاثة أولاد وفتاة خميرة البشرية ذات عيون بنية وشعر أسود .. أما الاولاد فهم نسخة مصغرة منه.. قال أحدهم بحماس : يلا يابابا احكى الحدوته بقى

-منا لسه مخلصها يابنى

قال بحماس : لا هبة الله مسمعتهاش كويس صح ياهبه؟؟

ردت الصغيرة التى يكبرها بسنة واحدة واشهر قلائل : لا سمحتها كويس .. أنا حاااوزة أنية (أغنية)

قال نور بمرح : هى وصلت لأنية!!..(ثم نظر للطفل على يساره وقال بمرح) : وانت يا حازم ملكش نفس فى حاجه ؟

قال بتكاسل : لا ياوالدى .. كويس

ضحك نور وقال فى نفسه (حتى مكسل تكمل الجملة) ونظر للطفل الرابع وقال : وانت ياأحمد؟؟

-عايز حدوتة حووة يابابا

قال ببسمة : خلاص نقول حدوتة تانية بس نستنى ماما عشان تسمعها معنا..عايزين حدوتة عن سيدنا محمد الجميل وأحكليكم موقف حلو من الكتاب بتاعنا عشان نعمل زيه انا وانتوا ولا عايزين حدوتة عن حد من أصحابه الحلويين ولا عايزين حدوتة عن إيه ؟

اختلفوا فى البداية واجتمعوا فى النهاية على انهم يريدون قصة عن اشرف الخلق عليه الصلاة والسلام .. فقد كان نور يرويهام لهم بطريقة مسلية وجذابة جداً ومشوقة .. وكان لا يستطيعون الصبر ليعرفوا الاحداث ، وكان نور يأخذ عهداً معهم على أن يطبقوا ماتعلموه فى هذه القصة لمدة أسبوع ويشارك معهم هو وهدير ويكافئ أحسنهم فى التطبيق بهدية بسيطة أو حلوى

دخلت هدير الغرفة وهى تحمل طبق فيه سندوتشات وقالت : يلا السندوووووتشات

ضحك الاطفال واعتدل نور فى جلسته على الأرض وجلست هدير برفقتهم وكونوا دائرة على الأرض

مد الأطفال يدهم وتناول كل منهم واحداً وقبل أن يقطم أحدهم صاح نور : ميبين قال بسم الله الرحمن الرحيم
؟؟؟؟

صاح أحمد بسعادة بالغة : أنا قولت أنا قولت

نظر نور لهدير وقال ببسمة : فىن الهدية اللى اتفقنا عليها؟؟

أخرجت من جيبتها قطعه شيكولاته صغيرة مغلفه وناولتها لطفلها قائلةً ببسمة : اللى بيسمي ربنا قبل ما ياكل بياكل لوحده يا أحمد ..انما اللى بينسى الشيطان بياكل معاه والاكل بيخلص وهو لسة جعان

مسحت العرق من على جبينها وتنهدت قائلةً : هه أخيراً خلصناً !

قال رامى بمرح: محسسانى إنك كنتى بتبنى عمارة .. دا انا اللى معلق معظمهم !

رفعت حاجبها فأدرف بتواضع مصطنع : وأعوذ بالله طبعاً من كلمة أنا

ضحكت قائلةً : ياواد يامؤمن !

هرول ناحيتهما من غرفته قائلاً : نعم ياماما

انفجرا ضاحكين فقال رامى : لا يا حبيبي ماما مش بتندهلك .. عملت إيه فى البازل ؟

مط شفتيه قائلاً : ربما صعبة شوية لكنها كويسة عن ذا اولد (the old)

أمسك نفسه بأعجوبة هو وتقى كي لا يضحكا ومسح على رأسه قائلاً : طيب يا حبيبي روح كملها بقى

دخل غرفتها فنظر لتقى التى انفجرت ضاحكةً فقال : أنا قولتلهم من الأول العربى والانجليزى لا يجتمعان فى هاوس

واحد ونو بدى صدقنى !

ضحكت مرة أخرى ثم قالت : بيسمعنا واحنا بنتكلم وبيلقط كلامنا ويركبه على بعض ماشاء الله عليه.. مستوى

ذكائه عالي

-اه ما هو القرد فى عين أمه غزال زى مايقولوا

قالت بعتاب : مش اتفقنا هنبطل الاسلوب السلبي والتريفة دى .. عايزين نبقى ناس ايجابيين علطول ومش عايزينه

أبدأ يسمع مننا تريفة عليه .. (ثم رفعت حاجبها وقالت) : ولا انت بقى غيران منه ؟

-ميسيين؟؟.. أنا أغير من الواد ابن سبعة دا؟؟.. دا حتى مفيش وجهه مقارنةً

ضحكت فأدرف بأعجاب مصطنع : بس برضه منكش انه واخذ من أبوه حاجات حلوة كتيرة .. راجل من دهر راجل

قالت بحب : طبعاً يا حبيبي يعني هو هيجيب الجمال دا كله منين أكيبيد من أبوه هيكون من مامته مثلاً !
وكأى رجل عربي مصري أصيل .. مهما كبر أو صغر.. مهما كان مستوى تعليمه وحتى مستوى قربه من الله ..
فبكلمة مدح واحدة يمكن أن تطيب بخاطره وتربحي قلبه وأحياناً .. جيبه !!

مسح على شعرها بحنان وقال برقة : أي حاجة حلوة في حياتي ربنا سحرك عشان تكوني سبب فيها يا حبيبي
ثم اقترب منها ليضمها اليه فسددت لكمة خفيفة لكتفه حالت دون وصوله اليها قائلةً : لسه مخلصناش شغلنا ياعم
.. مش هتنازل عن تعليق آخر ورقة برا ع الباب عشان واحنا داخلين مننساش أبداً نقول دعاء دخول المنزل
وكذب من قال ((البت زي الولد)) فالمرأة لم تنهيا عن رأيها بكلمة حانية أو ضمة أو غيرها ..

أمسك كتفه وقال : بتديني بالبوكس ياتقى؟؟..أنده لمؤمن يجي يتفرج على مامته وهي بتضرب أبوه .. منا اللي ساكتلك من أولها لحد وصلت للضرب

قالت وهي تضحك : متحاولش معايا يارامي ومتغيرش الموضوع .. هتتعلق يعني هتتعلق .. ويلا خد نية أن ممكن حد يشوفها ويعمل زينا وهتاخذ ثوابه دا كمان

جلس وجلست في قبالته وقال بتفكير : طيب جوا بيتنا أنا حر فيه .. يعني قولتيلي نعلق ورق الاذكار على باب الشقة وواحد على المراية بذكر اللبس وواحد على الحيطه اللي في وش الحمام وعلى بابه .. وكذا واحدة على شباك السرير .. مش كفاية كذا؟؟..لازم اللي هتتسطح ع الباب من برا؟؟

قالت بحماس : ايون طبعاً عشان مننساش ... شوف بقالنا كام سنة متجوزين ومع ذلك بننسى ساعات واحنا جاينين تعبانين من برا نقول الدعاء ونذكر ربنا .. وبعدين احنا عملنا الورق قد الكف وبأشكال ملفتة كذا تجذب العين ولونها من برا عشان تبقى حلوة فمؤمن يبدأ يسألنا إيه دا فعلمه الاذكار اللي بتحفظه من دلوقتي .. انا قلبي حاسس

انه هيبقى متميز ان شاء الله .. فانا نفسي بجد نطلعه متميز فى دينه قبل أى حاجه .. ودا هيبكون عونته وسنده انه
ينجح ديماً .. مش عيزاه يطلع زينا فى الاول يارامى

ثم وضعت يدها على كتفه ومالت قليلاً على أذنه وقالت : وافق بقى يارامى وعلقها براا

ابتسمت وقال : هعلقها حاضر لعل دى اللي تدخلنا الجنه

صفقت بيدها وقالت بسعادة : أيوون بقى هو دا رامى حبيبي اللي يفكر للآخرة مش للدنيا

ضمها إليه وقال : بحبك ياتقى

قالت بفرحة : وأنا كمان بحبك أووى يارامى ..

قال بمرح : طبعاً عشان عملت اللي انتى عيزاااه .. افتكريها بس عشان لما أجبلك فكرة مجنونة وأدخلك معايا
متقوليش لأ

قالت بدلال : هو إنت حد يقدر يقولك لأ .. ياسي السيد

ضحك وهو يتجه نحو الباب قائلاً : ايوا كدا يأمينه أحبك وإنتى مطيعه

علقها بالخارج ثم عاد ويبدو على وجهه التفكير نظرت له بتفحص وقالت : مالك؟؟

-بفكر فى حاجه كدا

قالت باهتمام : إيه؟؟

قال بجدية : أنا مش عايز مؤمن يتفرج على أفلام خالص .. لاقديم ولا جديد ولا عربي ولا أجنبي ولا حلو ولا
وحش

نظرت باهتمام أكبر فأدرف : يعنى ساعات لما بتبقى واقفة فى المطبخ وانا بكسل أقعد مع مؤمن فبشغله التلفزيون
اللى فى أوضته واقعد انا فى اوضتى اشوف شغلى او أقرأ وكدا .. مش عايز أعمل كدا تانى ... يعنى احنا بنشغله

هز رأسه قائلاً : بس الحمل دا بتاع ربنا يعنى حاجه فى ايد ربنا

قالت بسرعة : طاب ماشغلك والقبش وكل دا بتاع ربنا

-عارف والله بس لازم ناخذ بالاسباب .. يعنى فى مكافئة المفروض تتصرفلنا من ست شهور ومتأخرة واحنا ساكتين !! والمرتب المفروض كان ينزل من عشر ايام .. يعنى انا لو مكنتش بحوش من قبل كدا كان زمانى بشحت .. ومش عارف كمان شهري هتولدى ازاي ..

زفر بضيق فقالت بخفوت : استغفر ربنا يا حازم ربك قادر يحلها .. لازم تاخذ بالاسباب طبعاً بس لازم برضه متسبش نفسك للحزن دا .. وبعدين ان كان عليا فأنا هولد كدهووو !

رمقها بنظرة جانبية وقال رافعاً حاجبه : كدهوو ازاي؟؟

خبطت على بطنها بخفة مرتين ودون أن تلفت الانتباه قائلة : تيك تيك يلا يعادل

ابتسم رغمًا عنه وحاول أن يخفيها فقالت بسرعة : لااا ياعم أنا شوفتها خلاص متحاولش تخبيها .. ضحكتك حلوة يا حازم وربنا

ابتسم وقال بخفوت : ضحكتى بس؟؟

قالت بخفوت هي الاخرى : وصوتك كمان حلو

ابتسم قائلاً : طيب هعديها لك المرادى عشان بس فى الشارع انما لو كنا فى البيت مكنتش سكتت غير لما آخذ منك نموذج الاجابة

ابتسمت بخجل ثم قالت : ثبت بقى الابتسامه دى لحد مانروح لمامتك وهدى عشان حماتى متفتكرنيش لسه بطبخ وحش فدا منكد عليك

قال ضاحكاً : لا يا حبيبتى هي متأكدة

قالت بمرح دون أن ترفع صوتها : طاباب أنا ذنبي إيه بقى ان جوزي تونة ويفتن عليا ! ..

دلف أحمد بيته وعلى على وجهه إمارات الوهن قليلاً .. أغلق الباب وقال بصوت مرتفع قليلاً : أميرة حبيبتى أنا
جيت

جاء يتحرك ولكنه أحس فجأة أن الأرض تتحرك من تحته فأغمض عينيه واستند بيده على الباب وهو يشعر بدوار
رهيب يجتاح رأسه

هرولت نحوه زوجته وأسندته صائحةً بفرح : أحمد !!!!!!!!!!!!!!! إنت كويس !!

أسندته حتى أجلسته على أقرب كرسي وهرولت إلى المطبخ وأحضرت له كوب ماء بارد بالسكر وقلبتة فى طريق
عودتها إليه وناولته إياه وهى تسمى الله

ارتشف منه عدة رشقات ثم ناولها إياه قائلاً وهو يحاول الابتسام : خلاص بقيت كويس متقلقيش

جثت على الأرض بركبتها ومدت يدها إلى وجهه تمسح عنه حبيبات العرق وأخذت تمسح على رأسه بسرعة وهى
تقرأ بعض الآيات وهى تكاد تبكى

أمسكها من رسيها قائلاً : والله بقيت كويس متقلقيش أنا بس دخت من الحر

نهضت وبدأت تخلع عنه قميصه دون تفاهم أو كلام حتى وأخذته قسراً إلى الحمام وبدأت تغسل له وجهه بالماء
البارد وهى تسمى الله بقلبيها وتدعوه أن يحفظه لها .. أمسكت المنشفة فتناولها عنها قائلاً بمرح واهن : دى انا
هعرف أعلمها يا أبله أميرة

ابتسمت بقلق ومسح وجهه وشعره وجففهما من الماء وخرج معها إلى غرفته حيث أجلسته على الفراش وانحنت
لتخلع عنه شرابه فأمسكها من كتفيها ورفعها عن الأرض قائلاً بجديّة نظراً بعمق لعينيها : والله العظيم بقيت كويس !

كانت الدموع قد فرت من عينيها حين صوب عينيه إليها فقالت بصوت مرتجف : أنا خائفة عليك يا أحمد أنا ماليش غيرك

ضمها إلى صدره قائلاً : ربنا يديمك نعمة في حياتي وسندي ديماً يا أميرة (ثم أردف بمرح) : ومتجيش في يوم تقولي إنت تقيل مش قادرة أسندك

قالت بعتاب : أنا هفضل أسندك طول عمري يا أحمد وإن أطول هحطك في عيني

قال بمرح : هعيالك كل يوم مخصوص ياستى عشان أسمع شوية الرومانسية دول

ضربته على كتفه بخفة قائلة : ربنا يبعد عنك الشر يا أحمد ويخليك ليا

قال بحنان : مش دى الدعوة بتاعتنا يا أميرة .. ربنا يجمعنا في الجنة زي ماجمعنا في الدنيا

قالت بلهفة : اللهم آميين يا احمد .. عارف أول حاجه هطلبها من ربنا إيه في الجنة؟؟

نظر لها ببسمة فقالت : دا حسن ظن بالله مش أكثر .. هطلب منه يبقى عندنا 39 عيل

ضحك قائلاً : اشمعنى 39؟؟

-عشان سميت 39 اسم لاولادنا اللي مجوش .. مع كل اختبار حمل بيطلع سالب كنت بسمي اسم

ضمها اليه مجدداً ومسح تلك الدمعة التي فرت من عينيها قائلاً : احتسبها عند ربنا يا أميرة

-والله يا أحمد مش معترضة بس نفسي بس ..

قطعت جملتها وانخرطت في البكاء .. طالت ضمته إياها .. مكثت عدة دقائق تبكي بين ذراعيه وهو يستغفر في

اذنها بهمس .. كان يستغفر ببطء .. يعطى كل كلمة حقها ووقتها لتخترق حُجب قلبها .. مرت عدة دقائق وهما

في هذه الحالة ولكنه فجأة ابتعد عنها ونهض جاذباً إياها تجاه الحمام قائلاً : بقالنا يومين مصلينااش سوا .. يلا بينا

نصلي

وبعد دقائق قليلة كانا واقفين للصلاة وهو يتقدمها .. بدأ يرتل بصوت خاشع آيات من سورة التوبة وصولاً إلى الآية الكريمة

وَالسَّابِقُونَ الْأَوَّلُونَ مِنَ الْمُهَاجِرِينَ وَالْأَنْصَارِ وَالَّذِينَ اتَّبَعُوهُمْ بِإِحْسَانٍ رَضِيَ اللَّهُ عَنْهُمْ وَرَضُوا عَنْهُ وَأَعَدَّ لَهُمْ جَنَّاتٍ تَجْرِي تَحْتِهَا الْأَنْهَارُ خَالِدِينَ فِيهَا أَبَدًا ۖ ذَلِكَ الْفَوْزُ الْعَظِيمُ (100)

وكررها عدة مرات وفي الركعة التالية لم يصلي إلا بها .. هي وحسب ! .. وكان حين يصل إلى رضي الله عنهم ورضوا عنه يطيل ويخشع قلبه قبل صوته .. كررها عدة مرات ثم ركع وسجد وهي خلفه وأنهى الصلاة وتناول يدها وأخذ يسبح عليها ويستغفر .. مالت برأسها على كتفه وهو يستغفر على كفها ثم قالت بصوت خافت قطع استغفاره : رضيت بالله رباً وبالاسلام ديناً وبمحمدأ صلّ الله عليه وسلم نبياً ورسولاً ..

قالتها فابتسم لأنها قد فهمته دون أن ينطق ببيت شفه .. فالتواصل طرق كثيرة .. من ظن أن الكلام هو طريقة التواصل الوحيدة فقد جهل معنى التواصل من الأساس .. التواصل اتصال روحي .. يدفغان بعضهما بعضاً للأمام ويشدان أزر بعضهما ليصلا لهدف مشترك .. هدف وحيد !! .. الجنة .. ذاك الهدف الذي تعاهدا عليه وتقاسما فيه المهمات .. وتبادلا الوعود بعدم الترك .. عدم الخذلان .. عدم الافتراق .. الا للجنة ! .. كلّ منا سيرزقه الله بمن يشد بأزره ويأخذ بيده ويدفعه للأمام وسيكون هو ايضاً في يوم دافعاً للامام .. ستكملان نقص بعضكما لتصلا للكمال البشري .. لستما شخصين .. إنما قلب واحد معلق بين جسدين أحدهما يقول للآخر .. أنا إنتِ !

فتح باب شفته ودلف منها .. ابتسم حين رأى منار نائمة على الأريكة وهي محتضنة ابنتهما الوحيدة .. اقترب منهما وهو ينظر لهما في حنان .. ولكن وجه منار كان يتصبب عرقاً وتبدو كما لو كانت تحلم بكابوس .. هزها من كتفها برفق عدة مرات حتى انتفضت صائحة : مريم !

ربت على كتفها قائلاً : متخافيش يامنار .. متخافيش يا حبيبتى دا كان كابوس استعيذي بالله من الشيطان الرجيم

قالت خلفه وهي تبكي : أعوذ بالله من الشيطان الرجيم .. أعوذ بالله من الشيطان الرجيم

تناول الطفلة من بين يديها وقال : الحمد لله إنها مصحيتش مفزوعه.. انا هدخلها وأجيلك ..

اتجه نحو غرفتهم ووضع الطفلة في فراشها وعاد لمنازلتي كانت تضم ساقها الى صدرها .. جلس الى جوارها ومسح على رأسها بحنان وقال : بقيتي كويسة؟؟

هزت رأسها وقالت بفتور : الحمد لله يا عمر

-بصي يامنار .. انا مش هقولك إنسيها بس هي في مكان أحسن من هنا بكثير أوى .. كنتي عيضاها تعيش بتخلف طول عمرها؟؟

نظرت له بغضب قائلةً : بس متقولش تخلف .. هي مش ذنبها في حاجه احنا اللي غلطنا فيها !!

نظر لها باهتمام فأدرفت : كل القرايب اللي بيتجوزوا بيحصل لاولادهم مشاكل .. واحنا برضه مفكرناش غير في نفسنا واتجوزنا

-بس يامنار في قرايب كثير اتجوزوا ومحصلش مشاكل .. احنا مكتوبلنا كدا .. الحمد لله على كل حال صح ولا إيه؟؟

انتهت بسرعة لما كانت تقول فأخذت تستغفر كثيراً فقال عمر ببسمة حانية : ساعات بنبقى محتاجين بس اللي يفوقنا او يشدنا تاني .. وانا في الخدمة علطول ياستي اول ماتحسي بأعراض تراجع انهديلي وانا هعالجلك الموضوع علطول

قالت ببسمة : هتعملي فيها دكتور بقي واعالجلك وبتاع

ضحك قائلاً : أمال أنا سفرجي سيادتك يعني ؟

ضحكت ثم قالت بجدية : بقولك إيه يا عمر في حاجه كدا لاحظتها في مرام عايزة اقولك عليها

هز رأسه قائلاً : عارف هتقوليلي إيه ودا انا واخذ بالي منه من فترة ان انتباهها ضعيف شوية .. انا بيديا تركس (طبيب أطفال) وربنا .. سألت فى الحضانة اللي قريبة من هنا قالوا هيبتدوا من اول الشهر الجاى .. بس انا حاسسها صغيرة اووى على الحضانة يامنار

قالت باهتمام : طيب نعمل إيه؟؟..ماهى لازم تقعد مع عيال عشان تفك شوية وتبدأ تتفاعل شوية

-مش انتى صاحبتك ماشاء الله لاقوة الا بالله عندها اربع اولاد؟

-اه تلت ولاد و بنت ماشاء الله

-طيب ماتطلبي تخلى مرام تقعد معاها .. يعنى تشوف مين أشقى حد فى عيالها وبقى نستلفه ساعتين كل يوم يقعد شوية مع مرام

-هتكسف أقولها بصراحة يا عمر اقولها كدا مرة واحدة ..

-خلاص يا ستى خديها معاكى الدار لما تعرفى انها هتجيب بنتها هى كمان وبقى قوليلها ساعتها

-طيب يا عمر ربنا يسهل ان شاء الله .. بس لو مجابتش بنتها قريب هبقى اقولها وامري لله بقى عشان بجد مش هسيب بنتى حالها يتدهور

-ايون كدا اتحمسي ومنتكسفيش مش هى صحبتك من زمان؟؟

-اه .. دى هى اللي كانت بتضغط عليا زمان عشان أبعد عنك وأبطل أكلمك

قال براحة : اللهم لك الحمد .. بجد هفضل طول عمري أحمد ربنا عشان إنتى قفلتى الباب فى وشي وبعدتى عنى زمان .. مكنتش عمري هتغير كدا .. الحمد لله .. الحمد لله

أكملت على حديثه : وربنا مكنش هيجمعنا فى الحلال مع بعضنا

-أو كان ممكن يجمعنا بس ينزع البركة من حياتنا .. وبصراحة انتى لما تديننى الحمد لله اتغيرت فيكي حاجات كثير مظنش انى كنت هقدر اعيش معاها والعكس طبعاً صحيح .. يعنى بجد انا مكنتش اتطابق زمان

هزت رأسها وقالت باهتمام : تفتكر احنا لو كنا قولنا هنتوب لما نكبر او قبل مانتجوز علطول كان زمننا عايشين الحمد لله كدا؟؟

-الله أعلم طبعاً بس مفتكرش .. أصل ربنا مش بيضحك عليه يامنار .. يعني أنا أفضل أعمل الحرام ولما أعوز ربنا يحقلى الحلال أقول هبقى اتوب ! .. أصلاً اصلاً الذنب كل مدى ييطبع على القلب لحد مايبقى زى صدى أو قفل .. فلما حاجى اتوب بعد عمر طويل مش هعرف اتوب ! يعني احنا اتكلمنا كام شهر كدا ومكنتش بقدر افوت يوم من غير مانتكلم .. طب تخيلي لو كان الكلام دا استمر ست سبع سنين .. كنت هبقى متعلق بيكي قد إيه؟؟..مكنتش عمرى هقدر أبعد عنك حتى لو ابييه كان هيحصل ! مكنتش هقدر ابدأ اسيب الحرام .. دا غير اننا كنا هنتخايق طبعاً .. مفيش بركة !! .. وكنا هنفضل قلقانين من بعض .. مش واثقين فى حبنا لبعض ! .. وبعدين كمان الحمد لله انا كنت بحبك فعلاً عشان كدا بعد ما بعدتى عنى بكام شهر حسيت ان فعلاً حبي ليكي هيكون بحفاظي عليكى مش بكلامنا ع الفيس انى ابقى برضى رجولتى وخلص ! .. بجد ربنا يكون فى عون البنات بجد اللى موهومة بحب الفيس او الموبيل دا !يعنى بالعقل كدا فى حد هيحبك من بروفائلك؟؟..يعنى لو لقي واحدة عندها نفس بوستاتك إيه المانع يحبها هي كمان ! .. مش عارفه ان الولد بيبقى بيرضى رجولته وبرستيجه قدام صحابه انه بيكلم فلانه وفلان وفلان ! او بيبقى ييملى فراغ فى حياته ! .. او نقص عنده !

نظرت له نظرة اعجاب وقالت بحب : اللهم لك الحمد .. ربنا يديمك نعمة فى حياتى يا عمر وبرزقنا الجنة سوا .. بس لو ملقتنيش هناك تسأل عليا بقى ها؟؟..مش تروح للحوار العين وتنسانى

لفها بذراعيه قائلاً : هو انا اقدر انساكي دا انتى حبي يا حبي .. وبعدين احنا هنغير من دلوقتى مش لما ندخل الجنة الاول

قالت بحماس : إن شاء الله هندخلها .. ثقة فى الله بقى

ضمها اليه قائلاً : ياوادي كونيدينت (واثق من نفسه) انت !

- كنت ماشية فى أمان الله وبعدين هوبا سوبلكس .. تى دى تى وبقيت ع الأرض (قالتها هدى بأسلوبها المرح وهى تجلس على المائدة مع حازم وحببية ووالدتها)

ضحكت والدتها وحببية من أسلوبها بينما امتعض وجه حازم وقال بضيق : مش فاهم إيه اللي يضحك يعنى ! واحد وقعك على الأرض وكان ممكن لا قدر الله وشك ينكشف او العباية تترفع ! وبعدين هو خبطته ليكي لدرجة توقعك دى فيها احراج ليكي !

بدأت تضحك فزاد غضب حازم فقالت حببية محاولةً تهدئة الموقف : أكيد يا حازم هى بتضحك عشان تخف الهم من عليها ! أكيد اتصدمت الصبح واعصابها باظت لما المجسم بتاعها اتكسر .. لازم تضحك عشان تفك شوية

قالت هدى وهى تلتقط أنفاسها بصعوبة من شدة الضحك : ومش هتنازل غير لما يصلح هولى

نظروا لها جميعاً بأعين متسعة فقالت وهى تضحك : ايوا اللي طيرنى دا يوسف جوزى

انفجرت أسارير وجه حازم ولكنه قال بضيق : وازاى يخبط فى بنت وهو المفروض ..

قاطعته هدى : انا كنت حاضرة الموقف وحكمت يا حازم .. هو كان بيلف وانا معدية من وراه مكش شايفنى اصلاً

-طيب .. ينفع نكمل أكل بقى؟؟

قالت بمرح : ياعم انت بتقفش كدا ليه ما برااحة شوية .. قولتلك ياعم جوزى اللي وقعنى .. يعنى يجوز (غمزت له من طرف عينيها دون أن تلاحظ والدتها فابتسم رغباً عنه قائلاً : يارب أجوزك وأخلص منك بقى

-لا يا حبيبي قاعدة على قلبك إنت ومراتك ومربعة

ضحك ثلاثتهم ونهضت حببية لتغسل يدها لانها لم تشعر برغبة فى الاكل بسبب الحمل .. واتجهت نحو غرفة حازم القديمة لتجيب على هاتفها الذى رن وبعد عدة لحظات نهض حازم وغسل يديه ولحق بها فى غرفته فدفن دون أن تشعر به وسمعها تقول بمرح : انا عارف يانور ياخويا هخلص امته من الكورة دى .. بفكر أرفس ترفستين كدا فى الواد دا واولده فى السابع وأخلص

هرول حازم نحوها وهو يصيح : ترفسي مين ياللى تترفسي ! عايزة ترفسي ابني يا حبيبة
انفجرت ضاحكة وقالت : أحبييه يانور دا حازم سمعنى وهيرفسنى إلحقنى ياخويييييا
قال نور ضاحكاً : ماليش دعوة من أعمالكم سلط عليكم .. تستاهلى اللى هيجراللك بقى يا حبيبتى

وبعد عدة أيام

- عشان خاطر بقى يانور وافق بقى .. هو انا هنزل لوحدى يعنى مانت معايا أهو !
- مينفعش يا حبيبة تنزلى من غير ماجوزك يعرف .. اتصلي قوليله هنزل مع نور وانا هنزل معاكى انما كدا مينفعش
- بس انا عايزة اعمله مفاجأة وهو هيسألنى هنزل معاك أجيب إيه ومش هينفع أكذب يعنى
- طيب ياستى قوليلي عايزة تفاجئيه بايه وانا هجيبهولك ؟
- لا ياعم دى حاجات اتكسف اقولها لك .. وبعدين منا بروح السوق لوحدى فى معظم الاوقات فرقت إيه بقى اما
انزل دلوقتى ؟
- ع الاقل جوزك بيبقى عارف انك نازلة مش بتنزلى من غير مايعرف .. هو المحل دا فين ؟
- جنب السوق
- خلاص كلميه قوليله هتروحي ناичه السوق تجيبى حاجات وانا هاجى معاكى وهننزل عادى
- تصدق صح ! إيه الذكاء اللى انا فيه دا !
- قال بمرح : معلش بقى يا حبيبة الحمل مآثر على عضلات المخ
- عضلات المخ !! حسبي الله ونعم الوكيل فى اللى خلاكوا تتعلموا

جاء يرد عليها ولكن رنين هاتفه قطه كلامه نظر لهاتفه وقال : أهو بييجي ع السيرة

ثم أجاب قائلاً ببسمته : السلام عليكم يا حازم كنا لسه هنكلمك

تلاشت فجأة البسمة من وجهه وقال بتوتر : مستشفى إيه !! .. طاب انا جاى حالاً !!

أغلق الهاتف فصاحت حبيبة بفرع : حازم ماله ؟؟

قال وهو يتجه نحو الباب : حادثة بسيطة ان شاء الله ونقلوه المستشفى وأنا رايحله حالاً !

قالت وهى تلحق به والدموع قد انهمرت من عينيها : استنى أنا جايه معاك !!

-هتيجي فين بس يا حبيبة وانتي حامل كدا !!

-ماليش دعوة هاجى يعنى هاجى !!

وصلا الى المستشفى وسألأ فى الاستقبال عن الحالات التى جاءت فى الحادثة الأخيرة وعن اسم حازم عبد الله ..
توتر وجه موظفة الاستقبال وقالت لهم : اطلعوا فى الدور التالت الاوضة رقم (..). هتلاقوا الدكتور وهو هيقولكم
على كل حاجه

زاد توترها من توترهم .. وهرولوا الى المكان الذى وصفته لهم .. وحين صعدا اليه انقبض قلب نور وقد أحس بما قد
حدث ، فى هذا الدور توجد المشرحة !! .. حاول طرد تلك الفكرة من رأسه وأسرع نحو الطبيب وسأله نور بلهفة
وعيناها تترجاه أن يكذب ما يشعر به : طمننا يادكتور على حازم عبد الله !

قضب الطبيب بين حاجبيه قائلاً : انتوا تقربوله ؟

رد بسرعة : ايوا هى مراته وانا اخوها .. طمننا بالله عليك

ناولهم محفظة وسألها قائلاً : دى حاجه جوزك ؟

أمسكتهم وقالت وهى تبكى : أيوا هى بالله قولنا حصله إيه !!

قال باشفاق عليهما : انتوا معرفتوش من الاستقبال ؟

قال نور بحدة : قولنا بقى إيه اللى حصل وطمنا الله يكرمك دا مش اسلوب !

قال الطبيب بأسى : .. العربية الصغيرة اللى كان راكبها اتقلبت وعرفوا يطلعوا السواق ومكنش فيها غيرهم .. بس للأسف معرفوش يطلعوه غير بعد فوات الاوان وكانت العربية ولعت ! .. البقاء لله

تجمد الدم فى عروق حبيبة وسرى الجمود فى اوصالها كأنها صارت صنماً !! .. بينما نور كعادته حامل الصدمات ..! أمسكها من ذراعها بقوة وقال بعينين جاحظتين وصوت يحاول أن يبدو ثابتاً : عايز أتأكد إنه هو !

قال الطبيب : طبعاً لازم تشوفه وتتعرف عليه كمان بس للأسف النار شوهت ملامحه تماماً ..

أحسها ترتجف بين يديه فقال بثبات : طيب يادكتور انا ممكن أدخل وانا هعرفه ! ..

نظر لحبيبة وقال بتماسك : كان لابس إيه ؟؟

قالت بصوت جامد : تشرت ابيض فى ازرق

ربت على كفها بحنان وأجلسها على أحد الازرائك بالرواق واصطحبه الطبيب الى المشرحة .. انقبض قلبه عند دخولها وأخذ يستغفر الله كثيراً بقلب خاشع وعيناه تكاد تبكي لولا أن حال حبيبة لايمسح بأن يبكي هو الآخر ! .. وصلا أمام الجثمان .. رفع الطبيب عنه الغطاء الأبيض .. انتفض جسد نور وعاد خطوة للخلف وهو يستغفر الله بصوت أوضح ولم يستطع تلك المرة أن يحبس دموعه بل تركها تشق طريقها !! .. أخذ يردد وهى يبكي بحرق ((اللهم إصرف عنا عذاب جهنم إن عذابها كان غراماً))

((اللهم إصرف عنا عذاب جهنم إن عذابها كان غراماً))

((اللهم إصرف عنا عذاب جهنم إن عذابها كان غراماً))

((اللهم إصرف عنا عذاب جهنم إن عذابها كان غراماً))

((اللهم إصرف عنا عذاب جهنم إن عذابها كان غراماً))

((اللهم إصرف عنا عذاب جهنم إن عذابها كان غراماً))

((اللهم إصرف عنا عذاب جهنم إن عذابها كان غراماً))

((اللهم إصرف عنا عذاب جهنم إن عذابها كان غراماً))

((اللهم إصرف عنا عذاب جهنم إن عذابها كان غراماً))

ربت الطيب على كتفه وقال : هو دا؟؟

اقترب منه نور عدة خطوات وقلبه يدعو له بالرحمة .. يدعو لذلك الميت أياً كان من هو ! .. يا الله !! .. إنه يرتدى الازرق كمان قالت حبيبة !! .. تلك لحية حازم ! ..

إنا لله وإنا إليه راجعون .. اللهم ثبته عند السؤال .. اللهم ثبته عند السؤال .. وارحمه وارحمنا يا اارب .. اللهم ازرقه الفرووس بلا حساب ولا سابقة عذاب ..

قال الطيب بهدوء : هو دا؟؟

بدأ يمسح دموعه وقال وهو يحاول أن يتماسك : لاحول ولا قوة الا بالله .. هو لابس ازرق زى ما قالت وكمان كان ملتحي .. وفي اثر لحية محروقة .. ربنا يتقبل منك كل أعمالك يا حازم يا ارب .. يا ارب هو كان يبحك اوووى وكان علطول راضي بقسمتك .. يارب متعملوش بعدلك عامله برحمتك يارب

انسابت الدموع مجدداً من بين عينيه وهو يردد وكأنه يهذي : يا ارب اغفرله وسامحه يا اارب .. يارب اغفرله وارحمه يا اارب .. يارب دا كان صاحب جدع اووى وانسان خلوق وعنده دين يارب .. يارب تجاوز عن سيئاته واعف عنه واغفرله يارب .. يارب هو كان ديماً بيشجعنى يارب سامحه يارب .. يارب اجعله مع حبيبك النبي فى الجنة يارب .. يارب دا كان بيدرسلنا اسمائك فى الدار وبيعرفنا عليك .. وكان بيعلم غيره القرآن والتجويد .. يارب تقبل منه يارب هو كان يبحك اووى .. وسامحه يارب لو كانت نيته اتغيرت فى مرة وهو بيدينا الدرس .. يارب سامحه

صاحت بغير تصديق : لاحول ولا قوة الا بالله .. انا لله وانا اليه راجعون .. كلنا راجعين لرنا يا نور .. بالله عليك اتماسك يا نور .. انت مؤمن بالله وعارف ان كلنا هنروحله .. مش الدنيا اللي احنا عايزينها يا نور .. ادعى لحازم كثير وانا كمان هدعيه بس انت اتماسك عشان حبيبة بس واللى فى بطنها .. بالله عليك يا نور .. رنا بيحبك ودديما بيحطك فى مواقف بيختبر فيها صبرك .. بالله عليك استحمل المرادى يا نور ..

أخذت تحدثه وتثبت من نفسه وقلبها معلق بالدعاء أن يثبته الله ويخفف عنه وأخته .. وانتهت المكالمة بعد أن كلفها بالمهمة الصعبة .. وهي إخبار والدة حازم وهدى !!

أغلقت معه واتصلت بمنار أفجعتها بالخبر وطلبت منها أن تأتي لتجلس مع أولادها كي تذهب هي لبيت والدة حازم

اتصلت هدير بعمها وأخبرته بما جرى لحازم ليذهب لنور بالمشفى هو ويوسف .. اتصل بنور بسرعة ليعلم بأى مشفى هو ! فمن إثر الصدمة لم تنتبه هدير أن تسأله .. رد عليه بسرعة وأخبره باسم المشفى وأن حالة حبيبة تدهورت وستلد الآن!! .. أغلق معه الخط بسرعة و خرج الحاج محمود من بيته متجها للمحل ليصطحب يوسف ويذهبا للمشفى .. قابل على السلم رامى الذى كان يزور والدته وأخبره بالخبر المفجع !! .. وانطلق رامى كالسهم صوب المشفى

وفى المشفى خرجت الممرضة من غرفة العمليات مهرولة نحو نور وقالت بفرح : يا شيخ مراتك جوا مش عايزانا نغيرلها وعمالة تعيط وتقول محدش هيولدى !!

قالتها ودلفت الغرفة وهو خلفها بسرعة .. أمسك كفها وضغط عليه برفق قائلاً : مالك يا حبيبة؟؟

صاحت وهى تبكي بانفعال : والله العظيم مفيش راجل هيشوفنى ولو هموت !!

-اهدى بس بالله عليكى يا حبيبة

صاحت مرة أخرى وهى تتألم بشدة : والله ما فى راجل هيشوفنى ولا يولدنى !! والله لو هموت يانور ! لو هموووت..

(صاحت بألم وهى تبكي) : إلحقني يا حيااa

قالتها وصرخت بشدة من الألم .. ضمها إليه وقال بسرعة : والله مش هسيبك يا حبيبة ومش هخلي راجل يشوفك

بس خليههم يغيرولك ويدوكى البنج بس .. مش عشانك عشان حازم يا حبيبة .. عشان ابنه يا حبيبة .. اللي حته منه

أجلسها على طرف السرير وقال بحنان : سمي الله كدا واستغفرى وانا هخليهم يجيولك دكتورة ست بس خليههم

يخرجوا ابن حازم بدل ما يتخنى جوا ..

هزت رأسها بوهن واستسلمت للممرضات بينما غادر هو الغرفة بسرعة واتجه للطبيب وطلب منه أن تقوم طبية

بعملية التوليد .. وبعد إلحاح وافق الطبيب أخيراً على مضمض ..

نزل الخبر على أذنه كالصاعقة !! .. كيف !! كيف رحل حازم بتلك السرعة وتلك السهولة !! .. هل العمر قصير

لتلك الدرجة !..هل الحياة فانية حقاً !! .. لم يشعر بهذا إلا الآن فقط !! .. الآن فقط أحس أن كل من عليها

فان !

ركب سيارته وانطلق بها كالمجنون نحو المشفى .. وأخرج هاتفه واتصل برقم وبعد عدة ثوانى أتاه صوت أحمد

فقال بصوت متهدج وهى يبكي : حازم مات يا أحمد !! مات !! ..أحمد بالله عليكى تيجي ع المشفى انت

اللى هتعرف تمسكنا !! .. حما نور بيقول انه منهار هناك ولوحده واخته بتولد كمان !..الحقنا يا أحمد بالله عليك

ياشيخ الحقنا!!

قالها وانفجر باكياً وأغلق الخط مع أحمد بعد أن أعطاه اسم المشفى

أغلق الخط مع رامي وهو يشعر أن الأرض تهتز به !! .. أخذ يردد بسرعة "لا حول ولا قوة إلا بالله " .. " لا حول ولا قوة الا بالله "

قالها كثيراً وأخذ يستعيز بالله من الشيطان الرجيم ويدعوه أن يخفف على زوجة حازم وعلي أمه وأخته ! .. أخذ يعلق قلبه بالله ويخبرها بأنهم اختاروا من البداية الجنة وكان طريقها الوحيد هو الحياة على مراد الله في هذه الدنيا .. فلم الحزن عند انتهاء هذا الطريق .. !! .. أخذ يدعو الله بحسن ظنٍ فيه أن يجعل حازم من أهل الجنة مضت عدة دقائق وهو يستغفر ويدعو لحازم ولأهله .. أفاق من تلك الحالة الروحانية وانطلق لغرفته ليبدل ملابسه بسرعة

فتحت أميرة عينها بوهن وقالت وهي تتابع حركته السريعة : رايح فين يا أحمد ؟

حاول الابتسام وقال : مرات حازم بتولد وأنا رايحلهم المستشفى

نظرت له بوهن وجلست على طرف الفراش وقالت بفتور : ربنا يقومها بالسلامة

لاحظ ذبول لونها ونبرتها فنظر لها وهو لا يزال منشغلاً بملابسه : مالك؟؟شكلك تعبان ؟

قالت بوهن : حاسه بتعب شوية فعلاً

اقترب منها وتحسس جبتها وعقد حاجبيه قائلاً : انتى مش سخنة..طيب حسة بايه طيب؟؟

قالت بوهن : متشغلش دماغك يا أحمد روح المستشفى .. إنت عارف إنى بتعب فى الفترة دى علطول يعنى مش جديدة

نظر لها بتفحص فأدرفت : والله مافيا حاجه يا أحمد هو التعب الطبيعي بتاع كل شهر

مسح على رأسها قائلاً : طيب خلى بالك من نفسك على ما أرجع

-حاضر

غادر الغرفة وودعته هي حتى باب الشقة وحين أغلقه بدأت تخطو ببطء نحو غرفتها وفي منتصف الصالة سقطت بقوة على الأرض .. أمسكت معدتها وأخذت تضغط عليها بقوة لعل الألم يخفى ولكنه كان شديداً جداً هذه المرة .. بدأت تبكي وهي لا تجد حتى يد أحمد التي كانت تحملها حين تتعثر .. انسالت الدموع في عينيها وقالت بحسرة :
كدا يا أحمد تسيبني وأنا تعبانة ! ماهما هناك كثير معاها بس أنا هنا ماليش غيرك !

أخذت تبكي بحرقه والألم يعتصرها أكثر فأكثر .. امتد بصرها فرأت ذلك الاطار المعلق الذي به ورقه بخط يديهما معاً .. تذكرت يوم كتبها سوياً حين أمسك بيدها وبدأ يخطوها .. وفي المساء التالي حضر بها وهي في اطار ليعلقها على الحائط

((استغفر ربنا .. هتفرج من عنده))

أخذت تستغفر الله كثيراً وحاولت أن تتكأ على ما حولها كي تنهض .. وبعد محاولات كثيرة نهضت أخيراً واتجهت الى غرفتها وهي متكئة على ما حولها .. دخلت غرفتها وهي تسير ببطء .. وصلت امام فراشها .. اشتد بها الألم .. أحست أن المكان يدور بها والحياة تختفي من حولها ! .. وفي لحظة اختفى كل شئ وسقطت على الأرض !!

كانت تجر أقدامها وهي ذاهبة لبيته .. كيف ستخبر أمه وأخته بما حل به !! .. وصلت عمارتهم وصعدت لشقتهم .. استقبلتها هدى بحفاوة وأدخلتها بحبور وهي تضمها اليها ونادت على أمها التي سلمت عليها وقالت بلوم :
مجبتيش العيال ليه ياهديررر مش عارفه ان روحى فيهم يابنتى

قالت هدى بحماس : ان شاء الله حازم يخلف تسعه ياماما ومتبقيش عارفه تلميهم

ضحكت الام ورفعت كفيها للسماة وقالت : يا اارب ياهدى ياررب افرح بعيالك انتى وحازم كدا يا اارب وبياركلى
ربنا فيكم وفيهم

رد بهدوء : مالك اتخضيت كدا ليه يابنى .. ماله نور فيه إيه ؟

ابتلع يوسف لسانه ونظر له بدهشة وقال بفرع : أأ .. أنت عايش ؟

رفع حازم حاجبه ونظر للحاج محمود وقال بتعجب : ماله دا يا حاج ؟

لم تكن دهشة الحج محمود أقل من دهشة يوسف وحازم بينهما لا يفهم نظراتهم اليه .. قال بدهشة : مالكم
ياجماعه بصاينلى كدا ليه وماله نور !!

اقترب منه الحاج محمود وتحسس وجهه قائلاً بفرحة والدموع تنهمر من عينيه : انت عايش يا حازم !!

قالها ثم جذبه لحضنه .. قال بتعجب : اه عايش فى حد قالكم غير كدا ولا إيه (قالها بمرح ساخراً)

دفعه الحاج محمود قائلاً بضيق : إيه الهزار الماسخ بتاعكم دا !! دا انتوا وقتتوا قلبنا

قال حازم : بالله عليك فهمنى وربنا منا فاهم حاجه

قال : نور كلم هدير وقالها انك لا قدر الله موت فى حادثة وهما فى المستشفى .. وبعدين انا كلمته اعرف مكانه
قالى ان مراتك لما سمعت الخبر جالها الطلق وبتولد دلوقتى و ..

قاطعه بدهشة : حبيبة بتولد؟؟

-ايوا وانا بعث هدير تقولك لامك واختك عشان التغسيل والدفنة والحاجات دى وانا قولت لرامى وبعته ع
المستشفى عشان نور ميقاش لوحده مع مراتك والراجل اللي مات هناك !!

-لا اله الا الله يعنى ماما وهدى دلوقتى عارفين كمان انى موت؟؟

اندفع يوسف قائلاً : روح لمراتك يا حازم وانا هروح أبلغهم بسرعه ان الخبر مش صحيح الحمد لله لحد مانفهم من
نور !

قالها وغادر باتجاه بيت حازم وانطلق حازم برفقة الحاج محمود الى المشفى .. اخرج يوسف هاتفه وطوال الطريق
أخذ يتصل بهدى ولكنها لم تجبه ! أخذ يستغفر كثيراً وهو يحث الخطى ويدعو الله .. يارب سلم سلم

لاحظ أنه لازال يضم هدى .. تركها وابتعد عنها باحراج وقال ناظراً للأرض : آسف ياطنط والله مخدتش بالي

ضحكت هدى بخجل وكذلك أمها وقالت : تسلم يا يوسف يارب ديماً مبشرنا بالأخبار الحلوة !

ثم نظرت لهدير وقالت : مش انتى ياختى !!

ضحكت بخفوت وقالت : وانا مالى يعنى ياطنط مش نور اللى قالى ! ..

قال يوسف باحراج : عن اذنكم انا هطلع أستناكم برااا على ماتجهوزا عشان أوديكم المستشفى

صاحوا فى صوت واحد : مستشفى ليه !!

ضرب جبهته وقال : آآآآخ نسيت أقولكم إن حبيبة بتولد !!

وفى المشفى

اتسعت عينا نور وتسمر مكانه حين رأى حازم بينما بكى رامى وضمه إليه بقوة وقال : كدا يا حيوان توقع قلبى !!

قال حازم بمرح : يا عم فعصتنى يا عم !! .. نفس .. أكسجين !! .. زلاية !! .. أى حاجه طاهاه !

ضحك رامى وأحكم قبضته عليه أكثر وهو يقول : لا أنا هفصصك وأعصرك كمان

ترك والتفت لنور المندesh وقال : ومش انت لوحدك !! انت والواد اللى نشر الخبر دا

كان نور يحدق بحازم بدهشة !! .. قال حازم ببسمة : ماصدقت يانور عشان تنشر الخبر؟؟

جذبه نور بين ذراعيه وأخذ يبكي بحرارة احتضنه حازم قليلاً وهو يشعر بما يشعر به نور .. فهو لا يستطيع أن يتخيل

حتى اليوم الذى سيرحل فيه نور !! .. همس فى أذن صاحبه : أنا مكنتش ميت يانور ! .. احنا مش بنموت .. احنا

بنرتقى .. امال احنا عايشيين ليه ! مش عشان نوصل للجنة؟؟ .. والجنة خطوتها إيه؟؟ .. الموت يا صاحبي

بدأ نور يرتعش بين يدي حازم الذى همس بهدوء أكثر : وأنا جاى فى الطريق لهننا تخيلتى وأنا ميت فعلاً وروحى عند ربنا .. ياترى كنتم هتدعولى وتطلعوا صدقات ولا هتفضلوا تعيطوا ؟ .. السؤال بجد حيرنى أوووي

بدأ نور يمسح دموعه فقال حازم بجدية : احلف يانور انى لما أموت مش هتتأخر ولا تتراجع ولا هتحزن .. انت هتفرح عشان أنا سبقتك لحملنا اللى عايشين عشان نوصله .. للنجاح اللى نفسنا نحققه .. مش ديما كنت بتقولى النجاح فى الدنيا جنة؟؟

صمت نور فقال حازم مشجعاً اياه : إوعدنى !

قال بصوت قوى : بوعدك يا صاحبي

تركه ونظر لرامي قائلاً بجدية : وانت يارامي

قال بحزن : أنا مش هتقدر يا حازم

—مش هتقدر إيه بالظبط؟؟..مش هتقدر تفرحلى لما اسبقك وتدعيلي انى ادخل الجنة؟؟

ارتسمت بسمه على وجه رامي فقال حازم : وان كان عليا ياعم فأنا لما هتموت هديح وأوزع على الناس

ابتسم رامي فضحك حازم قائلاً : صدقة يلا مش فرحانين يعنى

ضحك رامي بصوت خفيض لانهم بالمشفى وربت نور على كتفيهما قائلاً : قفلوا بقى ع السيرة دى الله يكرمكوا

قبل أن يتكلم أحدهما رن هاتف رامي فنظر للشاشة واستأذن منهما وابتعد خطوتين ورد قائلاً بسمه : السلام عليك ياتقى

قالت بصوت باكي : وعليكم السلام يارامي .. إيه الاخبار عندك؟؟ الحمد لله صوتك بقى كويس .. انتوا كلكم كويسين صح ؟

قال بسمه : الحمد لله كلنا كويسين آه صحيح ...

قطع جملته صوت ابنه مؤمن الذى سحب الهاتف من والدته وقال وهو يبكي بانفعال : هاتى أكلمه أنا .. بابا هو
عمو حازم مشي وراح عند ربنا ومش هشوفه تانى؟

ابتسم من أسلوبه وقال بطيبة : يا حبيبي عمو حازم موجود الحمد لله وان شاء الله هشوفه تانى

قال بحزن : بجد يابابا ؟؟

-ايوا بجد

-طيب ليه ماما قالتلى انه مشي ؟؟

-ماما كانت فكراه مشي بس هو الحمد لله طلع موجود .. تحب تكلمه ؟؟

قفز من مكانه قائلاً بسعادة : آه يابابا عشان خاطرى !

-طيب استنى ثانيه ..

دنى من حازم واعطاه الهاتف واخبره انه مؤمن ، قال حازم بروحه المرحه التى اعتاد أن يتعامل بها دوماً مع مؤمن :
السلام عليكم يا شيخ مؤمن

قفز الطفل من مكانه وصاح بفرحة : وعليكم السلام يا عمو حازم ! انت ممشيتش صح ؟؟

-لا يا مؤمن ممشيتش يا حبيبي

-طيب انا عايز اشوفك عشان احضنك كتيير بقى عشان لو مشيت ابقى حضنتك كثير .. مش انتى بتحنى
احضنك ؟

ضحك حازم بشدة وقال : طنط بتجيب نونا اول ما هتجيبها هجيلك ان شاء الله

-الله !! وطنط حبيبة بتولد ولد ولا بنت ؟

-بنت ان شاء الله

لوى شففيه قائلاً : بس انا عايز ولد ألعب معاها مش هينفع العب مع البنت .. بابا قالى كدا .. ينفع انت تخلينى العب معاها؟؟..مش هي بتاعتك ؟

ضحك حازم مجدداً وقال : هنقول لبابا وهو هيوافق وتلعب معاها براحتك .. مش انا معودك تدعيلى ربنا يامؤمن لما بحتاج حاجه ؟

-ايون عايز إيه وانا هقول لربنا

-عيزاك تدعى لطنط حبيبة تقوم بالسلامة هي والنونا بتاعتها ماشي ؟

قال بسعادة : ماشي ياعمو .. خد ماما بقى وانا هروح ألعب

وفى لحظة كان حازم قد ناول الهاتف لرامى وهمس قائلاً : خد مؤمن

أخذ الهاتف وقال : ايوا يامؤمن

بعد عدة لحظات جاؤه صوت تقى قائلاً بدهشة : هو مين اللى بيكلم مؤمن ؟؟؟؟؟

قال بسعادة : حازم .. ماهو الحمد لله طلع عايش

اتسعت عيناها وقالت : ازاي؟؟..

-والله لسه شايفينه وملحقناش نعرف حتى منه ازاي .. (ابتعد عن رفيقه وقال بعتاب) : ليه قولتى لمؤمن ياتقى ؟

دخلت غرفتها واغلقت عليها وقالت باكية : والله انا اسفه يارامى وعارفه انى غلطت لما قولتله وانه طفل ! .. بس لما كلمتك وكنت منهار قفلت معاك انهارت انا كمان وهو شافنى وعمل زيك لما بتشوفنى بيعيط .. قومنى من ع الارض وقعدنى ع السرير وجابلي ميا وقعد يمسح دموعى بايده الصغيرة ويقرأ سورة الفاتحة والاخلاص وهو يمسح على وشي .. ساعتها انا عيطت اكثر فراح خدنى فى حضنى وقعد يقولى متزعليش ياماما من أى حاجه .. ولقيته بيقولى إيه اللى مزعلك والله العظيم حسيت ان انت اللى معايا بالظبط مش هو !! .. فروحت قولتله ان بابا زعلان

وانا زعلانة عشا هو زعلان فقالي انت زعلان ليه فقولتله عشان عمو حازم صحبه راح عند ربنا .. انا اسفة يارامي والله ..

قاطعها بحنان : خلاص ياتقى متعتدريش حصل خير الحمد لله .. بس بجد ربنا يكرمك بجد .. (ثم همس قائلاً) : بحبك على فكرة

ابتسمت وسط دموعها فقال بمرح : هزوخ من العيال دول وأجيلكم بقى حسيت انكم وحشتوني فجأة وعايز اقعد معاكم

ابتسمت بخجل فأردف : اجيلكم ولا إيه ؟ ..

-لا خليك مع صاحبك لحد مايطمن على مراته طبعاً .. وقبل ماتيجي بشوية رن عليا هجهز أنا مؤمن وتودينا الملاهى

قال بتعجب : الملاهى !!؟

-اه الملاهى والمعمورة كمان .. مش بتقول وحشناالك

-لالالالالا انتى فهمتى غلط خلاص وحشتونى يعنى موييلات بقى وكدا .. انما ملاهى والمعمورة كمان !! .. احنا فى نص الشهر ياتقى

ضحكت قائلةً : خلاص هاتلنا درة ونشوبها فى البيت وانا هعمل فشار ونسهر على فيلم

-فيلم ؟ .. انا سمعت صح ؟

-أيون هنشوف UP .. مؤمن بيحبه

قال بحب : وأنا بموت فيه

ابتسمت بخجل وقالت : روح لاصحابك بقى خلصتلى رصيدي واحنا فى نص الشهر يا حج رامي

-يسمع منك بؤك ربنا يا حجة ام مؤمن .. يلا السلام عليكم

أنهى المكالمة والنفث لصديقه وعاد اليه قائلاً : آه صحيح يا حازم ازاي حصلت اللغبطة دى؟؟

مط شفتيه ونظر لنور الذي قال : فى حادثة حصلت وكان فيها واحد لابس ازرق وعنده لحية وكان معاه محفظتك وموبايلك .. ربنا يرحمه ياارب

تمتم حازم بحزن : لاحول ولا قوة الا بالله .. ربنا يرحمه ياارب .. انهاردة روحنا النقابة واشتكينا وبعدها طلعتنا على كذا مكان لحد ما الحمد لله صرفولنا القبض والحاجات المتأخرة .. بس وانا راجع المحفظة والموبيل اتسرقوا منى ..

شهق رامى وقال بفرع : ياارب ارزقنا حسن الخاتمة !! واحد ميت على سرقة !! دا حسابه إيه عند ربنا !!

قال نور بسرعة : بلاش سوء ظن يارامى ممكن يكونوا وقعوا من حازم وهو لقاهم !

قال رامى بحدة : لأ طبعا محدش بيقع منه الموبيل والمحفظة على بعضهم وبعدين اللى لقاهم بيتصل بصحابهم ولا إيه؟؟

قال حازم بجدية : بجد يارامى بلااش سوء ظن .. حرام عليك المفروض ندعى للميت صح؟؟ .. وبعدين احنا المفروض كلنا نتعلم درس والله من اللى حصل .. ان الموت بييجي فى ثانية ! ممكن ييجي وانت بتغتاب او وانا ساكت لحد بيغتاب او نور مش بيغض بصره مثلاً ! لازم نفكر بعض ديماً بالحاجات الصغيرة دى ! .. امال احنا المفروض صحبة صالحة ازاي؟؟

هزا رأسيهما وقال رامى بحزن : خلاص يا حازم انا هستغفر ومش هسيئ الظن تانى بس محتاج حد يفكرنى علطول ويفضل ورايا عشان مجبش سيرة حد .. ماشي؟؟

-ماشي

قال نور : هنروح للدكتور بقى قبل مايطلعولك شهادة وفاة

ثم أخرج من جيبه محفظة حازم وهاتفه وناولهم لحازم .. أمسك حازم محفظته وقال بحزن : لاحول ولا قوة الا بالله .. كنت من ساعه وشوية زعلان جدا ومكتئب عشان المحفظة ضاعت منى ! .. بس بجد مش متخيل كانوا هينفعوني بايه عند ربنا عشان ازعل عليهم اووى اووى كدا !!

تنهد وفتح محفظته بحركة عشوائية ونظر باهتمام لتلك الورقة المطوية اللي بها والتي لاتخصه .. أخرجها وفتحها وقرأها بصمت ثم قرأها بصوت أوضح ليسمع صديقيه

“المحفظة والموييل اللي فى جيبى الشمال مش بتوعى .. لقيتهم ونويت أرجعهم لصحابهم بس مش ضامن عمري ! أرجو إن مت إعادتهم لصحابهم لأنى سأسأل عنهم .. أرجو الدعاء لى ”

-لا حول ولا قوة الا بالله ان بعض الظن اثم فعلاً يارامى ! استغفر الله العظيم والله مكنتش اعرف انه بالاخلاق دي ربنا يرحمه ياارب !

قال نور بتأثر : ياالله ! هو فى حد كدا ماشاء الله عليه ربنا يرحمه يارب .. زى مايكون قلبه حاسس .. ربنا يرحمه ياارب

قال حازم : المفروض نروح للدكتور عشان يدوروا فى بقيت جيوبه عشان يوصلوا لاهله !

-خلاص يلا نروح نقوله

نظروا لبعضهم فقال نور : هروح وانا ورامى وخليك انت هنا يا حازم عشان حبيبة متبقاش لوحدها .. تمام؟؟

كانت منار تجلس بيت هدير وتراقب الأطفال وهم يلعبون سوياً وابنتها تأخذ ركناً جانبياً تلعب فيه وحدها بلعبتها التى لاتلعب بسواها .. نظرت لاولاد هدير مرة أخرى وأخذت تردد المعوذتين وتردد ماشاء الله لا قوة الا بالله خوفاً من أن تحسداهم دون أن تقصد .. اقترب منها مالك أكبر اولاد نور وقال لها ببسمة : مالك ياطنط شكلك زعلانة؟

نظرت له ببسمة طيبة وقالت : لايحبيبي مفيش .. روح كمل لعب مع إخوانك

-اممم .. طيب هي ليه مرام مش بتلعب معانا !

حاولت أن تبقى على ابتسامتها وقالت : عشان هي مش بتعرف تلعب مع حد .. عشان قاعدة لوحدها علطول ومعندهاش اخوات

قال ببراءة : طيب ماتجيلها اخوات ياطنط يلعبوا معاها ؟

تذكرت آخر نقاش بينها وبين عمر والذي قررت فيه بعد ان احتد الحوار أنها لن تنجب كى لا تكرر مشكلة مريم وعلى الاقل حتى تعالج مشكلة مرام .. وراعى هو فى ذلك الوقت مشاعرها وراعى أنها متأثرة بموت ابنتها الأولى مريم ولم يشأ أن يضغط عليها أكثر .. قطع مالك شرودها قائلاً : انتى مش عارفه بتجيبى النونة منين ؟

ابتسمت لبرائته وسألته متصنعة الاهتمام : منين يامالك ؟

-وانتى بتصلي ياطنط ادعى ربنا كتير اووى وبعدها هتلاقى بطنك بتكبر وبيقى عندك بعدها ولاد .. اسألى ماما حتى

-اممم شكراً يامالك انا هدعى ربنا كتير بقى عشان يبقى عندى ولاد يلعبوا مع مرام

-طيب أنا ممكن ألعب معاها لحد ماتجيلها اخوات ؟ .. أنا بحبها وعايز ألعب معاها بس هي مش بترضي تبصلي حتى

-عشان هي مش بتعرف تلعب ازاي مع حد .. هي صغيرة يامالك وكمان محدش صغير بيلعب معاها فمش عارفه .. ماتجرب تلعب معاها انت وتعلمها بتلعبوا ازاي ؟

تحمس قائلاً : حاضر ياطنط هعلمها

وفى تلك اللحظة اقترب حازم من مرام وجذب منها عروستها وقال بانفعال : انتى مش بتلعبى معانا ليه وبتلعبى بالعروسة دى بس !

-حلو مامك .. يلا بقى ندور ع العروسة سوا ؟

هزت رأسها فاقبل بحماس : ماتيجي نعمل سباق لحد الاوضة

هزت رأسها قائلةً : لا عوسة !

ففهم أنها تريد لعبتها أولاً فابتسم قائلاً : طيب يلا بينا ندور عليها

اتصلوا بأهل ذلك الميت بعدما وجدوا هاتفه بجيبه .. جاء أهله وبدأوا فى انهاء الاجراءات لاستلامه .. لاحظ حازم أن هناك شاباً يبكي بحرارة بينهم .. اقترب منه وريت على كتفه قائلاً : ربنا يرحمه .. ادعيه كتيبير واوعى تنساه من صدقاتك

نظر الشاب لحازم وقال هو يرتجف من شدة البكاء : ربنا يرحمه يااارب انت صح ياشيخ لازم ادعيه .. بس انا مين هيدعيلي لما اموت زيه ! هو كان كويس وكنا بتتريق عليه علطول فى البيت ونقول عليه معقد .. بس هو مكنش بيتأثر بكلامنا بس فى الاخر مات محروق !! موته صعبة أووى ! امال انا هموت أزاى لما هو يموت كدا !!

ربت على كتفه مجدداً وقال : محدش عارف بكرا هيبقى إيه يا صاحبي .. الانسان بيتغير فى لحظة وربنا بيسامحه .. وبعدين هو فعلاً مات محروق بس ربنا كرمه بخير تانى .. انا موبايلى ومحفظتى وقعوا منى واخوك لقاهم .. والله يرحمه كتب ورقه وحطها فى محفظتى ان الحاجه دى مش بتاعته عشان لو مات قبل ما يرجعهم .. وربنا يسر الامر ورجعوا لصاحبهم بعد موته .. نحسبه ان شاء الله من أهل الجنة بحسن ظننا فى الله .. بس بالله عليك اوعى تنساه من دعائك

-سبحااان الله .. طول عمرى كنت بتريق عليه على الورقة اللى هو بيكتبها دى واقوله بتريفة لما تموت ياعم هنبقى ندور على صاحبك .. الله يرحمك ياخويا ..

ابتسم حازم فنظر له الشاب قائلاً : هو انا ممكن أعمله إيه ؟؟

-تدعيه ومتستهونش بالدعاء .. وتمشي باى نصيحة كان بيقولها لك وتطلع صدقات عليه

-طيب ينفع أقرأله قران ؟

-والله أنا قرئت على موقع اسلام ويب انه ينفع تقرأ بنية ان ثوابه للميت دا

-مين اسلام ويب دا ؟

-موقع فتاوى كدا

قال الشاب بحماس : طيب ياخويا أنا هعمل بنصايحك وهحاول ألتزم وابقى زيك عشان يوصلك ثواب عنى ان شاء الله وانت فى قبرك

قال حازم ببسمة طيبة : أعرف دار كويسة هتساعدك جامد .. ممكن تاخذ رقمى ولما تقدر تروح تكلمنى وانا هوديك

نظر له بامتنان وقال : تسلم ياشيخ بجد والله تسلم

-هات رقمك انت وانا هبقى اكلمك ان شاء الله كمان اربع ايام ولاحاجه

أنجبت حبيبة بعد ولادة متعثرة وبشدة طفلة جميلة جداً.. لاتشبه لأمها فى شئ .. ولكنها بشرة أبيها وعيناه الواسعتين .. قبلها حازم بحنان وكبر فى أذنها وانسكبت دموعه على وجهها وهو يتأملها قبل أن تأخذها الممرضة إلى الحضانة لأنها ولدت بالشهر السابع ..

بعد مدة أفاقت حبيبة من المخدر ودخل لها نور الغرفة أولاً ووقف أمام سريرها وقال : كنت عايز أقولك حاجه بس متزعليش منى

نظرت له بعيون واهنة وجفون متقرحة من أثر البكاء وقالت بوهن : هزعل على إيه أكثر من حازم يانور

قال بطيبة : وتزعلى ليه يا حبيبة مش انتم اصلا عايشين عشان توصلوا للجنة؟؟

هزت رأسها وقالت بخفوت : مكنتش مستعدة خالص يا نور

قاتلها ثم انخرطت فى البكاء .. دفع حازم الباب ودلف الغرفة وهو يقول : إيه يا غلس لازم تنكد ع البت وهى لسه ولادة !!

صاحت حبيبة بفرع حين ظهر أمامها فجأة !! .. اتسعت عينها فقال بسرعة : اثبتى يا حبيبة مش ناقصه جنان لتولدى تانى !!

ابتسمت وسط دموعها ولكنها لم تقدر أن تنطق من هول المفاجأة !! .. قال بمرح : ماصدقتى قولتى الراجل مات ورفستى الواد يا حبيبة

بدأت تتعلمش : حا.. حا .. حازم أذ..

قاطعها بمرح : خلاص ابلعى ريقك الاول وبعدين نبقى نتكلم .. الست لسه والده برضه يا نور

قالها وضربه على كتفه فصاح : ياعم انا مالى انا فتحت بؤي !

ضربه مجدداً وقال : ماتخليك فهيم كدا يعنى يا نور

خرج نور من الغرفة وهو يقلب كفيه ويقول : ربنا يهديكم انتوا الاتنين فى يوم واحد

خرج وأغلق الباب فجلس حازم بجوار حبيبة وأمسك يدها وقبلها قائلاً : حمد لله على سلامتكم

-حمد الله على سلامتكم انت يا حازم .. كدا تعمل فيا كدا؟؟

-امممم بعد تفكير بصراحة يا حبيبة اكتشفت اننا نستاهل اللى حصل دا .. بصراحة فى شوية حاجات عايزين نضبها

واولها .. هدفنا فى الدنيا .. احنا بجد مش عايشين لله ويس !

هزت رأسها بوهن فأدرف : عشان كدا هسمى بنتنا جنة عشان ديماً تفكرنا .. موافقة؟؟

هزت رأسها بالايجاب وفجأة فتح الباب وأدلف نور رأسه قائلاً : مامتك وهدى وهدير برا .. وأحمد بيكلمنى ويقولى

احنا فين عشان يطلعنا .. هو دا اللى نسينا نكلمه ونقوله انك عايش .. لسه هياخذ الصدمة !!

قال حازم بدهشة : هو كل دا لسه معرفش !!

هن كتفيه قائلاً : أهو هيعرف .. اطلع براا بقى خليك فيهم يا حازم

ابتسم حازم وخرج وأمكسته والدته وعانقته بشدة وأخذت تقبل فيه وتبعثها هدى التي ضمها اليه وبعد الاحضان دلفوا لحبيبة .. وبعد عدة لحظات ظهر أحمد في آخر الرواق .. اتسعت عيناه حين رأى حازم وهرول نحوهم ونظر لحازم بدهشة ثم التفت لرامي الذي بدأ يضحك وكذلك نور .. نظر لحازم وقال بجدية : متقولوش يا شباب انكم كنتم بتزهروا !!

قال رامي بمرح : وايه يعنى لو بتزهروا اديك شوفتنا !

قال بجدية : لا يارامى متزهersh !! .. أنا سايب مراتى فى البيت تعبانة ويقالى ساعتين فى المواصلات جايز أكثر وتقولى فيها إيه !! (نظر لحازم وقال) : إيه يا حازم؟؟

تنحى قائلاً : حصل لبس يا أحمد.. فى واحد لقي محفظتى وموبايلى ومات وهما افتكروه انا.. فكلموا نور اللي هو انا مسجله على انه اخويا .. وانا طبعاً لا معايا موبيل عشان اكلم حد ولا حتى فلوس عشان اتصل او اركب حاجه تروحنى بسرعة .. أنا آسف والله يا أحمد اننا جنبناك على ملا وشك .. ووالله انا معرفتش انك عرفت غير دلوقتى .. واحنا اتشغلنا بأهل الراجل اللي مات وزوجتى اللي بتولد فسينا خالص نكلمك

قال باهتمام : اه صحيح قامت بالسلامة؟؟

-اه الحمد لله جنبنا جنة

جذبه الى حضنه قائلاً : ألف مبروووك يا حازم ربنا يباركلك فيها يا ارب

ابتسم حازم فقال رامي : وانا ماليش حضن انا كمان دا انا اللي مجمع الحبايب ؟

قال أحمد : دا انت ليك علقه سخنة بس مش هنا بقى لما تيجي الدار .. ولا اقولك بلاش ! خلىنى اسيلك هنا واقول كنت بتقولى إيه فى الموبيل لما كلمتى؟؟

رد بلهفة : وعليكم السلام .. حرام عليك كل دا عشان أطمئن عليك دا أنا مخى كان هيطير !!

قالت بخفوت : سلامته

رفع حاجبه قائلاً : مالك؟؟ لسه تعبانة ؟

-لا يا أحمد كويسة .. هتيجي امته؟؟

-انا راجع ورامى اللى يباركله بيوصلنى لان المواصلات زحمة جداً .. قدامى بتاع ساعه لان الشوارع زحمة

قالت بوهن : ممكن يزيدوا على ساعه ؟

اعتدل فى جلسته وقال بجدية : بالله عليك طمئني انتى كويسة ؟

قال وهى ترفع حاجبها : ولو مش كويسة يعنى هتعرف تجيلي .. ماهى هى الساعه ..

قال بجدية : متخلنيش أنزل من العربية وأجيلك جرى إنتى عارفه إنى مجنون وأعملها

ابتسمت بخفوت وقالت : لا بس بدلع عليك يا أحمد خليك فى العربية محتاجين رجلك سليمة

ابتسم حين وجدها تمرح وجاء بتحدث ولكنها قالت : مش اتفقنا مفيش رعى فى التليفون؟؟ .. خلى بالك من نفسك

بقى .. سلام

-وعليكم السلام

ابتسمت للهاتف حين أغلقته وقالت : ماشي هى الساعه.. هتعرفى تعملى فيها ايبسيه بقى؟؟ .. أوبس !! هكلم هدير

الاول اتطمئن على حبيبة عشان نسيت اسأل احمد وبعدها هشوف هعمل إيه عشان أفجعه ..

عادت منار لبيتها برفقة ابنتها وأولاد هدير الاربعة لانها لن تبقى فى بيت هدير للابد .. ابتسم عمر حين رآها تدخل المنزل برفقة خمسة أطفال وأخذ يسمي الله عليهم وقال بمرح : ربنا يستر والعيال دى تفضل سليمة وانتي ماشاء الله ماشيه بيهم كلهم كدا

ابتسمت منار وقالت : عقبال ولادك ان شاء الله

لم ينتبه لعبارتها لأنه انشغل فى اللعب معهم .. أخذهم الى حجرة مرام وجلسوا بها يلعبهم جميعاً وقد لاحظ ان مرام قد تمسكت بمالك وصارت تجاوبه حين يلعب معها أو يكلمها .. وهو يمسك يدها .. ابتسم حين تذكر حبه لمنار منذ طفولتهما وتخيل أن هذا سيحدث بين ابنته ومالك فى أحد الأيام .. لكنه نفض تلك الفكرة عن رأسه وقطع عهداً على نفسه ألا يترك فراغ فى حياة ابنته ليملؤه شخصاً آخرأ .. جذبها وأجلسه على قدمه وأجلس على الناحية الأخرى هبة ابنة نور وقال ببسمة : ماتلعبوا مع بعض انتوا بنات تلعبوا مع بعض لعب حلوة صح؟؟

نظرت هبة لمرام التى لم تعرها انتباها بل ظلت تنظر لمالك وتتمنى أن يتكرها والدها لتلعب معه .. كما حلل عمر حالتها منذ البداية .. مبادئ توحده .. لعبة واحدة .. شخص واحد .. مكان واحد .. هكذا يلخصون حياتهم !! .. لقد أقسم على نفسه أنه لن يتكرها هكذا !

نادى مالك قائلاً : ماتيجي تلعب معاهم يامالك وتسيب أحمد وحازم يلعبوا سوا

سعد مالك بشدة ووقف بجوارهم وقال ببسمة : ماشي ياعمو

قال عمر ببسمة واسعه : هنلعب لعبة الاسماء .. يعنى دى اسمها إيه ياهبه ؟

قالت الطفلة : ميام

-ودى اسمها إيه يامالك ؟

-دى اسمها هبة الله نور

-دلوقتي سؤال مرام (أشار لنفسه قائلاً) : دا اسمه إيه ؟

نظرت له وقالت بهدوء : بابه

-اممم طيب ودى اسمها إيه ؟

نظرت لهبة قليلاً ثم نظرت لمالك الذى قال فى أذنها وكأن أحداً لم يره .. ((هبة)) قالت مرام : بيه

-اممم طيب ودا ؟؟

-مامك

-طيب مالك بيحب هبه ولا لأ ؟

-ايوا بحبها

-ويتلعب معاها؟

-ايوا

-طي ماتلعبوا انتوا الثلاثة ولا أقولكم تعالوا كلنا نلعب .. إيه رأيك يامرام ؟

هزت رأسها بالايجاب

كونوا الستة حلقة وأخذوا يغنون أناشيد الأطفال تلك .. وفتحنى ياوردة وقفلن ياوردة وهم يفتحون ويغلقون

دخلت منار الغرفة وهى تحمل طبقاً به عدد كبير من السندوتشات .. تركهم عمر وهرول نحوها وأمسك منها الطبق

ورفعه فى الأعلى وقال : لااا أنا هااكل لوحدى مش هحلى الأطفال دوول ياكلوا

صاح أحمد بحماس : إمسكوا الوحش الشرير ! إنه يأخذ طعامنا !!

رفع عمر حاجيه وقال لمنار بصوت خافت : دا تبع مين دا ؟؟

قالت بمرح : لا دا قناة اطفال شغال لوحده كدا

-ماعلينا - ثم رفع صوته- شيرير شيرير مختلفنااش .. مش هديكم حاجه !

حلقة الأطفال ونهضت معهم مرام وأخذوا يجذبونه من قدميه وكان يخفض الطبق قليلاً حتى يأخذ كل واحد منهم أحد السندوتشات .. كان تفاعل مرام قليلاً مقارنةً بهم .. لكن مقارنةً بما سبق فقد تحسنت كثيراً

لمحت منار في عيني عمر تلك السعادة التي غابت منذ وقت كثير .. هو دوماً يحمد الله ولكنها كانت ترى ألاماً كامناً على ابنته .. ولكن هذا الالم تحول اليوم لسعادة حين رأت حالة مرام تتحسن كثيراً .. ربما هي ليست مريضه كما اعتقدوا في البداية .. ربما هي وحيدة فقط ! ..

عاد أحمد لبيته فوجد أميرة ممددة على الأريكة .. اشتم تلك الرائحة التي بالمنزل وقال بيسمة : أنا حماتي بتحبنى بقى ..

اعتدلت حين سمعت صوته وابتسمت قائلةً : قولى يومك هيبقى طويل فأعلمك حاجه بتحبها

جلس الى جوارها قائلاً بمرح : ومقدرتيش غير انك تشوي بطاها إيه التعب دا كله !!

-العفو يا حبيبي انت تؤمر بس

ضحك من تجاهها لتعليقه وقال بمرح : انتى اللى حبيبى يا أميرة

قالت بعتاب : آه منا عارفه بأماراة انك سيبتنى وانا تعبانة عشان مرات صحبك بتولد

ابتسم فقال وهى تضيق عينيها : وانا ايش عرفنى مش جايز تكون مراتك الثانية هى اللى بتولد

ضحك قائلاً : اه صح وماله برضه مش عيب .. مراتى الثانية ميبين هو انتى اللى يتجوزك يعرف يشوف ستات تانى

رفعت حاجبها فقال بسرعة : عشان جميلة من جواااكى اووووى وطيبة وعندك حسن ظن بجوزك لاعلى درجة (قالها

بسخرية) .. وعلطول بتفاجئيني كدهون زى انهاردة يعنى

فتحت الباب فوجدته ذاهباً نحو المطبخ وعاد بعد لحظات وهو يحمل طبق به بطاطا .. دخل الغرفة وجلس على الفراش فصاحت : مش على السرير يا أحمد !

قال بمرح : ياستى مش هوقع حاجه ولو وقعت ابقى كليهم ياستى

-يااربي على الرجالة المهملة دى

قال محذرا : بس بدل ما أحكيلك حكاية الراجل الملبوس اللى

قاطعته : لالا لالا لالا انت تاكل براحتك خالص ولو عايزنى أفشرك كمان بس بلاش رعب يا أحمد أنا بخاف !!

قال بتهمك : منا بحبك تخافى عشان تحضنى دراعى وانتى نايمة

جلست الى جواره وتناولت واحدة وبدأت فى تقشيرها وهى تقول : عالم مستغلة

ابتسم وشرعا يأكلان وبعد عدة لحظات قال لها : مش هتقوليلي المفاجأة طيب؟؟

هزت رأسها نافية وقالت : هى دى المفاجأة

-تؤ تؤ تؤ كدا كذبة يا أميرة ..

-ليبيه ماهى البطاطا مفاجأة ؟

-اممم طايب هى المفاجأة الوحيدة؟؟

تتحنحت وأكملت طعامها فنظر لها قائلاً : على فكرة فارغ شريطين اختبار حمل فى الزبالة فى المطبخ .. دول إيه؟؟

قال بتغابى : ابيه؟؟

-يايت دا انا اللى قاريكى .. بقالنا كام سنة متجوزين يعنى وانا بفقسك لما بتخبي عليا حاجه؟؟

ضحكت قائلةً : مبعدهش ياخويا .. احنا متجوزين بقالنا كتير اووى صحيح .. سبعة مثلا ؟

-بدأنا النصب بقى .. هما تلاته بس يااميرة

ضحكت قائلةً : لا يا عم هما 16 .. انا فاكرة كويس اهوو

ضحك قائلاً : انا بقيت عجوووز يا أميرة

قبلت يده قائلةً : ربنا يديك الصحة يا أحمد

سحب يده قائلاً بمرح : بالبطاطا !!

ضحكت فقال بحنان : طيب ياستى عشان مسبقش الاحداث .. نتيجتهم إيه ؟

-الحمد لله ايجابي

-طيب قومي غيري نزل نتأكد من المعمل .. عان منعملش زي ما عملنا من كام سنة وطلع الشريط بايظ

ضحكت قائلةً : لا يا عم منا سبقتك وجراتنا اخدت عينة من دمي فى ابرة وهى رايحة المعمل وكلمتني قبل ماتوصل

بدقايق وقالتي الحمد لله انى حامل

قفز من جلسته وهوى ساجداً لله وهى كذلك من شدة الفرح .. قام من السجدة واحضنتها بحب وشوق وحنين ! ..

مشاعره مختلطة بين الغبطة والحب .. قبل وجنتها فدفعته قائلةً بمرح : بالبطاطا يا أحمد !

جذبها اليه مجدداً وهو يقول : ان شاء الله يكون بطيبيخ حتى !! اللهم لك الحمد حمداً كثيراً طيباً مباركاً فيه

دخل رامى بيته واتجه نحو غرفة مؤمن دون أن يصدر صوتاً كى لا يعلما بوصوله .. هو يعلم أنه يجلس الان برفقة

تقى فى غرفتها .. أمسك الشماعة التى يعلقون عليها الملابس ووضعها فى منتصف الغرفة وأخرج ملاتين وعلقهما

فيها واسدلهما من الجوانب كأنها خيمه .. وأحضر بعض الوسادات ومد الملائة ووضع الوساده عند الطرف كي لا ينسحب .. أغلق النور واتجه نحو غرفته وطرق الباب فجرى نحوه مؤمن بسعادة قائلاً بفرحة : بابا جيبني !

حملة والده واحتضنه بشدة ثم اتجه نحو تقى وقبل يدها بخفة وقال بمرح : اوعوا تكونوا خلصتم الفشار ؟

قال : لا يا بابا مخلصنا هووش ومستنينكم أهوو عشان نتفرج سوا !

أغلق شاشة التلفاز وقال : لا مفيش فيلم **up** انهاردة .. احنا عندنا حاجه أهم منه

نظرا له بتعجب فقال : هاتى ياماما الفشار وهيا بنا نذهب للغرفة الأخرى

ابتسمت وذهبوا سوياً إليها غطى عيون مؤمن بيديه وقال : نورى النور ياماما

أضاءت الغرفة وازاح يديه عن عيني مؤمن الذى صاح بفرح : الله !! ..

هرول نحو الخيمة التى تتوسط الغرفة فقال له رامى ادخل استنى جوا انت وماما واوعوا تنسوا الفشار

دخلا الخيمة فأغلق نور الغرفة ولحق بهما ويده كشاف .. أغلق الخيمة وأنار الكشاف على وجهه وقال بمرح :
بفكركم بميين؟؟

قال مؤمن بفرحة : ب((ايلى))

-شاطر يامؤمن .. طب عارف أنا هكلمك عن اييه انهاردة؟؟

قال بفرحة : عن شلال الفردوووس !

قال بحماس طفولى : لا أنا هكلمكم عن الفردوووس بس .. أحلى حاجه وأحلى مكان يامؤمن .. وعارف جبتلك إيه
كمان؟؟

نظر له باهتمام فأخرج من خلف ظهره دفتر ووضع أمامه وقال بصوت طفولى : كتاب مغامراتنا فى الفردوس

صفق بيده وقال : واحنا هنطير بالبيت برضه عشان نروح الفردوس يا بابا؟؟

-لا إحنا هنروحها بطريقة أسهل بكتيبير .. انت عارف مين اللي بيدخلنا الفردوس دي؟؟

قال بلهفة : ميين؟؟

-ربنا يامؤمن

قالت تقى : هو ربنا اللي هو بيحبنا ويعملنا كل حاجة حلوة ويبعد عنا كل حاجة وحشة؟؟

-ايون ياماما هو دا ..

-بابا احنا هنلعب فى الفردوس؟؟

-ايوا يامؤمن هنلعب فيها علطووول وناكل ايس كريم علطول ومش هنعفظ أ ب ج ..

قال : اسمها أ ب ت يابابا

ضحك والدها وقال : مش هنعفظها هناك يامؤمن .. وهنعمل كل حاجة حلوة مش عارفين نعملها هنا

قال بلهفة : يعنى هطير زي سوبر مان؟

-ايوا يامؤمن هتعمل كل اللي انت عايزه هنااااا

-طيب انا عايز أعمل حاجات كتير أووووى .. وخايف انسى لما اروح هناك

-ماهو عشان كدا احنا هننقعد نفكر فى المغامرة ونكتبها سوا فى دفتر مغامرات مؤمن فى الفردوس

-بس انا مش بعرف أكتب حاجه غير أ ب ت .. (صمت قليلاً ثم أدرف) : هخلى ماما تعلمنى عشان أكتب

مغامراتى .. ماشي ياماما؟؟

هزت رأسها بسعادة وقالت : ماشي يامؤمن .. هتحكينا بقى إيه انهاردة يابابا؟

قال بلهجة تشويقية : هنحكي عن القصر بتاعنا هناك والجنية بتاعتنا عاملة ازاي هناااا والملاهي بتاعتنا لوحدا

هناك

صاح بفرحة : الملاهى بتاعتنا لوحدنا ياابا !!

-ايوا يامؤمن كل حاجه عايزها هتجيلك فى الفردوس

-الله .. الفردوس دي حلوة أووى

-استنى بقى يا عم انت اما اقولك هنعمل إيه هناك بقى وهنلعب ازاى فى الملاهى واحنا بناكل الفشار .. وكل ماتحب تروح الفردوس او تفتكر حاجه قولى واحنا هنعمل الخيمة السرية بتاعتنا وهنسجلها فى دفترنا .. ماشي يامؤمن؟؟

أودعت ابنتها الفراش بعد يوم طويل من اللعب مع ابناء نور .. جلست الى جوار عمر الشارد وقالت بيسمة : يعنى افكر معاك؟

نظر لها بيسمة وقال : مش بفكر فى حاجه بس بفكر انهارة كان قد إيه يوم جميل أووى بجد الاولاد دول نعمة من ربنا

قالت بيسمة : عندك حق والله .. دا انا نفسي نشحتهم كل يوم من هدير

ابتسم وقال : مش هينفع .. بس ممكن تبقى تجيبهم عندنا يوم فى الاسبوع حتى عشان بجد مرام اثبتلى انهارة انها مش عيانة ولا حاجه وانها بس وحيدة

رفعت حاجبيها ونظرت فى السقف قائله : على فكرة يا عمر انا بسحب كلامى اللي فات

نظر لها باهتمام فقالت : الاولاد دول نعمة من عند ربنا .. ساعات بيبقى فيهم اختبار من عنده .. بس الاختبار مينفعش يخلينى اقوول مش هخلف تانى !!

اتسعت ابتسامته فأردفت بخجل : حقك عليا يا عمر انا اسفه بجد على الفترة اللي فاتت دى لما كنت بقولك انى مش هخلف تانى وانت بتستحملنى .. بجد انت جدع وكل مدى بحس انى اقل بكتيرررر انى استاهل واحد زيك

ابتسم وقال بمرح : لا منا كنت بعديهاك بس عشان مرام صغيرة .. إنما أنا أصلاً شورعجي ودكتور بالبلطجة

ضحكت رغباً عنها من أسلوبه وقالت : أيوا طبعاً بقى دكتور بالبلطجة وطول النهار بيجيلك أطفال ومعاهم أمهاتهم
بقى ..

-انا اه بتجيلي امهات بس المعظم بيبقى معاهم ابهات كمان متنسش دوول .. وبعدين لو اتعرض عليا كل امهات
الدنيا انا مش شايف غير أم واحدة بس !

نظر له بدلال فأردفت قائلاً بمرح : الست دى أمى شقيانة طول عمرها

وكزته بكوعها قائلةً : طيب ماشي يا عمر !! ..

أمسكها قائلاً : يابت انى علطول بتضربي كدا ماتسمعى للاخر .. اه انا مش شايف ام غير أمى فعلاً بس انتى مش
شايفك ام

-اه طبعاً طبعاً منا عارفه

-انتى أميرة قلبي يامنار مش أم بنتى بس !

ابتسمت بخجل فأردف : يعنى ضحكى دلوقتى من شويه كنتى بتضربي

وكزته مجدداً قائلةً : رجع المحطة اللي فاتت يا عم انت بتقلب ليه

ابتسم من اسلوبها وقال بحنان : بحبك يامنار

قال بدلال : وانا بحبك

قال بتهكم : من امته ؟؟

-من ساعه ما اتغيرت .. من ساعتها وانا بحبك وبكتبك من غير ما اعرف مين هيكون شريكى فى طريقى فى الدنيا
دى بحبك لمجرد انى عارفه انك اختيار ربنا ليا وبسسسس .. بحبك عشان ربنا قال الطيبون للطيبات .. يعنى اى
حاجه هخاف منها عمرى ما هلاقها فيك طول منا بتقى ربنا فى نفسى .. يعنى من الاخر كدا انت حد يعرف كل

حاجه بتزعلنى وعمرك ماعملتها ! .. انت حد حاسس بيا علطول ومقدرنى علطول وانا بحبه وبحس ديما معااه
بالامان ..

ابتسمت عيونه لها وباحت لها بما يحمله قلبه دون أن يحرك شفثيه : وانتي مراتى اللى استحملت فيا عيويي .. انتى
شريكة طريقي اللى ضحت كتير علشانى .. انتى اللى بتحسى بيا فى وسط الالم .. وبتفضلي راحتى علي اى حاجه
فى حياتك .. انتى قلبي وجزء منى .. انتى بنتى وحب عمرى .. باختصار يامنار أنا إنتِ

نظرت له قائلةً : سرحان فى إيه ؟

قال بحب : أنا إنتِ

رفعت حاجبها وقالت بتعجب : يعنى إيه ؟

لف كتفيها بذراعه قائلاً : دي رواية كدا قريتها زمان .. حسيت إنها شجعتنى أتغير .. شجعتنى أخلى هدفي الجنة ..
واختار شريكى للهدف بكل دقة وحب وثقة !

-ثقة فى شريكك؟؟

-لأ !! ثقة فى الله انه هيرزقنى الخير ليا حتى لو انا مش شايفه !

-اممم طيب ماتخلينى أقرأها أنا كمان؟؟

-لا .. احنا دلوقتى عايشينها يامنار .. لو قريتها مش هتوصلك المشاعر اللى فيها .. لان الكاتب مهما حاول مش
هيقدر يوصف حياتنا بجمالها ومشاعرنا ناحية بعض

-طيب مافيش أنا إنتِ يعنى عشان أقولهالك

جذبها نحو قائلاً : هو فيه طبعاً بس ممكن تتلخص فى حلة محشى كدا من بتوع حماتى

ضربته فى صدره قائلةً : على فكرة إنتِ غلس !!

ضحك قائلاً : هو الحب إيه غير ناس بتحب ربنا أووى ويحبوا بعض أووى .. هدفهم واحد وهو رضى ربنا ..
ويغلسوا على بعض !! .. هو دا الحب يا منار

ارتضى على فراشه بانهاك فقالت له بحب : ياااه يا نور .. انت وحشتنى أووى فى الشوية اللي كنت فيهم فى
المستشفى دول

اعتدل على فراشه وقال بحب : وانتى متتخيليش وحشتينى اد إيه .. كان نفسى اشوفك وانتى بتكلمينى وانا منهار
.. بيتهيألى مكنتيش هتعرفى تثبتينى كدا ؟

قالت ببسمة : التثبيت من عند ربنا .. انا بس فكرتك باللى انت زرعته فى

ابتسم لها فأردفت : لو كنت قدامى ساعتها كنت هحضنك وأفضل ساكتة .. انت عارف ان الحضن بالنسبالي هو
الحل لأى مشكلة نفسية

-عندك حق فعلاً يا هدير .. الحضن بينسى الواحد همه وتعبه وخاصةً لما يبقى من حد بيحبه أووى .. زيك كدا

جلست الى جواره قائلةً : ربنا يكرمك يا نور ويحبك .. ويباركلى فيك وفى اولادك ..

-اللهم آمين يا هدير ..

-كنت عايزة أقولك حاجه كدهون كدهون يعنى

-قولى ياستى وكلى أذان صاغية

-مش احنا من زمانا كدا لما لغينا الخطوبة بدأنا نحوش عشان نطلع عمرة؟؟

هز رأسه فأردفت : بس بعدها جت لنا مصاريف الولاد ماشاء الله مكناش عاملين حسابنا انهم هيبقوا اربعة وماشاء

الله جم ورا بعض فمعرفةناش نزود التحويش دا حاجه من سنة ونص تقريبا ؟

هز رأسه وهو ينظر لها باهتمام فقالت : بصراحة يعنى أنا كنت بشيل جزء من مرتبي ومن مصروف البيت كل شهر وبحط على التحويش دا .. والفلوس كملت بس ان واحد بس هو اللي يطلع مش احنا الاتنين .. وانا طبعا مش هينفع اطلع من غيرك بس العكس هينفع و...

قاطعها قائلاً : انسي ياهدير انى اطلع من غيرك

-بس يانور أنا نفسي حد فينا يحقق حلمنا .. انا وانت واحد مفرقتش

قال بجدية : لا طبعاً فرقت .. يعنى انتى لو حبيتى تطلعى تانى لازم انا اكون معاكى فهنرجع نحوش من الصفر تانى .. بجد انا كنت بفتكره كل فترة وبشيل حاجه بسيطة من المرتب .. اينعم الفلوس قليلة بس هنكمل عليها لحد ما نضب نفسنا ونطلع احنا الاتنين سوا .. مش هروح بيت ربنا من غيرك ياهدير ان شاء الله لو ربنا أحياني

ابتسمت فقال لها : عندى فكرة حلوة .. كنت بعملها زمان وافتكرتها دلوقتى

نظرت له باهتمام فأدرف : مش الرسول عليه الصلاة يقول مانقص مال من صدقة ؟؟ .. احنا نطلع صدقة من الفلوس دى وربنا هيبارك فيها باذنه .. حتى الصدقة دى هتكون للراجل اللي مات انهاردة وكنا فاكربنه حازم

ابتسمت بشدة من حبه لغيره وتفكيره الدائم بهم وقالت بسعادة : أنا موافقة يانور وأواعدك مش هسرف فى أى حاجه من هنا ورايح عشان ربنا يقدرنا ونزور الحرم سوا

-شوفت يايوسف قعدت أتحايل عليه يسميها هدى وموافقش وسماها جنة برضه عااا !

قال وهو يضحك : هى وصلت لعااا؟؟؟؟... كل واحد حر فى بنته ياهدى حتى لو سماها بطيخة هو حر

-لا مش حر ! فيبين صلة الرحم .. لو سماها هدى كل ماهيندها هيفتكرنى ويتصل يسأل عليا ويصل رحمه .. مش فاهمنى انتوا .. كلو عشان مصلحته

-متجوز شمعته تحترق من أجل الاخرين

ضحكت بخفوت فقال بها : طيب ياست شمعة أنا خلصت الكلية بالسلامة الحمد لله .. انتى هتخلصى امته ؟

-هو كل ماتكلمنى هنقعد نقعدهم يايوسف؟؟..هما تلت سنين

-تلت ايبيه !! لا هما اتنين بس !

-لا يايوسف وربنا تلاته ..

-ااامممم..طيب ياهدى ان شاء الله الفرحة هيبقى فى نص السنة .. جيتى اهلا وسهلاً مجيتيش هنجيب عروسة

قطن ونعمل الفرحة برضه.. هتيجي ولا نشجع قطن بلدنا ؟

ابتسمت خجل قائلةً : مانت عارف ان الاعتراض من عند حازم

-ياستى أخوكى وأنا هقنعه باذن الله .. وافقى انتى بس !

-هتقنعه ازاى؟؟

-ياستى مالكيش دعوة انتى وافقى بس؟؟

-اعمل استخارة طاب الاول ولااييه رأي سيادتك؟؟

ضحك قائلاً : ماشي يومين وهكلمك أشوف رأيك قبل ما أقول لآخوكى !

قالت بخجل : ماشي

قال بتهكم : كنتى غسل انهاردة وانتى مغمن عليكى

-مغمن عليا !! .. أول وآخر مرة أعملها بعد مغمن دى

-بس كنتى غسل

-الله يكرمك

-بقولك عسل

-الله يكـرمك

-مفيش حاجة هتقولها ليوسف؟؟ .. يعني كنت جنتل؟؟ ..كنت رجولة ياكابتن؟؟ ..عجبتك؟؟ ..أى حاجة طالاه؟؟

ضحكت قائلةً : مانت لسه قايل كان مغمن عليا يعني مشوفتش حاجة غير بعد القلم اللي ادتهولى

-بس صحيتك انا فى الجزء المهم .. دا انا خدتك حضن مطارات ياشيخة !

ابتسمت بخجل فأردف : ولا كان مغمن عليكى برضه؟؟ .. لو عايزة اعادة انا معنديش مشاكل والله انتى عارفه انى

خدووم جداً

-بس يايوسف

-بس بس هو انا قولت حاجة منا ساكت اهوو

-طيب ياعم الحج انا عايزة انام .

-ماشي بس اعملى حسابك على رنتى على معاد الفجر ان شاء الله

-اوكيه اوكيه .. تصبح على جنة يايوسفى

ضحك قائلاً : يااارب جمعنا فيها انا وانتى يافرولتى

*** تمت بحمد الله ***

كل نهاية بتبقى بداية لحاجة جديدة :

هي الرواية خلصت .. بس المفروض تكون بدآية لنا كلنا وأنا أولكم .. محتاجين نفكر بجد احنا ممكن نعلم إيه
عشان نوصل للجنة

وهنوصلها ان شاء الله ^_^ ابطال الرواية مش ملايكة واكبيد كانوا بيغلطوا بس خوفهم من ربنا وحبهم ليه كان
ديما بي فوقهم

كاتبة الرواية مش ملاك ولا اللي بيقرأوا .. بس احنا فى رحلة سعي نحو الكمال البشري ^_^
ربنا يعيننا ويقدرنا ويقدركم ..

الخطوة الاولى معظمنا مش بيبقى عارفها ودا للأسف اللي بيعطلوا .. بصراحة أول خطوة هي قعدة صفي مع نفسك
.. وورقة وقلم وبالخط العريض اكتب " ايه اللي مزعل ربنا مني؟؟ "

اكتب كل حاجه غلط بتعملها حتى لو فى نظرك صغيرة .. وابدأ بأسهل حاجه .. حتى لو مش هتخط صور بنات ع
الفيس زى مارقية قالت فى رواية فى الحلال .. واتدرج فى الحاجات ^_^ فى ناس بالنسبائها تلبس طرحة طويلة
أسهل من الانتظام على الصلاة .. فهتلاقيها لبست طرحة طويلة ومش مظبطة الصلاة .. اوووووووعى تفتكري نفسك
منافقة وتدي فرصة للشيطان يرجعك لورا !! .. متديلهوش فرصة واقري كتيبير عن الصلاة واسمعي عنها .. كفاية
كتاب أول مرة أصلي بصراحة ملهوش حل ^_^

وناس تانية بتشتغل بضميبيير وبتذاكر بجد بس مش واخدة بالها ان دا يقرب لربنا وفاكرة نفسها بعيدة لانها مش
لايسة خمار او ملتحي /: ! حضرتك العمل واتقانه من صميم الدين فاعى تفتكر نفسك وحش ..

ثق ان فيك خير بس برضه فى ذنوب لازم تتعدل عشان تبقى بترضي ربنا لاقصى درجة تقدر توصلها

احنا بشر ومش ملايكة وبنقع كثير وبنعثر فى الطريق .. بس المهم اننا نقوم تانى ونكمل طريقنا .. طريقنا لربنا >3

خلي دعوتك فى الدنيا اللهم اهدني الصراط المستقيم فى الدنيا والآخرة واللهم أعني على نفسي وعلى شيطاني

وادعي لنفسك بالخير علطوووول وحبها وأكرمها ، ربنا أكرمك ليه انت بقى تهين نفسك ؟ .. متهنش نفسك وترضى
انك تكون أى حاجة !! .. لازم تكون حاجة بس مش أى حاجة ^_^ !

حد فاهم حاجه ؟؟ .. اقروها تانى وهتفهموها

حاجه اخيره .. الصعبة الصالحة دى موجودة فعلاً بس مش هتجيلك وانت واقف محللك سر ، امشي فى طريق الله
وهتلاقيهم عليه ^_^

**** تمت ****